

一  
共五冊

人物傳  
官績

武進陽湖縣志



收發程耀庚傲

姜啟明鑾

人物

官績

漢

彭

循

三國

孫無終

宋

蕭承之

齊

蕭赤斧

子穎曹

梁

蕭景先

李安民

蕭綯

蕭敷

蕭景

蕭秀

子推

蕭愔

蕭恢

子修

蕭績

蕭業

弟象



惠休

惠朗





劉敬

錢本中一作忠

張志道

毛節

承谷容

胡澹子長寧

唐復

段民子實

蔣賢

吳潤  
昂子圻 圻弟坊

潘諒

白昂子圻 圻弟坊

郭觀

徐雍

孫樞

白瑜

趙琬子仲壽

吳昌子淵

王謙父彥昭

王興子沂 兄子澄

趙敬

劉觀

徐問

李濬

顧昇

唐鏞

毛理

薛為學弟承學

蔣容子益

周詹

王珀

胡華

白峻

白珍

唐貴子瑤

徐紘從弟纁

莊禕

黃俊

惲魏

王奎

丁致祥

龔大有

蔣亨

吳闇

鄒輓

蔣洽

吳仲

蔣同仁



梁幹

孫鑾

龔大綏

李鼎弟鼎

周金子仕

張瑋

沈琮

董紹子士宏

周整

邱緯

萬鵬

王堦

曹卿

惲奎

陳瓊

呂朋

吳宗達

陸愷

毛玉

常守文

金九成弟九臯

黃憲卿

孫濂

徐常吉孫瑋

蔣如京

林萬潮

陸南陽

何鯉

吳璘

史文龍

邵起潛

唐大卿

錢一本子春

沈應奎

金顯名

王就學

吳中行

王堯卿

褚國祥

吳希曾

吳宗徽

湯恩嘉

丁任

孫慎行

蔡模

唐音子一磨

吳玄

劉純仁子綿祚

父性  
子思  
簡思  
子亮  
柔思



鄭振先子鄂

吳襄

張師繹

龔三益子九疇

何厚基

陸卿榮

蔣紹燿

周士龍

董承詔

陸大受

惲厥初

陸完學

許鼎臣

吳暘

馮夢龍子祖望

董應揚

吳奕

莊起元

莊廷臣

陳睿謨子咨稷

楊惟寅

龔道洽

鄒忠允

瞿士達子廷詣

鄒嘉生

須用綸

王之柱

周詩雅

白貽清

陸卿任

張三光

唐鏞

戴吉人

蔣之俊

章世明

吳南灝

周士登

陸卿正

楊應育

鈕國藩

許應弦

陳國器

錢國瑞

劉呈瑞

卜象乾

薛宗

曹天錫

俞泰交



陳組綬子震生

陸自巖弟自嶽

陳震祥

清 劉光斗子履旋

莊應詔

須北社

劉憲章

趙繼鼎

趙德榮

莊應會

呂宮

馮達道

人物

官績

漢


彭循字子陽建國二年海賊丁儀等萬人據吳太守秋君聞循勇謀令循與儀相見陳說利害應時散去民歌之曰時歲倉卒賊縱橫大戰強弩不可當賴遇賢令彭子陽

晉

孫無終太元初苻堅方盛謝元鎮海陵募勁勇為前鋒無終與劉牟之何謙並在選中百戰百勝號北府兵敵人畏之

宋

蕭承之字嗣伯少有大志才力過人仕宋為漢中太守以平梁州





功加龍驤將軍後為南泰山太守封五等男元嘉末卒梁人思之廟祀於峨公山

蕭思話孝懿皇后弟子十許歲時好騎屋棟打細腰鼓侵暴鄰曲莫不患毒之折節數年遂有令譽元嘉中為青州刺史坐棄鎮繫尚方氏帥楊難當寇漢中乃自徒中起思話為梁南秦二州刺史悉收復漢中侵地文帝令思話上平定漢中本末下之史官嘗從文帝登鍾山石上撫琴帝嘉賞有松石間意元兗劭弒立以為徐兗二州刺史即起義以應孝武孝武即位為中書令丹陽尹後拜郢州刺史進都督卒謚曰穆思話外戚令望早見任待歷十二州仗節者九愛才好士人多歸之又工隸書善彈琴騎射子惠開少有父風涉獵書史仕齊終益州刺史惠基語在藝術惠休惠朗惠倩俱以顯仕聞於時惠禧子介惠基子洽語皆在文學

齊

蕭赤斧高帝從祖弟初為錢塘令後為雍州刺史治政為百姓所安勤於奉公不營產利封南豐縣伯累遷給事中太子詹事卒謚曰懿子穎胄字雲長宏厚有父風而好文弟穎基乃好武高帝曰兄文弟武宗室便不乏才出為新安太守吏人懷之明帝意在儉約欲壞元日大官上壽銀酒鎗穎胄止之帝不悅後與曲宴銀器滿席穎胄曰陛下前欲壞酒鎗恐宜移此帝甚慙時魏人揚言飲馬長江人心震恐穎胄如不聞魏軍尋退後蕭瑱等侵荊州穎胄遣兵拒之自以職上將不能制禦憂憤發疾卒

蕭嶷字宣儼高帝第二子寬仁宏雅仕宋為尚書左戶郎錢塘令後為武陵內史時荊州刺史沈攸之禁斷五溪魚鹽羣蠻怨怒酉溪蠻王田頭擬殺攸之使者其弟婁侯又篡殺頭擬以反抄柿至



都城下寔遣隊主張英兒擊破之誅婁侯立頭擬子都領其衆羣  
蠻乃安攸之誅寔以侍中都督江州徙荊州初攸之欲聚衆開人  
相告士庶坐執役者衆寔至一日遣三千餘人見四五歲刑以下  
不連臺者皆原遣百姓甚悅以市稅重多所寬假建元元年高帝  
即位赦詔未至寔先下令蠲部內昇明二年以前逋負遷揚州未  
幾復為南蠻校尉都督荆湘二州開館立學表置生三十人及儒  
林參軍等官以勸學行釋菜禮義陽劫帥張羣為賊積年武陵天  
門諸郡被其殘破自攸之以來不能討寔遣中兵參軍虞欣祖為  
義陽太守誘斬羣餘黨悉平二年入為司空中書監寔再督荊州  
將還都令不得齎府州物出城發臨津男女觀送數千人皆垂泣  
性孝友高帝崩哭泣過度眼耳皆出血事武帝恭悌盡禮卒謚文  
獻

蕭景先高帝從子少孤有至性帝鎮淮陰委以腹心武帝少年嘗  
與景先共車行泥路至領軍府西門車轅折俱狼狽景先日兩人  
脫作領軍毋忘今日艱辛武帝踐阼詔以景先為領軍將軍拜還  
未至府詔問領軍今日故當無折轅事邪景先事上盡心故恩寵  
特密沈攸之舉兵時景先隨武帝鎮江州湓城景先乘城忽聞整  
中有小兒呼蕭丹陽不絕問之應云賊當尋平已而果傳攸之首  
至永明中帝以景先尹丹陽符璽中語後假節司州諸軍事卒謚  
曰忠

李安民蘭陵承人父欽之薛令安民少有大志隨父在縣宋元嘉  
中沒於魏安民率部曲自拔南歸稍遷武衛將軍討晉安王子勳  
所向克捷齊高帝在淮陰留安民行南徐州事城局參軍王回素  
為安民所親盜絹二疋安民流涕斬之厚為殮祭軍府懾服高帝



即位為中領軍封康樂侯時王敬則以勲臣見親至國家密事獨與安民論議謂曰署事有卿名我便不復細覽也尋為領軍將軍御魏軍於壽春擒斬亡命賊王元初於六合山累官丹陽尹遷尚書左僕射後為吳興太守於家載米往郡人服其清

蕭紉字景業嘗守吳郡竟陵王子良稱之曰數十年來姑蘇未有此政累遷雍州刺史加都督紉留心詞訟人人呼至案前顧問勉諭無不厭服百姓畏愛及卒喪還百姓緣沔水悲泣設祭立祠峴山贈司空謚曰昭

蕭敷字仲達梁武帝次兄少有學業仕齊為隨郡內史招懷遠近士庶安之前後之政莫及明帝歎曰蕭隨都飲酒清言而路不拾遺行何風化以至此徵為廬陵王諮議參軍

梁

蕭景字子昭武帝從父弟好學才辯有識斷仕齊為永甯令政為百城最武帝起兵以景行南兖州事時沔北儉楚各據塢壁景示以威信渠帥相率面縛請罪旬日境內皆平帝踐阼封吳平縣侯南兖州刺史明解吏職下不敢欺年荒計口振恤又為饘粥於路以食之死者給棺人甚賴焉歷雍揚郢三州所至有能名卒贈開府儀同三司謚曰忠

蕭秀字彥達武帝弟為江州刺史將發主者求堅船以為齋舫秀曰吾豈愛財而不愛士乃教以堅者給參佐下者載齋物既而遭風齋舫遂破至州聞前刺史取徵士陶潛曾孫為里司歎曰陶潛之德豈可不及後即辟為西曹尋遷荊州刺史立學校招隱逸振救災傷都督郢州地居衝要賦斂殷煩秀務存省約百姓晏然性仁恕喜愠不形於色於武帝布衣昆弟及為君臣小心畏敬過於



疎賤遷雍州刺史卒四州人裂裳為白帽哀哭迎送之當世高才游其門者王僧孺陸倕劉孝綽裴子野各製碑文咸稱實錄子推侯景之亂守東府城陷握節死之橋語具文學

蕭憺字僧達秀同母弟皆以孝稱都督荊州時軍旅之後公私匱乏憺勵精為政闢屯田減力役存問兵喪之家供其窮困人甚安之大旱禱雨輒應開導物情辭訟決於俄頃無留事滯獄江溢堤壞躬率將吏築之雨甚水漲或請避之憺曰王尊尚欲身塞河堤我獨何心自逸刑白馬祭江身為百姓請命言終水退堤立南岸數百家登屋緣木憺募人救之一口萬錢人賴以免及卒荊州人皆巷哭

蕭恢字宏達武帝第七歲通孝經論語天監初為郢州刺史時疾疫死者甚衆恢下車命理其無主者又遣四使巡行州部境內大

治有以筒中布進恢命焚之遷益州刺史市馬千匹以代私馬百姓賴焉性輕恕通財好施常以臨民清約自勉卒謚忠烈有男女百人封侯者三十九子修字世和性至孝年十二母徐氏歿於荊州返葬中江遇風修抱柩長號血淚俱下終得無他葬訖廬墓先時山多猛獸至是絕迹為衛尉卿夜必再巡惟恐上聞或問故曰職司之常何足自顯出為秦梁二州刺史在漢中七年移風改俗人號慈父遇蝗躬至田所自責忽有飛鳥蔽日而至食蝗遂盡逮梁為侯景所敗力屈降魏宇文泰禮之甚厚遣還江陵元帝慮其為變修入覲望閣悲不自勝元帝亦慟舉朝皆泣尋拜湘州刺史長沙頻遇兵荒人戶凋弊修勸穡務卒未期流人咸歸修從子嗣語具忠節

蕭績字世謹武帝第四子天監十七年為都督南兖州刺史在州

以善政稱有詔徵還百姓曹樂等三百七十人詣闕上表稱績尤異十五條乞留為州任優詔許之普通四年徵為侍中雲麾將軍蕭業字靜曠象字世翼皆長沙王懿子武帝從子也天監初業為南兗州刺史運私邸米餼人作覺為城徙湘州尤著善政象嗣桂陽王融為丹陽尹舉無失德朝廷稱之兄弟所領郡邑皆有虎患業象到官後咸相枕而死人謂德感神明云

陳

蕭摩訶字元允果毅有勇力侯景亂摩訶年十三單騎出戰所向披靡既而歸侯安都齊兵入寇安都日卿驍勇有名千聞不如一見摩訶曰今日令公見之及戰安都墮馬被圍摩訶單騎大呼直衝齊軍安都以免從吳明徹北伐時齊遣大將率眾十萬來援有蒼頭犀角大力之號其鋒甚銳又有西域胡善射矢無虛發明徹

曰若殪此胡則彼軍奪氣矣摩訶曰願識其狀明徹令降人具道之乃自酌酒飲摩訶摩訶飲訖馳馬衝齊軍胡挺身出陣彎弓欲發摩訶擲銳鏡中胡應手而仆大力十餘人出戰又斬之齊師退走進爵廉平侯復以平始興王叔陵功封綏建郡公叔陵蓄積累萬悉以賜之後主入隋摩訶請曰一見舊主死無所恨賀若弼哀而許之入見俯伏號泣仍於舊厨取食進之辭訣而出守衛者莫能仰視終為隋所害摩訶訥於言語恂恂長者至臨戎對寇志氣奮發所向無前子世廉警俊勇敢性至孝及摩訶凶終追慕彌切父時賓佐脫有所云哀不自勝終身不執刀斧時人嘉焉

隋

陳杲仁字世威幼授孝經尚書一覽成誦年十八舉秀才仕陳為監察御史未幾去官歸養母死嘗刺血書孝經以志哀痛繼母病



思牛炙適禁屠刳股作羹以進母病良已郡上其事詔旌其門大業中奉詔平長白山及江甯授銀青光祿大夫義甯中與沈法興等翦東陽賊二十萬拜大司徒時稱其忠孝文武信義謀辨為八絕煬帝被殺沈法興入毘陵陽為起義陰實欲據之懼呆仁不附已遂遇害其後屢見神於郡郡人即其兵仗庫立廟祀之

唐

蕭瑀字時文後梁明帝子愛經術善屬文性鯁急鄙遠浮華在隋由內史侍郎出為河池郡守擊降鈔賊萬人又敗薛舉眾數萬唐高祖入京師招之挈郡自歸拜民部尚書武德元年遷內史令委以樞筦百務悉關決嘗引升御榻呼曰蕭郎瑀論議明辨而不能容人短自力孜孜抑過繩違無所憚上便宜每見納用秦王為雍州牧以瑀為州都督王世充平進尚書右僕射久之遷左僕射貞

觀初以切詆房元齡杜如晦廢俄拜特進太子少師復為左僕射坐與陳叔達忿爭御前免復起累遷御史大夫參預朝政會元齡等小過瑀即痛劾不報由是罷久之復用太宗嘗曰武德季太上皇有廢立議顧朕挾不賞之功昆弟弗見容瑀於爾時不可以利怵死懼社稷臣也因賜詩曰疾風知勁草板蕩識忠臣旋拜太子太保同中書門下三品卒年七十四謚曰肅從子鈞有才譽永徽中累遷諫議大夫左武侯屬盧文操跳堞盜庫財高宗以其職主幹當自盜罪死鈞曰囚罪誠死然恐天下聞謂陛下重貨輕法任喜怒殺人帝曰真諫議也詔原死太常工為宮人通訊遺詔殺之且附律鈞言禁當有漸雖附律工不應死帝曰如姬竊符朕以為戒今不濫工死然喜得忠言即宥工徙遠裔終太子率更令子瓘為渝州長史居母喪以毀卒瓘子嵩貌偉秀美須髯夏榮者善相

謂曰蕭郎位高年艾舉門蕃熾人未之許神龍元年始調洛州參軍事桓彥範為刺史待以異禮姚崇亦稱其遠到歷宋州刺史遷尚書左丞十四年以兵部尚書領朔方節度使會吐蕃回紇兵變徙嵩河西判涼州事完樹陣塢懷保邊人大破吐蕃祁連城下露布至授嵩同中書門下三品十七年進中書令仍遙領河西節度使在公慎密人莫見其際嘗薦韓休入相及同位峭正不相假至校曲直帝前嵩乞骸骨帝曰朕未厭卿何庸去嵩曰幸陛下未厭得以乞身如厭臣首領且不保安得自遂帝為改容乃授尚書右丞相與休俱罷子華謹重方雅有家法上元初以中書侍郎同中書門下平章事李輔國用事求宰相華不許輔國怨會肅宗大漸矯詔罷為禮部尚書二子恒悟恒子俛字思謙貞元中登進士第又以賢良方正對策異等拜右拾遺元和六年召為翰林學士進

知制誥穆宗立授中書侍郎同中書門下平章事進門下侍郎嘗詔譏王承宗先銘俛奏承宗比不臣迷而後復臣不忍稱道其先又辭成當有謝拒之則非朝廷撫納意受之臣誼不當取帝善而止性簡潔疾邪太甚孤特一概故輕去位無所藉文宗以俛先帝賢宰相筋力未衰乃以詔書并絹因其弟楚州刺史俛致之終不起家於洛以壽卒悟子倣字思道太和中擢進士第累除給事中宣宗嘗以李燧為嶺南節度使使者已賜節而倣封還詔書後倣以集賢學士拜嶺南節度使珍賄叢夥不以入門家人病取槁梅於厨以和劑倣知趣市還之懿宗喜佛倣切諫數遷拜義成軍節度使滑州瀕河累歲水患壞西北防倣徙其流樹隄自固人賴以安以兵部尚書判度支進中書侍郎同中書門下平章事再遷司空鯁正為權近所忌卒年八十子廩字富侯第進士遷尚書郎倣



領南海廩解官往侍南海多穀紙做教諸子繕補殘書廩諫曰州  
距京師萬里書成不可露齎必貯以囊笥貪者伺望得無意茲嫌  
乎傲曰吾思不及此廣明初以諫議大夫知制誥請厲止夜行以  
備賊謀出太倉粟賤估以濟貧民遷京兆尹田令孜養子有罪捕  
繫獄杖殺之令孜拒黃巢以廩為糧料使辭疾貶賀州司戶參軍  
光化中以給事中召不至卒華弟衡以尚主位三品衡子復字履  
初雖生戚里而好學自力非名士宿儒不與游以清操顯建中四  
年扈狩奉天帝欲西如鳳翔依張鎰復曰鳳翔乃朱泚舊兵今泚  
悖亂當有同惡者俄而鎰為李楚琳所害於是拜吏部尚書同中  
書門下平章事臨事嚴方數弗帝意故居位亟解然性孝友既貶  
晏然口未嘗言所累復子湛湛子寘咸通中位宰相寘子邁字得  
聖擢進士第辟節度府入朝拜右拾遺與韋保衡聯第而邁姿秀

偉意氣孤峻嘗慕李德裕為人保衡才下諸儒靳薄之既為相摭  
邁罪斥播州司馬保衡死召為禮部員外郎乾符間累擢戶部侍  
郎翰林學士承旨僖宗入蜀次縣州拜同中書門下平章事邁負  
大節以王佐自任既當國風采峭整時田令孜持禁軍權寵可炙  
邁未嘗少下王重榮之亂田令孜逼帝幸陳倉朱玫欲立襄王煜  
召邁作冊邁辭致恨之罷為太子太保移疾不出帝還宮孔緯構  
之賜死自瑀逮構凡八葉宰相名德相望與唐興衰古未有也  
錢九隴父在陳為境上所獲沒為隸人九隴善騎射唐高祖愛之  
常置左右義兵起以功授金紫光祿大夫及克京城拜左監門郎  
將從平薛杲仁劉武周以前後戰功累授右武衛將軍又從太宗  
擒竇建德平王世充從隱太子計劉黑闥於魏州力戰功最累封  
郟國公仍以奉官為苑游將軍貞觀初出為眉州刺史再遷右監

門大將軍加食廬州實封六百戶尋卒贈左武衛大將軍潭州都督謚曰勇陪葬獻陵

高智周父子長仕隋為秘書學士智周第進士為費令取俸與丞尉均民安其他擢秘書郎歷壽州刺史治尚文雅行部先見諸生質經義及政得失既乃錄獄訟課耕桑以為常儀鳳初進同中書門下三品遷太子左庶子久之罷為御史大夫與薛元超裴炎同治章懷太子獄無所異同因表去位尋乞致仕卒年八十二謚曰定

蕭昕字中明梁鄱陽王恢七世孫再中博學宏詞科歷中書舍人禮部侍郎代宗狩陝昕從擢國子祭酒請崇太學以宗教本大歷中持節弔回紇回紇恃功廷讓昕曰乃中國亂非我無以平奈何市馬不時歸我直衆失色昕徐曰國家龕定寇難功雖丝毫不遺

賞况鄰國乎僕固懷恩我之叛臣爾與連和又引吐蕃暴我郊甸天舍其衷吐蕃敗北回紇悔懼叩顙乞和非天子恤舊功則隻馬不得出塞下孰為失信者回紇大慚因厚禮所遣使者約和轉工部尚書德宗出奉天昕年八十餘步出城賊求之急獨竄山谷間僅至奉天遷太子少傅兼禮部尚書年九十卒謚曰懿昕始薦張鎬來瑱在禮部擢杜黃裳高郢裴垍其後鎬興布衣不數年位將相瑱為將有威名黃裳等繼輔政並為名宰云

蕭定字梅臣瑀曾孫父恕虢州刺史定以廕授陝州參軍金城丞蒞事清挺黜陟使裴遵慶表為判官改萬年主簿累遷侍御史考功員外郎左右司郎中為元載所擠出為袁信湖宗睦潤六州刺史所蒞有政聲大歷中有司條天下牧守課績唯定與常州刺史蕭復亳州刺史張鑑為第一其勸農桑均賦稅逋亡歸復戶口增



加定又冠焉尋遷戶部侍郎太常卿朱泚之逆變姓名藏匿民間  
京師平擢太子少師卒年七十七加贈太子太師  
五代

陳彥謙少負壯節為人多智畧善理繁劇楊行密定江表召為潤  
州司馬酷為徐溫所親信溫行部昇州常喜其繁盛彥謙勸溫徙  
鎮海軍治焉溫從其說即以彥謙為鎮海節度判官溫於軍國事  
但舉其大綱細務悉委彥謙主之江淮稱治武義元年溫與吳越  
兵戰於無錫溫病熱不能治軍彥謙遷中軍旗鼓於左取貌類溫  
者擐甲胄號令軍事溫得少息其臨機御變皆此類也未幾兼楚  
州團練使疾革時徐知誥恐其遺言及繼嗣事醫藥金帛相屬於  
道以結其心彥謙密留書於溫卒勸以所生子為嗣時皆多其有  
義先是金陵工成彥謙上費用之籍于溫溫曰吾<sup>既</sup>任公何以此相

溷也竟不復會計溫始終推腹用之故彥謙亦以此報溫卒年六  
十

吳陳彥謙傳

宋

張觀字仲賓南唐進士宋太平興國初以興元府掾復舉進士不  
第調雞澤主簿再求試特授忠武掌書記改觀察判官後召拜監  
察御史獻所業文賜進士及第會三司言劔外賦輕詔觀往按諸  
州稍增之觀疏言遠民不宜輕動撫之猶恐失所况增賦以擾之  
乎太宗然之遷諸路茶鹽制置使以諫罷治佛寺忤帝意改知黃  
州移揚州皆有善政尋遷廣南轉運使觀博覽史漢論事切直有  
古人風

李堪字仲任咸平二年進士景德間為古田令務本抑末建學立  
社尊老重士毀淫祠黜異教暇集諸生耆民討論政理治化翕然

鄒戩字保之父霖天禧三年進士甲科歷官尚書都官郎中知涪  
鼎二州有惠政戩由父任官婺州錄事參軍每決重辟哀矜見於  
言色求生不得乃為之設飲食具棺衾因俱感泣尋以如皋令提  
舉市易司

張昱之字景山父泌南唐進士歸宋授右贊善大夫世居滁州昱  
之始居晉陵登祥符八年進士知溫州蔡齊薦其才擢淮南提點  
刑獄楊崇勳知亳州恃恩不法誣蒙城令王申罪械送獄昱之廉  
出之徙廣南東路轉運使彝人有犯其首長窮治慘酷昱之請悉  
用漢法徙河北轉運使備邊諸州發卒斬西山木卒逃入契丹者  
歲數百計昱之戒斬木毋得深入卒不復逃還為鹽鐵副使擢天  
章閣待制轉湖北都轉運按察使內侍楊懷敏任邊事殺保州通  
判石侍舉謀為亂昱之自魏馳至部分諸將召懷敏曰將欲反耶

叱去兵衛事平還除戶部副使尋奪職知虢州後與從父鑄並以  
光祿卿致仕鑄四典名郡五任憲司皆有殊績語具寓賢鄉人即  
其居第號東西二鄉昱之子次元以父任累遷江淮荆浙諸路提  
點坑冶鑄錢司務躬自巡歷務革積弊卒於道山陰徐仲車聞之  
歎曰張公所性高明義而能果公不可撓清不可污蓋古之剛者  
也

丁寶臣字元珍與兄宗臣俱有文名尤工詩同登景祐元年進士  
以太子中允知剡除弊興利甚衆移知諸暨其治如剡越人稱為  
循吏歷官秘閣校理同知太常禮院寶臣在館閣久朝廷益知其  
賢英宗每論人物必稱之儂智高入寇時守端州以南方備寡被  
罪尋復召用歐陽修參政言者欲以嘗薦寶臣撼終乃指前事倖  
永州尋卒修祭以文誌其墓從孫常任字卿秀博學強記歷官戶



部侍郎極論復仇大義言甚憤切孝宗為之動容終寶謨閣待制封晉陵縣開國男食邑三百戶

鄒浩字志完馱子登元豐五年進士調潁昌府教授呂公著范純仁為守皆禮遇之純仁屬譏樂語浩辭純仁曰翰林學士亦為之浩曰翰林學士則可祭酒司業則不可純仁敬謝元祐中上疏論人材不振深中時弊哲宗親擢為右正言有請以王安石三經義發題試舉人者浩論其不可而止陝西奏邊功中外皆賀浩言願申救將帥圖維厥終京東大水浩言宜致謹消復之寶章惇用事威虐震赫浩所言每觸惇怒仍上章露劾數其不忠慢上六事惇銜之明年賢妃劉氏立浩上疏曰郭后與尚美人爭寵仁祖既廢后并斥美人所以示公也陛下之廢孟氏與郭后無異罪廢之初天下疑立賢妃及讀詔書有別選賢族之語疑始釋今竟立之豈

不上累聖德頃年為妃從享景靈宮雷變甚異宣制之後霖雨飛雹自奏告天地宗廟以來陰靈不止天意昭然望不以一時改命為難而以萬世公議為可畏帝持其章躊躇四顧凝然若有思付外章惇詆其狂妄削官羈管新州徽宗立召還復為右正言遷左司諫浩疏言人君用賢公議不可不恤獨斷不可不謹伏見朝廷之事頗異於即位之初相去半年遽已於是自今已往將如之何改起居舍人進中書舍人遷兵吏二部侍郎以寶文閣待制知江甯府徙杭越州初浩還朝帝首及諫立后事獎歎再三詢諫草安在對曰焚之矣退告陳瓘瓘曰禍其在此乎異時姦人妄出一絨則不可辨矣蔡京用事素忌浩乃使其黨為偽疏言劉后殺卓氏而奪其子遂再謫衡州別駕尋竄昭州五年始得歸稍復直龍圖閣瘴疾作楊時省之僅存餘息眷眷以國事為問語不及私卒年

五十二高宗即位贈寶文閣直學士賜諡忠浩為人忠鯁修潔記覽該綜及門問道者甚衆嘗曰聖人之道備於六經千門萬戶從何而入大略在中庸一篇其要只在謹獨自巔表歸即屏居闕一圃曰道鄉學者稱道鄉先生子炳字德久幼負俊聲未弱冠輒棄科舉學從楊時游莊外敏中與人不苟合以輔臣薦起布衣補承事郎除編修權給事中前後奏疏皆炳炳可觀建炎間疏請雪其父遷謫非辜且不出秦陵意奏可終知台州

錢公輔字君倚皇祐元年一甲三名進士歷知明州擢知制誥英宗即位陳治平十議大要言采民政分吏課擇守宰置二府官屬又作帝問一篇上之王疇為翰林學士未久擢副樞密公輔論疇望淺不草制坐謫呂誨等救之不得踰年起知廣德軍振作士類重拓學宮神宗立復拜天章閣待制召知制誥入見帝勞苦之命

錄十議以進尋知諫院嘗至中書白事富弼謂曰上求治如饑渴正賴君輩同心以濟公輔曰朝廷所為是天下誰敢不同所為非公輔欲同之不可得已王安石雅與之善既執政排異己者出滕甫鄆州公輔數言甫不當去薛向更鹽法安石主其議而公輔謂向當黜遂忤安石意罷諫職出知江甯府明年帝欲召還安石言其助小人為異議不宜在左右徙揚州以病乞越州改提舉崇福觀卒

沈積中元符三年進士累官戶部尚書宣和中知真定府上疏論燕山不可取又貽書中書舍人程振振宣告於朝已而師果敗績童貫惡之罷提舉上清寶籙宮既得燕山貫又命以資政殿學士知府事積中不行而卒貫猶憾之追奪其職建炎中以宰相言復積中原官



霍端友字仁仲弱冠入太學始齋食糲者十七年大究六經百家之旨屬文辭造端宏大不專坳合有司之尺度酌古御今有濟世之用不為空言崇寧二年廷試第一人授昭慶軍幕官尋召見便殿轉中書舍人給事中遷禮部侍郎於是彗出奎婁之間端友應詔上疏陳時政語甚切至又言朝廷尊安重內輕外侍從近臣出為藩翰高官大職以寵其行而悵然有留落不自聊之意可合內外侍臣更去迭來共為一體入侍禁闈為論思獻納之臣出殿大邦修方伯連帥之職俾天下之勢如持衡無首重尾輕之患疏入即請外補除顯謨閣待制知平江府未行改陳州遇吏民慈恕不以立聲威為賢察吏建白多聽采因能任善不必自己出以故於利害多所興除陳地汙下甚雨則積潦害稼朝廷疏新河八百里以紓陳人憂而去淮尚遠端友請益開二百里起西華循宛邱入

項城以達于淮泗自是陳無水患中貴石燾傳詔輦取瑞香花數千奉端友曰不可自我作俑疏罷之召還為禮部侍郎遷吏部會端友所善強淵明為尚書共事而與太師蔡京有連嘗從容致京意曰廷臣上所倚重無出公右者當繇中執法進丞轄幸努力助我端友驚謝曰平生未嘗言人之過若驟居此官愚不識忌諱必孤大丞相所以任使之意幸為辭焉由是京不說因疾致仕卒年五十贈少師

道光志

先緒志

鴻慶居士集

胡宿字武平天聖二年進士為揚子尉縣大水民被溺宿率公私船救全活甚眾以薦為館閣校勘進集賢校理通判宣州因有殺人者將抵死宿疑之辟左右訊之囚曰旦將之田縣吏縛以來不知故也宿窮究其獄乃婦人與所私殺夫誣之以自釋遂釋囚而置殺人者於法遷知湖州前守滕宗諒大興學校費錢數十萬宗

諒去僚吏疑其欺不肯書歷宿曰君輩佐滕侯久矣苟有過盍不早正俟其去而非之豈分謗意乎僚吏慚謝其後湖學為東南最築石塘百里民號曰胡公塘久之為兩浙轉運使知制誥內都知楊懷敏坐衛士之變出為和州都監尋復召宿封還詞頭命遂寢慶歷六年京東兩河地震宿通陰陽五行災異之學疏言應在西北二邊彼中不動恐有內盜起於河朔時以為迂明年王則果以貝州叛時議士大夫七十不致仕者請令有司案舉宿謂當使自陳全其節又言新樂舊樂難並用間歲貢士不若三年之制皆如其言唐介貶嶺南帝遣中使監護宿言介如道死陛下得毋受殺直臣名乎帝悟追還中使遷翰林學士知審官制院李仲昌開六塔河民被其害宿請斬之以謝河北兗國公主下降將行冊禮宿謂昔封兩長主未嘗有冊命獨施之愛女殆非漢明帝義也涇州

卒以折支不時欲煽為亂詔劾治三司使三司使色拯弗遣宿曰當給之物越八十五日而不與計吏安得無罪更拒制命紀綱廢矣拯懼立遣之拜樞密副使曾公亮任趙滋頴治界河事宿言於英宗曰南北通好幾六十年即或侵誣尺寸城砦之吏力能辨詰何至興甲兵哉縉紳多恥燕京外屬顧天時人事未至而妄意難成禍且隨之願守兩朝法度以惠元元幸甚以老數乞休治平三年罷為觀文殿學士知杭州明年以太子少師致仕卒贈太子太傅謚文恭宿清謹忠實外和內剛不以進退為意臨事重慎不輒發發亦不可回也居母喪三年不入內雖貴顯常如布衣時少與一僧善僧能化瓦石為黃金且死欲以術授宿使葬之宿曰後事當盡力他非所冀也嘗語後進曰富貴貧賤莫不有命惟當修身俟時毋為造物所嗟子宗炎字彥聖由將作監主簿鎖廳登第歷



官吏部郎中哲宗崩遼使來致祭宗炎以鴻臚少卿迓境上使者  
不易服宗炎以禮折之遂易服以見初宿使遼遼人重之知鴻臚  
即其子客歎胡氏世不乏人俄以直龍圖閣知潁昌府歷密州卒  
宿從子宗愈字完夫嘉祐二年舉進士甲科為光祿丞宿得請杭  
州英宗問宿子弟誰可繼者以宗愈對召試學士院神宗立由集  
賢校理兼史館檢討同知諫院王安石以李定為御史宗愈即疏  
言御史當用論薦今定以幕客不因薦得之是殆出執政意即大  
臣不法誰復言者及蘇頌李大臨不草定制坐黜宗愈又爭之安  
石怒出通判真州元祐初累遷御史中丞哲宗嘗問朋黨之弊對  
曰君子指小人為姦則小人指君子為黨君子為黨君子義之與比陛下能  
擇中立之士用之則黨禍息因具君子無黨論以進歷尚書右丞  
罷為資政殿學士知陳州徙成都府蜀人安其政召為禮部尚書

卒謚修簡子端修亦以直言入黨籍紹興三年贈直秘閣宿從孫  
交修字已楸崇寧二年進士試詞學兼茂科時資政殿學士翟汝  
文以給事中同知貢舉讀交修文以為勝己擢第一編修會典所  
檢閱文字以文章宏贍有氣不喜琢雕為奇詞達而事稱無長語  
擢左司員外郎除右文殿修撰知湖州建炎三年以中書舍人召  
還進給事中直學士院兼侍講見上首論天下之勢曰淮南當吾  
膺而將士遇敵先奔無藩籬之衛湖廣帶吾脅而羣盜竊發有腹  
心之憂江淞肇吾基而根本久未立秦蜀張吾援而指臂不相營  
宜詔二三大臣修政事選將帥蒐補卒乘以張國勢撫緩疲瘵以  
固國本此最當務之急上又出手詔問交修弭盜保民豐財裕國  
強兵禦戎之要交修疏言天下有道盜其先變乎昔人常謂甑中  
有麥飯數升牀上有一故絮被雖儀秦說之於前韓彭驅之於後

不能使之為盜惟其凍餓無聊日與死迫然後忍以其父母妻子所仰之身而棄之於盜賊陛下哀憫無辜下寬大之詔而開其自新之路禁苛慝之暴而豐其衣食之源則悔悟者更相告語歡呼而歸不變者黨與携落亦為吏士之所係獲盜可弭矣盜弭則可以保民矣沃野千里殘為盜區皆為杭稼之地也操弓矢帶刀劍椎牛發冢白晝為盜皆吾南畝之民也陛下撫而納之及其田里無以急征暴斂啓其不肖之心而安於其故一畝之宮上父子下雜豚行相羣居相友隨田高下雜置五穀無廢壤婦女蠶桑無懈人穀帛不可勝用而財可豐矣財豐則可以裕國矣日者翟興連西洛董平據南楚什伍其人為農為兵不數年積穀充仞雄視一方盜賊無賴朝不謀夕為苟且之圖以紓目前而已乃獨能強水上之政務農足食屹然自立於虜巢之中而不可犯以吾江東二

百郡之地欲強兵以禦寇戎而不能為翟興之所為乎李成盜江淮張甚廷議親伐交修曰羣盜猖狂天子自將討之不武不勝貽天下笑此將帥之責何足以辱王師議遂格而盜平如交修策焉尋請宮祠除徽猷閣待制提舉江州太平觀紹興三年復召為給事中進刑部侍郎翰林學士知制誥兼侍讀拜刑部尚書江東留獄追逮者尚六百人交修言若待其俱至則庾死者衆矣請以罪狀明白者論如律疑者從輕詔從之朝論欲以西蜀交子行於諸路又議大舉交修力陳其害上問蜀帥於交修以從子世將對後果為名帥自重兵守蜀餉道險遠水陸皆梗交修請三月以後九月以前留守關正兵餘悉就糧他州則守關者水運可給分戍者陸運可免詔行其議尋以親老自去除寶文閣學士知信州改提舉江州太平觀九年六月台歸除兵部尚書權翰林院學士兼侍



讀十年冬復請補郡除端明殿學士知台州

按道光志似誤

惡戢吏持法律嚴甚不受一辭干請之私奏免上供非經數者萬

餘緡在州數月感疾卒年六十五交修端默寡言喜怒不見進止

可識雖對人主必思而後言言無文飾洞見肺腑上察其誠特深

信之自其從祖宿從父宗愈至交修及世將皆在禁林中興以後

學士三入者自交修始慶居地集鴻世將字承公宿曾孫崇甯五

年進士初為監察御史累擢刑部侍郎出知洪州建昌兵變世將

以便宜發兵討平之除兵部侍郎直學士院尋以樞密直學士出

為四川安撫制置使兼知成都府宣撫吳玠以軍無糧請於朝世

將奏用轉搬摺運之法軍儲稍充公私便之紹興八年以交修薦

遂以寶文閣學士宣撫川陝人方之張詠號小乖崖金人陷同州

入長安諸路震動蜀兵既分聲援俱絕世將駐師河池參謀孫渥

勸退保世將指所坐帳曰吾誓死於此矣毋多言分遣大將吳璘

田晟郭浩楊政出戰數路並捷金人遂巡不敢度隴朝廷乘機出

兵會母喪特詔起復遂復隴州破岐下諸屯兵威大振世將尋病

有大星隕如雷是夕訃聞謚忠獻初世將始生父嘗夢金甲二神

人告曰吾唐世老將因名其二子長唐老次世將後兄弟同登進

士並顯名

張宇字泰之先世本合肥人七世祖訓仕吳為太傅興楊行密俱

起淮南號三十六英雄太傅其一也太傅有賜田在常子孫多徙

家焉故為晉陵人父彥直生七子而四子相踵擢名第州刺史榮

之取馮瀛王所賦常山竇氏丹桂五枝靈椿一樹之句表其閭曰

椿桂坊四子中宇與守最知名守官至資政殿大學士另有傳宇

為第三子以太學內舍生試上舍中其科釋褐為真州司理參軍

歷遷至駕部員外郎除提舉兩浙東路茶鹽公事歲課增羨召為  
司勳員外郎再遷吏部郎中紹興十四年除直秘閣福建路轉運  
副使移知湖州宇歷任中外屬時艱難民之休戚事之利害常欲  
有所興除而以非職不得行其意其在駕部及領閩漕時嘗因奏  
對敷陳時政利病上每嘉納其在吳興治道清淨恂悞無革整齊  
大體閭畧細故不治芑苴奉權貴不飾厨傳稱使客奉法循理期  
於不擾當時稱循吏馬上書請宮祠得主管台州崇道觀築一堂  
於舍西偏榜曰宜休以見其志宇為人慈恕樂易不立崖壑胸中  
甄別人品如涇渭而臧否不出諸口出入中外數十年寵辱得喪  
所閱多矣而不見喜怒文章溫麗古雅如其為人不務雕琢為奇  
以眩世俗耳目而奏議之文叙事詳實皆世務之要故多見施行  
紹興二十八年十月卒年七十八

張守字子固崇甯元年進士中詞學兼茂科擢監察御史建炎初  
上在維揚黏罕將窺行在葉夢得張浚皆欲南渡守獨抗疏上防  
淮渡江利害六事又疏言金人入淮之路有四宜擇四路帥以捍  
禦之又請詔大臣以選將治兵為急時相黃潛善汪伯彥不悅遣  
守撫諭京城守聞命即就道三年還奏金人必來願早為圖無何  
金人渡淮上遂幸臨安遷御史中丞苗劉之亂疏論宰相朱勝非  
不能思患預防勝非竟罷呂頤浩相舉行司馬光初議欲併合三  
省詔侍從臺諫集議守言光議較然可行不必徒為紛紜議遂定  
張浚議奉上幸武昌為趨陝計守與諫議大夫滕康皆持不可又  
陳十害議遂寢六月久雨詔即官以上言闕政初守嘗上疏曰陛  
下處宮室之安則思二帝母后穹廬毳幕之居享膳羞之奉則思  
二帝母后羶肉酪漿之味服細暖之衣則思二帝母后窮邊絕塞



之寒苦操予奪之柄則思二帝母后語言動作受制於人享嬪御之適則思二帝母后誰為之使令對臣下之朝則思二帝母后誰為之尊禮思之又思兢兢栗栗聖心不倦而天不為之助順者萬無是理也至是復申前說又疏論呂頤浩不可獨任張浚不可西去與上意異乞補外除禮部侍郎不拜上諭以正人端士不宜輕去始受命侍御史趙鼎入對論守不宜無故下遷乃遷翰林學士知制誥累官至參知政事復被劾出知福州金兵至淮上次平江諸將獻俘相踵守上疏曰兩河山東之民皆陛下赤子驅迫以來豈得已哉諭以恩信貸之使歸則敵兵可不戰而潰上又詔問攻戰守備經懷措置四事守言明詔四事臣以莫急於措置措置苟當則餘不足為陛下道矣其一措置軍旅其二措置糧食先是閩有范汝為之變公私交困守在鎮四年撫經彫瘵請捐所貸常平

緡錢十五萬累乞去郡召還知平江府旬祠以歸六年召隆參知政事兼權樞密院事七年張浚罷劉光世兵柄而欲以呂祉往淮西撫諭諸軍守言必得聞望素服諸將心者乃可浚不從遂有麗瓊之變臺諫交章論浚御批安置嶺表守力解之浚竟謫永州守亦引咎請去不許八年正月上自建康還臨安守言宜留建康以圖恢復趙鼎持不可守力求去以資政殿大學士知洪州兼江南西路安撫使疏請罷和糴時秦檜當國怒曰張守何損國如是守聞之曰正所以益也江西盜賊未息上問以弭盜之策守曰莫先德政既至開諭禍福不數月盜平徙知紹興府會朝廷遣三使者括諸路財賦韓球在會稽斂至五十餘萬緡守求入覲為上言之詔追還三使秦檜不悅守亦不自安復奉祠建康謀帥上曰建康重地惟張守可至鎮數月卒謚文靖孫抑戶部侍郎

施垌字林宗以太學上舍登崇甯五年進士時方創辟雍自鄆州教授召為直學遷太學博士宣和末除江東提刑朝命鑿銀林河通大江調役繁興垌慮導江入浙蘇秀必受漂溺患亟抗疏寢其役徽宗下詔獎諭進秩一等尋除右正言辭不就出持憲閩浙守信州皆有能聲紹興間除禮部侍郎後以敷文閣待制終生平篤意孝養所至得親書必冠帶跪讀遇恩補奏先及弟姪鄉里稱之弟垓有吏績終朝議大夫湖北運使

吳懋字禹功崇甯五年進士調當塗縣主簿歲饑官出粟平糶糴者坐集擾亂相蹂踐懋命布灰於地踈其行使東西循灰以進左受粟右輸金未晡而周人無譁者縣有圩田秋雨圩決懋躬督治凡追逮者書期縣門聽其自至金人至京師懋三上書言便宜不報入為吏部員外郎金人立張邦昌百官作勸進表懋當草牋奏

度不可拒將自裁會有為之者乃免王時雍用事坐政事堂懋罵之曰反賊吾不能擊汝如段秀實耶時雍面頸發赤不能對吳开莫傳以表狀詣金營懋不屈歸高宗即位召復故官除司農卿不拜擢知明州將卒凌籍官府求取無度懋以權酷之羸給其廩稍歲終民不知兵加直秘閣改知吉州卒

詹抃字成老父誼饒於貲築館延客縱其子從賢士大夫游以至於貧抃幼警悟甫冠舉於開封俊譽煜然五試禮部策於廷授某府助教主饒之樂平簿郡守曹宣符延致郡下事多諮決時學法峻急抃權獄官胡潤色者以傳授就逮抃訊所傳義則伸紙疾書凡十篇無一字牴牾抃異之遂緩其獄卒會恩免其全護士類如此調黃州司理遷衢之西安丞用薦改知定陶權鹽官令縣瀕海多鹽盜抃稍寬其禁囹圄虛而課亦辦邑人德之既至定陶時政



和間方興三山之役鑿山大河復禹故道倚山為梁調京東西河  
北之民三路騷動役至再三而功未就拊歎曰吾邑小而貧厲民  
以苟祿非吾志也會使者以度牒糴米數十萬石拊曰山東樸魯  
俗不為僧道而廣濟小壘止定陶一邑天甯一寺而糴數與諸州  
等僧牒數百將安用使者語侵拊拊辯詰不少阻遂決志歸葺故  
居開軒曰友陶招親舊賦詩奕棋無虛日寢疾且革處後事不亂  
命筆留語而絕拊氣韻高雅商略古今言辨而理暢音吐清越聽  
者忘倦詩文敏贍有思致談笑立成尺牘亦燦然可觀

蔡戡字定夫端明殿學士襄四世孫遷居晉陵乾道二年進士持  
節廣南東路所部十四州歲以礦銀為病戡積鹽羨代輸民甚便  
之擢湖南提點刑獄時李昂霄有異謀戡乘其未定單車馳諭其  
臺相顧駭愕叩首服罪甯宗朝知臨安府歲滂糴艱戡亟請發倉

民賴以濟韓侂胄當國乃請老有之齋集行世

張訢紹熙間知邵武光澤縣嘗行社倉法給窮乏禁生子不舉者  
設館以待行旅凡疾病無所歸者悉就養焉其法甚詳朱文公為  
之記

丁逢字端叔乾道二年進士為激賞所幹官金人遣塔烏林答天  
錫賀壽辰怙貴驕黠侮館伴衆憤莫能制逢謂示弱何以爲國上  
書乞借上方劔斬之帝批付宰相曰此人才氣可尚卿先一見速  
具奏來遂賜對遷太府丞帝方留意邊事命逢知安豐盱眙二軍  
皆有政績除川秦茶馬凡供帳公費悉屏去人服其廉介馬政修  
舉台還歷卿監終寶謨閣待制

張友嘉熙中知興化軍修學校割廢刹田租三百斛以佐學廩郡  
人德之祀其像於學宮

孫政字無逸其先世家金陵五世祖潭徙常州之武進縣家焉政少孤母邵宜人提諸幼還宜興依外氏斥賣簪珥求師教子夜治絲枲坐其旁勉之既任戴冠遣詣庠校從先生長者游未幾文藝燁然秀出一時政與兄崎相繼占上第起家兄畛亦貢禮部於是中外宗姻歌慕稱歎以宜人教子為法政學尤邃於經讀中庸至人莫不飲食鮮能知味則拊案起立胸中洞然如咽去鯁屬文辭典重不浮而辯於說理政和二年試上舍中第紹興元年以承議郎知臨安府錢塘縣上移蹕錢塘百役毛起府尹治次舍符縣鳩材數千章甚急政請撤湖上廢寺十數區可不勞民而辦已而十艘浮江而下尹席益病其溢檝政與仁和疏漕渠以納之政謂益曰治溝洫備水旱縣令職也而兵火創殘疲瘵猶未堪事今遽興河役以便過客非急務益慙而止戶部侍郎胡世將言州縣不時

之須皆非經數吏緣為姦人不堪命可校一歲用緡錢米帛若干均之兩稅而盡罷無名之斂政曰兩稅既增他日牟利之臣暴斂復起自我作俑而民益困矣議遂格中貴人詣政請事政不答俄領皇城司嗾邏卒摘縣吏之受賕者以聞欲併中政詔送廷尉卒不得政毫髮罪猶免所居官改知湖州安吉縣久之除提舉江南東路茶鹽事前使者歲除奏課例張空最上之朝增秩賜金無虛日政上計吏抱牘請循故事政驚曰使吾罔上僥賞耶一毫不敢欺也具以實奏寮吏驚服每行部見吏屬治有狀或得於一言不由紹介皆被慰薦有鬻爵為石埭尉者屢請貴人書屬政薦政曰石埭不惟汙吾筆而同薦之士必以噲伍為恥矣卒不許代還請宮祠歲滿致仕政性冲澹寡言笑至守一法持一議如山岳然不可移奪事母六十年心意幾微輒逆得之菽水歡然雖五鼎之養



不過也紹興二十一年八月卒年七十二葬宜興縣君山鄉龍山

鴻慶居士集

楊焯字元光世居常州晉陵縣父植左朝散大夫避建炎之亂家

會稽之嵯縣既沒葬其地故又為嵯縣人焯少時英爽有大志讀

書過目成誦屬文敏妙駿發頃刻數百千言以父廕任將仕郎調

池州建德縣主簿遷台州黃巖縣令歲饑流逋滿道焯以便宜發

粟振之州將大怒方具奏劾會罷去事遂已縣有大渠納衆水而

注之海歲久蕪沒為平地遇甚雨則水冒田為患焯率民田渠下

者合衆力疏治之長凡十里廣深如其故又築斗門以時澇泄由

是並渠之田皆為沃壤黃巖俗尚鬼一老巫縣人尊事之人有疾

病禁絕醫藥惟巫之聽焯笞而逐之天台太守蕭公振亦喜事者

每聞焯無顧忌大語則擊節稱善屢薦於朝不報會提典刑獄秦

昌時者宰相檜之猶子怨家得焯書有詆昌時語馳告昌時昌時

以聞檜怒逮焯繫廷尉獄飭有司發卒大索得焯萬言書稿於笥

中議刺時政語益切檜愈怒獄上入之法除名徙萬安軍積六七

年秦檜沒天子親郊一時士大夫竄流嶺海者皆得赦歸焯行次

英州遇疾卒年五十一

鴻慶居士集

薛極字會之讀書日記萬言嘉定十五年中詞科為大理評事累

遷兵部侍郎疏議更楮幣創安邊司又上疏曰願陛下深思顧諟

之難益懷兢業之念勿謂帝德罔愆而怠於進修勿謂天災代有

而應不以實紀綱雖舉必益求其所未至德澤雖布必思及其所

未周甯宗嘉納之立朝三十餘年多所裨益歷知樞密院參知政

事後加少保和國公致仕

向士璧字君玉負才氣精悍自喜紹定五年進士累知軍府數立

竒功嘗捐家貲百萬以供軍費歷官兵部侍郎湖南安撫使兼知潭州開慶初元兵圍潭急士璧率所置飛江軍斗弩社及本州民兵死戰聞後隊且至遣王輔以五百人覘之過於南岳市力戰有功圍遂解理宗嘉其忠賜詔褒賞會賈似道忌請間成功諷侍御史孫附鳳劾士璧奪其官潭州居住又稽核守城時所用金穀逮至刑部責償士璧坐是死拘妻妾徵之州人皆為流涕王輔亦貶死德祐間追復士璧官立廟潭州錄其子孫用之

錢之望字表臣少放達喜竒計金亮涉江以策干虞允文謂敵有內潰之勢允文用其策亮果殞符離之敗之望道謁張浚請三邊並出師使敵疲於奔命則大功可立浚不能用之望登乾道中進士授江西帥屬時賴文政猖獗朝廷旰食參政龔茂良薦之望遂得文政除全部郎知楚州募勇士五百人躬自訓練敵不敢近大

奚山盜起除秘閣修撰知廣州盜以舟師指城民大恐之望麾軍奮擊破之陞華文閣待制知廬州卒

元

胡松字松巖宋樞密副使宿九世孫父應炎元兵墮常死之祖母陳先極松出避以免既長歸鄉里推擇為吏歷宜興崑山常熟三州在常熟時民有為富人曹氏養子者被譴歸父匿之得腐死人溝中佯哭曰是吾兒也即訟曹于州松從州判官往視屍計未當壞而壞知非是置弗檢以不見屍報錄囚使者至詰稽違狀移讞旁邑曹不任楚掠遂誣服松等亦以見屍不檢受劾獄具曹之族重購偵獲養子始白文宗繼位殺故相回回倒刺沙命平章曹立巡東南糾其黨授上方劍得專誅按行至常熟松從長吏逆諸境民有告回回百餘人匿海渚殺豬會飲謀為亂立亟遣卒捕之松當



承行輒請曰回回不食豬今言殺豬詐也立怒不聽往獲賈胡數人訊之蓋訟者嘗與互市負其資不能償欲陷之也遂抵訟者陞平江路吏庚午歲吳中大饑官作飢餓者命松與一吏董之松收濟甚周且以私錢及餅餌囊負馬後施於塗旦浙米入奎他吏伺松間輒私拔其半乃晝見殍鬼捽之死松則無恙繼遷集慶當護上供物至京禮部尚書隆安魯見松謂曰名家裔乃久從吏役耶會拜江浙行省參知政事遂與俱南以省銓為甯國路涇縣典史時有制蒙古色目歐漢人南人者不得復西域流戶數百人因以暴掠民驚若寇至及涇松語眾吾在若無憂即出勞於郊誘開佛寺中呼其酋諭曰制言不得復歐者民爾今天我天子吏若勿犯吾民當率酒米相餉否則知有法爾酋愕遂戢其眾亟去無一人敢譁松親送出疆以歸民羅拜馬首轉禡之龍游縣發之錄事司

二典史皆有聲累資教授將仕佐郎信州路提控按牘兼照磨承發架閣請老不赴遂以從仕郎婺州路蘭溪州判官致仕卒年八十四子二黼浙江鄉貢進士汀州路儒學教授黻以平盜功授福州路羅源縣南灣寨巡檢

明王思明字克明元浙江行省左丞致仕洪武初以薦召為右傳侍燕邸每進對非仁義道德弗陳時藩邸僚屬多獲罪太祖知思明中三獨不及也嘗上所校綱目及手寫大學衍義二書曰此萬世龜鑑人主藥石太祖因置二書於西齋宮朝夕披覽思明性好學嚴於克己燕居焚香危坐未嘗有怠容置日歷左右題曰司馬公平生無不可對人言者某日所為舉筆於斯若不可書必不可為年八十一卒謚康懿孫謙語具後

朱煥字文仲太祖聞其才辟參戎幕張士誠據蘇州太祖擒其脅附者輒戮之以煥言多所縱釋歷福建按察使卒於官子士衡負骨歸葬與弟士循居喪有聞

桑慎字仲修洪武初為監察御史抗直敢言巡按廣東奏誅衛使張榮坐不避八議安置瓊州慎怡然即日就道

沙良佐明初薦知江西新城縣廉慎自持以寬治民興學校勸農桑庭無訟者

王暉洪武中知穎上縣慈祥愷悌以德化人時稱良吏

章文旭洪武間為福建邵武通判廉幹有才時學校解舍橋梁毀

於兵燹文旭創建修飭之功為多

劉敬字季恭洪武間舉人才授山東鄒城知縣廉明寬厚惠政大行朔望延見父老問民疾苦秩滿百姓詣闕請留尋遷江西建昌

府通判益勤吏治均差徭公賞罰吏民畏服累官直隸易州知州

刑部員外郎

錢本中忠一作字文德讀書習法律洪武中以人才舉歷知故城元

城縣有聲改知吉水豪民宿吏素為民患苦者捕其魁徙遠方邑

中肅然新壇壝學舍召諸生躬教之旌別勸率政務清簡不任刑

威有盜聚山谷間時出掠郡守欲以兵殲之本中單騎詣賊壘諭

以禍福咸相率縛首賊自歸會赦免本中勵清操門無私謁妻子

布衣蔬食裁足朝夕後知樂安以誑誤免郡人學士胡廣力保之

得復官吉水民間本中來空閭井迎拜如見父母未幾以疾卒民

哀慕留葬吉水爭為負土營墓云明朝分省人物攷

張志道洪武間以貢選河南陳州知州勸課農桑民安其化會旱

蝗志道禱於神蝗不入境



毛節字伯尚洪武二十九年以明經中式舉為鄉三老時三老得  
赴闕下奏利弊故重其選郡遣節負版詣京過金山有留題詩太  
祖見之大稱賞索其名於廷臣弗得適節進所負版太祖見其名  
微行訪之邀入酒家飲命賦詩稱旨曰御史才也薄暮命賦塔燈  
復撫掌稱善出一緘謂節曰吾有故人守常煩致之開緘乃以節  
為御史巡按江西救也之任微服出行部遇雨惡少裸而鬪節解  
之為所詆一媪籲天泣節問故媪曰邑有小姑神歲必以童男女  
祀妻二女去歲取其長今用其少是以悲又遇一媪亦泣問之曰  
一子為妖所攝將死明日節令毀小姑祠伐媪家老樹并捕二惡  
少杖殺之皆稱為真御史書其姓氏奉之  
承谷容洪武初為山東交城縣丞勸課農桑平徭薄賦人皆便之  
越四年為兗州同知

胡濬字源潔生而髮白彌月乃黑建文二年進士授兵科給事中  
永樂初進戶科都給事中署祭酒事上察近侍中惟濬忠實可托  
遂命巡游天下以訪異人為名實察人心向背時御製性理大全  
諸書成俾以勸勵天下以故雖窮鄉下邑軌跡無不至在湖湘間  
最久丙申秋還朝特升禮部侍郎明年往巡江浙諸州癸卯復自  
均襄還朝車駕親征北虜駐蹕宣府馳謁行在初上臥不出聞濬  
至喜而起且慰勞之賜坐與語凡所歷山川道里郡邑豐嗇民情  
休戚以至所聞所見保國安民之事悉為陳說之上欣然納之太  
子監國南京漢王謀奪嫡為飛語上聞命濬往察之濬密疏太子  
孝謹七事儲位獲安太子不知也既嗣位得濬疏大喜以濬為忠  
慎將大用之會晏駕宣德初累遷禮部尚書漢庶人謀叛贊上親  
征事平受賞賚甚厚賜第給閣者又兼領行在戶部帝嘗曲宴濬

及楊士奇蹇義夏元吉曰海內無虞四卿力也英宗即位詔節冗費濬因奏減上供物及汰法王以下番僧四百人英宗北狩羣臣聚哭於朝有議南遷者濬曰文皇定陵寢於此示子孫以不拔計與侍郎于謙合中外始有固志景泰元年進太子太傅楊善使也先濬言上皇蒙塵久宜拊服食以進不報上皇將旋濬屢奏迎復事上每以虜情多詐為言將抵居庸始得旨議迎復儀注并議防變方略輿情欣慰當多官會議時都御史王文忽厲聲沮抑聞者相顧莫敢言而退給事中葉盛憤鬱不平造禮部問焉濬從容言儀注已送內閣矣王一人言豈可憑抑何足與辯衆服其老成定見而其量亦不可及云尋進少傅時議立見濟為東宮下禮部會議都御史王文首言當立大學士陳循等皆唯唯濬不能爭而見濟竟立時給事中林聰首言皇太子無過不肯署名王文怒目

叱之嗾御史劾聰私其甥官善地專擅選法當死大臣連名署奏牘次及濬驚曰林聰至死耶如公論何即移疾不出上遣太監興安問濬疾濬曰老臣無疾聞廷議殺聰悸不安耳興安還報聰得不死左遷國子監學正及上皇復位力疾入見請老上從之濬節儉寬厚喜怒不形於色能以身下人歷事六朝垂六十年中外稱耆德及歸弟克恭克寧克誠年皆七十餘鬚眉皓白燕聚一堂因名堂曰壽愷年八十九卒贈太保謚忠安子長寧一名猷永樂時濬巡遊天下十餘年長寧事母以孝聞廬墓三年詔旌其門曰孝行濬歸老遣長寧詣闕謝帝念濬歷事累朝官長寧錦衣鎮撫世襲罪惟錄 明朝分省人物攷 唐復字復亨建文二年進士授浙江餘姚知縣調湖廣零陵又調交趾皆有惠政安南黎季犛亂復為書數千言諭以禍福季犛震



誓以象齒金錯未獻成祖見其書命宣付史館遷大理寺寺副宣  
德五年升平樂知府先是知府除授拘資格多不稱職宣宗特命  
大臣各舉所知復遂與况鍾等九人同擢知府授璽書假便宜馳  
驛之任時禁網疎闊平樂去京遠徭民雜居剝弊尤甚復至釐奸  
革蠹扶弱抑強薦拔下僚裁減冗雜當更張者累章敷陳悉見施  
行郡以大治及去位百姓立祠學宮旁祀之

段民宇時舉永樂二年進士選庶吉士與修永樂大典除刑部主  
事與修五經四書性理大全轉郎中用法平恕妖婦唐賽兒作亂  
三司官坐縱寇誅詔民以參政討平之時索妖婦急盡逮山東北  
京諸尼及天下出家婦女先後萬人民力為殫宥人情始安帝北  
征敕民督餉水陸轉輓並自居庸出塞民精心經畫費省而事集  
歷南京戶部侍郎尋改刑部二部皆以不治聞民至紀綱修舉宿

弊盡革有上元人為姪毆者憤甚詣通政司告時方令納米贖罪  
而越訴例成遼東不得贖民上言依定例卑幼罪以贖免而尊長  
及遠竄理有未安請得贖者免成遂著為令邁疾少瘥遽出視事  
或止之民曰數百人困囹圄吾安得以一人為解三日疾大作竟  
卒卒之日篋僅遺俸金四兩都御史吳訥經紀之始克殮禮部尚  
書胡濙以聞上悼歎賜祭命有司營葬萬歷間追謚恭肅天啟間  
改謚襄介祀鄉賢祠子寶字伯誠端介有父風貧至無以為居周  
忱初撫江南為買宅一區忱再至已鬻矣詢故曰寶既藉先人遺  
蔭諸弟無所有婚娶衣食皆不給何忍獨居耶鬻以分給之矣忱  
益賢之官兵部從征麓川凱還獨不言功橐中僅圖書數卷于謙  
王直亟稱之久之遷福建布政司參政海船竊出公私習為利數  
寶至一切禁絕年六十謝歸環堵蕭然廳事故有元虞集書方寸

地額或問何以遺子孫寶指額曰此先人所以遺我者  
蔣賢永樂間知蓬萊縣公廉勤慎賦役均平滿九載代去吏民思  
之

吳潤字汝德補縣學生以楷書與脩永樂大典授刑部主事歷建  
昌姚安廣信三府升雲南按察使土官普覺謀變潤先事誅之事  
聞升江西右布政使丁外艱解任江西民上章請奪情詔起復左  
布政使潤寬厚長者處已待物一以誠信在江西十有二年民愛  
之如父母景泰初以孫選儀賓例致仕卒年七十九

明朝分省人

潘諒字友貞嘗從兵部主事王忠學宣德丙午與忠同試南畿諒  
中式自以業不如師不赴宴復從忠學三年而後會試歷官禮部  
郎中以資久會推禮部侍郎章未上會繼祖母訃至諒當承重將  
發喪或謂姑緩之須命下諒曰此人之大倫一念苟欺得罪名教

矣言者愧服服闋改南京吏部郎中時胡濙方柄用諒與姻連未  
嘗一言干進久之升臨江守以平易寬大為政不務赫赫名歲稔  
振救饑民全活甚衆

白昂字廷儀天順丁丑進士授南京禮科給事中因黃霧之變疏  
論貢獻織造寺觀創造諸弊甚剴切劾戶部尚書張鳳不法自南  
京逮至詔獄已而釋焉監察御史謝文祥得罪率僚屬言文祥雖  
涉狂妄然其心則無他因而竄逐則忠良喪氣直士杜口恐非社  
稷之福遷應天府丞抑強植弱立義役法會劇寇劉通出沒海上  
東南騷然昂以僉都御史調士卒遠近皆會截其要路賊大窘迺  
宣布威信通挺身納款特於太倉學宮受之諭以禍福出於至誠  
通感泣迺縱之歸率其餘衆以降東南晏然遷兵部侍郎勅詣鳳  
陽修祖陵節費以賑饑民調戶部侍郎河決金龍口漕運多阻令



昂相治昂慮水勢趨張秋發卒數萬自陽武封邱祥符蘭陽數縣築長堤捍之導河自中年決口至尉氏下潁川經塗山合淮水入海修汴堤令高廣如一濬古睢河入運道築蕭縣徐集等口復自魚臺歷德州至吳橋修古河堤自東年至興濟鑿小河十二引水入大清河至古黃河以入海每河口作石堰視水贏縮以時開闔河不為害高郵甓社湖多溺於堤東開複河五十里以通舟河成賜名康濟人德之呼白公堤遷都御史請籍土田高下遇水旱應蠲時得按籍稽考遷刑部尚書以條例不一吏緣為奸刑定百餘事嘗曰秋霜之肅何如春陽之和故斷獄多平允御史李興以詰暴處死無敢言者昂曰不可使朝廷有殺諫官之名迺率眾大臣上言興固可罪然法律有致死之罪使興而處死則故勘故殺者又將何以加之興得免死昂立朝不為危行議論每依於忠厚平

居恂恂若無能臨事決機應變無所疑滯以病告歸卒年六十有九贈太保謚康敏昂雖位極公孤而左右無媵妾於孝友尤篤弟昇早逝恤其二孤訓迪備至又移恩廕與之推范文正公遺意置田若干畝以贍其族貧者又立義學置祭田設藥局鄉黨稱焉子圻字輔之年十八占應天鄉試明年登進士授南京戶部主事歷浙江參議時有承劉瑾旨開處州銀礦者圻執不可不得已請以贖金充內帑事得寢轉福建參議汀漳盜起輿疾率兵至大田驛相拒二十餘日會鎮東官軍至合擊之賊乃解散進山東布政使中涓進香泰山邀重賄圻婉謝不應樂清土豪有殺人者讞久不決圻一訊輒得其情歲歉賑濟有方多所全活遷尹應天擢都察院右副都御史提督南京倉儲上便宜七事皆切時宜京儲歲入一百二十七萬石所出乃一百五十餘萬石圻奏南京根本重地

儲蓄減耗所出多於所入何以持久請革冗費冗食劾武臣逋負  
不法坐罪者若干人會聞母訃奔喪歸旋得疾卒年五十有三圻  
弟坊十八領鄉薦歷吏部司務謙厚好學暇則讀書日有程課家  
居好施與自縣抵無錫堯石岸百里行者使之又作五牧白塘二  
橋昂孫悅語在文學

明朝分省人物考

郭觀正統初為御史巡按山東首劾藩臬大吏四人貪墨吏望風  
去剖斷疑獄不少撓滯尋以忤貴近移廣西僉事

徐雍正統初知浙江嵒縣數延見父老問疾苦興利除害好賢禮

士卒於官民哀痛之

孫樞字叔綱以貢授浙江象山知縣廉正不苛致仕歸貧無以自  
給知府劉珏為買宅居之

白瑜字楚英永樂元年進士授給事中出為湖廣均州州判廉勤

有為秩滿民不忍其去詣闕請留後終福建市舶司正提舉嘗輸  
田若干畝於學宮助諸生廩給

趙琬字叔爰永樂九年舉人由教諭累遷國子監司業正統間車  
駕臨視命講書至泰誓因陳七事皆學政當務多見施行忤中官  
王振與祭酒李時勉同荷校國子監前諸生上書請貸者以千數  
帝聞立釋之在太學十七年矩範端嚴教人以忠孝為先士有親  
老而貧者為遺書郡縣存恤之婚喪疾病輒捐俸以助又置地都  
城之隅為義塚葬士之不能歸者子仲壽以父蔭歷知河南鄭州  
湖廣荊門州有惠政居喪哀慟人尤稱之

吳昌字宗盛父彥忠有隱德為時所重昌幼穎悟稍長遊郡庠窮  
經攷史久益深造宣德中貢升太學吏部閱其才器擢知延平之  
沙縣值父憂歸服除改天台前令時里豪有為奸利者侵軍需錢



數千緡屬時當述職藩郡符檄交下催督昌籍豪者家弗克償乃  
徧求其族屬姻連諭令代償且以疏戚饒瘠為多寡卒之敲朴不  
施而所償盡完未嘗歸咎於前令海門內築新城備倭有令役民  
丁壯天台當出二千人越役民懼城成籍為戍譁然弗應募昌急  
曉之曰兵民籍已定豈有以民為兵之理爾輩自計固爾今為民  
父母肯陷爾乎當往事事毋自速罪戾也民從昌令閱月畢工無  
他故遂益信服凡令出翕然無弗從者邑有楊姓者坐誣罪且死  
昌察知非辜為直其枉楊後懷金來謝昌固拒之曰爾自有生理  
得釋吾豈粥獄者耶竟不納會朝議謂河南諸州水澇宜得良有  
司往濟荒歎吏部以昌在天台有治効遂奏遷同知歸德州事昌  
至州勞心捍患加惠撫輯民賴以全者動以萬計景泰癸酉以滿  
三載請致仕歸天順辛巳七月卒年六十九

明呂文懿公集子淵

字本深天順丁丑進士歷官福建福州知府郡多繫囚淵雪其枉  
者百餘人決遣五百餘人不決旬狴犴為空貧民逋賦以萬計淵  
曰固知催科無善政急則殘民緩則損上於是裁省浮費勸諭多  
方人不擾而公賦足當路交薦以母老乞養歸

王謙字益夫父彥昭遇文皇於潛邸命為皇子講讀謙三歲能誦  
孝經九歲持母喪如成人讀書禁林上摩其頂曰真書種也及長  
博文強記卒業太學詔辦事內閣試中書舍人雷震鷓吻上言宜  
杜絕倖進罷黜貪污既而閩浙盜起上言乞蘇民困罷麓川之役  
南京宮殿災及慧星見又疏慎修德政以回天意帝嘉納之土木  
之難衆議紛沓謙時為翰林編修獨上言也先君臣猜忌勢必不  
久宜固守以撓其銳卒如其言景泰改元由吏部郎中遷太常少  
卿屢疏時事且言朝多具臣執政不悅改南京太常少卿英宗復

辟召見言事切直復舊職特免戶內子孫差徭會承天門災又上  
敬天法祖開言路達民情用正人收羣望抑權倖遠近習八事言  
甚愷切忌者沮之仍改南京九載弗遷出守四川夔州謙欣然就  
道奏罷歲獻省費千計治行為最夔人畫像祀之

王儼字廷貴父忠語在孝友儼十歲能為詩景泰辛未賜進士第  
三人授翰林編修被旨借諸庶吉士讀中祕書給酒饌筆札諸物  
憲宗登極擢左春坊左庶子時始開經筵勅充講官母老求便養  
改南京翰林學士升南京國子監祭酒時教法久弛乃嚴立程制  
核勤惰為懲勸諸司差遣一按名籍不為私假又條奏便宜數事  
與風采凝峻廉角峭厲故教法修整羣士皆斂衽欽服凜然稱嚴  
師焉秩滿擢南京吏部右侍郎召為戶部左侍郎弘治初遷南京  
戶部尚書尋改吏部會有旨考察諸司儼悉心訊訪務求至當有

小過而才亦可用者別為奏請得降級補外其以例考績者必斟  
酌殿最不苟為文具又陳八事多見采納致仕還家卒年七十二  
贈太子太保謚文肅儼奉親極孝養事伯兄甚謹以三品恩移廢  
兄子澄為國子生歲出所積穀賑贍族人遇鄉黨子弟有恩嘗購  
得楊氏別業有世墓慰令勿徙缺其垣俾歲時往祀焉其為文雅  
健有體裁詩亦清粹真行皆適勁脫俗所著有思軒稿朝天稿若  
千卷藏於家子沂字希曾成化十一年授禮部主事升員外郎即  
中山東右參政湖廣右布政轉山東左布政使弘治十四年升右  
副都御史巡撫真定等府兼提督紫荆三關卒於官年六十二沂  
嚴毅謹恪天性孝友在禮部時外國以獅子來貢希重賞又有貢  
刀劍數至三萬者沂言夷人貪詐無厭量損其賜直且定數著為  
例憲廟上賓凡山陵廟祧遷祔之議儀文案創多所考據及巡撫



時賦役繁重力為裁省濬沱河水溢壞民田廬奏請築堤捍之功  
成賜綺弊獎勞沂方髻時母吳溺於北河每舟過溺處大慟幾絕  
生平自處儉約家雖富無貴侈態居官二十餘年終始一致人以  
為有父風云先是與嘗推其廕與兄子澄及沂復以所得恩廕與  
其姪世尤稱之澄字希范有識量為藩府推官常誦程子存心愛  
物之言獄至必重訊決期於無冤請老家居蕭然如未嘗仕者人  
謂其不負與所舉明朝分省人物攷 明徐文靖公謙齋集  
趙敬字叔成景泰五年進士授御史以言事黜知山西介休縣是  
夜大雨雹承天門災帝感悟召還成化初首白于謙之冤言石亨  
曹吉祥等誣陷謙乞從褒恤併請復郎中吳節御史葉湛等官俱  
報可出按湖廣河南治尚嚴明豪強脅息按江西知民健訟喜告  
訐有司上官輕於逮繫多以不實逃脫被累者衆故疏請嚴禁之

限滿將代會大旱戶部請救致振濟致疏免逋糧二百六十餘萬  
貸鹽鈔二載免漕運一年軍民詣闕請留遷江西按察使時議設  
各省巡撫獨江西以故故不更設也致在江西久習知利弊至是  
益勤於職吏民畏愛然執法徑情頗抑豪右朝貴側目未幾與福  
建右布政鍾清浙江按察使劉釘皆中考功法罷歸輿論冤之

劉觀字廷賓景泰二年進士歷官福建參政性狷介所至有聲遷  
廣西右布政未赴卒 陳府縣志

徐問字用中父玉語在孝友問宏治十五年進士直隸廣平推官  
遷刑部主事歷郎中值權幸縱橫屹不為動出知登州府擒獲大  
盜數百人調臨江修築壞堤七十二遷長蘆運使運司故利數自  
好者不樂居問曰此官藉吾一洗濯耳終任不取一錢累遷廣東  
左布政會中使採珠不中程御史欲下令責諸賈問曰珠有禁將

趣賈為盜耶事得寢嘉靖十一年以右副都御史巡撫貴州俗獷悍問建貴陽書院訓誨之漸知禮讓以擒獨山州賊蒙鉞功賜璽書褒勉召為兵部侍郎疏陳武備八事又言兩廣雲貴丰土司猖獗羅熒邊將喜功名釁好為掃穴之舉所誅戮率無辜赤子非陛下好生意宜救邊臣布威信各安邊境以絕禍萌帝深納之問嘗自謂于道雖勤注念未有渙然冰釋處固請告歸棲方茂山下田不百畝又割以贍寡嫂老屋數椽僅蔽風雨蒿萊滿戶貧士所不能堪問晏如也後起南京禮部侍郎遷戶部尚書數月復告歸問之學以窮理致知為入門以敬義直方為實際卒謚莊裕學者稱養齋先生

李濬字德深成化五年進士授工部主事累遷湖廣左布政所至斥豪猾除積弊毅然有為失當軸意謝病歸圖書數篋而已

太湖備攷馬蹟山志

顧昇字永昇以貢授福建延平府知事延平附山盜賊充斥昇至以守命討捕之境內晏然僉事高某聞其能檄討泉州逋盜盜平不自言功延平故多積逋昇綜理逾月不事刑罰眾皆感服歲負悉償

唐鏞成化元年舉人性清謹醅篤官湖廣岳州通判不持一錢歸後岳州縉紳有巡按江南者建清惠坊以表

毛珪字良寶少跣弛師商輅遂改行自勵景泰七年舉人累官福建泉州知府治尚簡靜厲清操既歸鄉人有笑其不能自潤者珪曰家世清白志之不忘正所以潤吾身也家居屏跡讀書人問何樂曰每觀一書輒有新知以此為樂

薛為學字志淵成化二年進士授監察御史出按河南入掌三法司事皆有聲初按荆襄墨吏望風解綬流民相聚為亂為學誅其



渠魁餘黨解散繼任者處置失宜幾再變為學重蒞請設州縣立  
衛所宣威布德衆以安輯呼之曰慈父未幾卒官為學歷臺中十  
餘年論事剴切中貴咸畏憚之呼薛繡衣而不名弟承學成化十  
七年進士任湖廣麻城知縣強敏有幹

蔣容字德夫成化八年進士授山西蒲州知州以憂歸起補潞州  
藩府軍校恣橫容行法無貸左右激王奏徵詣闕潞民隨之者二  
千餘人累疏訟冤容竟得白改知四川潼川州未幾重慶府缺中  
涓鎮蜀者諷使納賄遷除容力拒之由是忤璫遂謝官歸餘俸分  
與子姪先世所遺田廬悉讓兩弟子益字守謙號裕泉正德辛未  
進士授工部都水司主事分治呂梁洪事多興舉其大者如建分  
司正堂以聽政建儀仗庫以貯儀物建賑濟倉以廩無所歸者又  
增築舊隄以障水患堤旁穿義井建亭其上扁曰裕泉因以為號

戊寅往榷浙江竹林杜姦剔穢簡易不苛同事者慮閹豎為患議  
增稅益力持之曰國課僅足吾職也安能徇勢求贏乎議遂寢進  
署營繕司員外郎董修乾清坤甯二宮以勞賜銀牌文綺辛巳夏  
造武宗皇帝陵同列以中貴柄事沮益請往不激不阿工遂就緒  
世宗登極詔罷皇店等諸為民害者命益釐正奸人欲仍以罔利  
挾勢搔之益不為動人服其操進署都水司郎中癸未保升寧府  
知府命下而逝年四十一古庵毛先生文集

周膺字克禮成化十四年進士任江西萬載縣以剛直忤知府調  
福建永春除豪強清逋賦決淹獄擒巨盜修橋梁平道路鉅細畢  
舉民甚德之會歲除宴坐齋閣忽聞蛙鳴起跡之蛙躍入胥井中  
膺遣人發得枯骨釘貫其顱悉心推求竟得殺人者主名寘之法  
邑人為青蛙記神其事遷太僕丞卒於官

王珀字廷瑞成化三十三年進士授御史巡南城中涓貴戚為之  
斂手尋謫河南睢州判土豪陰結大盜剽掠河洛間蹤跡詭秘珀  
伺擒之改知江西都昌縣有仇家殺人匿其屍反以盜訴珀鞫得  
其情置之法歷官廣東南雄知府郡有權場漢番諸貨所聚珀銖  
錙不以染指時中貴專恣有司凜凜珀不為動會南海有大獄當  
事以屬珀獄成珀暴卒疑有毒之者

胡華字惟峻別號靜齋成化丁未進士授行人擢雲南道監察御  
史始巡京師搏擊不避權貴尋奉敕覈湖廣邊儲及巡北河兼理  
山東長蘆鹽課刻姦剔弊人甚便之巡按福建及北直隸皆值歲  
歉竭力賑恤存活甚眾閩多疑獄竭誠詳讞人以為神有御史古  
月胡勝似色龍圖之誣遷廣東按察副使所轄十三村弗靖檄屬  
兵勦獲甚眾將悉置之法華疑自當道因委訊鞠釋老幼脅從者

若干人功上有文幣之賜先是官軍以牧馬草場侵擾百姓嘗疏  
其事至是權貴挾逆瑾燬誣之自廣逮至京下詔獄罪且不測呼  
曰某不合輒起為國為民心疏瀆聖明等語詆者亦太息卒得理  
還職歷官至廣東左布政使廷議進擢都御史以母憂去議遂寢  
間有忌者謀中傷之華服闋遂不復出華為人沈靜端慤動止有  
常清謹自持不尚矯激居位以不欺為本論議常依平恕事上馭  
下一以誠敬歷事三朝所至有聲既謝政結鄉社清平逸老會詩  
酒自娛日事耕讀所著有巡閱錄靜齋詩集卒年七十三

古庵毛先生文集

白峻字崇之別號慎齋康敏公昂長子在姪七月而生幼癯弱多  
疾而性質警敏洞見事機裁決無滯年弱冠康敏命主家政規畫  
調度動有操術臧獲無老少悉事事計錢穀盈縮毫髮無漏用是  
生業日拓而日用益饒不數年遂以貲雄里中成化丙午以例輸



粟授蘇州衛指揮使轉浙江都指揮同知正德辛未四川賊猖獗峻遵例率家人輩奮勇從征壬申霸州流賊南掠江淮峻復隨大軍周旋効力先是康敏公昂削海寇劉通功賞未稱至是歲癸酉峻具先後功次上陳詔授錦衣衛千戶世襲甲戌江西峒賊扇亂峻奉命往參軍事有功升指揮同知丙子援納級例乞升鎮國將軍都指揮同知尋賜蟒斗牛衣三襲通鑑諸書丁丑以母蔣夫人年高乞終養歸途次聞蔣夫人訃哀毀成疾卒年五十九峻自幼安享富貴未嘗挫抑晚復際遇榮赫一時而家庭倫理無損無乖自奉聲樂滿前而日不廢事暇則登園亭玩物極飲以適志華而不靡樂而不淫人鮮及之者及歿聞者莫不嗟悼焉

明古集

毛先

白玠字宗璞生而聰敏少喪父母落落無所依遂扶書往金陵之句曲山寄跡華陽館從黃冠游忽感悟自奮乃之京師學於翰林

編修徐先生之門久之大有所得成化己丑成進士授戶部主事癸巳勘理浙江諸路鹽鈔時權貴私販累數十萬極力裁革人稱便焉累遷陝西司郎中山陝歉荒人相食議舉納粟之令他如僧道度牒生員入監各以差入銀實官帑其所出納皆玠主之人稱廉明未幾有南京尚寶之命體素瘠而才識豐贍遇事立辦談議風生故為時所推許性孝友自傷蚤失怙恃因名其讀書之軒曰思親示終慕之意事諸兄敬愛處友和易持身謹慤人未嘗見其過既進列御復得南畿密邇鄉邑乃於興仁之第築圃鑿池種竹構小軒三楹榜曰隔塵且曰吾得釋去繁劇將營菟裘老焉未幾卒年五十七

明朝分省人物攷

唐貴字用思家貧傭書以養父母父病革嘗熏辨甘苦籲禱願以身代宏治三年進士授戶科給事中稽覈兩廣倉庾請逋悉清惟

瓊在海外吏得為奸民以逋賦繫者獄恒滿貴差其多寡令以期償全釋甚衆子瑤字國秀正德五年舉人知河南信陽州累官湖廣永州知府有惠政

徐紘字朝文宏治三年進士由刑部主事授廣東按察司僉事時陳憲章講學紘躬式其廬請立宋慈元皇帝廟建周敦頤書院修唐張九齡祠築堤以捍海潮嶺南蠻蛋雜居吏多不檢紘發摘奸伏墨吏望風解綬去遷雲南按察副使卒從弟纁性至孝肄業國子監聞母病不及告馳歸至丹陽夢母告曰吾愈矣所苦在二指抵家果然因號夢指

莊禕字誠之號鶴溪宏治九年進士為人剛直負才氣處事無留滯少貧父將歿令擇所業禕泣對曰兒非儒不可以立身父曰吾瞑矣自是向學雖祁寒盛暑晝夜不輟遂以文名於時既第知直

隸寶坻時戚畹中涓互為奸利盜賊恣橫禕公廉無私獨立行意邑以肅然舊無城請於朝城焉不二旬告訖民不知勞尚書倪岳素以獎廉抑躁為事特疏禕政績十有七條行之天下擢戶部主事劾右藩匿公帑者因遣御史四出閱實帑藏并劾知府若干人出督徐倉會歲稔禕發倉以振監司難之禕曰即有罪當坐禕後上聞報可又督薊倉夜聞轉木聲甚開詢之知劉瑾採木口外上書力言其害又奏沒諸監占窩糧草於官觸瑾怒罰粟若干石後遷直隸河間府尋升山東參政仍掌府事時瑾熖薰灼人人自危禕三疏乞休瑾益怒謫四川順慶府未至言者以宿憾撫其過罷歸嘉靖初應詔陳江南十事世宗特詔所司行之嘗理友人枉死之冤白門生誣陷之獄激巡撫蠲租之疏皆人所不能者黃俊字慎齋宏治十二年進士生而穎異家貧力學登第後乞歸



終養居喪哀毀骨立家產悉讓之弟所居湫隘知府為捐俸結廬受徒講學服闋授戶部主事轉刑部郎中時璫權方熾事干中官者累年不決俊恚定讞忤璫意出知浙江嚴州府訪漢嚴光後裔值歲歉傾倉振施全活者以億計調湖廣漢陽府去之日老穉攀號肖像尸祝抵漢陽革去商羨萬餘曰吾飲漢江杯水足矣擢山東轉運使時饑政多為權貴所撓俊獨抗陳利弊十四條又奏免逋稅億萬自知為當道所忌乞歸卒祀鄉賢

惲巍字功甫少貧廢學以里役受笞於丞發憤讀書從莊禕受業禕愛其才督課而衣食之宏治十五年成進士由戶部遷刑部員外郎時有冤獄劉瑾必欲置之死巍得其情釋之曰吾豈以人命媚人耶尋出為湖廣僉事會盜起逸於湖率兵俘獲五百餘遷副使柳桂寇作撫鎮檄巍隨營征勦有功食三品俸宸濠煽亂巍扼

守蘄黃間民恃無恐都御史毛伯溫薦以自代忌者削其功罷歸王奎字文明自號一齋其先世本匡姓宋初避執祖諱易匡為王子孫因氏焉奎少有俊才弘治壬戌進士試政戶部介外被簡為南京湖廣道監察御史時有二重獄一略賣魏國幼火者一醉毆倡家倡家攘他屍陷之皆已誣服奎知其枉密跡之皆得實立為平反壬申擢江西按察使僉事分巡湖西諸郡縣威聲赫然德興尹素貪墨奎廉得其實將按之尹懼懷百金求貸怒曰我豈可以利誘耶卒按其奸累督勦桃源洞叛寇履危涉險俘馘甚眾招伏餘黨諭撫歸農勞績孔著有彩幣銀牌之賜民德之為立生祠正德乙亥九月卒於軍中年五十六

道光志 古庵毛先生文集

丁致祥字原德別號近齋生而凝重寡言笑比長通經以古文辭名於鄉年近五十始舉於鄉正德戊辰進士授戶部主事監居庸

德平軍儲出納有方暇與州學諸生講究經義諸生憬然改聽當  
正德時天下多事國用匱乏部使四出致祥往閩廣清鹽權之匿  
於奸者數十萬及疏利弊五事於朝多見采納歲漕自江達淮至  
京多滯部推督之先興復儀徵舊閘專堰利者以浮議沮之不顧  
仍集諸名人碑文埒以已見為錄刻之歲可省費萬計而運遂通  
擢湖廣布政使參議湖南歲饑躬自巡省多方賑貸所全活者甚  
衆武岡州民業見侵沒於藩府官校歲久莫能決從容諷王以利  
害即斥令割還之民凡五年詢民瘼爬搔釐革若切於身必去之  
而後已擢陝西按察司副使撫漢中流民威懷並行遇水災多方  
賑恤民以不困遷河南布政使歷官三十餘年囊橐蕭然題詠篇  
什甚富有草窗詩行世明朝分省人物攷

龔大有字士謙別號澗松正德六年進士初為直隸廣平知縣罷

牛羊筋角諸稅清內豎奸胥之蠹遷南京御史清戎江西值宸濠  
畔大有首以聞車駕南巡駐蹕留都復將東下人情恒擾連章請  
回鑾不報臺諫將從閣臣復具奏一御史以次當為首畏禍不敢  
大有銳然率諸御史上之又不報尋奉敕清理屯政舊田多為豪  
強漁獵聞其下車悉首正莫敢隱匿由是怨興謗生又論吏部尚  
書喬宇不職遂中考功法原官致仕歸家居日課耕讀暇則拉一  
二朋舊尋幽探勝嘯詠酣暢絕口不言世故性好儉約自奉未嘗  
過豐拳拳戒子孫勿以奢敗尤喜講學見姻族子姓質美可進者  
輒命題呈稿親加點竄略無倦容嘉靖丙申以疾卒年七十明朝分省人物攷

蔣亨字元貞正德六年進士官南京御史武宗北巡亨率同列抗  
章請回鑾建儲甚切三上皆不報十五年駕南幸駐留都又率同  
列伏行在所期以死爭未幾復請越三日不報人咸危之亨弗為



動歎曰為之自我職當如此他何計哉出為河南按察簽事以忤  
權貴歸亨以風裁自持沈靜端毅性廉介歷任十餘年僅守先業  
一無增飾人服其清節

吳閻字朝言正德六年進士授行人有事豫楚二藩禮成謝私饋  
所至詢民隱輒為劄記選河南道御史巡直隸鹽事兼巡河道還  
陳八事皆急務閻在臺不務以苛擊取名獨持大體然事係宗社  
生民進賢退不肖則諤諤無所忌諱武宗將北巡閻倡同列伏闕  
極諫南郊屆期馳奏請回鑾皆不報宸濠謀逆既命將出師復詔  
親征閻率同列力諫不聽先是選司通關節閻劾四人去都御史  
陳金謀復入院閻率全臺劾止之又極論江彬錢甯谷大用關鳳  
等罪及大臣阿附者眾飛語中傷不顧會世宗立閻慮屏逐小人  
復用疏請攬朝綱究奸邪抑奔競防蠱惑有莫重於用人莫急於

防奸莫大於正始等語上嘉納之未幾忌者中以考功法罷歸尋  
暴疾卒

鄒輓字敏行正德六年進士知浙江蒲江縣禁溺女多善政累遷  
廣西參議從王守仁招降猺賊有功改雲南副使擒賊蒙迷築大  
堰疏治河下流得沃壤萬頃

蔣洽字惟和別號介石幼穎敏凝重稍長就學立志不凡所為程  
式文詳贍步驟迴絕流輩正德辛未第進士觀刑部政以母潘安  
人垂老乞便養授南京車駕司主事職轄官艘時中貴謀入貢多

濫乞者洽雖應如例亦間從節約不苟阿徇流賊奔江南需戰艦  
尚書劉公委洽經畫不旬日就緒又委董舟事於蕪湖適烈風衝  
商筏損舟官長議商抵造洽力爭得免癸酉率同官上疏論建儲  
事語甚切至士論多之乙亥六月升戶部山東司員外郎督江浦

等處儲餉釐奸摘弊軍民畏服節縮浮費積羨餘若干石又以餘力修倉庾帑無濫費民不告勞進署本部四川司郎中奉勅督清閩浙逋稅吏民渙弊既久洽搜剔通融弗苛丁母憂服闋尋卒至無以為斂人服其清節年四十六洽治周易旁涉諸經史為詩古文純雅暢達不尚竒怪善行楷書兼通篆隸自謂得古法下逮醫卜諸藝亦皆得其肯綮所著有介石稿若干卷古庵毛先生文集吳仲字亞夫正德十二年進士知浙江江山縣嘉靖初擢監察御史時武定侯郭勛怙寵作奸仲劾之直聲震臺省議濬通惠河戶部歲省運費十二萬緡擢湖廣參政歷南京太僕少卿仲負經濟才持論鑿鑿副名寶嘗曰士大夫談說經濟非難惟切中事情若操刃而割無一不中肯綮斯為難耳然竟不盡其用

蔣同仁字公甫正德九年進士官寺正嘉靖初詔按閩獄多平反

二年議大禮伏闕受杖幾斃久之遷參議歸杜門却掃府尊過訪漁服出迎啜茗相對旋避居馮湖雖親知罕識其面

梁幹正德二年舉人方正自持鄉後進從游多所造就知湖廣竟陵縣以廉能稱卒祀名宦

曹卿正德十四年舉人以親老就選授浙江温州府學訓導遷樂清知縣蒞事公勤御史嚴飭廉介不苟取邑有巨猾莫敢誰何卿捕致之法民咸稱快

孫鑾字朝望正德十六年進士授刑部主事出讞楚獄多平反知陝西漢中府興水利修堰溉田歲比有收郡有引紙稱食客戶里甲共輸於官判某因而漁獵之鑾曰盡利取民中材染焉焉可盡誅為緩其治而悉罷諸賦判泣謝曰改行衛弁某貪饕肆毒前守不敢問鑾竟置之法擢雲南按察副使邊地數乏鑾括羨餘捐浮



費累歲積至萬緡除劇盜遷太僕寺卿歸每戒子孫曰無論仕不仕要做人無論人知不知要存心又曰居官不受囑而以事囑人吾勿為也歷仕以廉介著居鄉以長厚稱

惲奎字器之正德十六年進士授湖廣安陸知州歷吏部考功郎出知浙江温州府在安陸時中官提督均州太和山工役制用奎御以禮皆懾服不敢恣會歲饑發倉振貸上聞以羊酒勞之蒸温搏擊豪強擒島夷劇盜張璉與奎同年方柄用雖雅知奎而性喜附己奎剛直時與忤尤忤其姻戚之典選者遂調四川成都以足疾乞休

龔大稔字士登正德十六年進士授戶部主事累遷廣東簽事猺獍亂大稔撫之之時吏部尚書方獻夫家居侵奪鹽利籠絡貨權斥紫陽書院以廣其居詹事霍韜以剛狠翼之受賕殺人有司不

敢問大稔抗疏數其罪會獻夫韜皆被召誣以他事勒致仕行至中途復有旨廷訊杖闕下黜為民

陳璠字良玉正德二年舉人任大理府通判以直道忤上官左遷

福建市舶司提舉轄海商多琛貝璠廉潔自持及致仕歸夫人購

珠數顆璠檢得棄水曰毋以此玷我清名陳湖志 馬蹟山志

李鼎字用之正德五年舉人初任澧州學正苗民雜處號難治鼎

飭已厲俗俗漸化轉濱州濱喜夸詐鼎摩以禮法士習一變擢確

山知縣弟熹字潔之選為韶州府推官剖決如神韶逼楠岡王文

成勤平後餘賊肆竄熹悉心防禦民賴以安擢荊州通判馬蹟山志

呂朋字士同正德十一年舉人歷官廣東市舶司提舉為人廉潔

恬靜一介不取歷官幾二十年家不增一椽一壠臺薦十餘章終

回朔州縣兄秩陳邑志

周金字子庚號約庵正德戊辰進士授給事中遷太僕少卿都御  
史巡撫延綏宣府保定淮鳳歷官戶部尚書金為人警敏闊達饒  
經濟大略在省中章數十上悉度可行而言上數遊幸晏朝上疏  
請復常朝之規退則躬覽章奏以總權綱頗見采納時貴寵用事  
國儲蠹於冗食金言京糧歲入三百五萬而食者乃四百三萬乞  
痛加澄汰都督馬昂約女弟於後宮奸蹟類李園金力請誅昂而  
黜其女疏入昂女竟黜金貌壞偉善議論每廷議軍機大事邊境  
要害衆輒目屬之口對甚辨聞者莫不心愜朝議用兵土魯番復  
哈密金言西邊虛憊而土魯番險遠且青海之寇窺伺西寧不宜  
計哈密卒從金議於是衆以金可屬邊事推延綏再推宣府既家  
居廷臣交口薦猶尚以邊事也在兩鎮值寧夏甘肅大同三變之  
後既素豁達不拘帥臣體裁又善煦愉接下規畫盡利而人不勞

邊人愛之其在延綏大同警報至台將卒盡入語曰若知大同殺  
都御史乎衆曰知之金曰若輩謂為得已乎衆曰狂賊自取族耳  
金曰不然邊人苦甚又虐使焉其何以堪藉令上下相通若家人  
父子即授之刃誰忍刺之衆大懽呼叩首退其在宣府總督馮侍  
郎以苛失衆心又私引鹽利數萬諸軍請糧又不得挾憤圍帥府  
金方在告便服出名諸將吏佯詈曰諸軍皆爾曹剝削所致不然  
獨不愛死乎將鞭之諸軍氣稍平前蹠為將吏請且曰是總制者  
罔利不恤我也金因從容諭以利害衆帖然解散延宣皆虜衝金  
撫軍情策強敵闕城晏閉邊圉緩帶兩鎮四五年訖無敗事自金  
去宣府八年而大同復殺總兵據城亂時起金巡撫保定遂往扼  
紫荆擒大同謀者數人送京師會真定巡按御史有疑疾入某邑  
聞銳聲驚以邑令謀已欲杖殺之廣平守力爭又以守亦謀已至



遣吏發卒圍廣平捕守一城盡空金聞變星馳往撫定之上章露  
巡按罪狀而臺長庇其屬為之訟寃復上章力辨廷論竟直金而  
黜御史尋以都御史總淮漕章聖梓宮南祔諸護行者畏江險請  
從陸金力陳山險甚於江卒由江行如期而葬沿江千里居人免  
於伐樹撤屋役夫數萬人得無走死山谷中金之力也及為刑部  
尚書轉戶部益能於其官致仕歸家卒年七十四性喜讀書雖稗  
官小史亦用以資其經略尤喜為詩歌羽檄倥偬中率不廢詩善  
書有晉人風格既沒詔賜祭葬贈太子太保謚襄敏子仕自有傳  
道老志明朝分省人物攷

吳宗達字上千號青門萬歷三十二年一甲第三名進士授編修  
歷官禮部右侍郎讒者指為東林相詆訐得旨原宥時值璫鋌宗  
達終天啟時遜跡家居未及禍崇禎初魏忠賢伏法起吏部右侍

郎廷推閣臣列名第二薦孫慎行自代三年晉東閣大學士尋加  
少傅進建極殿疏辭不允時懲積玩政尚嚴覈宗達劑量於寬嚴  
間多裨益會有臺省得罪帝怒命即處決閣中相顧失色宗達集  
同官揭救得不死時分遣中官監視邊備宗達草疏爭之留中次  
日召見言不得已遣用之故宗達反覆執奏婉而甚力居政府五  
年匡濟時艱鞠躬盡瘁七年晉少師中極殿堅辭不拜是時溫體  
仁柄國黜逐異己廟堂無碩畫封疆無守禦宗達憂勞成疾八年  
五月累疏乞歸卒予祭葬謚文端宗達性耿介慎密無敢干以私  
忠盡拳拳敷陳匡救有人所不知者

張璘字席之號二無少孤貧為同里薛敷教所知講學東林書院  
師孫慎行其學以慎獨研幾為宗萬歷壬子受知督學熊廷弼遂  
成秋解己未成進士授戶部主事進正郎罷總戎暮金舊例督學

粵東屏去踰修供帳聚諸生講學士風大變大吏建魏忠賢祠乞  
上梁文於瑋瑋即日引去布袍草履授徒於家崇禎初起瑋備兵  
嶺北身冒矢石跋履叢篁毒箐間斬首千餘級又傳檄勸諭賊衆  
乞降未幾乞休踰年復起山東副使大學士吳宗達謂瑋難進而  
易退召為尚寶卿歷遷應天府丞歲大旱瑋以軍食可虞奏請禁  
江西湖廣過糴而令應天常鎮淮揚五郡折輸漕糧銀赴彼易米  
則小民免催科之苦太倉無顆粒之虧且盡改民解為官解以救  
民湯火從之召入遷左副都御史時劉宗周金光辰並總憲紀時  
璠為三清瑋上風勵臺班疏曰懲往正以監來今極貪則蘇松巡  
撫王志舉極廉則南京試御史成勇勇與臣曾不相知臣離南中  
民輒扳轅借成御史惠我南人雖前奉嚴譴宜召為諸御史勸詔  
下志舉法司逮治成勇叙用一時稱快旋引病未幾卒檢視遺囊

蕭然無長物得遺表墨淋漓未乾曰中原寇患宜用文臣如王守  
仁用伍文定故事又必稍寬文法俾得展布又遺命以布衾殮毋  
受賻以完吾生平節上聞惻然賜諡清惠罪惟錄

陸愷字允之正統乙丑進士選授北部愷以母在堂乞改南以便  
迎養乃得南京吏部主事曹務簡而日多暇日事披覽學乃益進  
尋改戶部監督在京草場累年宿弊一朝盡革非負外郎中所司  
者土田錢穀愷清以律已勤以蒞事大為諸長老所器重歲乙酉  
累疏乞歸時母尚無恙所夕奉養備至歲節及誕日率子姪稱觴  
上壽人以為榮曰毘陵雖多致仕者而慈闈康壽則所僅見也卒  
年六十二子簡自有傳明朝分省人物攷

沈琮字廷器正統戊辰進士授監察御史景泰庚午奉勅督理浙  
江銀鑛區畫有法後理湖湘刑獄尤多平反比還巡按兩廣威望



益振天順初升四川按察使僉事時蜀地多盜多方捕獲人始安業朝廷屢賜文綺以旌其能松潘羗夷自成化初肅聚為患僉議琮在蜀年久為彼所重宜升本司副使以鎮其地乃受璽書以往與都督協心殫力修城練卒不數月間遂平黑虎等寨事聞降勅褒嘉亦有文綺之賜乙未堅乞致仕歸卒年八十四明朝分省人物

毛玉字良器祖昇語在藝術玉研精問學日夕不少懈為文章清婉有風韻尤長聲詩登正統十三年進士第充部使者於南京景泰帝即位升兵科給事中改吏科有所參駁彈糾務存大體略虛文言罷諸不便事數十如停起復禁請謁歌濫舉停粥官免征逋負寬稅凶荒留養太學生徒皆國體政本之大者天子勵精嚮治玉疏求賢講武之要凡數千言皆見嘉納然體素羸遇盛寒暑輒病病稍間輒出出不數日而章奏屢上及疾亟猶陳六事事未下

而玉已告逝矣時景泰三年二月也年四十二明岳正類博稿

董紹字宗達嘉靖二年進士授浙江新昌知縣新昌邑敝而俗薄紹至悉繩以法豪強脅息紹亦嚴以自治官舍所需一切取辦於家去任僕攜一銅缶行已去縣三百餘里紹叱還納之庫尋復任以勞疾卒於官子士宏嘉靖二十年進士授戶部主事出知福建興化府僉事柯喬參將盧鏜驟嚴海禁當事誣以激變御史定讞士宏覆勘白其寃由是與忤久不遷部使者屢薦擢浙江按察副使時倭犯浙張甚當路者借修宿憾士宏蒞任與督撫張經李天寵調兵轉餉屢破倭以忤趙文華督撫論逮死士宏僅免歸卒

常守文字以通由吏員任成都衛幕以清慎薦遷廣西副提舉再任廣東一介不取丁母憂贈賻無所受獨衣而歸以貧死

周慤嘉靖二十年進士為諸生時道逢一嫗以衣質錢為人所給

整解襴衫與之歲稔家人苦饑整持授徒金歸道遇死者買棺瘞之初為大理評事恤刑闕龐有仁明聲譽遷山東登州府有楮賈以被盜告整曰失盜所有廬舍乎曰無有林莽乎曰無然則何有曰楊樹一株整曰是楊為盜也急令吏人伐楊昇至府觀者皆駭隨而闌入者五六十人整曰是爾闌入地乎貧者答富者罰既下令以紙贖答贖者過半皆持紙至整令各識所從鬻處召楮賈入視之大半其紙也遂得盜論如律以憂歸囊橐蕭然既卒御史周如斗助葬之

金九成字鳴韶嘉靖二十三年進士知浙江定海廉介不受私謁銳意興革地瀕海故有捍海堤久漸廢九成增葺之民號曰金公塘邑與海舶市易勢家因以為利力禁之因忤當路調山東章邱九成不為挫折奸弊杜請託一如定海時擢主事病免居官十年

妻子猶食藜藿知府金豪與同榜相善九成病且革會富家子犯法豪屬九成居間令致千金九成謝不可豪自抵其榻撫之曰獨不為妻子朝夕計乎九成曰我躬不閱遑恤我後面壁卧不復語豪歎息去既死捐俸葬之弟九臯以貢授浙江上虞訓導遷武康知縣修學校嚴課程士論歸之會秋大霖雨縣苦漂溺故事州縣災必以七月聞時諸司皆入闈不得達既撤棘已格於例先是長興嘉興曾以災借運於武康九臯乃請御史責償以供振恤情惻迫切言與淚俱御史為動容竟上請報可久之謝病歸

邱緯字世章嘉靖二十六年進士知福建侯官縣在任四年廉潔自天吏部考察以緯為第一名入補南京刑部主事丁憂服闋補戶部督儲通州移昌平有武弁運餉多乾沒且粟紅腐懼罪陰乞權要居間緯竟按如律出知河南南陽府益勵清節卒於官



黃憲卿字宏度嘉靖二十九年進士為戶部郎清聲蔚起九載不調時嚴嵩方柄政或勸之謁嵩憲卿曰老寡婦猶塗面目以取容乎卒不往嚴敗始擢江西副使年五十絕意仕進卒於家其監兌全楚時兼督珠池貢視篆日池吏例以金珠為餽憲卿杖而却之羨餘九萬兩緘之公府不入私橐

萬鵬字汝南為諸生時有文譽尤善治詩從游者日至年過四十始登進士知浙江松陽縣請謁不通搏擊無所避再調新昌會倭寇入犯練兵築城積勞成疾卒巡按胡宗憲經紀其喪歸無以葬直隸巡按陳瑞葬之鵬未屬纊有當路欲以百金助者託所知示意鵬推枕曰不意垂死受辱其孤介如此

孫濂字國輔昇西鄉人嘉靖三十一年武舉人累官應天淮安衛指揮使時倭寇為患東南郊城尤劇濂謂每港列柵守禦力分而

人不敵不如撤兵於倭所必入之港伏兵要一地伺其入而前後夾攻之倭果屢入屢殲不敢近州郭

王階字文登性醇謹無疾聲遽色嘉靖元年舉人選湖廣臨武知縣縣介山谷間土瘠俗獷又新被兵階務拊循惠下而不媚上以故不遷遂投牒歸

徐常吉字士彰弱冠能文嘉靖四十三年舉人授上海縣教諭萬歷十一年進士除中書舍人遷南京戶科給事中戶科故攝後湖黃冊所入不貲常吉矚然不染會歲旱疏請減江南租稅之半巡撫李某已論死常吉廉其寃力救得釋提學房寰貪墨不法劾罷之東廠太監張鯨以罪黜復召常吉言鯨隨退隨進為國大憂不報在留都章凡數十上皆國家大計尋遷浙江按察僉事未抵任卒常吉性好學多蓄書籍公餘手不釋卷所著尤多孫瑋萬歷十

三年舉人歷官江西廣信知府有廉名

蔣如京字宗茂性謹厚嘉靖四十三年舉人選江西南安知縣每行邑悉屏供具裏糧以從修什伍法以彌亂歲饑出穀以振多所全活邑稅舊為兩征民候輸甚苦如京制十限征之民以為便邑西有金雞橋久圯如京捐兩歲俸倡其役不六月功竣久之遷山西吉州知州謝病不赴故有田八百畝歲周其族戚子弟輩日廩若干各有定額其婚喪疾病雖疎遠必身為部分自奉節嗇不異寒素

吳中行字子道父性語在儒林兄可行語在文苑中行隆慶五年進士選庶吉士授編修大學士張居正中行座主也遭父喪奪情視事適慧星見詔百官修省中行首上疏曰居正父子異地分睽音容不接十有九年今長棄數十里外不使匍匐星奔憑棺一慟

欲其違心抑情銜哀茹痛於廟堂之上而責以訥謨遠猷調元熙載豈情也哉居正每自言謹守聖賢義理祖宗法度寧我短喪王子請數月喪聖賢之訓何如在律雖編氓小吏匿喪有禁惟武人得墨衰從事非所以處輔弼也即云起復有故事亦未有一日不出國門而遽起視事者祖宗之制何如事繫萬古綱常四方視聽今日銷變之道無踰此者疏既上以副封白居正明日趙用賢等疏亦入居正怒謀廷杖之侍講趙志臯等具疏救格不入學士主錫爵等求解於居正亦弗納遂杖中行等四人直聲震天下中行受杖畢校尉以布曳出長安門昇以板扉即日驅出都城氣息已絕醫投藥一七乃蘇輿疾而歸到去腐肉大者盈掌深至寸一股遂空聞母訃裏創造奔廬墓三年鄉人罕窺其面居正死歷遷諭德充經筵日講官會御史丁此呂劾奏大僚某不法狀尚書楊巍



論此此呂言者閩起魏託疾求去疏留者衆中行又不勝憤曰綱紀紊矣復上尊主權明臣義疏謂大臣去留取自上裁諸臣不宜媚諛養交且言官未奉明旨輒自論斥二百年來所未曾有由是公卿皆目攝之尋乞病免四疏得旨賜白金文綺乘傳歸卜築湖濱杜門屏跡歲大稔捐貲設糜饑民多所全活起侍讀學士掌南京院事復稱病辭未幾卒易箚時正衣冠呼諸子部署家事作自輓詩四章而逝明年帝念中行講幄勞賜諭祭一壇贈禮部右侍郎祀鄉賢中行長身玉立兩目炯炯氣雄萬夫仲子亮字采于萬歷二十九年進士授中書遷湖廣道御史疏劾方從哲有座主復推座主門生復及門生而浙人復繼浙人等語一時如陳治則喻安性等為浙輔門戶計者靡不膽落又陳起廢疏以趙南星鄒元標顧憲成高攀龍等宜破格用羣奸側目奉敕按宣雲論救淮撫

李三才辭理嚴直邪黨徐兆魁等許奏亮疏辨云羣邪合謀攻淮撫意少傾東林意多東林名賢如顧憲成者兆魁輩必不敢指為邪也邪臣怒憲成而不敢明言獨坐臣為黨臣已抱病決意長往請罷不報巡方時疏二十餘上兩鎮肅然聞母病上章不待報即歸以擅去官奪級天啟二年起南京禮部主事累遷大理寺少卿卒後贈大理寺卿祀鄉賢亮子柔思字德嘉天啟二年進士知河南祥符縣時闖賊日熾繕治城隍運籌措餉兵不譁而民不病白蓮邪教煽衆橫行計殲渠魁二人餘黨漸解覈追金帛千餘金修築提堰河患以弭學宮圯捐俸葺之振恤饑民全活甚衆以勞卒官祀開封名宦簡思崇禎四年進士授戶部主事監北新關稅剔除弊政商民便焉歷遷東昌道時登難甫平奉命徵師入衛練兵措餉以勞疾解任起補嶺南道調浙江參政去粵時遇吳鍾巒赴

桂林司理任時楚寇逼粵桂林危在旦夕鍾靈志殉國以妻孥託  
簡思慨然任之始終如一日在任以清節著署按察使事獄多平  
反以抗直謝歸柔思孫震生康熙二十七年進士亦授祥符令招  
徠勸墾催科有法力行保甲緝劇盜寘之法亦有召父杜母近出  
一門之謠以乞休歸  
林萬潮字養晦號石樓父富兵部侍郎萬潮以嘉靖戊戌進士為  
甯波府推官以父富嘗守是郡歸請所以治獄者受命而行至則  
恂恂然不敢以喜怒加人當斷獄務求所以生之者旬日不得不  
即斷士民相與驚曰一何其肖吾林郡侯也以父憂去官釋服補  
贛州已而檄攝興國其猾胥善巧伺以愚其上至是故進敝器以  
書之薰少怒即得詐為機利以苛擾細氓萬潮獨不一問左右請  
易器曰於余甚宜由是猾胥搖手相戒未幾信豐大水當道檄齎

幣金賑之間命即行是時水初退地卑者猶在沮洳中冒溽暑乘  
肩輿泥行沿村塢計口給授夜則會數而哀分之率不得寢生活  
者幾萬人而身則病矣當道顧益壯其才遇難辨事檄以屬之至  
憊甚猶時時作手續令吏人代為詰難家人泣諫則曰吾身猶食  
祿而可後事乎竟以病卒於官年三十八明朝分省人物攷  
王堯卿隆慶間以貢授江西鄱陽訓導遷河南武陟知縣恤窮辨  
枉節用省刑謝絕饋貽蠲除苛罰上官嘉之疾革有羨餘百金亟  
命計吏登之籍乃瞑

陸南陽字伯明常從唐順之游一時學者爭出其門因著講義行  
世以貢授湖廣善化知縣纖毫無取贖鍰悉用積穀又捐俸以濟  
諸生貧乏者有不便於民力爭之上官得請乃已久之乞歸扁舟  
東下過洞庭颶風大作舟人皆懼南陽徐曰昔吾與神約必不攜



善化寸縷還吾不食吾言神詎忘之須臾風止里居甚貧子完學語具後

褚國祥字徵興萬歷八年進士授福建上杭知縣調浦城當權主事會與巡按御史忤轉浙江湖州府同知母老請終養歸杜門無所造請既終母喪補山東兗州府同知會河決晝夜宣防不避危難總河李化龍惡其伉直論調遂棄官歸

何鯉字伯龍萬歷十一年進士由刑部出知河南彰德府勸農濬萬金渠號何公渠郡故無麥教民種植食以饒無賴多鬪聚鯉貫其罪擇精壯充捍禦故鄴兵獨強月再課士捐俸為賞格藩府屯衛士以請糧失時有私鬻官田餬口他郡者鯉便宜從事給官錢分贖丁壯聞風來歸事未半謫鄧州通判卒民為立祠祀之

吳希曾嘉靖十三年舉人性亢直不諧俗為英德知縣有惠政陳邑志

吳璘嘉靖三十七年舉人選魏縣教諭陞翰林院孔目吏部司務兵部郎中福建參議在官廉介有田二十頃臨終授猶子信於己子陳邑志

吳宗徽字允從性孝友失恃怙撫幼弟成立析產與千金鄉人義之以貢謁選擢雲南大理推官持法無所阿攝景東府篆清軍民田減荒稅祛隱弊權太和縣事省里甲之費立成規修崇盈倉鶴慶諸府夷民爭田久不決殺傷甚眾數命廷臣鎮撫不服宗徽往撫諭之立折其情歷三考年九十一卒高山志

史文龍字應霖嘉靖四十一年進士官廉州府節用愛人尋乞歸家居謹厚士論歸之陳府志

湯恩嘉靖中官福建沙縣典史廉幹得民去而民碑之於雙鳳閣

陳邑志

邵起潛性剛常面折人過為安州倅陳便宜緩逋賦民甚便之尋自免歸家居施德於兄弟鄉黨甚多陳邑志

丁任字碧山參政致祥子嘉靖間任江西興國主簿以廉名馬嶼志

唐大卿字子宏隆慶元年舉人樸茂醅謹令靖安倅青州皆以廉

靖自守歸橐蕭然郡縣未嘗有干請陳邑志

孫慎行字聞斯別號淇澳太僕寺鑾曾孫幼聞外祖唐順之論即

嗜學萬歷甲午乙未聯捷以一甲第三人授編修妖書事起廷論

必欲窮其獄慎行抗言是未可深求須存國體累官左庶子以憂

歸鍵戶息交覃精理學作里居紀以見志起為少詹事擢禮部右

侍郎爭東朝冊立及竝封莊田被旨切責不顧廷臣會議大言此

事是某禮臣死所復指首輔向高亦今日相公死所太子儲位既

定福王尚留京師莊田四萬頃宵小窺伺事且不測疏十餘上不

省慎行乃令文武諸臣伏闕力請上不得已許福王明年季春之

國羣情始安楚宗人擊殺巡撫趙可懷為首六人已論死禁錮尚

多慎行力白其非叛釋之代藩廢長立愛慎行念與福案近亟正

之羣小側目請告歸熹宗立召為禮部尚書入朝首論李可灼進

紅丸暨李選侍不早移乾清宮皆輔臣從哲不能先自匡正為弒

逆顯據詔奪從哲一官可灼戍邊秦藩由旁支進封賄近倖封四

子郡王慎行援典故力爭忤旨引疾去已楊忠烈二十四罪疏上

璫忠賢怒甚諸修門戶却者借璫為虐大起訟獄忠烈拷死慎行

以紅丸一案戍寧夏極邊三朝要典書成復坐以罔上不道例重

處璫敗解戍復故官崇禎元年以原官協理詹事召高卧不起八

年上方齋居引咎以閣員推及力疾赴都未及陛見卒年七十四  
謚文介慎行家居朔望必跪讀中庸一章表章諸儒以朱晦翁陸



象山王陽明為依日課凡五一默坐二玩易三文藝四書史五作

宇所著有慎獨義百篇傳於世尤善書法罪推錄

錢一本字國瑞萬歷十一年進士知江西廬陵縣建王守仁祠以

倡明理學為己任擢御史即發江西巡按祝大舟貪墨狀已請崇

祠曹端陳真晟羅倫羅洪先於文廟出按廣西屏供億之費時冊

立東宮改期申時行柄國不敢言一本即疏請建儲劾首相言極

切直留中三月削籍歸知府歐陽東鳳建先賢祠旁構經正堂講

學推一本主之梁溪顧憲成倡東林書院一本與講論往復不絕

朝議與東林為難一本曰不見是而無悶不見知而不悔正吾輩

得力處也潛心六經濂洛諸書下至天文地理無不披究尤精易

學先卒數日預營北域自作寄寓逋客長言數十首脩然而逝子

春字若木萬歷三十二年進士歷知獻縣徵授御史太僕寺少卿

徐兆魁痛詆顧憲成春三疏首發其險邪出按湖廣請予禮部侍

郎郭正域及光祿少卿顧憲成郵典楚宗人以告訐錮高牆者甚

衆春訟其寃請省釋之咸甯知縣滿朝薦等久繫以春奏得釋又

再疏劾守備中官杜茂且備陳採權之害言臣不忍皇上聽小人

之謀名出漢桓唐德下為我明基禍之主帝以湖廣地為福王莊

田春三疏力爭帝降旨切責葉向高致政去方從哲為首輔春抗

疏言今天下人才則朝虛野實財貨則野虛朝實從哲不能救正  
而於福王則無事不曲從臣嘗歎皇上有為堯舜之資而輔佐無  
人僅得王家屏沈鯉又俱不信用其餘大抵庸惡陋劣奸回媚嫉  
之徒不意至從哲而風益下臣聞從哲每向人言輒云內相之意  
是甘為萬安焦芳曾趙志高沈一貫之不若也從哲疏辨乞去帝  
慰留而責春妄奏出為福建參議尋丁父憂天啟初召為尚寶少

卿歷遷光祿卿魏忠賢黨閹克新劾春倚恃東林父作子述削籍  
歸崇禎元年召拜通政使歷戶部侍郎擢尚書總督倉場條行釐  
弊十事予告未幾起南京戶部尚書疏請皇太子出閣又條上戰  
守策并論賊三可擊狀帝悉如議行會疏請改折白糧忤旨罷歸  
卒子霖庚午舉人念修丁卯舉人刑部主事  
蔡謨字子範性醇篤以孝友聞故廬悉推予諸弟與人交不設城  
府萬歷七年舉人知浙江瀉安縣銳意興革百餘年積弊剷革略  
盡省民間供億以萬計與上官不合左遷去

沈應奎字伯和號湛源萬歷二十三年舉人少孤力學矜氣節喜  
急人難借鄉里俠少年游有絕人力置鐵簡自隨意有不平輒持  
簡起舞光上下閃閃颺拉有聲妻父邵芳亦以氣節著布衣徒步  
入長安名傾朝右謀起高拱於田間張居正與拱故不相能銜芳

假他事殺之復欲殺芳兩孤應奎集諸少年縋牆入奪歸得不死  
由崑山教諭遷裕州知州邑旱民乏食哺聚山礮間幾十餘萬督  
撫分兵勦之不克應奎單騎入其壘衆駭服曰徵科日迫逃死須  
臾非得已也應奎曰能從裕州牧歸乎我當善全爾衆感悟哭聲  
震林谷悉縱火燒山解甲去尚書孫丕揚過裕不遣一使迎亦不  
遠謁丕揚怒突入應奎署應奎方焙餅炙韭將食遂邀之共食丕  
揚奇之入朝言應奎廉擢刑部主事甫視事戶部以裕餉缺兩年  
額奪應奎俸裕民聞如數旬畝解京神宗異之御午門召應奎與  
民見州民道應奎狀淚交頤帝大悅賜應奎宴表裏晉員外郎三  
十八年帝不豫福王尚未之國中外交洶應奎請首輔葉向高入  
直己衷甲從之誓以死衛太子帝疾瘳乃出後出知汀州府稅監  
高宗播虐將由汀入粵應奎大書榜示直達會城曰稅監將入海



從倭抵汀境太守當領吏民擊殺之寀聞風屏氣不敢過汀尋以  
繼母病乞歸踰年起南京光祿少卿以黨事削籍年七十餘卒孫  
鼎鉉明亡為僧

唐音字希古少病幾不起其父令業醫晝夜刻厲與從父順之同  
學互相砥礪後從學於毛憲中式嘉靖七年舉人會試竟謝不往  
讀書必沈潛玩索師言有未愜不强唯諾反覆辨論期有得而後  
已其言曰堅苦斂束悉就規矩使筋力強固精神凝注意氣奮興  
於天下之可喜可懼視之漠如而後學為有基爾選直隸雞澤縣  
孤立獨行不肯以上官意指文法緩急為趨向時上官方欲督民  
買馬又欲為要人建坊又將脫巨奸於獄音皆以去就爭之卒於  
官貧幾無以殮有賻者其子一磨皆不受一磨字仁甫少穎慧讀  
書日記萬言萬歷二十八年鄉試第一四十四年進士大學士高

拱熟其名欲令讀書中秘力辭不赴性高伉律躬嚴峻履蹈不爽  
居宜興

金顯名字孝先一字揚庵父汝升萬歷二十年進士南京戶部郎

中顯名萬歷四十六年舉人崇禎初選授睢州學正會流寇擾中

州顯名練儒兵日蠲俸犒之咸感激為用權柘城令邑多逋糧顯

名與父老約盡蠲耗羨民大悅擢工部營繕司主事掌窯廠監節

慎庫奏報羨金三千兩特旨擢本司郎中出守汀州嚴保甲練鄉

兵定邪教之亂蠻民向化汀屬賴以安堵者數年卒年五十二子

鉉語在忠節

吳玄字又于萬歷二十六年進士釋褐湖州府教授歷湖廣右布

政性剛介時黨局紛紜玄卓立不倚在刑部時設園扉榜諭多仁

人之言刺東昌嚴州俱有卓政所著有率道人集孫守案另有傳

王就學字所敬父死於盜終身以不得盜為恨每飲酣輒涕洟號呼人咸悲之萬歷十四年進士授戶部驗糧廳主事申官需索橫甚解戶有掠死不得掣批者就學稱引祖制章兩上卒得請著為令旋以東事轉餉編採聞見疏可慮者四可乘者三語侵執政不報改禮部教習駙馬尋調吏部會仁聖太后梓宮將發故事皇帝當送之門先一日有遺官恭代之命就學愕然即夕具疏其略言皇上之身皆太后之身也凡可報恩者何得顧復其身今舉期在此一刻則憑棺哭踊亦惟此一刻而獨靳攀送以致聖孝不終豈獨非古禮聖心何安神宗憾之尋以此得罪削籍歸不半載卒劉純仁字元之祖峯語在義行純仁萬歷二十年進士授福建泉州府推官公平廉慎獄多平反凡跡涉嫌怨他人所不敢任者純

仁挺然當之嘗蹈海檢閱兵賦踰數月鬚髮為白監司檄委旁午竟以疾卒於官病劇時屬邑致餽猶手書峻卻之極歸家人鬻袍帶以償負祀泉州名宦子明祚以純孝聞綿祚字季廷崇禎辛未進士授江西永豐知縣鄰近九蓮山界閩粵賊窟其中綿祚請各省會勦廣撫熊文燦命參將張一傑率兵應之守備以下委綿祚節制壬申六月賊薄城下綿祚敗賊於沙溪再敗之表湖地為江右全省門戶預伏重兵待之夾擊兩晝夜斬馘無算仍率守備吳名魁等直入賊巢安撫其眾巨寇悉平因積勞得疾請告歸卒綿祚幼孤力學與兄熙祚永祚並以氣節流芳相淬勵卒得酬其志云永豐紳士請祀名宦又立專祠祠之熙祚永祚語見忠節鄭振先字太初萬歷二十二年進士官禮部主事自沈一貫當國時事日非朱賡繼之以同鄉相比暱帝命簡閣臣廷推李廷機等



而廷機之用朱廣主之振先抗疏劾朱廣十二大罪且言廣與一  
貫廷機為過去未來現在三身帝怒貶三秩以言官論救再貶二  
秩子鄂字峯陽少從東林講學天啟二年進士改庶吉士即疏劾  
魏忠賢文章尤負大名後以疑獄磔死天下寃之

吳襄字服于萬歷三十一年舉人初任福建南平知縣剔姦除弊  
胥吏莫不畏法遷直隸滄州時內監孫茂霖分守津通抵滄境府  
縣吏皆郊迎襄獨不謁茂霖怒及見則衣錦繡益怒襄不為屈竟  
解組歸築別業青山莊優游終老

張師繹字克雋萬歷二十六年進士授江西新喻縣清逋賦抗礦  
使有循聲累遷江西按察使會璫餓方熾正士半罹黨禍師繹加  
意拯護害將及拂袖歸杜門著書子星瑞語在文學

龔三益字仲友萬歷二十二年舉鄉試第一二十六年成進士選

庶吉士累遷右諭德兼侍講官編修時以事使楚藩王年少而驕  
三益奉璽書至門閹人導從掖門入三益曰天威不遠顏咫尺王  
慢天子使乃大不敬王慚閹中門見四十三年典北直試時御史  
劉光復以挺擊事名忤旨繫詔獄光復忤非端人而繫非其罪帝  
震怒三益發策有曰皇上明聖豈遷怒一孤臣哉或者叢神是倚  
煬竈為姦蓋斥鄭貴妃也聞者咋舌明年充東宮講官屢疏請開  
講以前語為忌者所中左遷湖廣參政因病乞歸子九疇字禹錫  
崇禎十六年進士官中書舍人博學能文九疇子朋百藥皆在文  
學

何厚基字仲博萬歷間以國子監授陝西苑馬寺監正攝富平縣  
耀州西安府卓有政聲時地震山民多壓死者厚基捐貲給棺前  
後掩骼以數百計民德之遷王府長史以老辭不赴生平好施與

推解衣食終身無倦色兄懋基字仲修性孝友萬歷三十四年舉人選徐州學正教士有法以母喪歸授徒以給善書祀鄉賢  
陸卿榮字孟欽萬歷三十二年進士初任浙江嚴州府推官歲大潦民從山巔卿榮出穀捐貲極民於溺視篆建德奸胥侵牟鉅萬卿榮正其罪追還之官攝府事以嚴灘險峻商民爭渡時致覆溺設渡船數十又設義田以餼渡夫擢吏部同籍有以百金饋者矍然曰君不知故人耶卻之時銓法多弊卿榮條上十七款皆報可猶吏舞文摘發百餘人無敢以姦嘗者屢疏請起建言久錮諸臣尋皆辟用凡典六選當時稱選君第一遷太常寺少卿以親老乞歸父病已劇有巡撫浙江之命父已卒哀毀成疾遂不起諭祭祀名宦鄉賢

蔣紹燿字光甫萬歷三十四年舉人授如皋教諭轉國子監助教時璫煽禍紹燿闔戶草疏辭甚激烈袖稿呈祭酒蔡毅中曰國學為師表地儻不直言匡救其何以謝天下毅中曰然列名疏上留中不發旋擢刑部郎中出知湖廣漢陽府有古循良風以勞瘁成疾遇享文廟諸僚佐請代紹燿正色曰予忝受郡敢以犬馬疾冒不恪乎即肅衣冠行禮未畢仆而卒  
周士龍字幼潛萬歷二十六年進士授戶部主事督淮關板閘抽分多善政衆建周公遺愛祠

董承詔字聖臣萬歷二十五年進士授中書稿師遼東還言六難請預設備後卒如其言擢兵部武選司員外郎薦用杜松劉綎疏通選法凡郡縣練兵武職條改欽依酌量錄用武職有欽依始此時朝議方急兵言兵者日進有方道人妄言有翼能飛請試觀承詔諍曰是妖可斬也坐訐激罷官已而妖竟無驗復起浙江布政



使浙多積逋承詔會計無遺比入覲周延儒以宿憾誣以侵漁將  
曲殺之帝顧御屏有神宗親書承詔姓名為之動容得致仕歸  
陸大受字凝遠萬歷三十五年進士歷官戶部郎中請減福王莊  
田劾鄭國泰驕恣亂法請衛東宮疏語剴切又爭挺擊及罷內市  
事於首輔方從哲不聽出知江西撫州府以清節聞大受身非言  
官遇事敢言坐察典罷後薦起未用卒

憚厥初字伯生萬歷三十二年進士官行人冊封魯藩卻餽贈奉  
詔召王錫爵於家不起柄政者啖以美官令劾之曰與王公俱得  
罪則可賣公弗為也遷兵部職方司主事定安商之亂歷任湖廣  
按察使崇禎二年京師戒嚴督河部鎮守兵入援時四方勤王兵  
多逗遛厥初獨裹糧以進帝遣中官勞問事平還楚尋擢陝西布  
政使移疾歸性樂易與人交無城府年八十卒

陸完學字汝成萬歷三十五年進士備兵浙江杭嚴時歲饑米騰  
貴或出示減價完學獨謂杭不產米聽其昂以來米高既而米果  
踵至民賴以濟晉閩藩時外吏多建祠以媚璫完學獨否璫黨潘  
石乳捃撫中傷之有東林健足之語遭削奪璫誅起浙撫先是濱  
海苦颶風潮從城堞入漂沒無算完學築塘以障潮水為之縮至  
今賴之遷兵部侍郎尋轉本部尚書修明戎政崇禎七年卒贈少  
保

許鼎臣字爾鉉祖惠語在義行鼎臣萬歷三十五年進士起家行  
人司遷吏部時諸務漸弛鼎臣於宗社安危諸大政陳奏剴切疏  
再三上得請乃退以見愠羣小堅請歸養母患背瘡口為吮血拭  
沐傅膏不委媵婢手居家十載起光祿丞魏忠賢用事鼎臣廷抗  
之予聞歸里崇禎初起本寺少卿諸璫聞其名莫敢橫索節省以

萬計流賊躡晉窺豫帝以鼎臣知兵巡撫山西單車就道陳便宜  
六事首列蠲租以恤窮民使民不從賊增餉以募勇敢使兵不擾  
民駐汾州督戰殺賊甚衆復有短毛賊攻交城急鼎臣救之賊解  
圍走劾罪帥尤某以金賂當路欲飾敗以為功鼎臣獨不可疏略  
云諸將皆可言功微臣但知有罪由是憾者益衆疏上請振不得  
請蠲征不得又請察被兵州縣量蠲又請留贖穀振饑皆不報未  
幾命協勦豫寇以和順等縣處山間接壤中州檄兵駐防而直指  
竟撤使旋省監璫遂突以和順失事劾鼎臣罷歸在晉甫十月先  
後凡八十餘疏好施予里中婚喪待以舉事者甚衆獎拔後進汲  
引單寒無少德色子之漸語具後

河南知府時帝愛子福藩國洛陽其僮客放縱吏不敢問	吳賜字麗中萬歷三十五年進士初授大理寺評事多平反歷遷	後凡八十餘疏好施予里中婚喪待以舉事者甚衆獎拔後進汲	引單寒無少德色子之漸語具後	竟撤使旋省監璫遂突以和順失事劾鼎臣罷歸在晉甫十月先	幾命協勦豫寇以和順等縣處山間接壤中州檄兵駐防而直指	請蠲征不得又請察被兵州縣量蠲又請留贖穀振饑皆不報未	云諸將皆可言功微臣但知有罪由是憾者益衆疏上請振不得	圍走劾罪帥尤某以金賂當路欲飾敗以為功鼎臣獨不可疏略	民駐汾州督戰殺賊甚衆復有短毛賊攻交城急鼎臣救之賊解	六事首列蠲租以恤窮民使民不從賊增餉以募勇敢使兵不擾	萬計流賊躡晉窺豫帝以鼎臣知兵巡撫山西單車就道陳便宜
------------------------	---------------------------	---------------------------	---------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------

廉潔守正不阿僮客斂輯遷廣東參政香山澳者倭夷貿易處也  
屯聚萬人為姦民煽誘築城造礮臺有不軌志巡撫何士晉議弭  
之以屬賜賜嚴輯姦宄杜絕交通名其首諭以威德咸俯首聽命  
隨其城及礮臺患遂息會士晉以璫禍去績未上聞尋遷江西右  
布政轉福建左布政有勦撫海寇功卒贈太僕寺卿

馮夢龍字仲田歲貢生萬歷間任廣東新興知縣邑當六郡衝供  
億不貲夢龍措置得宜無絲毫派累糧額頗重民苦之力請上官  
得減嚴保甲姦匪遠跡治獄和平待士有恩禮崇楨閭民追慕之  
祀名宦子祖望字元呂少從薛敷教游崇禎四年進士撫然曰民  
生於三何以圖報遂號生三初知湖廣瀏陽縣繼任河南商城時  
闖賊方熾城被掘陷四鄰皆盜藪祖望蒞任入賊巢諭以大義擇  
鄉民有幹才者分地嚴守招撫流移給牛種勸耕儲料物為築城



計未幾寇復至功盡廢祖望居破寺中椎牛置酒召鄉民四十人謂之曰無城何以守今城中富室十絕其九多膏腴遺產爾等此時量出錢米給帖永業築城有資爾等獲產不兩使乎俱受令去兩月城工竣雉堞屹然與光山固始犄角事聞擢戶部主事歷遷郎中會左良玉等大軍需餉授湖廣參議督餉北上聞京師陷恐資寇糧聽饑民取之慟哭歸里杜門不出號呂道人未幾卒董應揚字于廷萬曆三十七年舉人初任銅陵教諭歷遷兵部員外郎時在京文武官俱有進馬之額應揚貧無餘金解束帶鎔之及邸舍用物盡質以應都下因有窮員外之謠授廣西布政參議會龍英之變悉心綏輯民夷以安擢蒼梧參政移疾歸吳奕字世于萬曆三十八年進士令福建龍溪會大水城不浸者三版奕力救得無恙水退築磯修橋不費民錢行法必信胥吏不

敢作奸以強項忤縉紳為所媒孽投劾徑歸

莊起元字中孺萬曆三十八年進士知浙江浦江縣調蘭溪治績卓著擢江西撫州府有倚勢奪民產者起元立斷還之察典左遷戶部主事督餉天津值三王竝封邊警告急起元籌畫海運省公帑金錢數十萬李應昇罹瑞禍逮至天津起元歛贈備至瑞暨崔文昇李明道督漕司道望風執屬禮起元獨與抗衡不屈未幾竄山海關崇禎元年擢太僕少卿子應會應詔語具後

莊廷臣字龍祥號凝宇萬曆三十八年進士令浙江永嘉有惠政以天下清廉第一舉卓異擢禮部主事歷江西湖廣浙江廣東監司其分守鄖陽時方議建瑞生祠廷臣獨爭之力楚人重其剛正升湖廣左藩居二載耗羨一無所染歸橐蕭然里中稱清白吏祀永嘉名宦年八十五卒子鼎鉉有孝行

陳睿謨字常采號鹿茸萬歷三十八年進士授知縣擢御史巡按四川時魏忠賢生祠徧天下巡撫尹同昇以諷睿謨睿謨正色曰當留一塊乾淨土還朝廷禍福吾任之卒不建忠賢誅降救褒美再按畿輔出為福建糧道歷遷湖廣布政使其備兵禹州時土寇楊四作亂睿謨統千戶劉邦定討擒之於是修建儒學創造潁濱書院又請蠲河患地一百二十頃士民頌焉崇禎年議設偏沅巡撫詔睿謨往流寇李荆楚劉新宇劉高峰等竝起睿謨授將士方畧屢戰皆捷三寇悉平既而張獻忠逼荊州湖廣巡撫疏請沅撫移鎮荊州護惠藩睿謨至方策戰守而惠王已微服出邨強睿謨護之行至岳州而荆襄陷睿謨以為恨卒祀閩豫蜀楚名宦子咨稷崇禎十五年舉人歷官刑部郎中恤刑畿輔活死囚無數陞雲南瀾滄兵備僉事與睿謨同祀鄉賢咨稷子玉璣語在文學

楊惟寅字亮儒萬歷四十年舉人初授河南上蔡教諭其地有伏義陵產著草孔子厄廟生白龜因著周易觀玩鈔遷亳州學正以禮樂經濟文章騎射四科教士又集春秋五傳分六部五倫類編生平讓家產撫族孤孝友出於天性兄惟和官口口以懷愆太子陵陷當得罪惟寅學錄秩滿應遷戶部請改工部救之得免兄不知惟寅亦不言後權闕湖廣沙市無城流賊至惟寅部勒市人為伍總督盧象昇亦移重兵策應民商慶更生建祠立碑祀名宦龔道洽字應民萬歷四十年舉人任湖廣雲夢縣時璫歛方熾祠宇滿天下楚撫檄守令輸貲道洽不應曰雲夢貧不能以溝中之骨為璫祠添一椽會璫誅事得已邑中大姓挾聲氣啊唱里黨道洽案坐不法者奪所攬田宅子女還之民遷山東青州府同知疾作將告歸流寇入界道洽成師而出賊敗退疾益急當事許道洽



歸章未上寇又至道洽復強起登陴固守圍解乃歸

鄒忠允字肇敏萬歷四十一年進士初知浙江錢塘縣有惠政遷兵部丁母憂哀毀骨立素食三年服闋擢福建參議平劇寇劉香會有攘功者忠允曰人臣奉職何事言功方憂違罪不暇耳轉九江副使當事欲侈城鑿功忠允曰守在人不專在地徒防農事無益因忤當事投劾歸窮研經學孫祇謨語在文學

瞿士達字元亮萬歷四十四年進士授刑部主事出知河南開封府晉河道副使治河有功著有治河考以不附璫歸崇禎元年起補廣東兵備道奉敕征勦流寇有禦寇捷書遷福建海道參政會同提督備倭謹巡邏捕亡匿造舟礪兵操習水戰擢浙江糧儲道遷福建布政使告病歸性剛介居家孝友手不釋卷子廷詣字雲韶順治四年進士福建泉州推官擒滅大盜許山父子闔郡安輯

折疑獄有聲

鄒嘉生字元毓萬歷四十四年進士由戶部郎中出知陝西西安府時白蓮妖賊四起嘉生修備簡旅賊不敢犯有巨璫在陝捶殺職官嘉生執送臺使者樊杖下善治獄有吏舞法輒吐狀曰吾溷神易溷鄒公難舉卓異督學江西尚書王紹徽以媚璫嗾言官齟齬之罷歸後紹徽入逆案嘉生寃白補浙江台紹副使台與閩相望多寇嘉生駕樓船入海按視形勢伏兵堵截海氛以息歷遷陝西懷隆道時秦晉多警嘉生建四議營制馬政軍需邊儲多成效遷山西按察使流寇紫金梁等十道犯晉省垣空虛集紳寮四面守西北圮嘉生獨當之城內畫四廟廟分十社社有長政令嚴密賊遁去嘉生居家敦孝友尚節義與江陰李應昇善應昇被逮鬻產資之子廷玠語在忠節

須用綸字如卿萬歷四十六年舉人崇禎七年授山東青州推官  
風節凜然出疑獄大辟十有七人有大姓利叔產謀為後遂逐其  
妾并害遺孤用綸嚴鞠寘之法其家得全署府事解衡王餉別除  
扣剋積弊修葺學校城池教場倉庫時兵餉告急用綸裁各屬雜  
費得節羨銀三千七百餘兩封儲府庫報上官充餉不費民間一  
錢為前守所忌囑當道誣以勒索子兆英徒步叩闕得白歸家杜  
門讀書兆英語在孝友

王之柱字砥中萬歷四十七年進士歷官福建按察副使兩歲失  
怙母毛氏教訓成立舉進士即疏母氏苦節建坊旌表初令將樂  
既令南陽擢觀察俱有異政奉母至孝鄉黨宗族稱之祀鄉賢  
周詩雅字廷吹萬歷四十七年進士知直隸廣平縣尋調寶坻初  
抵縣出滯囚數人又革馬戶侵占姦人王福魏汝平倡白蓮教京

輔騷動詩雅計除之福汝平俱闖黨莊客因中傷詩雅左遷上林  
簿憤時政著指鹿為馬論有採以入告冀動上聽闈怒矯詔鐫詩  
雅秩編管閣敗擢戶部員外郎旋遷湖廣參議分守湖南土賊八  
排蠻者最悍詩雅威懷之卒就羈勒後移貴州提學乞歸母喪三  
年不入內構一亭曰退谷兄弟倡和其中夜則同卧數年歿

白貽清字希賢萬歷四十七年進士授戶部主事督餉山海關人  
方視為危地貽清慷慨受事叱馭而前及備兵陝西榆林屢立戰  
功有水泉三條溝張義堡紅溝青松南樂水磨川七捷以疾歸尋  
起戶部侍郎督餉宣大晉尚書總督倉場簡任所司務攬大綱有  
古大臣風云

陸卿任字庶愚萬歷四十七年進士授戶部主事革諸弊積羨餘  
數千金還公出為西涼副使捐金修城隍繕守具鎮番縣瀕邊斗



絕積沙平城卿任冒險修築鬱為重鎮轉福建驛傳道參巡撫熊  
文燦軍事平海寇鍾斌李魁奇等招安難民數萬晉按察使以積  
勞卒賜祭贈光祿寺卿祀鄉賢及福建名宦

張三光字九水以貢授太倉訓導性高峻以古道自任嶽嶽諸生  
中恥為苟合馬世奇姚希孟輩咸以臯比推之曰足一及門而終  
身思步趨者非斯人誰與歸擢知昌化縣昌化地多磽瘠民坐虛  
糧百餘石死亡幾半三光至酌陳六款語極痛切遂蠲免權廣東

廣州府同知以疾歸

唐鏞成化乙酉舉人性清謹醕篤通判岳州不持一錢歸岳民歌

思之後岳州縉紳有巡按江南者建清惠坊以表之

戴吉人字酬之擅文譽好談經濟兼工騎射擊刺崇禎壬午由歲

貢授岳州推官時洞庭南寇氛方熾吉人慨然以澄清自任安輯

流移繕治甲械寇有謀王一德老人者吉殲之歲饑賑卹多善政

後莫知所終

蔣之俊天啟二年武進士授應天標營守備攝吳淞奇兵營汪子

清聚眾焚掠之俊以五十人一日夜追百八十里擒之防海兵數

千挾刃鼓噪及蘇盤門之俊馳諭兵民俱輯遷劉家河游擊署金

山參將時海寇劉心宇恣橫上官疏請移之俊守崇明冒險出洋

抵山東驚游山焚盜艘而還命以都司僉書攝崇明縣廉靖愛民

以事謫羅木營守備病免復起守昌平卒於官

章世明字茂國天啟二年武進士除錦衣衛校尉罷歸崇禎六年

出為燕山守備移駐馬馱沙備海世明日夜率巡兵出入大洋嘗

遇賊艘命襲之賊眾拒有一酋急呼止曰此燕山章將軍能發連

珠毒天毋輕敵世明發矢斃數人賊棄舟遁是時倭寇恣甚江浙

太倉上海崇明嘉興等處皆受其害世明屢出奇計殲之寇亦稍避不敢犯境推升南京巡邏營都司莊烈帝凶問至世明衰服謁太祖陵泣曰能保戎馬不至乎何以見先帝地下也卒為劉澤清所逼死於石城橋下年五十二

吳南灝字幼梁天啟五年進士知福建上杭縣值流寇至親冒矢石調閩縣海寇猖獗南灝勦撫兼施擒其渠魁擢吏科給事中章數上如議三朝要典疏實錄傳信除江南漕糧長條諫罷中官張彝憲皆卓然有抗直聲總理戶工二部卒於官贈太常卿諭祭祀

上杭閩縣名宦弟南岱語具後周士登字伯升天啟五年進士歷官四川川東道副使闖賊走彝陵犯夔州侵夔餉數十萬士登駐節涪陵相去二千餘里朝議以失隘嚴詰百姓聞之爭先樂輸旬日間充舊額侍郎倪斯蕙等申

救謂士登之去留關全蜀之勝敗遂仍令監四省軍追寇歷川入楚所戰皆克累戰於土地埤格查山麥子山應宗菴石門子大破賊軍擒其渠一字王普天飛等會丁父憂赴至即日解官已人乞留不可歸卒

陸卿正字廷表天啟五年進士授直隸真定縣時魏忠賢建祠遍天下上官檄日四五至卿正不為動會忠賢敗乃已升禮部員外郎福建興泉道時將枱撫海寇劉香老卿正曰事不避難臣職也兼程謁廣督熊文燦力言主撫之非條上戰守十議文燦然之用

其策香老焚死未幾賊黨林三老又合餘眾寇福甯勢復熾擢參議調巡福甯命將設伏大破之獲其魁陳斌全吳無能等寇氛遂息

楊應育字體英性孝友歷官山東甯海州判有治績丁母喪服闋



補通州判治南漕軍民使之時州方建魏忠賢祠屬應育主其事  
應育慨然怒曰吾不彼附罷官而已即日自劾歸一日早出遇有  
人方鑽垣竊其廩粟應育遽引避謂家人曰若饑耳一發則終身  
負盜名人稱長者子非魯語具後

鈕國藩字誠所天啟七年舉人性豪邁弱冠聲名藉甚年五十五

始舉孝廉謁選已二旬初任滇南再任饒州同知皆有惠政歸囊

蕭然寄興詩酒卒年七十九

陳邑志

許應弦字佩千崇禎元年進士歷知慈溪江陵武清俱有善政遷

韶州司李捐俸修學宮擢南京戶部郎中

陳府志

陳國器崇禎二年舉人吳江教諭惠愛庠士會部檄富衿納監國

器察其弊堅持之秩滿擢知縣曰吾豈為折胥吏逐拂衣歸祀吳

江名宦

太湖備攷

陳邑志

錢國瑞字開先本姓徐幼撫於舅遂從其姓崇禎三年舉人授山

陽教諭陞醴陵知縣臨藍賊寇縣國瑞躬率兵擒殺梟其二魁又

會勦湖南燕子窩巨寇有功直指汪承詔巡撫陳睿謨交章薦擢

諫垣未抵都國變痛憤道卒

馬蹟山志

劉呈瑞字君開崇禎四年進士授戶部主事擢御史按廣東廉正

持大體一疏劾不職者三十六人時盜劉香初平餘孽未靖呈瑞

加意緜輯四境帖然捐錢數千緡闢修途自古岡達省會數百里

行旅往來宵入潛跡會歲稔粟價騰湧發廩振之兼命泛舟出縣

全活甚衆再巡按順天彈劾不避權貴竭忠籌國前後凡五十餘

疏京師聞警上言通州為重地臣不可不出守至通親執刁斗鼓

厲士卒城遂完猶以所屬多潰被劾罷歸明亡坐臥小樓足不出

戶數年卒

卜象乾字坤儀崇禎四年進士任江西新建縣以德化民不用鞭  
扑歷遷刑部郎中授浙江驛傳道未赴遇闖賊不屈繫於獄賊有  
識之者曰此新建賢令也脫之歸尋卒祀新建名宦

薛宗字諧孟崇禎四年進士刑部郎中擢河南開封知府時寇起  
秦晉蔓延中州又值歲馔饑賊勢愈不可制宗至釐兵餉築外城  
邀守將登陴捍禦寇未旋引去會大吏主撫宗欲先勦後撫力爭  
曰賊無約而求撫者是欲以就食坐困我也必使大創而後撫願  
為兵者聽隨征願歸農者聽安插乃無他變卒不能用宗怏怏成  
疾十一年冬寇圍汴城三日諸帥統兵突至勉餽給之反郡流涕  
大呼曰時事去矣投劾歸明亡棄家為僧更名米號堆山

曹天錫字公純崇禎四年進士知福建莆田縣置義田備災荒增  
學舍廩給諸生親課藝其中數科中式者皆其所獎拔士為建

曹公衡鑿坊甯海橋長三十餘丈久廢渡者恒遭漂没天錫捐俸  
成之卒於官

俞泰交字子開崇禎六年舉人性疾惡好陵折貴勢然見人失所  
創若身受十三年詔擢天下舉貢數百人均進士賜特用泰交名  
第二授戶部山東司主事凡奉四使常例餽贈盡除之時賄賂公  
行銓注缺有定價泰交不持一錢得江西九江府左良玉兵駐城  
中民多散徙泰交調停兵伍民得安枕旋以病歸

陳組綬字伯玉天啟元年鄉試第一名崇禎七年進士授兵部職  
方主事勤勞盡職以其暇著職方圖凡京省都邑九邊四塞山川  
險阻錢賦出入關軍機要害者悉載焉典山東丙子鄉試事竣星  
馳還都籌兵畫餉倍於平時積勞成疾臨終呼曰吾此身不死疆  
場而死床第乎簡篋猶見代謀制勝奏草生平善書乞書者膚至



所著有五經副墨孝苑編史躬齋詩文諸書行世子震生崇禎癸未進士善詩文為人落落有奇氣所著有思廬草

劉憲章字端甫家貧力學擅文譽崇禎十年進士授中書科中書遷御史巡城行保甲法國戚姦民悉屏跡不敢暴橫疏數十上皆闕人才得失民生利弊其尤著者救劉宗周張瑄金光辰一疏巡按順天奏免徵豆料寇氛熾協同督撫晝夜厲兵防禦三關告急奉旨巡察未幾三關解嚴又巡荆襄一帶夙夜奔馳不言瘁及歸閉門讀易足跡罕越戶庭臺使者頻欲登薦以病卻之陸自巖字魯瞻崇禎十年進士知浙江湖州歲饑鍾米值萬錢民聚眾掠食將為亂自巖諭散其黨杖殺渠魁復為之平糶設粥以食餓者時兌漕令下民間乏穀故事郡國災傷必詣臺使者上之自巖謂轉請於朝勢緩無濟即自草疏奏請糴私應兌民賴以濟

丁母憂歸尋卒弟自嶽崇禎四年進士知浙江歸善縣歷官甯波知府賑荒弭亂著有勞績祀甯波名宦

趙繼鼎字取新崇禎十六年進士官湖廣公安令時郡縣多殘破人以為畏途司銓者索賄使人諭之意繼鼎曰士君子立身行己貴乎不苟賂而官何以長民堅拒之遂授公安蒞任甫二日有惠藩承奉率眾抵驛取夫百名馬四十匹檟甚繼鼎易服為眾夫先詣承奉報夫數其一即公安令也承奉訝不敢取夫而去公安學次江陵江陵試額百餘名公安不及四十繼鼎力請於學使者得信前數科舉額亦如之遷兵部車駕司主事因父喪歸遂隱居授

徒自稱江南老教書以終其身子申喬申季自有傳

陳震祥字體元崇禎閏舉賢良方正知廣東儋州多惠政署臨高黎寇圍城震祥出戰手斬數十人擒其魁賊遂遁有海舶因風飄

入邊帥以為賊欲盡殺之震祥曰若老幼婦女必非生而為寇何  
忍駢誅執所俘訊之皆良民也因出印簽分遣得死者五六百  
人遷貴州安順府同知以時艱不願仕進寓居於儋清順治六年  
兵至儋將屠城震祥與帥有舊哀請城得全儋民德之卒於儋之  
七里村

趙德榮字臺侯崇禎間以貢授仙游知縣斗棧寇林隆寺擁眾數  
百人往來九座間為害甚劇德榮潛策堵禦備器械四鼓緇人請  
兵鄰邑應檄至授方略擊之賊稍遁已復聚眾至數千德榮曰再  
請益兵則鄉勇不能待即與戰賊乃退未幾援兵大集德榮分遣  
縱擊擒賊魁李玉箴等十一人餘黨皆敗德榮慮賊窮貽毒轉酷  
非盡殲不可因更進兵戮渠魁四十六人寇平郡人作頌刊諸石



人物傳 宦績

武進陽湖縣志



收 卷 程 耀 庚 德

汪 叔 定 鑾



人物

清  
官績

清

劉光斗  
子履旋

莊應會

莊應詔

呂宮

須北社

馮達道

季芷

董大翮

吳守窠  
子通立

徐可光

楊廷望

董翼祥  
子佩笈

吳南岱

沈搏上  
父繼志

吳來儀

劉漢卿

薛信辰

楊兆魯

岳鍾淑

徐元琪

許之漸

子維梃

維

楊大鯤

孫士徽

士凝

王祖舜

沈璣

張偉

周復揚

陸遇霖

蔣鉞

周在豐

白彥良

吳本立

莊搢

趙申喬

子鳳詔

劉於義

陶自悅

白寶

高世定

子文起

趙申季

吳雲露

莊紹平

陳聶恒

唐執玉

蔣嘉猷

錢濟世

從子人龍

管楡

謝嵩齡

子楸

莊令翼

錢萬選

子恒

龔銓安

張奎光

謝旻

弟權

子寶樹

子王

李廷樞

吳錫爵

徐依

吳之翰

黃雲

湯自超

莊松承

徐崑

史增

子全詔

吳龍應

吳炎

蔣炳

子熊昌

騏

和

莊學愈

莊榮徵



許宏聲子承倉紹承莊大椿

潘思渠子承倉紹承龔崧林

段之縉子汝舟莊柱

楊稷子應甲孫履泰煦弟

吳龍見孫堂吳溶子鞏

劉綸子圖南躍程景伊

錢維城子圖南躍瞿曾輯

莊一虬子圖南躍袁禮成

劉斌子圖南躍莊成

莊經禽子圖南躍王光燮

陸廣霖子繼夔繼莊綸渭

吳楫子繼夔繼余有慶

吳祖脩子繼夔繼劉辰駿

劉同子繼夔繼莊繩祖

謝慶來子繼夔繼楊河桂

湯大賓子雄業繼劉烜

劉煥章子企琛繼裴直方

崔龍見子景儀景沈敬書

徐鼎亨子景儀景謝聘

謝王鷺子香森逢瑞孫恩壽

卞謨正子達吉莊炘

汪本直子達吉沈鍾養子湘

史夢琦子達吉胡時顯

劉印全子達吉徐大榕

吳琦

楊焯

謝愷

父王炎

盛愷

祖衡

父綱

弟愷

大

管幹貞

呂爾禧

子子鈺

子班

楊清翰

張師范

白鳳

吳塔

莊振

方聯聚

謝時敏

子增

費濬

李東灝

王燮

趙鍾書

子仁基

左輔

吳光悅

惲敷

吳德孚

龔鏜

董敏善

父思嗣

楊鼎

張繼昌

費庚吉

呂榮

子詒安

卜桐高

劉弼全

董大醇

盛思本

吳孝銘

魏襄

管通羣

費開綬

董基誠

楊士所

蘇應珂

龔冕

子寶蓮

史秉直

徐燮鈞

劉汝剛

族孫

錫祐

陸葆

李錫琨

劉承寬

弟瀛

劉鈞貽

余保純

子葛銜

趙忠弼

汪本銓

呂佺孫

弟佺孫

倌孫



憚光宸

莊受祺 子允瑞

張曜孫

盛隆

呂雋孫

莊士全

史致諤

憚世臨

董貽清

陸傳應 兄子椿

馮燮坤

劉達善 父文蔚

陳峻

陳肇鏞

吳鎬

余光倬

人物

官績

清

劉光斗字暉吉明天啟五年進士官浙江紹興府推官多雪冤獄

時海寇劉香橫海上巡撫知其能檄光斗討平之攝會稽諸暨海

潮壞岸築石塘圩岸衛之擢御史彈劾不避權貴清兵南下豫王

擇人安撫以光斗安撫常州民皆安輯時撫蘇州不得人幾致變

賴光斗調護得全經略洪承疇疏薦可大用格於吏議左遷行人

頒詔閩中巡按某性剛暴薦紳士民每以疑似陷大戮光斗反覆

開諭多所救免典辛卯科廣西鄉試得疾道卒縣人請建仁賢祠  
祀之次子履旋字旋九順治四年進士除戶部主事歷郎中改知



瓊州府禁苛派革耗羨察奸宄民賴以安營卒以鎮將緩餉譁履旋諭之立散去後知保定府治獄多平反趙夏以強姦誣婦夫竊李岐山殺僧俱蝨緣將免卒論如律白新城安肅盜案内高瑞徵等冤釋容縣獄孟家林等九人時有清如水明如鏡執法如山之謠後移疾歸性剛正蔭藉高華而自奉如寒素尤篤風義任瓊時歸儋州知州同縣陳震祥喪償知縣王都虧帑嫁其孤女年七十卒五莊應會字春侯明崇禎元年二甲一名進士歷禮部郎中福建提學副使順治初以薦舉補江西參政金聲桓亂遠近披靡應會不為動得間奔大將軍譚泰營具言賊可殲狀事平以軍功遷右布政十年入覲召詢利弊應會即具疏請汰袁瑞兩府浮糧大概言瑞州加糧起於陳友諒之竊據袁府加糧起於歐晉祥之失察積漸因循遂至浮糧十萬永貽民害此新朝所當釐正者也疏入奉

俞旨三百年弊政遂革十二年移四川左布政尋晉刑部右侍郎應會兄弟五人皆仕俱字侯鄉里稱為五侯家云子京生語在孝友同生朝生在文學莊應詔字宣侯性孝友侍父疾匝月不寐明崇禎十二年鄉試副榜知廣東興甯縣順治三年冬惠潮山賊竊發郡縣皆瓦解應詔集民兵繕器械躬自帥戰衣不解帶者五月除夕亦坐卧城上士民感奮糧匱而守禦不解援兵至賊竄去赴部改授道經江西值金聲桓叛大將軍譚泰知其才疏授瑞州推官未幾歸興甯民建祠祀之子有筠名弼孫搢曾孫清度俱進士呂宮字長音順治四年一甲一名進士授秘書院修撰世祖召館臣親試宮條對請建常平倉及試君子懷德論稱上意傳諭云呂宮文章簡明氣度嫻雅朕所親見擢侍講學士尋擢吏部侍郎肅



銓政絕苞苴旋進宏文院大學士薦舉江東耆舊請停江浙白糧  
民解及簽點機戶皆報可一日上在海子命諸大臣集高阜使甲  
騎環阜馳捷衝而上將及顛眾皆驚怖失色獨宮端立不動而甲  
騎亦遂止上曰呂宮氣度過人於此可見十二年乞休加太子太  
保賜馳驛歸逾年上遣使存問賜羊酒先是御史郝浴巡按陝西  
以劾吳三桂不軌革職宮保留浴并鐫三級後三桂果叛人追思  
宮為知言家居凡十年里中不知有相國卒諭賜祭葬  
須兆祉字介繁性友愛睦於親族貧者恒周給之順治四年進士  
由工部備兵陝甘歷著勞績賜鞍馬金帛邊地多警以勞卒官祀  
名宦  
馮達道字惇五順治四年進士歷官河東運使為戶部郎中時江  
西藩司應詔論及袁瑞二府三百年應蠲未蠲之浮糧疏下部議

達道曰此千載一時也借同官力議請蠲堂官以軍需孔亟為嫌  
達道固請始入奏達道每夜焚香於庭為民乞命七日果得俞旨  
季芷字蘭如順治四年進士授福建福州府推官清勤奉職時山  
寇竊發兵數徵調檄芷監軍自侯官永福披荆陟嶺勦撫數十萬  
眾脅從解散剖疑獄懲刁誣歷兼縣事案無留牘遷刑部主事  
董大翮字清貽孝友能文章順治四年進士浙江鄞縣知縣時海  
氛未靖以舟山為窟巨舟往來窺定海關大翮率丁壯禦之寇不  
敢逼以暇課士多所造就三年罷官復起天台知縣天台處萬山  
中賊首周欽貴等踞羅城巖為民患大翮練鄉勇謹斥堠屢蹙之  
遂降巡撫有十年逋寇一旦肅清之疏得優叙後罷歸  
吳守竅字其凝順治四年進士授湖廣房山知縣五閱月有殊績  
以才堪治劇改授江西金谿知縣時餘醜未靖守竅嚴保甲練鄉

勇盜悉解散民安農桑復葺學舍親校課品其甲乙諸生前後登科第為合省冠註誤罷職尋以薦補河南杞縣杞故衝要驛馬散牧為民病守窠悉命歸官廩墾地七千八百餘頃民食以饒以卓異擢行人歷知江西瑞州府治稱廉平子邇立字在安以例貢授江西定南知縣邑僻處山陬疊遭兵燹城中不滿四十戶署圮帑虛令率不逾年去邇立慨然曰是豈不足為政邪招徠流民芟夷懇闢物產日豐民始知有室家樂進生徒督課文風漸開始有舉鄉試者在任十八年遷浙江杭州府同知

徐可先字聲服順治四年進士授直隸東鹿知縣有平盜功改任龍泉造石梁五百餘丈以濟行旅禁溺女崇學校民俗一變遷刑部主事歷山東提學

楊廷望字競如以例選授河南上蔡知縣邑遭流寇田野荒蕪河

流羨溢廷望招流亡闢荒土循視諸水道及故溝之可攷者凡為河二十有三川一汀一地洫二陂三湖五溝一百有九相其緩急先後治之使早有所蓄澇無所溢居民行旅便之毀淫祠數十以料物葺學校書院建孔子廟於蔡溝伏羲廟於蒼臺以及漆雕開祠蔡仲之廟凡九年百務具舉邑大治民建生祠祀之後遷浙江衢州府卒

董巽祥字志潔順治六年進士少孤性孝初令陝西紫陽地無署無民招集撫綏完城郭備戰守遂成下邑逾年丁母憂服闋補陝西鳳翔知縣遷甘肅平涼府同知郡為邊徼有荒地額糧累民歲至二千八百石力請上官奏免擢兵部職方主事尋謫光祿署正卒巽祥敦氣誼傾吐肝膽人無賢愚事無大小一處以至誠故人敬慕追思之卒僅四十餘子佩笈字岵瞻少穎悟九歲通左氏春



秋父喪以孝聞康熙二十一年進士知浙江海鹽縣愷悌神明民間稱老佛擢戶部主事歷官四川川東道時當軍興籌畫供具略不擾民重慶舊無船行有白制府建立者非民意嚴督之數萬人鼎沸罷市數月總督年羹堯檄兵往勦軍士環甲促上道佩笈集僚屬議曰此曹非為亂者少緩之可撫而解安用糾糾者為語總兵駐兵牙門單騎往諭眾立散繫其渠責遣之力言船行不可立無為言利者所誤時羹堯頗擅威福附之者多顯擢屢欲引薦堅辭之乞休歸羹堯敗諸人以黨籍得罪眾始服其先見居鄉敦睦婣重然諾詳言正色為後進儀表孫仲蒲州知州傅太學生工詩文早卒曾孫潮語在文學

吳南岱字泰巖順治六年進士由刑部郎中授江西袁州知府調濟南擢江西督糧道方在袁州時右藩莊應會請汰袁瑞二府浮

糧方下部議南岱備陳二郡糧額加重之由及民疾苦狀卒汰袁

州浮糧十一萬石有奇瑞州稱是當國家新造南岱在袁日久招

集流亡營籌饋餉百廢具舉民懷其惠立去思碑頌之

沈搏上字扶雲安西鄉人順治六年進士授廣東惠州知府時粵

氛未靖搏上隨征參贊軍務督運糧餉披堅執銳親冒矢石事平

抵任民散田荒竭誠撫馭民漸安戢未期月沒於任年三十七無

子士民哀慟當道者念搏上勞勩奏請官其父繼志為樂昌教諭

尋改廣州府教授亦卒於任父子均祀惠州名宦

吳來儀字瑞虞通判嶽曾孫順治六年進士選授江西新淦知縣

江西自金聲桓變後所在多盜出沒剽掠新淦樂安永豐諸邑尤

甚官軍不能治來儀請以廣地用大軍狹地用鄉勇誅巨寇而赦

脅從則賊易破如其策賊竟滅陳剔弊興利八事調福建古田新

塗民勒去思碑繪攀轅圖以誌其愛古田處萬山中無兵乃練鄉兵防守山盜海寇合攻勢張甚來儀率鄉兵登陴固守四十九日不解甲擒偽總兵林新木梟偽總兵林仙球林仙養等招撫偽總兵程有道等八人令僕為丐狀踰城告變巡撫發兵至古田復安事聞授部員未行坐事歸流寓無錫江陰間徒行疏食數十年無不平意年八十歸卒於客舍貧無以殮聞者傷之來儀妻戚氏亦明達大體被圍時來儀以帑金數萬屬護之奸胥遣其婦紿曰城旦夕破盍挾貲他避戚叱曰吾夫為朝廷殉此城吾為吾夫殉曷避為守其金晝夜不寢事賴以濟

劉漢卿字上于順治六年進士授江西鉛山知縣邑環山盜賊出沒不時賊首張自盛聯巨寇肆抄掠攻城人無固志漢卿佩印登堞激以忠義士盡感泣固守月餘援至賊始引去後以追料價解

任尋還職補陝西褒城知縣褒當棧道南戶口凋敝清兵征雲貴軍需供億不貲漢卿悉心籌畫無缺乏攝洋縣事山賊突至竭力守禦圍遂解歸田後經史自娛於周易性理尤深孫於義自有傳薛信辰字候執順治六年進士隨征赴廣東即授廣東潮州知府同城參將郝尚久叛逼降不屈命斬者三潮民環懇乃繫獄妻孥多投井死清兵至得釋事聞補直隸保定知府旋擢山西井陘道歷遷浙江布政使所至有政聲

楊兆魯字泗生號青巖順治九年進士歷官江西建南道參議有賢聲在刑部時條奏五事一請訂正條例一盜劫不宜分滿漢一科抄覈擬宜立限責成一請讞獄勿留滯一請矜恤獄囚時初下熱審令法司遽奏處決重犯兆魯曰是熱審非議緩死趨人死也上書大司寇論之提學江西請留踰額生一千八百餘人官闕中



殲巨盜民以安謝病歸子世求貢生內閣中書舍人博雅工詩  
 岳鍾淑字天陶順治九年進士浙江仁和知縣縣多屯兵養馬需  
 數十萬金鍾淑請於上官撥餉協濟兵民安之以憂歸服闋補永  
 定縣邑有公費鍾淑盡却之積逋以清考選吏部尋告病歸  
 徐元珙字輯五順治十二年進士除刑部主事歷員外郎郎中授  
 福建建甯道閩外未靖奸民依山負海所在艱脆元珙誅其凶渠  
 餘黨解散後任直隸口北道撫防秋亂卒有應變才擢太常卿請  
 釐正北郊配饗位次援据精核事未行遷都察院左副都御史疏  
 正北海祀典略謂岳鎮方位當以天子所都為準今沿宋明之舊  
 仍祀懷慶是往南而祭北海義竊未安宜就北鎮醫巫閭便奏可  
 以親老乞歸  
 許之漸字儀吉順治十二年進士授戶部主事遷江西道御史彈

劫不避權貴莊頭劉七倚勢恣橫奏寘之法旗民肅然巡視陝西	茶馬前任按茶篋馬匹數自取什之二商販不前馬額缺乏之漸	至禁除陋習勒條約宣示不苛不擾遠邇稱便以事被劾削籍事	雪復官自以性剛寡諧徑歸徜徉林下年八十八卒子維挺字松	年康熙八年舉人直隸武邑知縣懲蠹輕徭多實政輯舊聞著書	名逸林維楫康熙五年舉人湖北鍾祥知縣裁兵夏包子叛大軍	水陸兼進維楫籌餉安民秩然有法上官倚重馬孫元愷 <small>康熙庚子舉人</small>	楊大鯤字陶雲父廷鑑語在文學大鯤好學強記順治十六年進	士改庶吉士左遷江西新建縣丞才氣儻曷屢攝縣事時方用兵	稔精芻蕘宿時立應分守江防綜理戰艦糧餽倥傯中籌畫裕如	上官以文武才薦擢知九江府繕城隍謹斥堠招來綏輯百姓安	堵歷遷山東按察使擯絕嗜好胥吏不敢為奸報囚精慎嘗一日
---------------------------	---------------------------	---------------------------	---------------------------	---------------------------	---------------------------	--	---------------------------	---------------------------	---------------------------	---------------------------	---------------------------

決數十事平反尤多以勞卒官孫士徽康熙五十一年進士授編	脩詩文清麗書法有晉唐人風士凝康熙五十六年舉人山東單	縣知縣築河隄親畚鍤折獄尤敏決工詩	王祖舜字觀御京營効力順治間累官湖南援勦營游擊隨將軍	傳恢平廣東深入敵戰雖負重傷不少怯以功加 <small>左都督補廣西</small>	沈璣棲鸞鄉人少從洪承疇征黔滇叙功授貴州安順府推官撫	苗蠻戢兵民全危城者三開驛站二十一清理冤獄以百計前此	黔之盤江鑄索攀渡歲被溺無算璣選巨木駕橋遂成坦途熨竿	以外民素頑獷璣思撫法馭咸俯首聽命後奉裁缺改 <small>補觀城知</small>	張偉字漢公工詩文偶試武首拔旋中順治十四年武舉人授陝	西蘭州衛千戶時蘭兵亂巡撫單騎渡河走偉追護之且曰河西	三鎮力足相援甘肅張提督勇威名最著願赴甘肅請濟大事勇
---------------------------	---------------------------	------------------	---------------------------	---	---------------------------	---------------------------	---------------------------	---	---------------------------	---------------------------	---------------------------

見詢兵機大喜謂偉曰汝豈甲冑中人疏改監督同知駐靖遠籌	應兵食守孤城寇不敢犯復檄調赴隴輸晉糧至秦秦省蕩平進	取四川偉以成都運首險折支可供軍實遂令入川供支以息民	力丁憂歸起補湖廣常德同知擢陝西延安知府延安衝疲偉至	禁濫差嚴私派與民休息總兵誣其縣人與彝通謀疏請嚴訊偉	力白其冤盡予開釋邊堡士庶懽聲震天年七十卒於官祀名宦	周復揚字魚復寄籍太倉以拔貢生授河南陳留知縣故事輸糧	必以銀鏹民苦耗費復揚請臺官以碎銀充餉後任廣西容縣邑	經獻賊蹂躪烟火蕭條復揚招集流亡置屋宇創義學劇盜聚萬	餘人踞縣東大雄山為患復揚申請會勦躬擐甲冑道險不能騎	攀木懸崖而上兩日夜直搗其穴出兵前數日製布旗萬餘書容	縣順民加鈐印遣幹役賫付近山居民及脅從願反正者民間爭
---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------



先領旗賊黨孤遂平之所掠婦女閉一室諭親族領歸忤上官以大計降調去之日賊餘孽謀害之時容江水淺賊於通舟處植亂石礙其行亭午忽洪流大漲揚帆直下一晝夜行八百餘里賊眾露刃相望不得前遂歸子清原語在文學

陸遇霖字商巖性孝友早失父母常夢中啼哭淚痕漬枕著孝經集註以寄意及長潛心理學著傳習錄以縣學生入國子監考取正藍旗教習授江西布政司理問升河南歸德府推官署知府會大水城閉遇霖踰城告災得蠲復有女僧被殺者坐一賣菜傭將論抵矣遇霖下車覆勘謂傷杖不符推求得殺人者乃營卒之妾其凶器則卒之遺刃也一時稱神明焉

蔣鋌字鐸函以恩貢生官丹陽教諭時海氛初靖議內徙濱江居民知縣借事要挾凡地以洲名者盡在徙中知府委鋌覆勘所謂

十三洲者沿江僅兩處餘則稠居沃壤皆內地也鋌以實申請民得安土奏銷案起諸生二十四人共逋六十餘金鋌牒縣以學糧輸課遂無懼吏議者

周在豐字文邑弱冠游京師為祭酒王士禎所知授河南滎陽縣丞上官器其能令兼署知縣又歷署中牟汜水等縣潔己愛民嚴懲胥吏縣有河工搶險護隄尤著勞績以年老乞歸工八分書嘗製竹硯自隨系以詩和者甚多年九十餘卒

白彥良字祗常康熙三年進士任浙江雲和縣值耿逆煽亂彥良預脩戰守具旋以憂歸起補河南儀封縣張伯行方幼彥良至奇之勉其力學果為名臣時檄察欺隱多希上官旨開報浮額彥良愀然曰邑民貧不忍以賦稅累也卒以實報罷歸後補湖北雲夢縣雲額歲筦出入者多贏縮彥良稽察勤慎無纖毫染地當南北

衝冠蓋絡繹悉捐捧儲應不以擾民平獄訟興學校在任七年民戴其德後遷陝西乾州未赴卒祀雲夢名宦

吳本立字意輔康熙九年進士改庶吉士授兵部督捕主事母病剗股進逾年母卒起補職方主事擢員外郎奉職恪勤簡督贛關積弊一清累遷浙江台州知府政父訟稀以事降補同知歸自權關至出守皆膺仕本立俸外不名一錢歸橐惟書數簾歿後喪不能舉門下士魏學誠督學江南命學博經紀云

莊搢字書采康熙九年進士授山西臨縣知縣會定邊守將朱龍叛陝西葭州吳堡盡為所據清兵由臨進勦百姓竄伏山谷搢單騎之任招徠宣諭不數日安定如故攝汾陽富家謀殺人罪應死以贖金為酒饋不啟封還之擢貴州騰越知州所管勲莊每年加徵穀七百二十石輓運甚苦力請永審遷刑部員外郎充律例館

纂修授陝西榆林道臨民於百里外迎之調湖北武昌總督親覈湖南地畝欲得廉潔者自佐疏搢名奏可搢親勘視田賦悉平九卿保舉擢通政參議未至京卒

趙申喬字慎旃號松五父繼鼎明兵部主事語具宦績申喬康熙九年進士河南商邱知縣嚴保甲法盜賊屏跡戶給糧單俾隱田者得自首虛糧盡除卹災荒決疑獄民誦為父母行取授刑部主事楚有重獄讞詞類文致應駁改堂官不允申喬力爭卒減等遷員外郎引疾里居七年邑中大徭役指陳利弊無所諱三十九年以大學士李光地薦特召授浙江布政使蒞任即革陋規省派費政治一新甯波民倡照地派丁之說與巨室相持幾致變夜草片檄論之帖然無敢譁者未踰年遷巡撫藩庫舊有貼解費歲支不過什伍申喬在任積二千金封識以授代者曰吾奏銷不名一錢



後將難繼得此足辦一歲事矣毋更擾民也錢塘江逼杭城潮汐拍岸舊塘傾圮申喬相度鎔鐵貫石中築子塘護焉四十一年秋潮益猛新塘欲壞方率僚吏致祭潮大至風狂急吹水皆立眾奔避申喬屹立不動潮距祭所百步止自此潮不逼塘畚鍤修舉調偏沅巡撫禁重耗貪墨屏息疏請秋米儲道倉備解者充次年春夏兵糧免其守候又請預給二耗米石以恤運丁俱報可嚴與屬吏約雪前過圖後効不用命者効皆奉法惟謹四十九年擢左都御史丰裁峻整不務搏擊疏言西省捐積欠潼關衛大同府米荳草束應一體蠲征又請民房地租照地丁蠲例皆從之遷戶部尚書勾稽出納維慎九卿會議有不可者輒別奏聞民地例停圈撥莊頭李必達等欲圈滄洲地已議行申喬疏爭得寢馬維屏等請納銀萬兩交部領大錢易小錢交局改鑄申喬力言其擾尋亦寢

爬梳積弊賢勞盡瘁屢疏乞休温旨慰留年七十有七卒於官諭祭葬謚恭毅申喬清介拔俗不可干以私事無鉅細悉自裁決投牒者一見問姓名久而不忘士無賢不肖稱述大臣風節操行必首申喬子熊詔語在文學鳳詔康熙二十七年進士山西太原府知府有政聲

劉於義字喻旃號蔚岡祖漢卿語在宦績康熙五十一年進士選庶吉士授編修雍正元年以侍講視學山西特諭留心民事時山右積荒無儲蓄奏請以耗羨贏餘買米積儲報可累遷倉場總督先是倉場積習書吏勾同旗丁私賣正米以賤價買節颺耗米抵額於義燭其奸嚴出入稽餘米定數宿弊一清七年命赴甘肅清查軍需舊案甘肅十年中虧帑百六十萬文卷紊散莫知所由於義檄查親校釐正歸欵累遷直隸總督直隸盜犯依律不分首從

皆斬大名劫盜十餘案每案數十人於義詳訊凶器止田具贓據  
僅粟穀係饑民借糧爭奪非積匪巨盜比奏請得未減直隸盜案  
照各省分別定擬自此始調署陝甘總督駐肅州辦軍需事輸運  
軍糧解送馬匹安集士魯番回民羽書旁午隨宜措置上下稱便  
營柳林湖屯田及各提鎮營田俱成沃衍為軍營水利乾隆三年  
以軍需劾罷越二年起直隸布政使歷遷吏部尚書協辦大學士  
命同大學士高斌查辦直隸水利周歷相度東西兩淀暨唐河大  
鳴各泉源流出入疏通宣洩次第奏功加太子少保年七十四卒  
於官賜祭葬謚文恪子復字無咎雍正五年進士以編修歷浙江  
糧道亦以治行聞

陶自悅字心兌康熙二十七年進士授山西猗氏知縣時軍興糧  
乏獷卒訐眾為亂自悅單騎諭散之擢知澤州鹽梟因前牧激變

勢甚張州故有戍兵千當撤上官議留備禦自悅慮以費擾民且	兵悍豐易生力請得撤渠魁尋亦就縛釋誣累甚眾聖祖仁皇帝	幸山西上官以文學薦賜御書後以老病乞歸	白寶字楚唯拔貢生授福建南漳知縣雪三年前冤獄不畏強禦	撫字有方以內擢卒於京南漳民思之祀名宦	高世定字保承康熙三十三年武進士授湖廣常德守備總督于	成龍嘉其才題補鄖協都司適鎮算紅苗蠢動清兵進勦世定奮	往破天心等寨斬苗酋事平復搜緝叢箐招徠流亡黎民復業擢	宜都游擊歷遷荊州參將時臺灣告警京口為海門鎖鑰特調鎮	江參將未幾授廣西桂林副將率兵勦惡獍擒莫貴鳳等數百人	斬之尋鎮福建漳州時水師提督他出所部兵乘隙通海寇為亂	縱火肆殺世定自省趨歸密堵隘口擒亂者水師遂定奉旨補授
---------------------------	---------------------------	--------------------	---------------------------	--------------------	---------------------------	---------------------------	---------------------------	---------------------------	---------------------------	---------------------------	---------------------------



正紅旗漢軍副都統賜花翎漢武臣得典旗兵前此未有也後以疾引歸子文起康熙五十二年武舉人任廣西柳州營遊擊平苗有功為仇者所嫉劾罷事雪補廣東右標游擊

趙申季字行瞻戶部尚書申喬弟早孤誦詩至蓼莪輒飲泣因自號蔚什康熙三十六年進士授廣西遷江知縣邑素多派累申季臚列二十九條哀籲上官得所請勒石永禁約束蠻獠不敢肆掠禁豪強之放穀漁民者興學校嚴保甲俗為之變改編修督學山東以勞卒於官子彪詔語在文學

吳雲路字樸存薛墅人康熙五十六年舉人懷遠教諭嘗奉檄勘災白監司監司怒曰天庾作汝沽名具耶雲路復力請於巡撫卒得振在懷十年未嘗以一事干令一日請令言曰諸徵比者候良苦盍緩諸令笑曰公今日可謂破天荒矣弛之吳氏譜

莊紹平字華奏號閑汀應會孫康熙五十九年舉人選湖北宜城知縣蒞任不數月聘鄉試分校前令遞遺疑獄未具者八紹平刻日讞決而后行吏民驚為神江岸積淤成沙前令升科增額未幾復成巨浸戶多流亡乃攤課各戶民重困紹平請報部免課上官持之紹平以課重則民力不支民貧則舊額轉缺非增額乃虧課也力爭得請久之以引見解職未行邁疾卒子映舉人商州知州次勇成績學工文目盲復明味經齋文稿

陳聶恒字曾起康熙三十九年進士授廣西荔浦知縣邑多獠姦民挾以煽亂聶恒單騎抵其家諸酋羅拜因諭以禍福令出荔民之居獠穴者調長甯建清溪橋捐置渡口義田民懷其德治最授刑部主事改翰林院檢討未幾卒著有栩園詞樸齋文集邊州間見錄嶺海歸程記

唐執玉字益功一字薊門順之六世孫康熙四十二年進士初授  
浙江德清知縣邑版籍混淆多逋欠執玉行編審法假冒得自首  
免罪虛田詳豁積弊一清投牒者五日案盡結民無訟座主徐侍  
郎方家居宗人以罪匿其所執玉携印往捕曰令不行請從此去  
徐急出其人巨室僕為鄉里患執而捷之由是上下相約不敢犯  
法遷工部主事補戶科給事中時議開捐馬例戶部書吏有缺主  
與候選知縣向珣關通婪索執玉欲糾之珣囑客以重賄求寢執  
玉立劾其奸一時震懾遷大理寺少卿擢禮部侍郎知貢舉晉左  
都御史直隸總督廉知州縣疾苦多所陳奏屢賜璽書慰問雍正  
三年部議耗羨歸公并欲追還元二年之後納者執玉言歸公之  
令實自三年耗羨始已許州縣移為他用今欲追還是為小費而  
失大信又言州縣倉穀實皆民欠今責償於州縣官追比一二百

故官子孫情實可憫上皆從之清初以近京地給八旗將士別撥	地還民謂之代徵糧地寄糧寄莊之名以起執玉請歸其糧於所	撥州縣官免追呼民免跋涉九年以疾乞骸首乃以兵部尚書養	疾京師十一年正月再出督直隸三月卒於官貧無斂諭祭葬子	孝本字念淳康熙庚子舉人特旨授邑宰擢守台灣次子少游賜	舉人	蔣嘉猷字蒼濡康熙四十二年進士任湖南辰州府同知駐乾州	苗種雜處反側未安條十議請上官咸報可勞神纂算苗吳老虫	龍老五等尤桀黠時繫民人要重賞嘉猷謀勦知營兵不足調日	練所轄兵候觀音者與苗為婚善撫之使說鎮苗為內應陽以期	約老虫等置酒天王廟親贖所劫老虫等至伏發籐牌兵捲地入	苗所負鳥槍不及施殺八人餘就縛登山發巨礮萬壑俱震鎮苗
---------------------------	---------------------------	---------------------------	---------------------------	---------------------------	----	---------------------------	---------------------------	---------------------------	---------------------------	---------------------------	---------------------------



亦噪而出自午至申寨平六里苗為保靖土司所虐懇請內隸嘉猷建四議白上官以屬乾州保靖土司以三千金乞寢其事斥去之卒如所議尋以勞卒官民感之祀名宦

錢濟世字元功號碩齋為諸生有名由教習授福建惠安知縣惠安負山襟海故多盜蔡三十二害尤劇濟世擒斬其黨并白標官張爵臣等通賊狀於上官上官不以聞後三十二在旁邑滋橫乃悔不從濟世言山賊陳五顯在隣邑倡亂濟世命十家出一兵鄉設一練長擇邑紳領之屹然成勁旅五顯憚不敢犯值歲饑截漕振救濟世即運儲各鄉按戶核給振先他府兩月全活數千萬人而首邑久不振民怨守及令羣情洶洶爭頌濟世而詈本官濟世適至聚觀者幾遮道不得前守深銜之以虧倉穀揭報蓋軍糈待給於屯米濟世紓其徵而糴倉穀以給之也士民控上官願尅日

輸米還令守益憾以虧帑誣揭罷之濟世遂於所建書院授徒從者如市踰年屯米悉完乃歸杜門著書不復出所著經論史論皆具特識惠安人祀之於書院從子人龍字汝允深沈有志略讀書淵深百家靡不綜貫康熙四十八年進士雍正間知山西長治縣澤潞之間產鐵出礦之初價賤質下及鎔鍊後勦十不及一直才三五釐故事稅其器用及鐵條布政使奏請開廠榷其稅敕巡撫下所司議之人龍曰是重困吾民也議不可布政使嚴詞駁之乃自劾求去諸上官及僚屬皆咋舌巡撫雅重人龍知其弊遂奏寢之

管倫字宇文號青村明侍郎紹甯曾孫少育於外家以家難冒姓楊後乃復姓隨舅大鯤貴州貴西道任以軍功選授江西餘干縣戢凶暴清賦稅前令負帑甚鉅倫以身任遣歸有力爭者倫曰迫

人於厄非義也以事解任補貴州普安縣普介萬山中民獠雜居  
輪每歲首春持斗酒親歷土司宣播德威俱帖服歷遷刑部郎中  
治獄詳慎多平反卒於官榆學問淵博尤以詩名  
謝嵩齡字宇瞻康熙間八黔贊總督楊雍建幕討吳三桂議叙授  
陝西長安縣晉乾州知州修城郭建學校勸農桑廣積儲延師訓  
士文教大興慶陽巨盜王海潮聚黨數百人橫行郡邑秦民患之  
其在長安聖祖親討噶爾丹駐甯夏上官慮歲饑餉弗繼嵩齡日  
馳五百里至隴東集糧八千石昇至軍所嵩齡往來環鎮陰察海  
潮出沒要害以計擒戮之秦民感悅十年聖祖西巡嵩齡蒙召見  
奏對數千言悉稱旨賜御書內府珍物會潼關同知缺以嵩齡改  
補時穀價涌貴嚴私糶之令嵩齡請弛其禁價遂平未幾罷歸乾  
民相率蒲服建二旗以迎書曰愛民如子盛德難忘至今祠祀弗

替子梗不樂仕進杜門篤學人以方明之真趣居士梗弟旻語具  
後

莊令翼字圖雲康熙四十八年進士授江西宜春知縣邑多逋賦

前令鞭扑從事令翼以民皆急公逋在姦蠹因摘豪猾包攬者痛

懲之緩民新糧先輸舊賦更盡蠲陋規民力漸紓歲輸如額世宗

命大臣察江西歲徵惟宜春無逋賦引見嘉許立擢福建甯甯知

府初蒞閩會福州延平知府俱以倉穀劾罷上官以令翼明練能

察弊旋調延平逾年丁憂請急奔喪上官已疏請留任守制哀痛

成疾致違上官意以辦楠託病劾奏得旨寬免歷遷福建按察使

案無留牘民以不寃以老乞歸年八十五無疾終

錢萬選字又青康熙四十八年進士任太平教授擢知福建莆田

縣有富商陰殺人事敗以萬金謀脫峻拒之卒置諸法醫者蘇進



與族弟爭田饋棗酒二器萬選知其姦坐堂皇啟視之則銀也予重懲歸其弟田後罷歸子恒貢生議叙授雲南姚州普棚驛丞向乏水道恒捐俸浚河民資灌溉歷遷永北知府審浮糧創書院郡接土司番民以私仇相殺傷前守請兵擒獲成大獄論死甚眾恒鞫得實誅首惡二人株連盡釋民德之

龔銓安新塘鄉人康熙四十一年舉人除山東泗水知縣縣民劉廷舉與叔不相能叔老病死怨家訐以讐殺前令械繫之誣服讞既成報刑部矣銓安覆勘得實力白其冤巡撫檄他府會勘如銓安言乃得減死論縣大水民居盡圮銓安請發振傾囊佐焉以事罷職旋卒貧不能歸葬子孫遂為泗水人

張奎光字玉辰康熙四十八年進士授廣東興甯知縣邑富商有例獻奎光蒞任饋踵至悉置於庭整衣冠端坐嚴諭卻之姦民多

服斷腸草誣人奎光痛懲之其風乃已得盜魁二人杖殺之賊匪惕息士民懷其德建祠以祀

謝旻字侶桐陝西安塞知縣遷貴州普安知州尋擢刑部員外郎轉戶部郎中是時趙申喬為戶部尚書尚介節獨心重旻尋外推

江西贛州府遷湖南驛鹽糧儲副使時有江甯積留船戶困且不支旻力請除其役給費遣歸擢按察使敬慎用刑而不留獄尋遷

河南布政使除重耗慎倉儲屬邑瀕河被水者代償舊逋總督田文鏡方尚嚴覈旻每事調解之大河南北吏治肅清民氣和樂論

者以為旻功擢太常寺卿未赴即轉大理寺卿巡撫江西為政務持大體不屑屑細務事關民生則陳奏不遺餘力擢工部侍郎歸侍母黃太夫人十餘載六十遭喪哭慕如孺子家居肅穆嘗誡子弟曰讀書豈僅為功名卯年七十三卒弟樞字喬南雍正時刑部

員外郎循例引見以未諳刑名奏上願刑部尚書云此人自謂未嘗講求朕知其必重民命也毋改旋晉郎中以京察一等出知四川成都府擢濬灌口都江堰溉十六屬民田攝藩司兼理松茂道事牒訐山積裁決如流水松潘向以土司侵奪頻年繹騷檄諭以天朝威德辭氣慷慨率叩頭膜拜帖然以安薦擢湖南岳常澧道移巡湖北襄鄖中州大水流離糜至檄為之儆居授粟至者如歸居民安堵以毋憂歸起補廣東雷瓊兵備道瓊州孤懸海外廣袤千里商賈黎岐雜處爭奪繁興檄為別其居易其地平其懋遷歲時巡視必徧宣暢德意海疆宴然以瘴霧得疾卒檄遂於學手錄名臣言行成帙旻子王生字能可雍正初由國子生考授州同知尋擢浙江烏鎮同知烏鎮濱湖匪類出沒王生以積匪由冗兵乃黜冒濫嚴部勒境中遂安毋憂服闋補廣西百色同知地僻遠四

時霾霧當官者不輕出入王生身親行縣剔弊釐姦民徭帖服擢廣東惠州府護理惠潮道檢察屬郡覈實倉儲以積勞卒檄子寶樹字問蘿乾隆十八年舉人知河南滑縣邑有積盜寶樹偵獲殲其魁尋升直隸正定同知滹沱河病涉增設船夫嚴禁勒索行旅賴之擢江西饒州知府鄱陽湖草洲歲多械鬪寶樹為畫界息爭屏革陋規殆盡倡修書院人才多所造就署廣饒九南道坐失察降補甘肅甯夏通判逆回不軌募鄉勇分守要隘商民安堵總督福康安調守有垣隨赴大營襄贊撫綏諸回懾服年七十三引疾歸囊無餘資布衣蔬食無異寒素

李廷樞字朝璉康熙三十年進士授江西東鄉知縣再補廣東信宜隻身就道布衣蔬食信宜山僻民未知學至則集士庭教之月必九課指授講解無少間始有列科目者蒞任末期凡利民之政



大概無勿舉尋以勞卒驛道賻之乃克歸葬信民祠祀之水旱疾疫禱輒應

吳錫爵字畝或性孝母病刲股以進康熙五十年舉人授江西臨川知縣調廣西宜山葺學宮建義塾歲旱刺血為文以祭甘霖大沛龍門土司故羣蠻蜂集為亂練鄉勇進勦至洞口前鋒斃於礮眾懼錫爵攀崖直上兵盡奮斬首百餘級焚其巢後忤上官歸剛直名震西粵云

徐依字永念康熙五十一年進士年五十二矣選庶吉士散館改廣東三水知縣邑當孔道舊有陋規供億甚為民累依盡革之糾集兵壯捐俸為糧勦捕宿盜殆盡聞本生父訃請假回籍治喪降服舊無丁憂例依陳情堅懇解任民遮道泣送數百里不絕服闋補浙江麗水知縣興水利築通濟堰民甚賴之邑固貧瘠依蒞任

即值秋災請振不報請緩徵又不報反被謫依怡然日使貧民得須臾勿死吾名掛彈章無悔也士民號送如去三水時

吳之翰字煥成為諸生時甚貧以院試赴江陰見溺死者收瘞之邑令逮治之翰曰以掩骼埋胔而被罪某誠無悔若以為殺人明鑿無所逃也邑令歎為長者釋之女甥鬻他郡從子入旗俱貸金贖歸後以教習起家廣東知縣邑有盜案前令繫七人乃偶從旅舍入市買一衣吏據為贓物者已定讞之翰廉得冤狀白上官緩其獄卒獲真盜邑稱神明乞休歸

黃雲字伍芸康熙五十六年舉人授浙江孝豐知縣邑有金石鄉荒山數萬畝額賦累民多逃亡者雲力請上官題豁建義學育嬰堂養濟院修文廟在任五年卒於官士民肖像建祠以祀長子宮乾隆丁巳進士選庶吉士改知衡山縣

湯自超字軼人以歲貢生任湖南桂東知縣修城垣建倉庾積荒  
之後振卹災黎全活甚眾內遷中書告歸

莊松承字巢雲父令輿語在文學雍正元年舉人考授中書出為  
廣東廉州府同知署知府事剔除姦弊鹽課稅務正供外無稍濫  
盜商民感德鹽場海嘯丁戶漂溺松承不及報即出帑安集之署  
瓊南道副使瓊州鎮標兵三千前官給餉多侵蝕兵屢譁松承至  
按名親給三千人懽聲若雷調署雷州府雷州歲貢葛吏胥給價  
輒侵牟松承令機戶各任其數先給價之半驗收全給之不假胥  
吏手丁憂服闋補順天府南路同知旋告歸

徐崑字國山雍正元年舉人考授中書五年以同知發浙江補溫  
州同知署湖州擒巨猾雌老虎等盡殲其黨擢金華府屬邑滯獄  
凡二百餘盛暑坐決之兩月而竟時湯溪酈十九有寡嫂攜其孤

嫁魏七十被毆死令坐十九以誣崑覽前牘疑之飭令覆檢令執  
不可乃託為他縣尉奉檄釐保甲至其鄉盡得七十兇狀則除夕  
蒸粉餌所攜子攀炊具覆粉餌於地七十梓之死妻驚呼七十復  
捶殺之旋投之池而以溺聞崑召七十至一訊而伏遂白監司啟  
棺覆檢曩令罪十九時觀者數千鼓掌大譟至是皆泥首謹譁呼  
為神人獄半具而崑以大計去降調山東甯海州判署平原縣移  
曹縣引疾歸

史增字學川父樹屏有懿行如廁獲重貲數百訪其人還之增康  
熙五十七年進士授雲南保山知縣邑有倒馬坎懸崖極險石磴  
壞行者服粟增修築以便行旅所轄枯柯村糧輸順甯府踰嶺數  
百里多剽竊增請改輸本邑施甸去縣寫遠胥役私派繁重增禁  
革之定均徭法遷趙州知州適清兵進勦烏蒙州當衝要供應軍



需民無擾勘丈田畝絕刁猾欺隱以勞卒官子金詔字丹崖貴州獨山州同以軍功遷直隸順德通判後補甘肅西甯通判以廉介勤慎稱

吳龍應字飛淵性端凝才華雅贍雍正元年以迴避卷欽取第一明年成進士選庶吉士授編修十三年以大學士徐本薦授湖廣武漢黃德道巡視鄉曲固隄防問民疾苦審雪冤滯遷湖北按察使前案填委歷數年不決龍應剖斷如流無留牘乾隆六年遷山西布政使甄別屬吏約束胥役嚴而不苟先是總督班第委管武昌關固辭不許至是乃以前事追論罷歸讀書自娛與里中諸老倣洛陽會優游以終子祖修語具後

吳炎字企美雍正四年舉人考授中書派四川丈量地畝事竣補福建甯同知署福甯州州有冤盜久繫炎緝獲正兇釋株逮者

數十人調福州同知以卓異擢雲南鶴慶府親老歸養後補貴州	平越府郡無留獄鹽價騰貴炎請設商運價遂平時上官議開南	明河僚屬風靡炎力陳不可狀後上官卒以糜帑敗年七十罷歸	蔣炳字曉滄父梧語在文學炳少負開濟大略雍正四年舉人考	授中書時初設軍機房慎簡僚屬炳以才望入直從大學士鄂爾	泰經略西陲飛章草檄倚馬立就還累遷御史高宗登極詔求直	言炳應詔論列諸大政侃侃直陳得旨獎譽累遷順天府尹發官	帑資無業者置官車以免派累歲饑京外增厰平糶天旱州縣以	工代振巡撫河南僚屬畏炳風烈素猷勸者悉望風去秦晉大旱	炳以米十餘萬石轉運協濟兩省之民宴然河決陽武隄壞四十	餘丈所司束手炳晨夕督夫堵築三日工已竣又開茆河以灑河	流購木植以備隄堰緩急有恃河不為災巡撫湖南時以擬布政
---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------	---------------------------

楊口罪失當獲譴謫軍臺未幾詔還仍令值軍機尋授甘肅布政使炳益自感奮軍書旁午日營手畫事皆立辦時復游饑巡勘撫循申旦不寐閱三歲清兵凱旋凡奏銷軍需三百八十餘案上眷念勞績擢總督倉場卒於任炳敷歷中外三十餘年所至皆有成效家居先後僅五年於人才尤多所成就乾隆二十年歲祲首輸五百金以振先是炳父梧創立社倉炳行之益力鄉閭賴焉次子熊昌字辛仲乾隆二十八年進士以戶部主事洊升郎中直軍機出知安徽潁州府履任日即下教盡革陋俗五十七年秋黃河水下注逼亳州城率屬晝夜巡防先發倉振貸民以獲蘇城外有西湖久湮修治之使復宋歐陽修蘇轍舊蹟旱澇無患訪歐陽裔業農者授湖濱隙地使耕其雋者令肄業書院中捐廉資給旋罷歸家居清節自勵而意氣慷慨能急人之急晚與里中同志講學於

城北覺塵庵熊昌弟騏昌陝西漢陰通判嘉慶十二年郡以旱災開振局十五年濬城河騏昌皆主其事

楊和字聿修雍正初以諸生薦舉賢良方正才能出眾授戶部七品官歷官湖北德安府同知先是任安陸通判轄地五百餘里外江內湖盜賊出沒乃飭標兵於要口巡防獲則繩以峻法無敢犯者江口舊有長隄歲久圯安陸漢陽常被水害和請於大吏給帑修築不能得乃捐廉募眾成之高厚倍蓰於舊盛漲不為患兩郡十餘州縣安堵無虞土人感其德立祠於隄祀之

莊學愈字沛蒼雍正七年舉人官直隸平山知縣漳沱河決民廬湮沒學愈不待報發米振之曰文移往返死者必多吾甯以此獲愆耳邑有營田幾四萬畝舊以水田報銷實則如龜兆圻學愈周度於西北上游穿渠引漳沱水析灌之復多設水牕時啟閉遂成



沃壤調撫甯縣山海關吏指落地貨為商稅私征肥橐學愈廉得  
實執其吏罪之觸怒監督轉以袒護入奏對簿事得白補魏縣令  
歷遷開州知州  
莊榮徵字信關雍正七年舉人任廣東定安知縣定安瀕海田久  
沒於水而賦額尚存民苦累檠徵勘驗得實請免其賦大府入奏  
得旨豁免後移知東安士民不忍其去為建生祠  
許宏聲字聞繡雍正七年舉人考授中書遷甘肅平涼府鹽茶同  
知駐固原與知州分土治軍民雜處號繁劇宏聲惠孤貧懲蠹役  
興學校政令一新有黑雲烈風自西來吏馳報曰大雹至矣一城  
盡驚宏聲曰是可力驅也亟請提督令軍士排鳥鎗齊發聲震天  
雹遂卻民廬獲全沿邊因得卻雹法歲屢歉振卹勤至會御史李  
源奏甘省多匪荒命會總督察勘及固原歎曰固知許君振荒有

法使人皆如是吾復何言甘省向無社倉宏聲捐米百石為倡設  
厥勸輸擇好義者董其事上官飭各屬倣之舉卓異未及入都卒  
子承倉山東臨清知州承倉弟承志字繼士乾隆三十年舉人以  
教習選廣東長樂縣長樂商鹽缺課按戶責民償謂之比鹽久為  
民累承志至悉除之使民共食官鹽課亦無缺調番禺番禺省會  
繁劇俗健訟胥吏私設班館緣以為利羈候者四百餘人承志窮  
日夜判決不半月盡釋歸遂毀其舍一月中嘗乞假六七日以清  
留牘禁株連嚴誣告之罪俗為之革巡撫以積盜多隸番禺之沙  
灣芟塘嚴檄擒捕承志思其地濱海張皇則生變乃減從往召其  
長老委曲開諭之甫七旬獲盜首及其黨三十餘人乃以失察於  
前功不足抵竟被劾論徒去之日襍被外無長物配三年贖歸里  
高宗八旬萬壽以祝釐賞給原銜旋得末疾在兄子紹錦山東莒

州官舍卒紹錦以謄錄入貲作州牧有政聲在莒十八年沂屬七  
邑有疑獄倚以質成多所平反嘗謂古稱清慎勤當續以和厚二  
字於居官之義始盡云

莊大椿字書年父絳語在文學大椿雍正七年副榜知四川雙流  
縣官室陳氏子奪民田前官皆不問民泣訴之大椿拘陳至閱其  
契曰偽也契書陳宦以年月計之爾父載作秀才爾非世家非偽  
造何杖之而還民田豪右帖服後知新繁縣有吳氏殺熊茂遠獄  
前令以行姦被戕論大椿疑其傷多乃夜訊吳氏手封片紙飭二  
吏疾出城開視不得報者重懲吏啟之則令拘吳氏夫李公兒也  
相與駭且笑曰公兒出久矣安所索之不得已至吳氏門封鍵如  
故坐高坡歎息以為歸當受責也倏見屋內火光躍入見公兒擒  
之吳氏見夫至錯愕吐實熊茂遠者寓其家久鬻販積五六百金

公兒先數日徧走里中以遠適告而私匿於家與氏夜醉茂遠殺  
之移尸卧房埋其銀桑樹下夫逸而吳氏大呼有賊鄰里赴救則  
茂遠已死以行姦被殺訴事白邑中稱神明調射洪課種藝振風  
教士民戴之乞休歸卒子燮字允叔援例揀發直隸補南宮縣丞  
累擢州縣治獄平恕大辟八情實者前後不過三四人知鉅鹿時  
為川水漲壞民田廬燮巡視版築迄工竣二百餘日王倫擾臨清  
州地與鉅鹿近率吏民晝夜防守眾以無恐及知大興永定河水  
漲壞隄浸及民田大吏檄往堵築燮捐廉俸數千金尅期竣事升  
南路同知緣事被議得白感寒疾卒

潘思桀字挈方雍正二年進士選庶吉士改刑部主事參決矜慎  
獄無冤者由郎中出知廣東南雄府會驟雨水溢衝太平橋四望  
皆巨浸親治筏以濟溺者作席舍棲之飭縣今夜出庫金為萬餘



緘瘞死給生令以例當題請思桀曰待請而行民其魚矣有罪吾任之所活無算擢海南兵備道深入五指山化導黎人濬瓊州西湖通舟楫俾無涉海之險民稱為潘公湖調糧驛道旋遷按察使治獄多平反雪東莞陷盜案者數十人乳源人殺人啗其鄉愚以金使代罪讞上思桀疑其狀一訊得實西甯有爭墓道械鬪者汛弁遽以逆聞思桀偵得兇渠按如律解縱良民無所擾遷浙江布政使金衢嚴被水旁溢枕紹湖三郡漂流人畜無算督守令收棺櫬瘞浮骸發倉儲以振民又疏餘杭餘姚上虞諸湖人比之鄭白之沃云蕭山民羣渡江環撫軍門告饑官私震駭思桀曰民饑當哺譁則亂民也請治之收狡黠數十人荷校以徇諭眾曰官已在縣振若曹矣速歸毋自取戾眾帖然遷安徽巡撫未蒞任聞河決淮肥即拜疏巡視督振數月抵署奏三策曰課農桑疏溝洫稽流

移報可尋調撫福建諸府州頻遭水旱振卹憂勤民無菜色修築甯德東湖得良田數萬畝濬福州西湖溉田數千頃以冒霜露觸海氣得疾卒於官祀賢良祠予祭葬謚敏惠思桀服官數十年勤慎如一日政餘研究經學而尤邃於易

龔松林字封五號塵園雍正五年舉賢良方正授廣東海陽縣瀕海舊有隄互數百里歲久衝決浸民田松林倡復之建閘以資蓄洩在任五年多惠政丁母艱服闋攝河南嵩縣縣有伏牛山距治三百里介山陝岡險籌密盜賊出沒松林議請設守備駐劄且移糧捕通判於孫家店皆見施行歷權汝陽祥符補洛陽攝鞏縣治最擢補懷慶知府未之任卒 龔氏譜

段之縉字改齋雍正十年進士任全州下車見銀鑰被逮者五六人詢之則前牧比追鹽價之船戶也惻然為代償五百餘金釋之

州為粵西門戶驛使如織舊例各鄉按戶僉役之縉革之悉由官顧募著為令坐事望吏議降判柳州引疾歸子女舟乾隆十年進士刑部主事乾隆庚午主山東試終保德知州竹初文鈔莊柱字書石號南村大椿季弟雍正五年進士改翰林院庶吉士特旨選知大興縣廉潔愛民庶事修舉羊草脚費胥吏借以擾民請戶部移奉宸院辦理弊遂除擢浙江温州府平反冤獄詰正宿訟以恕御屬吏而嚴課民事正鹽筴省魚稅定額租歲饑以數事請上官首任海運官粟六萬餘石又採買及借鄰近倉穀平糶粥民賴以蘇將去任期不十日時又封印不事嚴鞫而伸誣良斃命冤獄得殺人者置之法遷溫處道副使築尖塔二山海口閱四月功竣而民不勞練於政事口不言能敏於文辭不求人知引疾歸平生力學篤行未嘗蹈非正之地談委巷之語無疾言遽色雖

橫逆至夷然也子存與語在經學培因在文學

楊稷字事可性英敏雍正七年舉賢良方正任甘肅會甯縣會甯地高方亢旱時以軍興資輓糧粟知府以歲豐報稷奮然曰歲稔地瘠振貸且不暇反誣上以虐民乎白其事於大吏知府乃以他事齟齬稷將告歸民號泣請留大吏廉知之乃寢其事後以雪冤獄例晉秩因同官方望議移其獄讓之以勞卒官筭無長物逋帑千金民爭代納

丁廷讓字退思父來復篤學多著述廷讓雍正十一年進士授戶部主事監督寶泉局先是寶泉局東西廠工匠六千人桀黠者以工價不平倡停爐上命步軍統領舒赫德發兵擒治眾洶洶將拒捕廷讓恐激亂選壯士十人為僕隸狀入東廠縛狡匠數人入西廠縛二人付刑部獄上聞深嘉之出為福建延建邵道調鹽法道



待商人不少假除蠹弊絕苞苴商人初怏怏既乃大悅服轉江西  
按察使以失察偽稿事免歸廷讓居官儉素里居有清德子應甲  
字怡曾由湖南縣丞升永順知縣調桂陽能雪冤獄遷零陵以疾  
歸孫履泰字星階嘉慶四年進士由庶吉士改河南葉縣知縣調  
淮甯兼攝太康皆劇邑刑政清簡不聞鞭扑聲尋乞終養歸煦字  
叔侯嘉慶三年順天鄉試第一大挑知縣發湖南補江華縣時會  
匪滋事大府名捕者五百人煦鉤距考驗赦脅從使捕賊自贖獲  
匪魁陳鐵頭等及其黨七十餘人論如法縣在湖南極邊毘連兩  
廣賊匪乘間侵掠煦建議於湖南兩廣錯界各設文武員按日巡  
哨四境大治廣西傳言賊二千人竄江華姑婆山大吏將率兵入  
山搜捕煦按縣圖實無是山而縣內山界多客籍號為棚民久勤  
開墾奉法令驟入兵恐有變力言於上官乃止調零陵去縣日士

庶追送者幾萬人尋以疾歸煦弟履恒語在文學履恒孫承壽字  
佛持咸豐二年順天舉人浙江永康知縣  
吳龍見字恂士明大學士宗達曾孫雍正十三年舉博學鴻詞乾  
隆元年進士授戶部主事以事降調七年詔舉如唐馬周陽城其  
人備擢用大學士陳世倌舉龍見召對以州縣用補直隸武強知  
縣武強城久壞又乏水龍見力為修築鑿井二十有四又築滹川  
書院尋調獻縣縣治南有橋為入京孔道時橋壞水潦將降龍見  
不及申請輒發帑萬金修之橋成而大雨水深丈餘人服其先見  
修漢河間獻王祠墓以毛公貫公配祀擇劉氏子孫奉之內遷刑  
部主事尋轉山西道御史以常平倉積儲空虛非計上疏極論下  
部議行在臺省十年年七十乞休歸卒於家孫堂字伯升乾隆五  
十一年舉人大挑知縣所至禁暴戢奸屢決疑獄權福建長泰時

邑多械鬪官吏積弱莫敢誰何堂手擒首犯一人置重典悍俗遂革及補河南鄆陵葺志乘除擾累卒後民共德之八名官傳堂弟飛翰號雪舫工楷法為世所稱

吳溶字雨臯乾隆元年舉博學鴻詞由議叙為河南縣丞擢知縣調淮甯剔弊釐奸卹民隱培士氣嘗論致治之要在熟察風土民情因勢利導泥古而不知今未有能得其平者去任歿於家淮甯人間訃為位以哭祀淮甯名宦子鞏字師曾少孤貧力學工書以內閣供事議叙歷官四川邛州知州在蜀數十年佐理軍營甚著勞績罷歸不名一錢而意泰然

劉綸字如叔父機語在義行綸乾隆元年舉博學鴻詞試第一授編修歷官文淵閣大學士軍機大臣十六年奉旨前赴土默特清查蒙古地畝時議勒限遷徙流民撤還所典旗地綸至以出口人

民積聚不宜頓行驅逐當節次疏通為條例具奏得旨允行十九年以順天府屬各員責成不專非設官意請分錢穀責治中詞訟責通判是時西征準噶爾將發役車供侍一切辦治事竟無一人譁者自為侍郎以至入閣前後二十餘年皆在樞廷贊畫機務始終敬慎退直慎默不言即諸子亦不能知其嘉謨密勿也迭主順天鄉試及會試得士最盛三十七年薨於位贈太子太傅賜祭葬謚文定祀賢良祠綸學問經濟冠絕當代為人和厚不立崖岸而莫敢干以私尤以廉潔自矢自工部侍郎歸買屋數楹逮後未嘗益一椽半甃嘗言居官貴操守而節儉為操守之本寡嗜欲為節儉之本人以為名言著有內外集二十四卷行世子圖南乾隆三十三年舉人廣西南甯府同知躍雲乾隆三十一年一甲第三名進士官至兵部左侍郎砥勵名節於眾所驚趨者去之若浼督學



江西公正自持不與地方一事江西為之謠曰公相之家大臣之度秀才之母童生之父再典山東試時山左人呼為戒尺榜以所得多寒暖又多老諸生也詩宗唐白居易宋蘇軾文好明歸有光書不名一家而有天趣著有貽拙齋詩文集若干卷召揚乾隆四十九年南巡召試第一內閣中書學行高潔鄉里推服著有平安舫詩稿十九集召揚子逢祿語在經學

程景伊字聘三父彥陝西靈臺知縣語在文學景伊乾隆四年進士改庶吉士散館授編修進易泰卦保泰箴上深嘉賞命書於御屏尋遷侍讀歷官文淵閣大學士兼吏部尚書景伊性行端重事上樸誠問必以正對上嘗詢人才景伊對李瑚有守瑚時以巡撫罷職遂起原官始終清節緬甸撤兵後釁復生議征勦景伊奏言窮荒醜類不足復勞中國陳說古義甚力上從之邊釁亦息關樞

於歲額外每進羨餘上與景伊言及之對曰此例開恐異時輾轉日增將至末大於本其嘉謀入告持正識大體類如此立朝四十年未營私室上嘗溫語曰久作公卿可尚無居止乎由是始購數椽乾隆四十五年七月薨於位賜祭葬謚文恭著有雲塘書屋詩稿十五卷文稿十二卷代言存草二卷

錢維城字宗磐號茶山人麟語異宦績維城長身戍削目炯炯有光乾隆十年一甲第一名進士授修撰游擢刑部左侍郎修律例舉其援引歧誤者如殘毀人屍親屬捉姦二條請改正復以事主殺賊之例各省引捕亡律問擬多未當疏請更改均得旨下部議行視學浙江以士子工揣摩少實學飭諸生以半年習一經於按試時覈驗士習一變奉命偕湖廣總督吳達善會讞貴州案悉心鞠論各得其平通古州逆苗香要脅眾肆劫復奉命偕吳達善

及巡撫宮北麟往勦遵旨撫諭各寨赦脅從甫踰月香要就擒餘  
黨悉降旋丁父憂回里卒遺疏入上軫悼褒恤加贈尚書諭祭葬  
謚文敏賜子中銑舉人內閣中書維城學問精洽畫擅元四家之  
勝卓然成大家所進畫冊多蒙御題著有詩文集三十卷  
瞿曾輯字贊觀號秩山乾隆五十四年進士授工部主事轉御史  
給事中屢上封事刑部秋審冊於十日前分送大學士九卿科道  
核議從其請也擢甘肅蘭州道時甯夏將軍某奏兵餉有假銀將  
興大獄特旨命曾輯馳往查辦曾輯以甯夏地接阿拉善王界蒙  
番雜處銀來歷無可究詰不宜以細故擾外藩事遂寢繼任四川  
鹽茶道再權臬司所至皆以安民察吏為心務持大體不喜更張  
丁母憂歸寓居江甯優游林泉二十年卒曾輯官川南道時家人  
留行者會成都兵變勢洶洶賊相戒勿犯瞿公館舍得免於禍

瞿

容撰傳

莊一虬字赤飛家貧并日一食不能從師工楷法傭書自給以謄  
錄選廣西全州倖久之遷貴州施秉知縣奸民徐國用仇苗民揚  
言苗反巡撫檄總兵率大軍往勦民大恐一虬疾馳百里止之曰  
此奸民蜚語請先往伺之遂單騎往諭羣苗縛國用斬之民乃安  
權黃平知州調遵義先是劇盜劉文理據險謀亂肆殺掠守令會  
營攻之數月不能克一虬至故弛其圍出不意禽文理殲其黨三  
十餘人尋以黃平讞獄里吏議歸在官十餘年貧如故及卒惟敝  
裘一襲脫粟數升

王顯曾撰傳

表禮城字屋吾號讓木少有文名貢國學集漢書獻賦名列第二  
乾隆六十年舉順天鄉試以先得謄錄選福建浦城丞攝福鼎縣  
事邑濱海多外患禮城繕守具修明戚繼光礮臺夷船至碎其舟



會匪董希勝王步由潛匿未獲時出擾民大吏置不問禮域力爭  
之會御史有言得旨捕治禮域與遊擊任重追獲之於浙境方論  
功因縣丞不得署知縣勒還任調上杭丞禽治奸盜民棄尸不葬  
倡施楷置義冢革溺女錮婢舊俗興雙峯書院巡撫臚治行以知  
縣薦禮域以文士困簿書恒鞅鞅遂乞養歸 澤古齋文鈔  
劉斌字晴帆一字海巖由河工議叙通判歷遷刑部江西司員外  
郎平反二冤獄擢漢陽知府歲稔辦振以餘解存藩庫始終不受  
鹽規銀鹽戶有感折獄平允者饋金不納署漢黃德道遷四川永  
甯道卒於官斌以縣學生起家刻苦自勵居官節儉不異布素子  
其繩雲南開化府同知 會稽山齋文續稿吳保恒撰墓表  
莊成字聖薪乾隆元年舉人初知福建詔安縣閩俗有練總者把  
持訟事為民患成按法除之斷獄嚴明民為感泣以憂歸起補安

溪知縣治最廣考亭書院田畝士德之孫垣工詩文乾隆五十九  
年副貢  
莊經畬字念農乾隆二年進士知安徽建德縣能雪冤獄調盱眙  
黃水入洪澤湖岸圯經畬冒雨指揮水退人以為神性强直遇不  
平輒力爭之屢為上官劾奏至落職事無驗輒後官後遷甯國知  
府卒  
王光燮字麗三乾隆二年進士選廣東博羅縣坐事免起為直隸  
雞澤縣鑿邢家隄建青龍閘通城濠水利濬溝七道建七利閘得  
溉田三百餘頃沙河為害縱橫二十餘里光燮約民濬治沙患以  
平建書院招秀民肄業親為指授歲旱禱赤日中首觸城東龍王  
廟石碑血殷清天遂大雨血痕積久不滅京軍過臨洺關雞澤當  
出車五十兩光燮按鄉亭定出車數書其直調邯鄲故事假民馬

給邊驛吏緣為姦豪奪無還者光燮令十假一役滿還主仆者與  
直坐事免起為江西宜黃縣山民以無糧趨利便豪勢益兼并多  
械鬪光燮聽民認懇升科獄訟大減為令最久未嘗一遷秩去後  
益見思子育琮己酉進士兵部武選司主事

陸廣霖字用賓乾隆四年進士改庶吉士未散館即除福建連城  
知縣調臺灣彰化城外虎尾溪地遼曠為劫奪藪請設丞以資彈  
壓俸滿將行巡道以彰化多鴨寮康熙間叛賊朱一桂即飼鴨者  
命善處之廣霖曰苟業耕者叛將廢耕乎審年貌鄰佑互結足矣  
甯德縣東湖三面竝海自經倭寇隄衛久圯更築費鉅萬工不就  
大吏檄往督察廣霖仿河工下埽法治之工遂歲陳宏謀撫閩廣  
霖陳崇貢院通水利整橋梁裕積儲廣郵亭興煤廠端士習嚴械  
鬪禁囤積廢闖神戒溺女止燒山十二事多見施行丁母憂歸免

喪補廣西恭城縣署百色同知百色界連雲南田岑二土官爭地  
界不決廣霖履勘斷歸岑氏田氏不敢異後坐事罷職子繼夔浙  
江桐廬縣知縣繼夔乾隆三十五年舉人河南登封縣知縣服官  
皆有聲繼輅語在文學

莊綸渭字對樵乾隆七年進士授浙江武康知縣勤於聽斷調定  
海定海孤懸海外不設場窰岱秀二山尤窮絕無禾稼以魚鹽為  
生附郭農民多以米易鹽流轉城市有商人覬其利賄得大府檄  
以二千金收餘鹽六十餘萬斤綸渭以為苟如是必盡弛農民為  
窰丁化膏腴為斥鹵而羣不逞之徒四集胥吏搜緝為暴而刮士  
堤薄海潮衝溢其害不可勝言力請止大府檄再下固爭卒不行  
定民感戴立生祠紀碑頌功德擢知甘肅甯州紅毛夷人以大珠  
六驢行固卻之曰勿使夷人視中國官長謂可貨取也尋乞養歸



吳楫字書石乾隆十年進士授戶部主事改吏部轉刑部擢郎中奉命隨侍郎某勘浙江積獄獄有恃援逞辯者卒訊得情置之法又往山西勘事巡撫庇屬員暮夜賄千金揖卻之論如律在刑部二十年以廉幹稱遇大獄往往徹夜不寐求其情嘗曰即明允如臯陶猶恐違曾子勿喜之戒况未必允耶以積勞卒

余有慶字元龍早歲嗜學由明史綱目館議叙授湖南瀏陽縣丞丁母憂服闋選湖北江陵縣丞地當江衝值大風雨隄將潰有慶露宿堵築有投訟牒者有慶為剖曲直且諭以訟則終凶還其詞民曰得長官言可勿訟矣上官薦擢知縣以才疏謝遽引疾歸吳祖修字慎思雍正十一年進士改庶吉士時父龍應猶官編修父子同在翰林當時榮之散館選直隸廣縣調任印以卓異薦升廣東連平州會丁父憂服闋補山東濱州緣事牽連罷職循例起

復發湖北署嘉魚縣及沔陽州尋借補武昌調襄陽以捕盜功得旨送部引見未行而卒祖修任州縣垂三十年所至多善政而尤長於折獄任邱有逸盜殺人棄尸於河無主名祖修齋宿城隍廟忽有人言於廡下曰殺人者楊大口也捕訊果服而言者即其黨立置之法濱州有鹽梟為患幾二十年祖修設計擒治餘黨屏息德州河決鹽店口三十餘丈洶勇不受塞祖修跪風雨中籲禱解衣投決口水勢頓緩不日而工合及署沔陽州州方分置文泉縣是夏江水浸文泉及州境七十餘村當事欲僅為文泉請振祖修曰分文泉以利民也未分之前此七十餘村不與文泉同食振耶今歧視之是未見分縣之利而先受分縣之害也上官無以難乃從之

劉辰駿字湘渠保定知府履旋曾孫以縣學生累試不售其族叔

祖尚書於義保薦之引見發戶部以主事銜學習行走尋奉旨赴  
陝宣諭化導事竣留陝以知縣用會於義總督陝甘題留辦軍需  
時征準噶爾辰駿多所規畫期滿引見雍正十三年選授福建將  
樂縣崇業寺僧富而橫以爭水主使歐殺人獄具百計營脫辰駿  
卒置之法調閩縣有齷商坐科場事株連繫獄上官欲死之辰駿  
持不可既免賚百金為謝堅拒不納又有積賊脅力絕人恣為姦  
盜在繫忽逸飛行屋瓦眾莫能近辰駿以火器擊下杖斃之人咸  
稱快會丁父母憂服闋改發四川時勦金川檄署布政司經歷供  
帳儲侍立辦署瀘州嚴而不殘去思如在閩方題補成都縣坐福  
建造冊事送部引見有旨以縣丞用補侯官大湖縣丞旋隨臺灣  
道渡臺紮治番獄臺地民番素相殺至乾隆間凹莊柳樹浦兵民  
被害者益眾大吏檄道督審委辰駿署臺灣縣兼理鹿耳門同知

承鞠斯獄辰駿謂非親至其地不能得實冒暑入山谷間竹木翳  
天日靡不親到十數日具得熟番挾嫌引生番慘殺焚尸狀獄成  
首從當誅者七人餘無所問而時署知府者以為寬縱堅執焚殺  
乃熟番非生番嚴刑拷掠當死者四十八人時辰駿已補彰化力  
爭之不能得乃陳白大吏願回省親質臬司覆鞠卒如辰駿議而  
辰駿乃以承審逾限去官  
劉同字鐘應乾隆十八年順天鄉試副榜尋充官學教習期滿以  
知縣揀發直隸再任龍門遷安事其在龍門會歲饑施振經畫有  
法既畢事益募捐義穀為備其在遷安豪民李文耀毆死田傭賄  
寢其事既覺傭母言子實病死不願檢翼日同忽單騎至其家見  
一老嫗詰曰若非某傭母耶嫗不測所以應曰是也一訊具服蓋  
向指傭母者偽也後獲鄰省盜首例得列薦同日緝盜職也未可



以是邀賞固辭境內蝗起為文禱劉猛祠蝗立盡三十六年疾發乞歸會丁母憂遽卒同為大學士綸從祖弟總督方觀承與綸遇於朝語吏賢及同綸遜謝曰吾弟也頗任縣事否觀承歎曰劉令相處久乃不知為公弟今仰公家風矣去官日民知其貧醵金為獻同卻之祇取小錠一重三四銖謂爾等知我家一錢太守否民不知所謂常相稱述焉

莊繩祖字蜚英乾隆十五年舉人官山西交城知縣善斷疑獄縣中稱神明縣故產羊皮及白鷹大吏歲徵之然白鷹實不數見吏夤緣為利繩祖至給羊皮民價而白臺使革取鷹之弊引疾歸謝慶來字豫豐歷任浙江杭衢通判調紹興南塘海防通判乾隆二十年海塘潰決水溢民居慶來與山陰知縣萬敦築複塘以捍之又議左右故塘易薪以石瀕海士庶勒石紀其事遷雲南石屏

知州時方征緬甸隨辦軍需尋調雲州州鄰緬甸數被寇城幾陷慶來率兵民竭力守禦城獲全緬平引疾歸

楊河桂字星川乾隆十八年舉人選陝西石泉知縣有惠政署武功時前令定讞私鑄錢應立法者三四百人河桂求於上官得生者二百餘人民感其德無復私鑄罹法者四十六年大旱河桂上長白山禱而雷雨驟至人以為誠感年七十四無疾卒

湯大賓字名書援例授浙江紹興府同知攝玉環同知玉環孤懸海外會亢旱大賓發倉平糶以官錢令販戶轉輸并請撥溫州倉穀濟之全活甚眾署紹興府事再署山陰縣事海塘衝決大賓不待申報出帑興築擢雲南澂江知府呈貢縣有長蕩民爭水互鬪知縣以聚眾報幾成大獄大賓勘實禡一生杖五人而獄弭以憂歸服闋補廣西潯州府兼署梧州府梧田舊為胥吏舞弊多失額

乃下令有田無糧者一月中首報免隱漏罰再令田少糧多者自報額遂符復以母憂歸遂不出大賓生平多隱德其在紹興督運也同鄉旅殯京師者記居址姓名於棺使糧艘載歸分送其家累歲不倦家居後增祠田贍姍族兩遇大旱首先倡振里中諸善事靡不殫力為之子雄業字存方援例選授廣西橫州知州累遷左江兵備道道故轄鎮南關乾隆五十三年安南內訌黎氏遺裔維祁母子叩關避難廣督孫士毅奏請進討以雄業得眾心檄理驛務賞罰明肅設牛負摺運諸法軍儲皆先期集提督許世亨戰歿雄業駐鎮南相度關外機事榜出師期于富良江北而繕器械戢城壘為之備時上命嘉勇公福康安為兩廣總督駐桂林方謀大舉安南首阮光平震懾以雄業威信可托命遣使款關投順願迎奉故黎主而遣兄子光顯入貢雄業察其誠上命雄業率之來朝

擢按察使尋轉布政使藩司錢穀總匯當軍興後未及奏銷款目紛清雄業櫛剔就緒率僚屬捐廉攤補帑完而民不擾以勞卒于官

劉烜字翼行御史永祚元孫烜少負用世志為外親副都統高世定所器教騎射授以方略乾隆二十一年武舉人選貴州銅仁協鎮守備時大軍征緬甸經略大學士傅恒檄烜隨征累戰皆捷凱還累遷至浙江衢州鎮兵官奉特旨以總兵充浙江鄉試監臨旋移鎮福建汀州會饑民肆掠守令倉卒請兵烜曰此迫於饑耳安事兵單騎出諭皆羅拜解散移鎮漳州烜日簡軍實儲守備時訓練漳九營遂為勁旅漳故高世定舊部烜踵其跡漳人以其高氏甥又所從受兵法比唐韓宏繼劉希逸云

劉煥章字旭岑乾隆二十五年進士選四川銅梁知縣邑有甯湖



周四十里為洱海之源夏秋潦水挾沙石而下淹田禾漂廬舍積為邑患煥章力請加振創開兩子河間年分疏使沙石不積閱二年漲水日消民田盡出去縣之日為作創開新河記泐石以告來者俾無廢塞焉尋升雲南蒙化同知因爭辦鹽政事忤上官意適有奸民挾嫌上控遂以失察遣戍遇赦以貧累不得歸卒於騰越州子企埰字味顛嘉慶四年進士積學砥行官江西會昌知縣未幾卒

裴直方字師仲乾隆二十六年進士授戶部主事簡發湖南知州署永順府郡西通蜀道左壁右澗行人苦之直方捐廉開闢民往來無恐碣其上曰裴公崖補彬州州鉛礦四最旺者金川塘數千人爭壟聚鬪直方親往諭利害析界址眾悅服調靖州州有鶴山書院為魏了翁故居直方重築院舍延師課士靖之科第自此始

旋擢長沙府卒先是嘗攝辰州關樞舊常有贏直方至平兌一以部頒為法不加銖黍至是貧無以殮僚屬集貲賻贈喪乃得歸崔龍見字翹英本籍山西永濟父琳河南南汝光道僑居常州遂家焉龍見乾隆二十六年進士授陝西南鄭縣調富平時金川未靖征調煩亟龍見隨事經畫民稱便累遷湖北荊州府署荊宜施道值教匪為亂陷當陽當陽距荊州百四十里龍見以為賊不走宜都則偪荊州二處皆扼要關楚蜀全勢恐賊散則難勦捕因帥眾防守宜都而使江陵縣魏耀率眾趣當陽賊乃不敢出七日後官兵雲集圍之悉就擒戮當圍賊時白龍灣有白蓮教二十三人謀集眾夜襲圍兵龍見先期偵獲而宜都教匪聶人傑等構逆龍見復馳往擒奸謀置之法鄉民數千人叩關求入城龍見察其無他遽命啟納全活無算旋補荊宜施道轉運督戰備嘗勞苦引疾

歸子景儀字雲客乾隆四十九年進士由庶吉士授編脩累升侍  
讀學士改授廣西思恩知府平叛苗復冊亨城卻魏獻雪冤獄歷  
官泗城平樂府廣東廣州府署高廉惠潮道所至以廉明稱擢河  
南南汝光道祖琳嘗居是官有惠政父老以為舊德復見奉旨查  
緝紅鬍匪徒景儀赴汝甯督捕以勞疾卒景儼副貢生四川金堂  
知縣亦有政聲

沈敬書字貽仕乾隆三十一年進士選江西樂平知縣甫蒞任見  
舊有饋贈上官陋規慨然曰吾終身老教書年六十得官養廉足  
用誓不沾民間草木何有苞苴及上司耶惟務休息其民不求赫  
赫聲譽三年即謝病歸宦橐蕭然仍應聘為經師

徐鼎亨字會基乾隆三十一年進士任四川梁山縣性廉察邑有  
奧區為盜藪鼎亨單騎入諭解散歸農境遂無盜移巴縣歲大稔

詔發倉平糶前令奉行不善民大鬩監司將發兵捕鼎亨曰饑民  
耳請馳諭之既受印即日平糶民賴以蘇既去巴人為立碑祀於  
社乾隆間以天下德政去思碑類多文飾詔毀之使者至士民數  
萬聚碑下乞勿毀有業攻皮者年七十餘大聲曰必毀是吾頭願  
與碑俱碎使者言其狀得留三十七年清兵征金川檄辦軍需叙  
功以同知用母喪服闋補儀隴縣僻簡治以清靜獄無繫囚以  
老謝歸卒

謝聘字晨隴祖世勲語在義行聘乾隆三十一年進士授河南固  
始縣遷鄭州署武安及許州五十年許州大旱聘先給捐振繼以  
官振諭各莊互相守禦一州以安武安在萬山中西近太行田高  
仰惟西北有巨浸聘度地勢遠太行之麓數十里疏引以灌民頌  
其德署鄧州重建唐張巡明鐵鉉雙忠祠在固始創建公鉏子孫



叔教祠

謝王鷺字振飛乾隆三十一年進士授湖北大冶縣署穀城時教  
匪為亂王鷺兩守危城轉輸糧餉協擒渠逆四十一年五十一年  
再辦振荒總督李侍堯奏稱為通省冠

陸瑗字蘧菴乾隆二十七年舉人三十四年會試取中正榜授內

閣中書入直軍機升刑部郎中四十九年隨大學士阿桂勦回逆

歲事又隨閱視河工奏請以瑗護將軍印回京值郎中俸滿加四

品銜留部瑗在樞廷垂二十年小心勤慎贊畫機務當軸咸倚重

之擢浙江溫處道旋卒子香森性慷慨有幹濟才由廣東陽江縣

丞洊擢山西平陽知府逢瑞乾隆五十一年舉人湖南醴陵知縣

孫恩壽福建甌甯知縣皆能其官葆尤知名語具後

卜謨正字繼阜乾隆三十三年舉人補山東青城縣脩築城垣工

固而民不勞他縣亦乞謨正往辦城工齊東縣民抗糧毆差請於

上官調兵督捕謨正請往諭之皆散遭父喪歸越明年間青城被

水衝決亟馳視則城已完好方謨正去時民庀築城具相戒曰三

十年內城壞當代脩不可累賢令也改旌德訓導卒

莊斫字似撰乾隆三十三年副榜就職州判奏留陝西歷署縣事

擢興安府漢陰通判調乾州署興安府興安去省會遠山谷居民

良莠雜處斫廉得白蓮教頭目蕭貴為逆狀捕置之法既而楚蜀

蔓延興安獨無事嘉慶元年署咸陽以與平泥河賊王金禮功賞

戴藍翎二年升邠州仍留軍中是年冬教匪屯聚興安之光頭山

大吏以斫能守禦再署興安府興安舊以堤為城坦步可上斫團

練鄉勇數萬人因堤高下或塹或墉晝夜巡築城以固時楚賊張

添倫等自南鄭渡漢川賊齊王氏等繼之斫以為楚賊渡漢遠涉

西鄉紫陽石泉周落遼廣戶口稀少焚掠無所得必遁歸檄沿漢諸縣掣商船民舟盡入汭港守以重兵使賊不得南向又念川賊若潰非東走夔州即北走通江興安當南北衝係全省安危賊據要險則兵餉俱絕由是度地設防賊乃不敢窺伺時統軍宜綿倚斡為重在興安三月復檄之去連破洞汝二河賊巢賞換花翎後以子達吉為咸甯知縣因乞休就養達吉卒乃歸在官多陰德嘗鞠邪教爭於統軍免株連者萬人朝邑被水請振出貲八千金濟之在邠時免地方科派貼差銀三萬兩去之日百姓涕泣求畫像建生祠焉達吉字伯鴻早慧倣儻援例為知縣分發陝西補藍田調咸甯擢潼關同知勤聽斷卻苞苴前後擒治大猾巨盜數十人歲旱禱雨跪烈日中雨至沒踝乃起中濕致足疾遂卒斡父子皆多著述以舟行滲漏漫漶幾盡斡僅存文六卷詩七百餘首達吉

存保嬰備要六卷秣陵秋江上緣樂府二種

汪本直字讓庭篤學工書乾隆三十三年副榜為山西絳州州判署襄陵縣事遷介休介休故衝要驛館在城市吏卒往來擾民乃移西郭外裁民供億費於舊驛立試館為歲科考棚尋知忻州州大猾周抱吉橫於鄉本直至即置諸法州人羅克智豔郭氏婦美戲之婦憤自經死羅兄克睿為臬司吏庇其弟誣婦以他事死本直駁議千餘言卒旌婦烈而抵克智罪訪得金元好問墓為復構野史亭錄其後二人置祭田三十畝俾奉祀事以獲新疆犯例得遷方奏入即乞歸著有言行類編十六卷

沈鐘字大聲乾隆四十七年舉人授福建屏南知縣時屏南自古田析為新邑築城郭建學校定籍貫嚴保甲事集如蠅應手皆辦蒞事三年坐城工虧帑落職民感其惠歛貲代償貧不能歸授徒



自給遂卒於屏鍾養子湘扶柩浮海入乍浦颶風大作湘哀號誓  
以身殉舟人感其孝為減載數百石乃得全咸以為在官清節之  
報

史夢琦字仲韓乾隆三十四年進士授內閣中書擢兵部主事軍  
機處行走以御史視學廣東以母憂去服闋升給事中出守漳州  
漳邊海遼闊俗武健張奢者臺逆林爽文餘黨積歲其能治夢琦  
躬率弁兵捕之盡械其眾以歸奸人王章為鄉里患遣吏縛至庭  
兩案株連數百家律皆當死夢琦誅渠魁數人餘皆宥之擢汀漳  
龍道五十九年秋風雨海溢水深丈餘夢琦躬率拯災窮僻皆到  
會閩省清查以屬吏虧累被議去官夢琦清直有廉節不矯飾近  
名視學時得端溪硯十二以名其齋云  
胡時顯字行偕明尚書澹十一世孫監生考取騰錄乾隆三十七

年侍郎劉秉恬辦理進勦金川西路糧臺奏時顯從行文移案牘  
皆出其手奏獎賞給中書科中書職銜又以遇事奮勉奏得遇缺  
補用升兵部主事值軍機處洊升郎中京察三次一等選廣東雷  
州府以親老乞留隨大學士福康安勦湖南貴州紅苗有功賞戴  
花翎又隨都統額勒登保勦湖北川陝教匪屢奏捷授內閣侍讀  
學士加三品銜轉鴻臚寺卿以勞瘁卒於陝西興安軍營贈光祿  
寺卿賜祭葬時顯性慤直百折不變在軍機忤要人即日斥出隨  
軍金川及楚陝黔蜀屢抗統帥顧皆為統帥所容為箋奏頃刻立  
成曲折如意未卒前數月力疾陳奏十事其請增隨征兵糧及令  
巡道稽察轄下營伍得旨允行尤善書名重當時云  
劉印全字墓陔乾隆三十七年進士選四川資陽縣洊升綿州調  
赴西藏辦理軍糧升廣東鹽運同印全官蜀時勤撫字嚴竊盜治

行稱最方教匪蹂躪川陝檄赴達州老木園營武弁誣難民為教  
匪邀功印全請於帥釋其枉者數十人賊近綿境印全還州堵禦  
綿為省城門戶而舊城形勢扼要僅存基址乃捐廉興築為士民  
倡刻日告成納難民避賊者三萬餘人賊自嘉陵北來總督魁倫  
擁重兵駐綿州畫江自守難民萬餘人呼號覓渡總督不許印全  
力請得渡兩岸呼父母者其聲殷天嗣以鄉兵渡河擊賊於沈香  
鋪乘勝追殺十餘里振旅還城參贊德楞泰楊家店之捷印全率  
鄉勇立高阜呼曰降者免死投戈伏地者無算察之皆脅從難民  
計全活三千餘人綿人為建生祠子遵路嘉慶庚午舉人孝友肫  
穆能承先志著有菜根書屋詩集四卷  
徐大榕字向之父瓚語在忠節大榕乾隆三十七年進士授戶部  
主事隨大學士李侍堯讞獄湖北昭析允當以是知名尋授山東

萊州知府平度州民張子布者娶於羅婦弟有良私鬻其姊毆子  
布斃之并自斃其母以滅口有頃子布蘇有良遂以母死誣子布  
知州以狀上大榕閱原驗腹下傷橢方曰吾訊子布跣足鬪而有  
良納鐵裹鞵今傷橢方乃有良蹴也大吏庇州官坐大榕失出罪  
遂奏削職繫濟南獄中書狀使所親至京控訴上命尚書胡季堂  
侍郎吉慶按其事方對簿時忽雷電大震有良恐懼吐逆狀事乃  
白即日復官調泰安府累決疑獄旋緣事鐫級開復改京員乞歸  
養卒工詩著有百二十硯齋集八卷

吳琦字景韓乾隆四十二年舉人官江西鄱陽知縣鄱陽兩遇旱  
自出數千金振之民有訐所怨以教匪者琦詰以何驗曰不食肉  
鹽耳曰若食之而食則奈何訐者屈遂縱之又有誣大姓為不軌  
者大吏命以兵往琦辨其誣釋之其歸也貧負官錢民代償乃歸



孫鋌字耶谿銳志學問喜為古文應京兆試遽卒士輩咸惜之著有紹韓書屋文鈔二卷

楊煒字槐占善書工詩乾隆四十三年進士改庶吉士散館授河

南柘城縣時妖民王景亂初定民多流亡煒撫卹備至為開濟瀆

池以興水利調固始城圮亟捐俸倡脩不兩月而工畢以母憂去

免喪官江西署饒州知府餘千人黃景成者為盜藪黨以千計煒

至三日即以計鉤致一郡稱神明補南昌罷職捐復加捐道員分

發廣東時蛋戶張保烏石二為洋盜分東西路游緝總督百齡自

勦張保而檄煒署高廉道當烏石二煒酌度事機簡練鄉勇外則

招徠脅從內則嚴備制禦投誠者眾盜勢益蹙張保遂詣總督降

并誘擒烏石二以自贖後卒於粵著有西溪草堂集若干卷子鼎

高書高皆候補知府鼎高有文譽著有溪山清暇居集六卷

謝愔字彥丰榘曾孫祖濟字孔淵雍正七年舉賢良方正父王炎

字稷山乾隆十三年進士授甘肅渭源知縣以廉明稱升甯州內

轉刑部員外郎敬慎臬事咸得其平遷兵部職方司郎中愔乾隆

四十六年進士授浙江義烏縣盡心民事嚴肅胥吏自題齋額曰

慎一點硃民有獄訟不輕傳喚役出量道里資給不費民一錢計

遠近立程限無許差漏刻到即斷決無片牘留積尋任江山邑為

閩越衝要適用兵臺灣自出征及凱還百務繹騷義烏之民競赴

江山為之吏應得無誤旋擢紹興通判乞歸卒

盛愔崇字孟岩祖衡語見儒林愔崇乾隆三十九年舉人由中書

入直軍機四十六年進士授主事升禦史在軍機二十年勤敏稱

職以陝甘總督長齡請往陝西軍營軍書絡驛愔崇伏地起草悉

合機宜補同州府同界連山西軍糧皆由同匯運前官以運米費

重議折銀愷崇捐廉給費悉以米運軍食以充調西安卓異入都  
值西兵驚報適至面奏南山路徑形勢及堵禦策甚悉隨將軍德  
楞泰回陝升督糧道五署臬司遇疑獄多平反升江西按察使遷  
陝西布政使調甘肅卒愷崇書畫似其父每有進御輒蒙嘉賞與  
弟愷大愷復齊名極一時風雅之盛愷大字甫山乾隆四十五年  
聖駕南巡召試欽取舉人授內閣中書轉御史嘉慶二十三年奉  
旨以明年春幸盛京謁祖陵蹕路所經差務絡驛愷大上封事即  
日降旨順天府二十四州縣錢糧全行豁免二十四年以萬壽恩  
詔普免直省錢糧積欠愷大奏言民欠多胥吏影射請酌免新賦  
十分之二又奏各直省常社倉事宜并附奏常州積穀平糶可補  
社倉未備其捐錢存儲商典請飭地方官不得挪動俱奉旨允行  
旋出守甘肅慶陽有清節兼工書畫愷復字彥叔由四庫館騰錄

選授副指揮洊升河間府知府卒於官

管幹貞字陽復號松崖乾隆三十一年進士改庶吉士散館授編

修遷禦史歷外任擢漕運總督工部侍郎充丁酉貴州考官戊申

順天考官己酉會試總裁其任御史巡城時劾副指揮馬為玘改

供縱犯及任漕督劾岳州衛守備錢選縱所屬運弁為湖北按察

使李文培私運財木督糧稽延沔陽衛守備焦廷遴失察吏役通

賄作奸均論如律又疏論湖河水利責成州縣以運河通塞課優

劣又奏復長蘆運使貸丁錢仍令運丁分年歸款及奏免封民船

為撥船幹貞於漕艘北行嘗自策馬登岸督催或支帳夜宿弁丁

有勞必加獎賞又復冬兌冬開舊例民甚便之旋以議白糧全行

運京而費無出幹貞恐為丁累力排眾議坐是免官卒於京邸年

六十有五幼子通羣語具後



呂爾禧字皆孚大學士宮元孫乾隆四十八年舉人由四庫館議  
叙知縣發浙江署太平縣海口閘日久圯壞田數千頃淪入巨浸  
爾禧捐俸築之補桐鄉縣給易知由單絕飛灑浮額隱寄弊又立  
按日分圖法俾無擁塞青鎮港瀆通太湖置巡船選丁緝捕盜賊  
屏迹及卒桐民相率赴署門奠哭立祠以祀子子珏字孟嚴河南  
靈寶知縣河工出力加同知銜改發安徽署黟縣兩月結案百餘  
民以為平黟境多山他邑流民聚眾挖煤為民害子珏擒治為首  
者民始獲安勸民設豐備倉建試院節書院冗費俾克持久黟人  
祠祀之子班字仲英嘉慶七年進士授戶部主事綜核吏案胥吏  
無敢上下手主稿捐納房詳定章程與庫司互相稽核以杜流弊  
洊升郎中出為廣東瓊州知府郡環五指山為黎人聚處漢奸入  
貿易輒生事子班撫馭有方閭閻安堵郡田少不敷民食風信不

時糧價騰踊子班檄屬開倉平糶又籌款募商買運民賴以濟丁  
母憂服闋補浙江甯波知府護甯紹台道會英吉黎船入境以貿  
易請子班諭以定制震以兵威即颺去道廠承脩戰船歲多積壓  
子班請以歷任未脩之船捐俸津貼補修水師無誤坐配子珏子  
儁孫子班子倭孫佶孫倌孫語皆具後

楊清輪字仲陸乾隆四十九年進士選湖北嘉魚縣丁父憂服闋  
選福建長樂縣決獄明斷人稱楊鐵案在長樂十六年恩信孚洽  
械鬪哀息後竟無一人入秋決者時洋盜蔡牽頻擾長邑清輪察  
流徒中周應元王貴二人有幹略加禮遇募鄉勇助之前後擒獲  
無算後應元官都司貴官總兵擢汀州府汀境與江西廣東毘連  
賊魁屈春高等出沒其間清輪擒戮之所部以靖在汀八閱月生  
在長樂事去官民攀送塞道額於郡之書院曰八月千秋既歸貧

如寒素主講龍城書院鄉里稱清節者輒推清輪云

張師范字晴湖以辦征金川軍需有功歷官四川知縣知州其任  
榮經縣時縣為入藏孔道多陰雨河水數敗隄為患師范禱於神  
四十日不雨而隄成民建亭其上曰張公亭任涪州時歲凶先發  
粟而後聞於上官州民朱泗斂錢惑眾巡檢遽以叛逆稟大吏師  
范急追止之擒治數人遂定以老乞歸工書又喜為詩著有晴湖  
詩稿若干卷

白鳳字音喈父言遵孝文敦樸乾隆五十年歲大祲以董振勞瘁

卒鳳四十九年進士知縣發福建署海澄改馬巷通判前官多以

民毆官抗糧拒捕械鬪落職鳳至去科條朔望集矜耆相勞苦謀

及日用生計為講解聖諭或徒步憇祠廟諄復勸導聽受者曰眾

皆歡舞相親愛在任年餘獄訟哀息馬巷遂成善地尋補長泰調

大田大田在萬山中民俗儉陋鳳修學校救以文治官書皆自為

之在任五年與民如家人父子卒於任貧甚妻子留滯三年始得

歸

吳塔字次升乾隆四十九年召試二等援例以知縣分發山東山

東八卦教匪蔓延直隸河南境嘉慶十八年三省匪徒約同時謀

逆塔首發其謀署金鄉縣之任即下令禁不得以教匪相告訐於

是賊潛歸遂獲賊魁崔士俊繼獲宋大勇孫戰標等百六十餘人

時定陶曹縣直隸長垣河南滑縣並殺官劫獄而金鄉賊先受創

遂不敢發三省逆匪亦以崔士俊既擒遂巡觀望以致破滅事聞

擢桃源同知遷知曹州府卒於任

莊振字龍見初任陝西城固縣典史以獲盜功升韓城知縣嘉慶  
元年川湖教匪竄入陝省振隨營贊畫共勦平五柞雲等凡五路



興安府城戒嚴漢南民避賊過江者號哭於道振縱之入城全活  
幾二千人從軍十二年以功累升漢中知府漢中用兵後人民失  
業振勞來安集搜捕餘匪行保甲法民得安居擢河南彰懷衛河  
道在任三年清慎率屬卒於工次  
方聯聚號友槎曾祖辰康熙三十九年進士官檢討由大興遷居  
常州始為陽湖人仍著籍順天聯聚乾隆五十一年舉人大挑以  
知縣分發甘肅署禮縣時川楚賊匪方熾蹂躪秦鳳間禮縣當其  
衝賊首張漢潮王三槐等時至城下肆攻擊聯聚葺城堞勵兵民  
與共城守凡九月乃靖勘會甯縣災周行村落織屑簿錄補成縣  
調平番均有惠政平反冤獄人以包孝肅比之升靜甯州丁母憂  
服闋補廣西永康知州以疾乞歸未行卒聯聚性伉爽尚氣節當  
官不能屈意事上嘗曰某本一儒生無他望倉庫無短少不合則

卷衣橐而歸耳何所畏而作諸詔態耶以是所至稱強項焉子履  
錢語在文學  
謝時敏字佩東幼孤母楊督教嚴切友愛兩弟援例補江西饒州  
府經歷後升直隸東光知縣時敏為縣不妄取一錢決事不輕用  
刑反覆曉諭使悔悟乃已其梗頑不率者始懲之尤愛青莊子常  
以俸錢資膏火其在江西景德鎮出瓷器界安徽之婺源祁門山  
嶺亘互有匪棍穴其中恣為不法時叙力擒渠魁置之法瑞昌豪  
矜占貧戶墳山賄通胥吏十數年不結時敏廉得其實一訊而服  
去之日士民為立祠焉其在直隸承辦河工兵役不敢偷減運河  
淤淺設法濬治瀕海之民歡聲雷動子增字仲偉嘉慶十四年進  
士山東博平知縣亦以循良稱  
費濬字濬川乾隆五十一年副榜就職州判發陝西歷署蓋屋扶

風縣俱有惠政署長安縣邑瀕南山民素悍有楊禮等五人盤踞城南久為民患濬訪獲繩以法有為緩頰濬不應卒治如律民目為費青天教匪陷留壩廳濬捐銀勸修村堡百十三處西南路守備以固賊繞由東境入濬時被檄赴漢南已出城西聞警即策馬還東率鄉勇三千人前拒夜半賊至奮勇進擊平明賊敗遁補長安復以功保升同知直隸州署耀州漆水逼城濬批引河七十餘丈築隄四十餘丈水不為患州舊派民驢贏應差濬捐金買應立案永免民感其惠擢延安府有被難流民不能回籍者濬捐二千金遣送出境歡聲動山谷調西安興利除弊政治一新尋擢督糧道兼署按察使清釐積案調山東督糧道未履任卒子開綬語具後

李秉灝原名錦字鑒亭父汝梅孝友肫摯樂善不倦東灝嘉慶十

四年進士授內閣中書協辦侍讀勤慎稱職十八年秋林清作亂逆匪入東華門時秉灝散直將歸聞警命僕從閉閣賊不得入率書吏封閣中章疏圖籍廚中米裁數升命作糜分給杯飲凡三日幾殆事平上命照軍功優叙尋以疾卒

王燮字賡陶乾隆間由四庫館議叙授浙江上虞縣丞虞邑少水多山燮為道達河渠築通明堰修整圓湖阜李湖諸隄闢以資蓄洩風雨寒暑不少懈自奉甚薄有吃粥官之語年七十一卒於官民思其德歲時祀焉

趙鍾書字守田戶部尚書申喬元孫父匪幼孤賴母教文譽日起篤學敦行鍾書從父受學中式乾隆五十九年舉人選豐縣訓導修建學宮節孝祠嘉慶十八年教匪逼山東單縣距豐四十里居民震恐鍾書與知縣防守以守城功保知縣未赴選卒子仁基字



厚社道光六年進士江西崇信知縣調安徽署懷甯判決滯獄感  
格兇頑齋禱於室而時雨立應十二年以捕獲桃源掘河姦民陳  
端奉旨特擢江西贛南道升湖北按察使卒性敦摯親族待以舉  
火者數十家卒之日宦橐蕭然人謂其不墜家風云  
左輔字仲甫乾隆五十八年進士由安徽南陵知縣歷官湖南巡  
撫任泗州時民婦不知紡織輔設局製具募織婦教之碭山縣李  
家樓決口泗州淹沒輔度地建廠躬親撫卹并以被災極重申請  
入奏得振卹竝免賦三年盱眙民孫國柱誣周永泰謀大逆巡撫  
具奏時河南賊陷滑縣有旨命總督那彥成復滑後即統大兵會  
江督赴勦輔已署潁州府檄先帶兵往輔力言泗屬無邪教單騎  
往案之得國柱誣告狀大獄遂息任廣東雷瓊道時昌化縣將復  
開銅礦輔以黎人不辨礦苗又無厚力勢必仍藉漢人而聚匪為

姦必生黎鮮且銅船內渡嘗屢被劫今雖海洋靜謐當杜其漸請  
止之任巡撫時以屯丁失業苗租過重冗費宜裁積逋宜免列款  
具奏均得俞旨輔初入官即以清慎勤三字誓墓宦轍所至風俗  
一變或規其猛則曰譬如醫者下峻劑以發深痼非敢傷其肌膚  
也條教皆手自為懇摯如嚴師恩誼如慈父故民樂從以老休致  
里居卒年八十三輔文章醞雅尤工於詞著念宛齋二十八卷行  
世  
吳光悅字星乙原名廷燮殿試時有同姓名者純皇帝親更馬嘉  
慶元年進士官內閣中書入直軍機洊升吏部郎中遷御史出知  
安徽甯國府歷官江西巡撫任河南河北道時河隄決光悅駐工  
所晝夜巡視所督上下三省交汎五百餘里里有分巡立簿總記  
之汎弁勤惰隄形安危瞭若指掌河督下其法以為各道式任江

西巡撫時朝議鹽法減官價以敵私梟光悅奏曰官鹽有價有課有費私梟有價而已即多減勢不敵緝梟急懼轉而為盜鹽之於民猶布帛菽粟茶烟竹木也聽其賣買任其流通關津征稅遠近利賴若設官征課於場竈而任民運販則私梟皆良商國課裕而民食便帝然其言後竟格不行道光十一年積雨大潦郡邑多災奏截留漕米八萬石以裕民食積勞卒官年七十三

惲敷字子寬乾隆五十九年舉人由大批知縣發浙江署臨安臨安均著惠政繼署定海定海孤懸海外控扼外洋為浙東巖邑額設兵五千惡少竄名為暴敷至嚴懲之民大悅服去之日為立生祠補嘉善值嘉湖兩府水災嘉善地尤卑下田廬漂盪老弱轉徙敷實力撫卹並為歷勘水道疏濬之旋以叙定海獲盜功擢海甯州敏於當官州無逋事興學校敦教化未期月以憂去卒嘉善人

建祠祀之子世臨語具後

吳德孚字玉庭薛墅人嘉慶五年舉人直隸定興知縣民風儉陋出廉俸獨剏河陽書院自是遂有舉於鄉者居鄉孝友喪葬祭祀一準家禮子春棠道光五年舉人江山知縣

龔鏜字聲甫祖朝棟語在義行父詒安山西朔州知州有幹略鏜五歲父口授史事輒知感發嘉慶十四年進士由編修轉御史二十三年仁宗詔東巡祇謁祖陵廷臣諫止上孝思篤摯旨切責眾懼莫敢言會四月八日京師晝晦鏜齋沐繕封事赴圓明園頻行顧閤者曰明午不歸若當於西市視吾耳詰朝啟奏上留中不之罪二十四年典試河南會秋漲河決馬營壩鏜以試期已迫冒險竟渡及登岸舟隨流漂沒人以為神尋升奉天府丞兼學政以清節聞洊擢內閣學士兼禮部侍郎坐順天武鄉試事左遷鴻臚寺



卿卒

董敏善字藹如父思駒字惠疇乾隆五十四年進士分戶部務持大體不為苛察由員外郎出為廣西潯州知府未竟設施而卒敏善秉承家學屢試不第援例補河南潯縣縣丞嘉慶十八年九月滑縣民李文成謀逆戕滑官吏潯距滑僅二十五里賊眾蜂聚城被圍知縣朱鳳森屢請援兵不至積憂勞成疾敏善慷慨誓眾激以忠義與士民固守時軍書旁午凡糧餉出納士卒徼巡悉中機要賊百計圍攻眾守益力越十日援兵始至圍解而滑賊猶時薄瀋城四出焚劫十二月清兵平滑潯始解嚴方被圍時賊黨多瀋人潛伏城中為內應鳳森捕訊得實并家屬置之獄議當斬敏善勸釋婦女出城外全活不可勝計後升中牟知縣甫蒞任即平反縣民趙祿毆死王喜妮要案朱甲寅與劉小攢毆張占元死驗

實罪坐朱甲寅張族上控必欲以劉小同抵上官亦為所搖或欲借以齟齬之敏善力爭讞始定奸民劉順義以奉教惑眾將成大獄敏善爭於上官誅首惡餘悉貫宥縣當衝衢北瀆大河七十餘里民間計田出車徭役不息敏善知民困歲減十之四五邑無書院倡紳民捐建名曰景恭生平口不言守潯功以防河出力奏加同知銜丁母憂歸逾十年卒

楊鼎字位台由騰錄議叙效用陝西軍營補孝義廳巡檢尋遷縣丞擢知甘肅山丹縣調會甯亢旱六旬鼎力疾步禱雨隨車下歲得稔尋署靜甯州路見麥苗盡生黑蟲還禱於神俄蟲投神案下者以石計餘皆移集草樹葉為之盡而麥大熟尋以疾歸

張繼昌字樂田性質介為福建閩清典史俸外不取一錢調嘉義典史賊首陳辦張丙作亂守令皆被害繼昌閉城集士民策守備

事平以功擢知山西襄陵縣賞戴藍翎六品頂帶在襄陵三年調  
岢縣未至卒

費庚吉字耕亭祖懷禮語在義行庚吉嘉慶二十四年會試第一  
名進士禮部主事洊升郎中遷御史簡任河南汝甯府汝郡號難  
治庚吉曰天下豈有不以德化而但以刑威者專意撫循崇尚教  
化在汝甯三年民俗丕變調知開封九邑士民攀轅泣送不忍其  
去旋升福建糧道時海氛不靖檄赴泉州總理糧臺兼翼長感憤  
時事疽發於項卒庚吉篤學工文自為諸生聲雋黌序每一藝出  
爭相傳頌官京師二十年尤以扶植善類訓迪後進為己任從游  
者甚眾及卒莫不傷之河南士民思其惠政請祀開封名宦  
呂榮字幼心乾隆四十二年舉人歷官甘肅隆德安徽五河桐城  
知縣在甘肅署固原知州州西有故道百里達西北陞久梗塞商

民繞行數百里榮闢之人稱為呂嶺在安徽署懷遠知縣適歲饑  
姦民聚眾數百肆掠名振刀手榮獲巨魁三人置之法餘解散絕  
迹五河地窪土積旱潦俱患榮為開渠製水車以濟之民謂所開  
渠曰呂公渠車曰呂公車桐城前後凡五至斷獄振饑編保甲緝  
姦匪民至今德之後擢浙江杭州東防同知因案罷歸榮歷官三  
十年任州縣十四俱以廉明稱宦橐蕭然歸里後邑有善舉皆慨  
然身任道光二十年邑患潦芙蓉圩最窪下災尤甚榮集捐多金  
振之存活無算年八十三道光十七年重赴鹿鳴適孫成慈領鄉  
薦祖孫前後同年士林稱盛事焉年八十八卒子詒安嘉慶十三  
年舉人歷任直隸定興武清雞澤新城知縣精敏善斷廉潔自持  
所至皆有政聲卒於官

卜桐高字翹秀號綦岡乾隆四十二年順天舉人大挑授安徽鳳



陽府訓導歲大饑巡道示期臨振大雨雪日昃不至四鄉饑民咸集啼號盈路桐高詣府請急振之知府慮得擅發罪桐高曰饑民老幼枵腹遠來久不得食又雨雪勢必就斃求生之而致死之豈不上負天恩邪擅發之咎願獨任之知府如所請饑民全活無算越日巡道至謂桐高才識兼優保擢知縣歷任繁劇有聲

劉弼全字星垣性抗爽負才略乾隆五十一年舉人大挑一等以知縣發山東時山東藩司康基田升任南河河督悉其才奏請帶往江南襄辦河務基田奏改章程皆其所定事竣以例不得任本省仍回山東借補藩庫大使鈎稽出納周詳廉慎藩司吳俊重其才守會辦通省清查俾總其事寬嚴得中未嘗重譴一人而追入庫金多至鉅萬調補汶上縣縣有張敦厚者告平民聚眾謀不軌大吏不察檄嚴辦弼全知其誣力為申雪坐告者邑旱蝗禱於神

翼日大雨蝗絕旋丁母憂歸不復出鄉有善舉咸身任之嘉慶十二年十九年旱道光三年十一年十三年二十年水六遇災振又築芙蓉圩黃天蕩潰隄數千丈修築郡縣兩學宮皆弼全總其事靡不妥善里中善堂如存仁普濟育嬰經費日絀弼全悉整畫之如其舊又請掩埋路斃浮屍皆往日地主鄰保之所甚累者一旦除之家居四十年凡有益於鄉里者無不為年八十二卒

董大醕字仲文武進人嘉慶己未進士改庶吉士散館授山東日照知縣改補鄒平歷任河南淇縣孟縣擢鄭州知州所至俱有惠政鄭州民為建生祠尸祝之升汝州直隸州民德之如鄭以未疾告歸邑有善舉盡力捐助道光庚子邑被水災芙蓉圩潰隄數千丈命子捐八千金築隄賑饑人感更生年七十八卒盛思本字午舟惇崇子幼秉奇慧博學能文嘉慶丁卯舉人甲戌

成進士授庶吉士散館改兵部主事總辦武選司事能持大體累升御史給事中凡所陳奏悉稱旨旋晉光祿寺少卿道光辛卯江蘇大水思本疏奏賑災章程請飭江蘇巡撫頒行奉旨諭允活民無算是年考差思本因手顫未應試蒙特旨視學山東為蜚語所中被議錮級因母老乞養歸善書工詩有祖父風著有潔華夢草軒集卒於家

吳孝銘字伯新薛墅巷人嘉慶十四年進士改庶吉士散館授工部主事充軍機章京時京師教匪甫平官軍聚攻滑羽書紛沓孝銘隨行敏慎遇事皆如素習洊升郎中回疆之役首逆潛遁議者欲以克復四城分封回部長孝銘密啟軍機大臣曰是可行於乾隆時不可行於今日行之邊患且益大事遂止旋以首逆就俘賜花翎自道光三年天下大水厥後江浙兩湖被災尤數西方用兵

度支大缺戶部言宗室日以蕃衍而衣食悉仰於官耗財之大者請自系出世祖以上子孫皆改為覺羅為覺羅者以次遞革孝銘言之戶部尚書曰茲事司農宜密陳不宜顯言法宜緩更不宜驟易宗室久受恩養一旦降爵減糧令下即大困困而呼籲朝廷不得已將必復之是良法美意終於不行也尚書是其言即使草奏上之遂罷眾議歷遷鴻臚光祿少卿通政參議授順天府丞仍留直軍機十四年擢太僕寺卿再遷宗人府丞孝銘前後在樞廷二十二年持文柄者七所至以公明著事毋至孝雖貴婉戀如孩提其官江西學政母以南方卑溼不欲行乃子身赴任母歿聞訃擗踴泣血在道病幾不測還京三年以原官致仕歸

魏襄字贊卿號曾頌父元以醫名有陰德襄嘉慶十年進士河南即用知縣補永甯大計卓異調洛陽去永甯時士民多攀轅涕泣



任洛陽值大饑襄方入都引見比同任已後報災例期又值滑匪擾亂兵差往來繹騷襄具文白上官不俟批答即單車親勘饑區陰編保甲發倉穀以振至春復設粥廠百餘課最賞五品銜丁母憂服除選山東招遠縣調署惠民縣鞫獄多平反丁父憂服除選雲南口口縣洊升知府擢江西廣饒九南道以關稅不如額降級繳償開復選甘肅平慶涇道召內擢太僕寺少卿襄文章淵雅少年登第而承家學尤邃於醫其內擢京堂乃以醫學聞於上將備太醫供奉之缺云

管通羣字兆箴號椒軒道光三年進士授戶部主事洊升郎中隨辦廣東徭匪賞戴花翎京察一等授貴州糧儲道翼日特調湖南鹽法道遷長蘆鹽運使江西按察使安徽布政使以任運使時事革職二十一年九月特旨賞六品頂戴赴浙江辦揚威將軍糧臺

明年署布政使又明年授安徽按察使浙江布政使八月遂擢浙江巡撫其在戶部主山東司稿山東司覈天下鹽利時值兩淮奏罷鹽政芟浮費招販商通羣因草奏議行故由貴州調湖南遷長蘆皆任鹽事任皖藩時值大水驛路多沒而海氛侵江浙調兵不得陸行通羣令改水道軍行乃速其出司浙江糧臺法乾隆時回疆軍需力除浮冒無大帥印文勿假借時七省皆設重防而艱於餉通羣調劑盈虛使軍食無絀總督劉韻珂倚重之奏緩陞見遂不期月而有撫浙之命因奏善後十七事皆潛抑狡思上尊國體手治官書恒夜分不寢以勞得暴疾卒通羣嘗言理煩如治絲惟靜可以釋紛又以南人脆弱思復明威繼光軍制以振起之顧撫浙日淺所志皆未及條畫施行國史有傳

費開綬字佩青號鶴江嘉慶二十五年進士改庶吉士習清書散

館授編脩遷御史給事中充道光辛卯湖北壬辰雲南考官授陝西潼商道調湖南衡永郴桂道歷雲南按察使江西布政使擢江西巡撫其任潼南道每黃河盛漲民多墮溺開綬輒下令拯活之獲尸者給錢掩埋有差調湖南所屬州縣有水患親至其地給振水亦疏濬得平官江西時六年中疊有水患安輯拊循具有條法施振不費官帑不假民力使在官者各輸俸銀養廉銀而已為之倡更使紳戶富戶各輸銀錢凡獲銀三十餘萬兩民因以全活開綬領江右藩條最久屢署巡撫事及拜巡撫之命凡前後所陳奏皆切中利弊行之有效任江撫二年卒國史有傳自嘉慶道光以來武進陽湖人士京職無尚書侍郎外職無總督巡撫偶有得躋巡撫者終未能久於其任開綬撫江右兩年為最久云

董基誠字子詵號玉椒嘉慶二十二年進士授戶部主事以假照案革職援例開復改刑部洊升郎中治獄詳覈在部資格深顧京察未列優等復援例以知府發河南署懷慶補南陽調開封聽斷明決初至開封數月清釐積獄至數百起大府倚重之終以勞瘁卒於官基誠工駢儷與弟祐誠及方履錢齊名其兄弟少年時復與其戚楊士昕稱三才而祐誠士昕履錢僅一舉鄉試惟基誠以進士起家長吏治官豫頗著政聲祐誠履錢語皆在文學士昕字劬起嘉慶二十三年舉人直隸甯津知縣以乘輿謁陵辦道遲誤免士昕長於醫免官後居保定以醫自給清貧如儒素工詩文及畫花果又與基誠同時官刑部因鞠假照案被議者有蘇應珂字韻莊嘉慶十九年進士授內閣中書升刑部主事降級捐復改戶部洊升郎中充道光丁酉廣東副考官應珂沈淪郎署凡三十年一以謹恪自持同年壽陽祁窩藻任尚書最久卒未以同年故



優視之應珂亦無所干請後以資格既深列京察一等未及外除卒

龔冕字松五先世少聞達顧多隱德至冕以讀書自勵嘗徒步入都應試中道光六年進士江西即用知縣署萬載補宜春值水災冕親勘災區次第給振不足自輸俸銀養廉銀以濟之官江西數年政聲甚著旋引疾歸居鄉不與外事而有便於人之事無不盡力為之年七十五卒子寶蓮字靜軒道光二十一年一甲第二名進士授編修洊升詹事上書房行走充癸卯雲南正考官咸豐辛亥江西正考官五年命督廣東學政按試時勤察搶冒諸弊甫一年卒

史秉直字洵侯道光三年進士以知縣分發甘肅署伏羗縣關外有路斃者秉直詣驗得傷而殺人者無主名乃微服夜訪酒帘中

燈火熒熒間二人私語曰甲於某日與乙偕行乙死而甲不見何也直前叩其實遣役物色之獲兇置之法補崇信某佃負租不償斧戕其妻以誣業主鄰里無異詞秉直疑之齋宿城隍廟覆訊得實旋調涓源涓為西疆孔道清軍征張格爾羽書絡繹秉直供張車馬事辦而民不擾凱撤大吏叙勞入奏時秉直丁父憂歸奉旨歸部即選服闋選補河南西華兼理扶溝扶邑村民家夜火與幼子皆焚死唯其婦以呼救免秉直往勘見火自外入知必有故推得挾讎縱火者抵罪調鹿邑以緝獲左道亂民奉旨以同知用調署祥符以決河大工告成擢汝州會早禱雨風穴山遇勞疾卒秉直盡心民事鋤豪強卹災患敦教化所至之處翕然從風其卒也遠近為之流涕生平力學工文自鄉舉至通籍閱十四年從游弟子甚眾及官河南道光辛卯甲午癸未三充鄉試同考官所得士

老宿被黜者無敢怨焉子致道致華語在忠節

徐燮鈞字傳兼號閔賓左副都御史元珙五世孫道光六年進士  
發陝西補郿縣調咸陽十二年秦中旱饑燮鈞振貸有法大府下  
其法於所屬是歲饑而不害有兄弟爭產搆訟燮鈞曉譬之遂感  
泣罷去有路斃者額破傷骨而地無漬血燮鈞檢尸橐中有醫書  
刀鍼默知為獸醫乃陽稱馬病求善治者爭言某能治宿前村某  
家燮鈞遽輕騎往其家聞官至大駭色變入索得血衣刀杖具服  
殺人狀平時與民詢水利課農桑照煦如家人去之日父老咸感  
泣走送里居十年創置善舉甚眾性孝友事兄如父兄歿奉嫂謹  
肅撫兄子如子產僅中人而溫恤親族周急備至才思敏贍老而  
不衰

劉汝剛字聖思號近庵嘉慶二十四年順天舉人道光六年以大

批知縣發安徽補建平擢無為州歷任劇邑而前後在懷甯最久  
盜魁劉和尚在繫復逸與其黨沿江肆掠數年其能治汝剛至即  
捕置之法民有夫婦買舟之楚舟子窺婦美殺其夫而奪之汝剛  
詣江干見舟子忽心動遽命擒治考竟論罪民以為神廣德圩巨  
數十里江漲溢入田廬輒沒汝剛集費築隄旱澇有備會道光二  
十九年大水鄰邑隄壞澇及懷甯為藩司某以私憾劾罷貧不能  
歸民相與讓宅居之劉錫祐字晉三道光元年河南籍舉人於汝  
剛為族孫同時官皖政聲亞焉

陸葆字少逸嘉慶十八年副貢生道光八年以州判發雲南歷任  
繁劇能以威惠孚民洊升中甸同知其官文山縣有猥匪依山為  
巢結邊盜出沒寇掠葆率練眾往捕冒瘴雨冥行窮谷擒斬其桀  
黠者餘悉悔罪願緝匪自贖總督林則徐諗其才檄代理開化府



事尋調辦永昌回匪勦逆撫順不費兵食而事定後署蒙化直隸  
廳以憂歸會太平軍連陷江甯鎮江奉旨在籍團練葆自以衰顏  
不能振奮感念時事憂形於色生平篤好釋典臨沒精神不亂云  
李錫琨字嗣卿道光元年順天舉人會試挑取國史館謄錄議叙  
知縣選授山東夏津調荷澤荷為曹州府首邑捻匪出沒所在號  
難治錫琨至即捕獲巨盜數十置之法不數月境內肅然以功保  
升知州補平度所蒞之處民皆見思性好讀書居官猶手不釋卷  
善聽獄訟嘗謂熟於往事則自能得情每訊囚或泛問他事俟有  
閒輒出不意詰之不事刑杖而無不吐實居家孝友鄉舉之歲其  
叔客義州病亟錫琨得書即往省視或以試期迫尼之不可至則  
叔已死乃奉柩歸往返踰月而京師適以疾疫改九月鄉試遂獲  
雋云

劉承寬字子容大學士綸曾孫禮部主事逢祿子也嘉慶二十一  
年舉人考授咸安宮官學教習發山西歷署朔州孝義縣補陵川  
調安邑孝義有黃蔭槐者其子官侍衛恃勢為鄉里患動持縣官  
短長承寬至搜得其匿人地窖並誣告某某殺人狀立械繫按治  
人咸快之陵川多狼禱於神而狼絕婦女習游惰為教之紡績比  
巷機聲相聞安邑故有鹽池時河東鹽務滋弊業此者多折閱必  
重賂以求退商官即勒富民代充復婪索鉅萬乃免承寬則悉卻  
之上官及同僚皆歎服弟瀛字子譽道光十九年副貢生就職州  
判加捐知縣發河南補滎陽歷任劇邑所至皆著威惠在內鄉嘗  
斷一兄弟之獄兄在繫而弟誣以饋食致毒瀛反覆詰之弟情得  
乃出兄而繫弟卒相與感泣求罷楊汶成者殺其族兄於陳姓空  
舍中以誣陳瀛詣驗見汶成兇狀疑之一鞠而服其他發姦理枉

多類此前後引疾歸卒於家  
劉鈞貽字涵志號蘭谷道光五年順天舉人十五年大挑一等以  
知縣發四川補梁山調仁壽吏事明決善理繁劇嘗署灌縣修離  
堆濬都江堰渠灑溉膏腴數百萬頃其在合江地當西漢入江下  
流淫潦歲作瀕岸無完廬鈞貽先時導防民用安宅為人聰穎善  
屬文未仕時嘗居京師客授弟子多貴顯  
余保純字祐堂號冰懷嘉慶七年進士即用知縣發廣東補高明  
二十五年高明颶風暴雨水壞民田甚眾而粵東舊無災振保純  
為請開倉平糴且倡捐振之復為民請借帑修圩分年按田徵償  
亦故事所未有者至今行焉調署南海以勦擒積匪成大業劉亞  
擢南雄直隸州乞養歸毋憂服闋再補南雄會嚴禁鴉片煙之事  
起道光十八年上以林則徐為欽差大臣赴廣東查辦海口事件

檄保純從常以小舟往來虎門澳門之間時林則徐欲使外國諸  
商盡繳鴉片煙土而海外望國推英吉黎其兵官義律尤桀黠他  
國覘其意為進退保純往說之使繳焚煙土鉅萬且願出具甘結  
不敢再入市議將成而結不時集二十年林則徐授兩廣總督  
保純署廣州府將復使如澳門趨之提督關天培者恃勇喜功以  
言激則徐輒率水師進戰敗績死則徐亦以罪去上命大學士琦  
善來粵節制兩者至則一意主款廷議罷之命尚書宗室奕山為  
靖逆將軍尚書隆文果勇侯楊芳為參贊入粵視師而義律已悉  
眾入犯陷虎門薄省垣礮子雨射城無完屋奕山等既至乃定議  
復使保純往說義律保純乃徧請將軍參贊及督撫諸大吏各加  
關防印信於檄而行攜一僕絕域下冒鋒刃登義律舟見之要以  
信義成言而返事解叙功賞戴花翎特旨補授廣州府旋進候選



道然是時海氛初起議者猶易視之頗以是役咎保純遂謝病歸  
歸又十餘年而卒保純明決善斷外嚴內寬方煙禁嚴急被繫瘦  
死者纍纍保純固請於上多所釋里居前後近三十年興建善  
舉甚廣開濬孟瀆德勝澡港三河修築宜興之東壩當事皆乞保  
純董其役料度物土費者而工固里人至今稱之有子十人第四  
子萼銜道光二十三年順天解元由廣西知縣積官至花翎知府  
所至著稱第五子光倬尤知名語具後  
趙忠弼字和羹號作梅祖翼語在文學忠弼以鄉試挑取國史館  
膳錄援例議叙知縣道光十七年選授安徽婺源縣婺源俗好訟忠  
弼至即結正百餘事鄰邑有某氏子誤樵於某豪山田中豪黨見  
而毆之子歸方與父相持哭豪率眾踵至使某甲刺殺其父而以  
子殺父鳴官子素懦不復能置辯獄將成矣忠弼適以事至府聞

而疑之因自請願鞫斯獄乃日夜坐聽事反覆推勘會大雷電風  
雨則取死者血衣使集訊諸人遞衣之祝曰衣至殺人者雷電當  
下擊某甲在訊中獨戰慄不敢前遂得實與豪並置之法居三年  
娶大治大府將奏擢之以母老乞歸歸十五年而母歿年九十忠  
弼亦已六十有八矣哀毀甚亦遂卒

汪本銓字衡甫道光九年進士授禮部主事充軍機章京洊升郎  
中甲辰順天同考官歷官順天府丞光祿寺卿充丙午江西正考  
官擢順天府尹宗人府丞簡放浙江布政使本銓初直軍機適海  
氛告警即深以財匱兵弱為憂每屬稿繕進敏贍稱旨同輩皆斂  
手不及是時戶部庫藏告竭而直省州縣逋課至鉅萬浙江尤甚  
宣宗知本銓謹慎特任浙藩以清釐之本銓勾稽精審無稍瞻徇  
參革知縣楊燦基保擢知縣曾積堂以示懲勸復念道光二年浙

省清查案惟事攤補今各屬凋敝循案派攤必難補足且挪缺之款再歸通攤而原虧之員轉得置身事外乃為覈減浮費限年取償且差其多寡以為賞罰迄事克有實濟焉道光三十年八月大雨三晝夜海塘衝決巡撫吳文鎔欲自投海以塞咎本銓在旁亟止之且曰某處工最要某處工次要應用木石若干麻絮柴土若干任某某可以集事文鎔曰無銀奈何本銓曰是不煩多費也藩庫有某款報部未撥移而用之裕如矣文鎔大悅悉如所籌潮汐亦稍平先時治海塘者費帑金甚鉅是役才數萬而工竣任布政使二年署巡撫事三月咸豐元年六月入都陛見遂陳情乞養歸奉旨准其辭職辦理團練三年太平軍由江甯陷鎮江亂民姜芳槐等謀以城應賊有告變者本銓立投計擒斬之事遂弭益欲團練義勇恢復鎮江乞餉於浙江於是召收江淮精銳名曰武勇約持一

月糧期必克會天雨積旬師期屢愆遂罷歸發憤遇疾卒先卒之十五日奉旨賞戴花翎具摺奏謝自以績用弗成感傷泣下及卒如例賜卹贈太僕寺卿

呂佺孫字堯仙道光十六年進士改庶吉士散館授編修克庚戌會試同考官四月授廣東高廉道未赴任擢四川按察使咸豐元年遷貴州布政使署巡撫四年擢福建巡撫時南安永安匪先後作亂佺孫與總督分兵擒治之漳浦匪肆擾日久佺孫亦飭檄其府縣勦平之先是御史蔣達請改兵制而山西巡撫亦有富者出財貧者出力編練鄉兵之奏下各督撫議佺孫奏曰兵農之分其來已久我朝民惟完賦兵以衛民即有差派亦皆給值閩地負山面海兵額甲於他省而地多斥鹵俗悍民貧械鬪之風幾成銅疾臺灣澎湖又粵閩雜處氣類攸分必藉客兵以資鎮壓他若巡洋



守卞水陸交嚴往返動逾千里今以獷悍之眾授之干戈既恐助其驕橫又復限以方隅不聽遠調則撥戍巡防更屬無從措置是有籍丁之名而無實兵之用且自丁糧歸併以來任田姓有錢糧力作從無徭役茲復以抽丁之古法畝以免役之空言不獨民易阻疑抑恐糧多抗欠況兵額既改營制自裁而所抽之丁若隸州縣則牧令盡掌兵權仍設營官則將備兼理民事尤與大局相妨至於富出財而貧出力當寇患逼處民有戒心行之一時未嘗無效然人情懈於已安民力難以持久安可編為定額遂欲議以裁兵摺入帝以所奏明晰從之佺孫諸所陳奏洞切事理如停鋪租飭鹽課權茶稅免抽釐弛銅禁鑄鐵錢及請豁水田錢糧皆見施行軍用以充而民不病七年以病乞歸卒國史有傳嫡弟佺孫字次閑道光十五年舉人以謄錄議叙選四川墊江知縣蜀吏治尚

嚴佺孫獨以誠厚化之咽匪亦卒無犯者會佺孫授按察使迴避去任未幾佺孫擢黔藩仍回墊江民爭歡迎曰我公復來何幸也以詣鄉檢尸觸暑卒葬東門外縣民歲時上塚至喪歸猶不輟佺孫同母弟佺孫字星田道光十八年進士咸豐元年以編修充廣東鄉試副考官五年授韶州府旋署高州府遇水施振循行泥淖中民多全活勤於造士莅高逾年其識拔士輒舉鄉試元魁七年署雷瓊道九年夏大旱禱雨致疾卒於官宦囊蕭索吏民醵金送喪歸

惲光宸字蕃生道光十八年進士改庶吉士散館授編修大考賞袍褂料充癸卯河南甲辰浙江考官二十四年授湖南岳州府二十八年調長沙二十九年升廣東糧儲道尋遷鹽運使擢江西按察使咸豐八年擢布政使九年擢巡撫先是太平軍圍南昌光宸

以按察使登陴守禦議掘暗濠置甕募瞽人伏聽以防地道未成  
完城者皆破格賞士皆奮起賊漸退因囊沙壘石補城缺而暗濠  
亦成地道遂絕復令死士縋城出奪賊攻具賊大蹙圍城三閱月  
乃解其後賊由楚皖擾及江西光宸以兵先後擊退之及授巡撫  
方力防粵皖又嚴防太平軍帥石達開東犯且以兵援皖江西境  
以無恐當巡撫張芾防九江瑞昌光宸駐姑塘任糧臺籌備餉需  
無絀任布政使以本省各營及援楚兵時發半餉議一律發全數  
任長沙府時整躬率屬人不敢干以私尤清釐訟獄不一年理積  
案至千百起光宸持己廉介不苟言笑道光時以翰林輪次召對  
稱旨方典浙江試即授知府不數年洊升臬司咸豐時則任臬司  
至八年始得領藩躋撫遽以疾卒國史有傳  
莊受祺字衛生編修令輿五世孫道光二十年進士改庶吉士散

館授編修充癸卯山西副考官簡授福建福甯府調署漳州福州  
會丁父憂服闋以知府棟發湖北補安陸洊升布政使緣事降補  
福建按察使旋擢浙江布政使以溼疾作未赴其之官湖北在咸  
豐三年鄂事方棘受祺署鹽法道僑治宜昌建議榷蜀鹽以補淮  
課為酌定科則歲入鉅萬迨官荆宜施道仍管鹽榷兼司後路糧  
臺受祺量其出入益以移貸盡輸之軍無少缺乏是時荆州駐防  
旗兵以乏餉勢岌岌受祺為請於大府以沙市鹽稅月與萬六千  
緡復為籌銀製造箭弩鎗礮以資利用兵食既足眾志咸奮則益  
集民團練勇以助之迄事平叙勞賞戴花翎會遣散之川勇與襄  
陽亂民合戕其統率官陷宜昌荆州大震受祺先諭解之嚴守入  
保賊乃棄宜昌走受祺謂土賊無盡殲理勦不如撫為力請得止  
誅渠魁因主遣川卒萬人收其兵刃火器優給資糧竟事無一譁



者受祺長身秀目工文善書其官翰林輪次召對稱上旨迨以保送河工召見即日授知府殆異數也以詞林起家而論兵於緩急虛實洞中窺要尤善識別將才如湖南李續宜王鑫蔣益澧唐訓方及江陰全國琛方其功績未顯受祺亟稱之後皆如其言謝病寓居湖南益陽卒次子允端字心泰少習兵事軍功積官至直隸知縣保升直隸州署良鄉通州補固安大城編查保甲盜不敢入其在大城尤講求水利民皆德之

張曜孫字仲遠山東館陶知縣琦子道光二十三年舉人援例選授湖北武昌縣軍功積官至候補道慷慨善論兵前後督撫皆重之然亦不能盡其用僅一署督糧道鬱鬱以卒承家學尤精於醫官知縣時嘗坐堂皇為民診疾日昃無倦容盛隆字惺予嘉慶十五年順天舉人會試挑取方略館膳道光四

年選授浙江安吉縣縣有烏龍壩為蓄洩山水要道隆以千金築之適水暴至民田數千頃得無患署太平會歲大饑不及請輒開倉振糶並自以穀千石助之全活無算署臨海有要口曰海門時海氛不靖隆率民團晝夜防守造礮臺瞭臺土城四十餘烽火相望卒安堵無恐前後在浙三十年所至皆有政聲擢海甯州謝病歸卒於仲子康湖北武昌道任所年八十二長子應語在忠節呂雋孫字曼叔道光二十六年舉人以揀選知縣加捐知府發陝西補同州以守城功賞戴花翎加按察使銜擢潼商道為人白首儒雅而膽識過人同治元年陝中回民叛亂在籍副都御史張芾將往諭之雋孫謂必先勦而後撫芾不可至蒲城回逆使人約降芾信之雋孫曰此詐也幸毋往不聽卒遇害其守同州叛回四出焚掠擾民耕作雋孫謂賊晝動夜伏使鄉民望月而往戴星而返

以民兵隨其後護之歲竟大熟省城圍急大府調雋孫署西安閒道馳赴繕具守備城中恃以無恐賊平田野荒蕪雋孫議行均民法參以營屯代耕不數年兵食交足時回民嚴禁不得出城有死者即瘞於廬雋孫謂久錮積怨終且為變乃弛其禁為作義塚葬之復為設義學漸以教化四年回逆由汧隴寇陝踞醴泉之九峻山雋孫督兵迎禦之累戰皆捷賊遂西竄蒞道任未久以疽發背遽卒然所設施皆切於用至今賴焉

莊士全字心蕙道光二十年舉人咸豐六年揀選知縣由湖南改發直隸署武強補柏鄉調大名為治寬大獷悍悉馴武強旱蝗禱於神而蝗不害有李氏子及羅氏二子浴於河羅子長者滅頂死羅謂李子實擠之以幼子為證士全留幼子於廨出不意詰之盡得其偽事遂解馬賊張錫珠薄柏鄉城居民遷徙空縣僧王追賊

西行士全念王返旆賊且復來益與父老繕守具曉以大義於是徙者復相率入保而附近諸邑鄉民襁負求入城自庇或謂啟門賊且乘閒入士全不聽悉納之全活甚眾法蘭西人行天主教於中土無籍醜徒因為姦利士全與民約傳教載在和議吏所不禁獨慮莠民偽託滋鄉里患且玷彼教願從教者盍先詣縣自言詣縣則與剴切譬曉或感悟輟去同治三年夏教眾劫民財反誣控民士全廉知狀懲教首而寢其事法人訴於臺司名捕甚眾士全持不可遂去柏鄉迄今柏鄉之民猶能言之士全體貌豐偉性特寬厚篤實人謂稱是腰腹云

史致諤字士良系出溧陽其大父始遷常州致諤道光十八年進士改庶吉士散館授編修二十八年簡授江西廣信府會部議開信屬之廣豐縣及袁州宜春縣諸礦致諤謂乾隆九年廣豐嘗開



采得銀三萬有奇旋以礦徒為亂捕勦之費二十餘萬得不償失  
徒以擾民復使人至廣豐煎試所產似銀非銀名曰垢石據以上  
陳礦事遂罷咸豐三年太平軍圍省城致謬嘗署南昌豫備城守  
軍械甚具城中恃以為固至是復由閒道輦送兵食以濟師踰年  
調補南昌時甫解嚴而旁郡皆賊致謬建議謂江西舊食淮鹽今  
道梗不至莫如借運浙引以餘息充餉名曰餉鹽巡撫陳啟邁與  
侍郎曾國藩奏行之軍民利焉國藩駐師城外有勇丁二人持刀  
入索質庫錢勢洵甚致謬輿過立擒斬之一軍大譁致謬從容出  
謁言狀國藩夙與同年雅故及是益重之其卒亦益戢十年以卓  
異引見得旨發往浙江交巡撫王有齡差遣委用又奉諭幫辦浙  
江團練未至而浙省淪陷同治元年署甯紹台道旋補授兵燹之  
餘烽火相望時江蘇巡撫李鴻章駐上海節制甯紹兵事使將率

洋勇來援致謬往受方略遂與美利聖兵官戎副將華爾同舟渡  
海推誠相結竟得其力復召募義勇使都司楊應龍等分統之前  
署道張景渠方以兵闕逮問致謬為固請得留屬以兵事已則專  
力籌餉軍食既充所向克捷事平賞按察使銜花翎致謬不畏疆  
禦不遜聲色惟體素羸瘦乃以年力就哀原品休致歸

惲世臨字次山道光二十五年進士改庶吉士散館授吏部主事  
升員外郎郎中遷御史咸豐八年授長沙遺缺知府補常德會太  
平軍石達開撲永州攻寶慶常德戒嚴世臨募鎮守勇分布水陸  
太平軍知有備遂引去十一年升岳常澧道適大雨沅江水漲大  
隄將潰世臨急率勇築護隄卒得完同治元年超擢布政使時湘  
軍方攻江甯垂克而軍火不繼世臨請之巡撫撥火藥三千石濟  
師七日而達大功遂歲逾年擢巡撫奏請慎重名器考核吏治勸

辦積穀清釐錢糧皆得旨俞允尋為御史賈鐸糾劾使者案治坐  
任用同鄉加抽鹽釐降四級調用世臨奏辦未得直而世臨實於  
同鄉無所瞻徇也湖南人皆德世臨陝甘總督楊岳斌奏請棄瑕  
錄用得旨發往差遣以病不能行及卒曾國藩復最其前勞以聞  
而湘紳復請祀其省名宦國史有傳

董貽清字叔純父祐誠語在文學歿兩月而貽清生少穎悟弱冠  
中式道光二十三年順天舉人咸豐三年太平軍連陷江甯鎮江  
常州勢岌岌貽清勇於任事創議防堵捕戮賊謀及亂民甚眾以  
功加五品銜選授四川青神縣歷任首劇擒獲咽喉匪龔雞子等其  
黨皆逃旋署資州直隸州十年滇匪李永和肆擾蜀中由捷為五  
通橋犯其所屬之井研縣貽清與所屬四縣繕具守備相為犄角  
至是率練勇迎擊於馬達井大破之越日賊益集乃入保井研井

研跨山為城勢孤絕賊易視之謂可旦夕下圍攻數日不克則大  
怒必欲屠之雲梯地雷百道並進貽清隨方設禦時以奇兵出襲  
之閏六十六日援兵來內外合擊乃解圍貽清性豪飲在圍乃絕  
不近杯勺親冒矢石與士卒同甘苦糧盡日僅一食至食糠粃叙  
功擢花翎補用知府會其母以解圍日歿於資州官廨大吏奏留  
辦防勦所向有功服闋署西陽直隸州州民毆死法蘭西教士無  
主名坐是摘頂戴留緝久乃得白卒於綿州署任井研士民籲請  
建祠祝之

陸傳應字子受父耀適語在文學傳應名家子累試不售援例官  
河南夏邑縣典史恤囚有恩旋以縣丞改發湖南軍功浯保知縣  
補浹浦咸豐九年太平軍圍長沙傳應方在圍協守而辰沅土匪  
皆起以浹為淵藪巡撫張亮基使急之任至即捕斬匪首數十人



餘黨入鄰境山中與會匪數千嘯聚成窟傳應選團勇八百人出賊不意夜抵山麓使居民擊金熬火為疑兵親率勇仰攻賊大驚擾奔潰淑民久惑於天地會其桀黠者則糾而為匪即暫解且復合傳應召其鄉父老與之約各教率子弟能自新者不問不從命則聯坐父兄於是淑民無復入會者叙功賞戴花翎升用知府巡撫駱秉章奏保人材得旨以道員記名方署衡州府時太平軍踞江西吉安府與衡毗連衡州防勇將勾結為亂傳應偵知之募精壯三百人陰為備果有衡永道親兵乘夜歃血為盟刻日舉事傳應以眾往捕戮十餘人而事定遂益募新兵防勦所向有功是時鄰境皆賊迄無一騎入衡州者擢衡永道調辰沅永靖道治鎮筵為苗疆接黔壤其兵向號勁旅漸乃廢弛傳應與鎮將謀選精壯者訓練聽調以五百人為一軍其營哨隊什及餉糈器械皆如募

勇法師行則予餉歸伍則止不願行者弗強鎮兵喜於見用踴躍爭赴嘗越境援黔叙功為撫藩所扼劾降通判雲貴總督張亮基奏調入黔請開復原官署按察使傳應知忌者未已遂謝病歸歸數年卒祀淑浦鎮算名宦兄子椿字仲彬以軍功官河南滎陽知縣有循聲亦祀其縣名宦初傳應五十猶未有子太平軍陷常州難民紛紛渡江傳應倡以白金五百收卹多所存濟後遂連舉二子人以為德報云

馮燮坤字仲慈道光二十五年進士貴州即用知縣補遵義署松桃直隸同知古州郎岱同知俱有政聲咸豐四年署鎮甯知州時太平軍竄踞貴州上游州縣苗匪所在響應圍攻州城援絕餉斷燮坤募勇登陴晝夜防守間出兵擊卻之太平軍旋圍廣順州大府檄燮坤援之率數百人往猝遇太平軍麾軍進戰矛及燮坤頰

血被面燮坤怒馬衝突戰益力遂解廣順圍以功題升台拱同知署思州知府以疾告歸燮坤為官清貧謝官僑寓湖南猶授徒自給一時知名之士咸出其門尋卒於湖南

劉達善字子迎父文蔚字通軒道光二年進士官四川溫江縣惠政得民嚮匪至相戒不入其境平生健於為文達善其所親授性穎悟年二十中式道光二十四年順天舉人咸豐五年以知縣揀發湖南八年署祁陽時太平軍石達開以眾數十萬來犯達善率民兵登陴礮子由襟袖間飛越殞二卒達善神色自若城東北隅為太平軍以火藥轟陷數丈達善以巨板雜土石築之太平軍竟不得入凡守四十八晝夜而圍解叙功擢直隸州並賞戴藍翎巡撫毛鴻賓特保堪勝道府得旨以道員記名是時賂秉章密陳天下人才堪勝督撫者十人達善與焉同治元年四月署澧州會大

水溢入城達善與民露宿城上書片紙乞糴於屬縣水未退而米至事竟民無飢色冬授岳常澧道會丁母憂大吏欲其奪情視事堅不可服闋補鹽法道調山東登萊青道兼督海關駐福山之烟台往歲達善引見入都與當軸言洋務洞悉外國人性情伎倆當軸歎詫為難越年遂拜是命九年夏天津民教事起煙台訛言日聞外國領事官邀達善往會以覘中國意達善輕輿赴之與開誠相語皆大悅無復驚擾旋賞鹽運使銜換花翎踰二年乞歸年未五十歸則臨流卜築小榭與友朋觴詠為樂未幾櫻疾卒達善博學多能舟車所至不去鉛槧尤負經世大略於天下利病得失罔不究心雖官至監司人多以未竟其用惜之

陳峻字馨吾熟於吏事有才諳任廣東四會縣知縣陞佛山同知所至有聲績尤篤鄉誼告歸子亮疇以編修乞假侍養峻優游林



泉數年卒

陳肇鏞字子傲道光十七年舉人初授河南中牟知縣以才諳調糧臺轉運司幕府章奏擢知府晉道員補許州許當南北衝用兵久民困於出車肇鏞為定役法民便之知河南府宜陽盜張野貓築壘山中與南汝商洛羣盜通刻日為亂肇鏞與知縣從一騎直造其壘禽之登封盜魁梁甲伺令出襲縣城出繫囚殺令妻子郡邑大震肇鏞聞驚馳援出不意平之欲引年歸未行卒肇鏞嗜金石圖籍所藏甚富時稱鑑賞家

吳鎬字伯蔭薛墅巷人由方略館供事議叙從九品發廣西以軍功積官擢四川川東道同治元年自粵赴蜀會有亂民胡舉高旨稱提督沿江糾眾肆掠鎬授計都司姚懷玉伺舉高入謁健卒突出即座上擒斬之重慶府之崇因寺議與法蘭西改建天主教堂

鎬以其地高持不可巴縣知縣張秉堃徇彼教意固求之激眾怒焚毀其舊建之堂勢洶洶鎬出諭乃定即引咎自劾請勿究治坐是降二級大吏鑒其賢為奏調鄰省簡授雲南迤南道旋調迤東加布政使銜未及拜命而卒喪還過蜀川東民號泣設祭相望於道

余光倬字耆來號幼冰道光二十七年進士授刑部主事洊升郎中光倬性警敏而慮囚詳慎不輕麗人於法咸豐九年戶部鈔票之獄起冬至日戶部稿庫火有旨使宗令怡王載垣會同刑部審訊時步軍統領鄭王端華戶部尚書宗室肅順朋比用事意欲有所傾陷株連逮問者不下千人光倬承鞠斯獄載垣等時以密奉聖旨相恫喝光倬執正不阿因遷延不竟其事會穆宗登極載垣端華肅順坐法誅有旨限刑部半月速結光倬勾稽剖決依限奏

上僅坐商人馬錫祿以罪餘皆獲釋同治元年江督何桂清始就逮至京光倬據大清律地方大吏逃奔職事比照守邊將帥失守城寨斬監候律擬斬監候情罪重則擬斬立決仍請上裁時朝中大僚多為何桂清舊故謂不當加重冀緩其死而給事中郭祥瑞等復交章論劾請速正典刑下大學士六部九卿翰詹科道議覆由刑部主稿光倬草奏曰已革兩江總督何桂清身膺疆寄受國厚恩豈不知軍旅之事有進無退守土之責城存與存况其時常州有兵有餉並非不可固守乃首先棄城逃避致令全局潰散望亭為無錫至蘇州要衝業經奏明截留長龍船紮營於此乃並未身經一戰命殺一賊忽於蘇州失陷之前一日率師船退駐福山海口是其撤兵遠遁縱寇殃民尤罪迹之昭著者至刑部歷年審辦軍營失事成案均視此為輕惟余步雲係由斬候加至斬決情

罪相等雖帶兵提督與統兵總督稍有不同然論疆寄則文臣視武臣為重論軍法則逃官與逃將同誅論情節則聞警屢逃非被攻被圍變出不測者可比論地方則全省糜爛非一城一寨偶致疏防者可比請仍照原擬從重擬以斬立決同治元年六月十三日奏上得旨改為斬監候秋後處決是日有旨以內閣侍讀學士王拯奏劾光倬趨附迎合苛刻鍛下刑部案治皆不得實其年十月何桂清竟奉特旨誅二年給事中博桂以部有劇盜越獄復撫前事劾光倬下部覆案亦無實坐屢被參劾撤銷京察一等及御史記名未幾王拯以與人互糾獲罪降調博桂以風憲官賄賣參摺遣戍黑龍江而光倬亦以母憂歸遂不復出



人物傳 儒林

武進陽湖縣志



收發程耀庚啟

汪叔定儀



人物傳目錄

儒林

陳

張

崖

唐

蔣

堅

宋

張

巨

龐安仁

胡玘理

明

謝應芳

葉夔

吳性

毛憲

丁 際

周孚先 弟恭先

高 璣

唐 音子一 磨

金 敞

薛應旂

政子近 魯敷教

近 充

孫敷

唐彩 兄彬

馬負圖

蔡所性

陸卿鵠

章大士

何冷

顧日融

惲鶴生

楊方達

是奎

莊述祖

莊有可

惲日初

吳光

楊瑤

蔣鳳池

楊坤

顧秉信

楊椿

臧琳

莊存與

蘇瀉

孫星衍

張惠言

子成孫

錫

姊

洪亮吉

子飴孫

符孫

孫

齧

孫

齧

齧

劉逢祿

袁履浩

盛衡

陸敏政

李文詰

楊岫谷

王嶽

張

榛

謝珍

楊新甲

莊泰

王銘西

弟大寶

弟大業

從

周駿嶽

子鏡

子又朔

子說男

禮孫繼弘

子逢原

子敏善

庸子

通敏

褒甲

相孫

相孫

選辰

庸

子熙

孫

庸弟

顧文炳

貴



儒林

陳


張崖仕梁歷王府中記室天嘉元年為尚書儀曹郎撰五禮與東陽鄭灼吳郡陸詡吳興沈德威會稽賀德基俱以禮學自命傳三禮於同郡劉文紹官終國子博士

唐

蔣堅元和中在永州學為春秋師

宋

張巨字微之嘉祐初舉明經少從胡瑗受學與胡宗愈蔣之奇丁際為四友又學易於歐陽修以薦充國子監直講王安石新經行巨與同官數人隱去著易解歐陽修為之序



丁陳字公黜資性淳粹踐履篤實舉嘉祐二年進士以經學倡後進尤長於易春秋李定辟為屬以疾辭蘇軾曾肇孔文仲交章薦之司馬光當國陳獨後謁光曰真自重士也除太常博士改左右正言元祐間士大夫險競者有五鬼十物之號陳疏請窮治後出知處州

龐安仁字宅道通五經尤長於易張舉鄒浩等皆執經受業一時學者宗之

周孚先字伯忱與弟恭先從程伊川學歷十七年伊川稱其兄弟氣質純明可與入道居父喪哀感行路既葬同廬於墓及伊川沒孚先特建城東書院奉祀二程生徒自遠至眾不能容復設城西書院與恭先分主教授楊時來郡城迎館城西書院中敦諭諸生師事之初由鄉荐入太學調四明鹽坊改建德尉皆不就特賜承

任郎改奉議可祠後為臨安教授卒恭先字伯溫性純厚篤於性道亦由鄉荐入太學釋褐坑冶幹官力戒沽名恬於進取紹熙間郡守黃灝以孚先兄弟祔祀城東書院

胡理字德輝登宣和三年第歷秘書省正字嘗受學於楊時得其精蘊謁劉元城于南都元城許其能護至道歸書聞答語為護道錄先是陳東上書攻六賊言者設書由理潤飾忌之又與李綱同舟東下貶梧州紹興初復官兼史館校勘趙鼎當國以熙豐元祐舊史屬理與張嶠修正鼎去位理出知嚴州鼎復相又舉理與嶠筆削成書秦檜主和議理與同館朱松等抗疏爭忤檜引去安貧樂道至老不倦為一時表正

明謝應芳字子蘭自幼篤志留心性理之學尤工於詩文元至正初



築小室隱白鶴溪顏曰龜巢因以為號授徒講學先質後文浙江  
行省舉為三衢清獻書院山長不就避兵入吳吳人爭延為師見  
三高祀祀范蠡張翰陸龜蒙乃曰范蠡未足為高士吳自有三高  
秦伯仲雍季子是也宜正祀典而以張陸附時張士誠據吳會應  
芳力不能除乃葺晉顧榮墓著懷古錄以見志明初江南平歸居  
芳茂山表鄒浩墓正張巡像去學宮之土地祠喪葬屏去僧道晚  
年學行益邵年九十七卒所著有思賢錄辨惑編毘陵續志龜巢  
稿子林字瓊樹工文善書洪武中官新鄭教諭道光志明朝分省人物攷  
高璣字齊之學以洛閩諸儒為的常體驗於事親從兄間手錄程  
朱講學要語成帙玩索無倦有問者亦必以是示之家故貧而事  
親甘旨無缺弘治十二年詔舉經明行修之士郡人毛憲等交荐  
之以親老辭知府連盛請為鄉飲賓亦不赴卒祀鄉賢以布衣預

此祀者惟謝應芳朱昱與璣三人

葉夔字司韶正德末以歲貢入京疏陳六事其一謂師儒之職人  
材攸繫宜重其任授汝陽訓導世宗時議大禮張璉聞夔有繼統  
不繼嗣說走書邀之夔笑謝曰吾豈以是博官耶不應以繼母年  
老告歸銘其室左曰不欺右曰養正嘗曰人能于義利二字分明  
便可上達繼母歿年已七十四猶悲號為孺子慕平時恂恂於  
言及大節所在輒投袂奮起嘗請祀宋李死事諸賢修謝應芳墓  
每嘆人心不古因自號古心既而曰心無古今顧存之如何耳爰  
更號存齋病革猶手書無欲上人之心數語曰此心學之要也子

金嘉靖元年舉人官紹興府通判多惠政浙人祠祀之

唐音字希古與從祖順之同學相砥礪毛憲講學於鄉音造門請  
益既又赴吳謁魏莊渠時音已領嘉靖七年鄉荐當計偕竟謝不

往讀書必沉思玩索於毛魏兩家言有未愜者輒反覆辨論有得乃已其論學大旨謂堅苦斂束悉就規矩使筋力强固精神凝注意氣奮興於天下之可喜可懼視之漠如而後學為有基爾後謁選得雞澤令孤立獨行上官欲督民買馬為要人建坊脫巨奸某某於獄音皆以去就爭而止督學使者至廷勗諸生曰諸生何從學聖人乎學雞澤令耳尋卒於官貧無以殮諸監司厚賻之其子一麀字仁甫少穎慧日記萬言嘉靖二十八年鄉試第一四十四年成進士高拱欲令讀書中秘力辭性高伉律躬嚴峻履蹈不爽毫髮能世其家學云

吳性字定甫原籍宜興入郡庠卜居武進嘉靖二十九年進士為校官授河南南陽府教授端軌貞教卓有師模喪葬戒用浮屠漸次教以冠射諸禮士習一變擢南京戶部主事游補郎中調尚

寶司丞固乞歸性服官不滿兩考其引退甚於人之嗜進為人不苟迂談不驚虛譽常曰聖學只一敬字王業只一豫字無憂勤惕勵之心則放恣而不敬無誠實淵深之心則怠弛而不豫未有能成者也萬歷間崇祀鄉賢子可行中行自有傳

金敞字廓明少負氣節有經濟才慕族兄鉉為人見士大夫標榜馳聲譽者鄙之明亡後嘗從魯王海上顛沛不忘忠孝數年乃歸無家屋爰僑寓江上嗣從宜興湯之錡游搜輯顧高遺書謂聖賢為必可學之錡歿敞乃僑居梁谿結廬習靜立山居會約興起學者甚眾靖江朱鳳台令開化患多盜延敞往助敞為行保甲法邑大治未幾歸疾革遺命題墓曰處士金敞之墓  
毛憲字式之號古庵正德辛未進士選擢刑科給事中即上疏言人主之德莫大於開廣言路優納正直時諫官實明方以言得罪



憲即抗疏申救以為不宜塞諫諍之口會議中府眾皆唯諾憲獨慷慨披折不阿不激聞者聳然又嘗見邊防軍政之弛災異水旱之頻乃敷陳古訓疏列遠圖多見采納冊使荆湘見民居漂溺死徙瘡痍之狀即具疏馳奏又以先儒陳澔有功禮經宜以從祀武宗西狩諫請回鑾兼論建儲不報將回鑾有帑賜憲獨疏辭不受未幾以耳疾謝歸與同志講求性理之學每以克己為難晚年扁其書室曰三近齋蓋退然以困勉自勵云性端重寡言立身治家悉有規格置義田義學教養鄉族施愛孤弱年七十七卒孫中孟字二思性至孝父歿嘔血數升水漿不入於口者數日母病數年侍疾不懈終喪不御酒肉以歲貢授太平訓導卓有師模遷教諭謝病歸

道光志 光緒志 明朝分省人物攷

薛應旂字仲常號方山中嘉靖乙未會試第二授慈谿令試諸生

首拔袁煒許其大魁天下後果如其言時郡守方恃苛黷應旂銳意撫綏有檄下縣輒格不行守怒欲窘辱之應旂乞改教九江徐階督學兩浙時素知應旂後又督學江西檄掌白鹿書院事旋擢南京吏部主事轉郎中大計考察嚴嵩使尚寶丞諸傑貽書屬黜給事王燁燁端士也應旂留燁黜傑降建昌通判歷遷浙江提學副使試諸生於慈谿得向程許其可發解後得諸大圭卷大奇之復召向程語曰爾解元為諸大圭奪去矣後放榜諸果發解向居第六其甄別不爽多類此調陝西鄜延兵備道中考功法罷歸洛川縣齋贖鍰千金為路費却之應旂負才磊落不輕許可一時文名與唐順之相埒故語文章宗匠必曰王唐瞿薛初從呂涇野邵二泉講濂洛閩之學後聞良知之說大以為快既而沿是說者多不掩言乃曰良知之學源於陸子靜陸學孟子教人之法也朱學

孔子教人之法也遂著考亭淵源錄家居垂二十年手不釋卷生平著述甚多兩浙通志之成皆應旂所手定而文獻通考一書更為有補於後學子近魯居父喪過毀疾且革命以麻衣歛四子近充萬歷二十三年進士歷官浙江河南布政使以清介絕俗聞近魯子敷政字以心萬歷丁未進士授江西永新知縣砥礪清勤舉廉能第一考選山東道御史天啟元年巡按四川會土司奢崇明反殺巡撫徐可求等攻陷夔慶諸府是時兵無統率全蜀震驚敷趨入軍門收巡撫敕印圖籍隨題請左布政朱燾元為巡撫復以便宜調動兵倡義固守晝夜登陴躬冒矢石大小百餘戰屢挫賊鋒三月餘矢窮糧竭斗粟累金敷政碎布絮食之三軍感泣效死乃檄石砭土司秦良玉內外夾擊擒斬無算賊奔潰旋以大義勉良玉等灑血誓師恢復諸州郡全蜀再造敷政之功居多敷政弟

敷教字以身為諸生時巡撫海瑞即以忠義士稱之萬歷十七年進士與高攀龍同出趙南星門益以名教自任會御史王藩臣上疏不白憲長吳時來耿定問交劾之敷教曰是欲為執政箝天下口也抗疏詆時來等座師許國以貢舉非人自劾詔敷教歸省過三年以教職用後起陝西鳳翔教授尋遷國子監助教時詔並封三王具疏力諫并貽書大學士王錫爵錫爵恚甚然並封事竟寢趙南星被逐復抗疏申救謫河南光州學正歸從東林講學律身嚴苦垢衣糲食於物無忤見惡人輒望望然去嘗曰學者苟不見性靈即皦皦不污終歸一節耳家居二十年力持清議大吏有舉動多用敷教言而止詩文矢口成不事瑣琢著浮弋集泉上雜語續憲章錄卒贈尚寶司丞道光志

光緒志 明朝分省人物攷

唐彩字子文縣學生少孤篤學博覽析義必精世父順之講學彩



從之遊究明性理蘊奧慎獨不欺教人以聖賢為必可法兄彬字子畏王公延課諸子有豪族構獄以五百金乞彬一言峻却不受薛應旂氣蓋一世獨稱彬德行文章一郡無雙云

清

馬負圖字伯河明諸生明亡後遂棄舉業奉母避居瀟湖西業醫以給養值盜至負圖遙與語曰物任君取勿驚吾母盜感其孝散去少孤露與再從弟拔萃互勉成學門人湯誥與太倉陸世儀遊負圖屬其介請來郡與憚日初蔡所性輩會講多發明體用實學一以朱子為宗每語人曰為學之道在能治其心疾將革猶與諸生反覆辨論卒年六十八李顯嘗稱其潛德先生憚日初字仲升明崇禎六年副貢生方正有氣節少與楊廷樞錢禧交文章縱麗於百氏無不窺尤喜宋儒書及從劉宗周遊學益

邃明末應詔上備邊五策不報歸隱浙之天台山携書三千卷以隨會明亡崎嶇閩越欲有所興復後不得已散眾歸里嘗纂劉子集要一書又撰高劉兩先生正學說晚歲與同志講學道南書院康熙十七年卒年七十八一時言學者多宗之稱為遜菴先生

蔡所性字仲全少喜讀先儒語錄通五經明亡絕意進取研究諸史及曆算律呂皇極洪範各書以絕學自任與友人講五經同異所性踞高坐聽者屏息訪陸世儀於太倉諸賢見所性者無不稱嘆性孝友父病目舐以舌病結以指導糞居喪一依古禮以修脯代弟完逋賦與馬負圖為性命交能談言微中里人有城府者見所性輒立化時人以比康節西山

吳光字與嚴明諸生入太學有聲十歲喪母哀毀如成人及長日誦數千言為文說理而華既而究心經濟博綜載籍自成一家言

明亡棄舉子業結廬於瀟湖東玩易自適或出遊匡廬天台興至成詠家貧甚而口不言自謂遇拂逆反多進境李顯至郡城與光論學甚契稱光所著易柏十箋象數易理兼臻其極足為來學指南云同時嘗與顯論學而為所稱者有陸卿鵠楊瑀陸卿鵠字傳公明副榜貢生性孝友潛心理學由副貢蔭中書舍人明亡遂不仕與李顯論學有契迎致於家率諸子北面事之於進修之要安身立命之微靡不究極而又為德於鄉惟恐人知及卒顯為之傳

楊瑀字雪臣與顧炎武友善炎武著日知錄每就正焉嘗與瑀書曰僕服先生不刻文字不與時名教子博文而不求仕又曰讀書為己探賾洞微吾不如雪臣其傾倒如此

蔣鳳池字卧公明諸生與章大士萬綺秀講學東林少好學詩文

博麗既壯而悔曰是朝華夕謝者何益取程朱語錄及白鹿洞規閱之喜曰道在是矣由是學務實踐力求自得於己為文精理融粹崇禎甲申烈皇帝殉國鳳池設位哀經臨哭終身齋食

何冷字中涓少孤孝母明末不應舉采薪自給輯忠義事名樵史樵罷輒藉草讀之探討儒書以闡明實學為己責著聖學心傳一編開迪後學多興起者晚年詣益純講學東林書院

楊珥字逢三明參政維寅子也諸生九歲能文弱冠有名復社與憚日初為石交明亡後杜門窮經絕意仕進時知府宗灝屢與大獄以陷善類召珥飲陰欲求隙中以法珥坦然赴之曰珥罪人今辦死來矣灝一見心折不能有所鍛鍊

顧日融字旦初家貧授徒養母一日聞師友講心性大旨豁然有省嘗言惠吉逆凶研勘精微乃可進於戒懼慎獨之學平生見人



不善如疾病在身即事立說直指本體故言雖切至而人不怨環所居五十里間化而善者千計陳鍊謂侍旦初坐憂憤頓除回顧草木鷄犬意皆欣然自得因悟揚子鑄人之意館餽之餘輒以周急鄉里薰其德化故多樂推解每遇凶歲饑而不害卒年七十五顧秉信字確士性端穎弱冠講求正學李顥主講延陵書院往觀而慕之尤好陸世儀所著書師事馬負圖益淬志不懈其治心以劉宗周人譜馬負圖知非錄治身以方孝孺日用箴設教以朱子白鹿洞規凡歷象方輿農田水利漕運兵防悉貫通焉授徒必先經史指誨者多掇科第而秉信以布衣終巡撫張伯行聞名敦聘不往卒於家同時與秉信友善者有潘文卓字振聲篤志勵行值同志講會徐出一言解其爭豁如霧釋張伯行延訂先儒遺書不赴卒年九十又有石永芳字桂祥銳志求道與秉信相砥礪講學

習禮友反躬實踐推端士焉

惲鶴生字臯聞康熙四十七年舉人官金壇教諭少事常熟錢陸燦工詩古文辭既讀宋儒書服膺主靜之旨後遊蠡交李璫見顏元及璫所著書大悅服遂為顏李之學璫稱其乾乾惕厲可與明道生平研究經術於易書詩春秋等皆有撰述卒年七十九楊椿字農先幼穎異端慤如成人弱冠工古文辭康熙五十七年進士官翰林歷遷侍講學士祭告秦蜀歸奏途次見聞七事多施行進經史講義虞書勅天之命章畧言臯陶戒舜曰無教逸欲有邦益曰無怠無荒舜豈教逸欲而好怠荒者二臣言之不以為忤舜受之不以為非有虞之治所以不可及上即召對椿往復推闡一時傳為盛事性矜慎刻苦淹貫經義不襲講學陳言躬行實踐髦而不倦平生以該洽受主知所輯書校理精密三館推重於經

史之學著述尤富

楊方達字符蒼少凝重好學雍正二年舉人閉戶著書方行矩步其學貫串經史旁及諸子百家府縣交舉經學不應年七十九卒其後有周駿嶽字望熊廩生亦以經學稱性朴訥家貧嚴於取與精三禮自漢唐以來諸儒書皆究其奧突然不執己意務得聖人制作之原所著儀禮說心七易稿始定終以積思致疾卒侄弘源工詩廷相以著行聞

臧琳字玉林縣學生以讀書考古為務實事求是別白精審教人必先以爾雅說文曰不識字何以讀書不通訓詁何以明經其論治經也必以漢注唐疏為主太原閻若璩稱其深明兩漢之學孫繼弘字厚庵有孝行曾孫庸本名鏞字在東與弟禮堂及同里顧文炳俱師事錢塘盧文弨盡得其學儀徵阮元十三經注疏校勘

記經籍纂詁二書出庸手錄者為多德清許宗彥稱其好學深造當求之唐以上禮堂字和貴尤精小學善讐校事親純孝父病畏火禮堂潛身溫被及卒三日不食三年不見繼母疾刲臂以進禱神請減己算母愈禮堂竟夭庸子相字木齋傳其父業著漢學師承記分別漢宋畛界劃然相子熙字仲金諸生亦精經訓文炳字子明通訓詁十三經義疏條舉無遺道光元年與相同舉於鄉是奎字玉雯縣學生博雅有聲講求正學為人坦夷溫厚日記言動得失以自警問學者隨其深淺答之反覆曲暢乃已詩文會集輒操筆先就歧黃青鳥二氏家言悉洞其蘊著述夥多尤以易象元音為心得云子鏡字仲明少好學至老彌篤一生篤信程朱於易尤多發明與方苞秦蕙田友善築室舜山以講學從游者甚眾事親孝父歿葬於舜山鏡廬墓以居乾隆十一年學政尹會一兩



疏薦鏡學行大學士高彬河督顧琮文章舉鏡經學皆不應鏡不  
禮邑令聖寶而鏡李弟鉉嗜博無行聖寶誘令誣鏡以罪率隸攫  
所著書周內無所得郡守宗望楚令鏡捐學舍為龍城書院尋事  
白以學舍還之卒年七十七  
莊存與字方耕乾隆十年一甲第二名進士授編修不數年晉秩  
卿貳選掌文衡充天文算法總裁官及樂部大臣直南書房上書  
房官禮部三十餘年以左侍郎致仕歸蕭然儒素典試浙江時却  
巡撫餽金不受遺以冠受之及途從者曰冠頂珊瑚也直千金急  
馳使返之存與幼傳閻若璩之學博通六藝而善別擇時閻氏所  
闢偽古文信於海內言官學政議上言於朝重寫二十八篇於學  
官頒天下考官命題學者毋許諷讀偽書存與獨曰古籍墜溷十  
之八藉偽籍存者十之二如大禹謨之人心道心及殺不辜寧失

不經太甲之儉德永圖仲虺誥之謂人莫己若悅命之股肱啓沃  
旅葵之不寶異物諸語皆聖人真言幸存於今者諸篇廢則訓戒  
之語亡乃為尚書既見及說數稱偽書而古文獲仍立學官不廢  
門人餘姚邵晉涵曲阜孔廣森外孫劉逢祿與從子述祖皆通其  
學子逢原乾隆三十年舉人全椒縣教諭通敏三十七年進士詹  
事府左中允選辰四十三年進士俱能世其家選辰仿朱彝等經  
義考著史考纂至唐代未竟而卒孫隽甲五十一年舉人歙縣教  
諭貴甲綬甲褒甲濤俱學行知名而綬甲尤為述祖所愛重能盡  
通其家學擬刊布存與遺書研精校讐而遽歿劉逢祿及述祖自  
有傳

莊述祖字葆琛十歲而孤乾隆四十五年進士選山東昌樂縣知  
縣調維縣明暢吏治刑獄得中豪猾斂迹嘗勘鹽地人以為斥鹵

述祖指路旁馬帚草語之曰此於經名莽夏小正莽秀記時凡沙  
土草莽者宜未眾皆服尋授桃源同知不一月乞養歸著書色養  
者十六年無一日離左右嘉慶二十一年卒年六十七述祖原本  
家學研求精密世儒忽不經意者覃思獨闢洞見本末所著經傳  
考釋及古文甲乙篇皆義理弘達為前賢所未有其餘五經悉有  
撰述旁及逸周書尚書大傳史記白虎通於舛句訛字佚文脫簡  
為之易次換第草薙腋補咸有証據不啻面見古人中又朔字禘  
莫學有家法工篆籀及楷書

蘇溇字景程縣學生幼好學念讀書以明理為先因誦大學聖經  
章沈思月餘恍有得於心閱他書皆洞徹訓子弟以嚴造就後進  
尤眾與子言孝與弟言弟雖桀鰲亦為感悟親沒後絕意進取惟  
以理學潛心日誦思貽父母令名數語自警終身以至誠遇人洪

亮吉擬以元紫芝徐仲車一流吳士模謂其德行溇備如黃叔度  
徐孺子而學則過之嘉慶元年詔舉孝廉方正邑人欲以溇名上  
固辭年七十九卒子敏善嘉慶五年舉人官高溇訓導有文行  
莊有可字大久勤學力行教而彌篤精研諸注傳義理句櫛字比  
合諸儒之書以正其是非而自為之說於易詩書詩春秋皆撰述  
兩遊京師不遇子說男官河南迎養至署晨夕不釋卷年七十九  
卒說男嘉慶七年進士改庶吉士散館授河南南召知縣擢懷慶  
府通判有政聲

孫星衍字淵如幼有異稟讀書過目成誦深究經史文字音訓旁  
通諸子百家既從錢大昕遊益精研漢學客陝西巡撫畢阮幕為  
校定各書乾隆五十二年一甲二名進士授翰林院編修充三通  
館校理散館改刑部主事大學士和珅示意往見將為之道地星



衍却之在部用法寬恕依古義平議疑獄全活甚眾洊升郎中六十年授山東兗沂曹濟道母憂歸主講浙江詁經精舍課諸生以經史疑義兼及小學天文地理算法詞章不十年舍中士皆以撰述名家服闋補山東督糧道署布政使十六年引疾歸嘉慶二十三年卒年六十六星衍博極羣書勤於著述少時文藻軼麗繼乃沈潛經術所著尚書今古文注疏凡積二十二年而後性誠正立身行事皆以儒術好獎成後進所至士爭歸附喜聚書向人借鈔無虛日金石文字皆考其原委凡所撰述校定共二十五種學者宗之

張惠言字皋文生四歲而孤少讀易即通大義年十四為童子師學行過人嘉慶四年進士改庶吉士散館以部屬用大學士朱珪以惠言學行特奏改授編修甫越一年即卒年四十二惠言鄉會

兩試皆出珪門下未嘗以所能自表吳珪潛察得之則大喜故屢進達之而惠言亦斷斷相諱不敢隱篆書初學李陽冰後學漢碑及石鼓文少好辭賦擬司馬相如楊雄及壯為古文又學韓愈歐陽修生平精思絕人其學要歸六經而尤深於易禮言易主虞翻言禮主鄭玄皆極精審學者稱皋文先生子成孫字彥維國子監生通小學精天算惠言著說文諧聲譜未竟而卒成孫續成之阮元稱為超卓精細惠言姊子董士錫字晉卿副貢生從惠言受易虞氏義通陰陽五行家言

洪亮吉字稚存六歲而孤性純孝家貧出遊以養母及歸聞凶耗慟絕墜水救而免居喪三年齋食不處內乾隆五十五年一甲二名進士授編修五十七年充順天鄉試同考官旋督學貴州專用古學教士嘉慶二年詔在上書房行走三年天考命擬征邪教疏

亮吉慷慨數千言尋以弟霽吉喪引疾歸四年高宗崩亮吉入京  
哭臨仁宗親政求直言亮吉上書成親王大學士朱珪尚書劉權  
之乞代奏其書極陳時事列中外官罔上負國者四十餘人上震  
怒革職對簿以大不敬律擬斬立決詔免死戍伊犁五年四月京  
師早上手詔赦亮吉即日大雨上製得雨敬述詩及導言納諫論  
紀其事亮吉歸署其室曰更生十四年卒年六十四亮吉忼爽有  
志節生平好學不倦窮日著書於經史注疏說文地理靡不通貫  
少好春秋左氏傳以杜注多不遵古訓於是冥心搜錄歷十年成  
春秋左傳詁若干卷其他著述甚富少與同邑黃景仁詩歌唱和  
時稱洪黃後遊安徽學政朱筠幕與孫星衍齊名時又稱孫洪云  
子飴孫字孟慈嘉慶三年舉人湖北東湖縣知縣博極羣書心力  
敏銳二十一年卒年四十四符孫字幼懷齋孫字子齡道光十九

年	舉人	廣東	鎮平	縣	知縣	皆沈敏	嗜學	能嗣	父業	齋	孫尤	工駢文
劉	逢祿	字申	受	大學士	綸之孫	其外祖	莊存與	及舅	述祖	皆以經		
術	名世	逢祿	盡傳	其學	嘉慶十九年	進士	由庶吉士	改授	禮部主			
事	二十五年	仁宗崩	逢祿	集大喪	典禮為長編	始末	具備	道光四				
年	補儀制司	主事	時有請	以湯斌	從祀文廟	者或以斌	前在上書					
房	獲譴	乾隆中	嘗奉	駁頗難	之逢祿	攬筆書曰	后夔典樂	猶有朱				
均	呂望	陳書難	匡管	蔡尚書	汪廷珍	善而用之	遂奉	諭旨是年	越			
南	貢使為	其國王	母乞	賞人	溘詔	論中有外	夷字貢	使欲改	為外			
藩	逢祿	草牒	駁復	歷引	周禮	職方及說	文爾雅	以為言	貢使折	服		
在	禮部	十二年	恒以	經義	決疑	事其為	學務通	大義不	治章句	於		
易	主虞氏	於書	匡馬	鄭於	詩初	尚毛	學後	好三家	平生由	董仲舒		
春	秋求六	藝家	法由	六藝	求觀	聖人之	志性	肫篤	謙和	能益	以一	



字者輒應時改定撰著凡七十餘卷道光九年卒年五十六次子承寵字子中嘉慶二十四年舉人力學富才藻甫壯遽歿士論惜之道光間有邑人薛子衡者廩生研求經訓於易詩皆有論著嘗假館承寵家私淑劉逢祿之學謂逢祿詩聲衍及莊述祖古文甲乙編皆徵引未備欲補成之以容游死粵未及卒業

楊岫谷字麗中歲貢生善治經性至孝事親及喪祭皆本禮法童稚習而能之同時王璵字瑤舟貢生博綜羣書求其指歸論經術必先明小學通訓詁治易則謂象卦之旨聚於十翼而說卦尤精治春秋一以比事屬辭取義治三禮得說數萬言張榛字廷選亦貢生為安徽鳳臺訓導名亞於璵

袁履浩字文江嘉慶十八年舉人學行端粹兄子多幼孤躬自撫教值大挑亦不赴家居教授勤著述於六經訓義頗多解析之作

謝珍字寶齋父湛恩好施與歲早散數千金以振珍性孝友耽理學終身誦易以毛憲嘗講學道南書院爰輯其言為語錄年八十一卒

盛衡字漢詔篤學敦行乾隆元年應博學宏詞科助纂三禮義疏多所訂正十六年詔舉經明行修之士尚書汪由敦疏薦衡以年老辭尋補江浦縣教諭以實學勗諸生造就甚眾弟大寶勤學博覽尤潛心理學例貢後校官未赴卒從弟大業字玉豐乾隆十七年舉人大典字賓門由舉人中明通榜官陝西雒南知縣大寶等三人皆從衡受業善屬文衡子綱亦工文善書畫官至湖南永州知府

楊新甲字振華六歲能詩長益篤學有孝性善事其親年三十六始補郡學生鄉試屢躋遂棄舉子業專治經史尤邃於易鄉里重

其文行從學者如歸市為人慈和伉直家無中產而見義必赴常  
曰雖無救人之權不可無救人之心面諍友過背則舉其善每夜  
必省一日所為偶有差失雖寢必起集子婦告語自責子夢篆以  
學世其家

陸敏政字子忠自幼通爾雅說文及長博涉諸經於馬鄭荀王諸  
家及唐宋各義疏靡不淹貫學政彭春農器異之謂可繼閻若璩  
惠棟之後而升學海堂也家貧客遊四方襄校山東江西廣東各  
學政幕幣聘無虛歲為人廉介樸素道光四年舉於鄉選補鹽城  
縣教諭卒年七十一

莊泰字履安郡增生律躬端謹博涉多通左輔撫安徽延致幕下  
每以語人曰履安真人師也生平研尋理學言行悉合矩度授經  
邑中及門多達者道光九年重遊泮水門人趙申嘉左昂以詩紀  
之卒年八十八

李文喆字玉坡嘉慶十二年與弟秉灝同舉南北鄉試歷任全椒  
鹽城教諭覃精理學嘗言儒者斥王陽明為吳端不知三達德中  
智為先言智即不得不言悟離仁義言悟即為釋合仁義言悟即  
為儒陽明功業炳千言皆仁義中事豈可以躬行仁義者為吳端  
識者以為知言

王銘西字愚溪縣學生性贛直抗論今古間非義語必斥幼為文  
即驚長老尤致力經義博采眾說而於莊存與劉逢祿所著最服  
膺然能自抒所見不為苟同旁通天文輿地河渠厝算又精研吳  
中水利藩司聞其名檄邑令敦聘入水利局每事折衷焉道光末  
歲饑銘西倡捐巨金賑活無算凡義舉皆慨施家以中落及太平  
軍陷郡城弟鑄久被執窮究殺其黨錢培榮者銘西出而承之身



受鞭灼無完膚而談笑自若尋以計逸去妻及二子一女皆死遂  
走虜靖江謀規復亂定歸里設粥廠掩露骨采訪殉難者數萬人  
為請旌卹

人物傳目錄

隱逸

周

披裘公

漢

陸璣

梁

蕭眎

唐

施肩吾

魏璞

南唐

陳植

宋

張舉

陸文圭

元

錢源

徐仲三

明

黃本中

何士信

陳一麟

龔穆

錢孝

吳克

陶澤

楊先生

王儒

徐濟

張天挺

秦之鑑

巫大章

惲子邁

錢桂森

王廷璧

唐宇昭

葉如璧  
曾孫銘

清

黃章

邱上儀

蔣演生

劉朝鑑  
子泌

張以謙

屠錫光

史遵

呂嘉岳

卞煥文

孫駿聲



隱逸

周

披裘公當暑反披敝裘負薪而行道有遺金不顧季子怪而問之對曰反裘負薪豈拾遺金者哉何吾子貌君子而心野人也季子知其賢請問姓氏曰子乃皮相之士何足與言姓名遂去季子立而望之不見乃止

漢

陸璣字仲芳操履清正明京氏易尚書尤精風角星算太守解為主簿視事旬日遂謝病去隱居會稽山以典籍自娛公車再徵皆以疾辭

梁

蕭眎素性靜退少嗜欲好學能清言天監中為丹陽尹武帝賜錢八萬悉散之累遷中書侍郎未幾求為諸暨令到縣旬日即去眎素榮辱不關于口喜怒不形于色任情通義不自矜高晚築室攝山獨居屏跡及卒親故跡其事行謚曰貞文先生

唐

施肩吾擢進士第後隱洪州著閒居詩以見志

魏璞字不琢長於詩文氣真而志放杜門二十餘年不交豪達飲泉茹藿泊如也與陸龜蒙皮日休善每值鱸肥菰脆則乘舟載酒偕遊於烟波淡蕩間時人高之

南唐

陳植字彥夫居新塘鄉下浦里連歲大旱植鳩工間前河自港至山麓引湖水灌田後遂不患旱得避穀術移居烏安山巔石穴中

子孫獻以脫粟不納改獻松針及青精食之問以富貴不告問休咎輒答而纖悉必驗閱年百六十歲後不知所終

張舉字子厚登進士甲科以無兄弟養親不仕調任青溪主簿亦不之官閉戶讀書四十年手校者數萬卷元豐間以高行薦元祐中復薦起為潁州教授辭不就孫覺胡宗愈范祖禹蘇軾等文章薦之詔拜祕書省校書郎勅州縣致禮敦遣竟不出舉孝弟修於家忠信行於友聲名聞於時蹈中守常從容不迫為當時名流所慕以不造門為耻崇寧四年卒賜謚正素先生

陸文圭字子方咸淳初中鄉選宋亡隱居城東號城東先生

徐仲三字壽卿好古該博宋季自城中避居夫椒韜晦不出及宋亡誠家人曰君父之讐言不可忘寧守貧賤無求聞達

元



錢源字士元號悠然叟博究墳策不為祿仕築亭南山顏曰悠然  
趙孟頫為之記

明

黃本中豪宕不羈有盛名不應選舉與倪瓚顧英高啟徐賁為詩  
友嘗乘小舟挂布帆載琴樽書籍釣具往來江湖號五湖漁者有  
達官異而詢之本中賦詩云覓得鱸魚酒便賒棹歌聲裏記年華  
山長水遠知何處月白風清是我家兩岸綠烟籠柳樹一江紅浪  
滾桃花生平不識飛熊夢笑倚江天數暮鴉長嘯而去  
何士信字敞甫性恬退無意進取搆映雪齋讀書其中謝應芳為  
文以記之

陳一麟字曰仁號碧梧年十六補縣學生親喪哀泣徹宵旦聞者  
為淚下為學初主靜悟後改宗程朱喜讀易年五十不與試事掩

關論學不輕自炫露學官助以粟力辭九舉鄉飲賓均不赴巡撫  
周懷魯疏薦稱其明道力行著書樂志古之君子今之古人當軸  
往見輒避匿表其門曰晉陵高士

龔穆字孟遠好禮守道躬耕教授王與白昂皆出其門下與為學  
士時往候穆會方屏水灌田竦立桔槔下穆曰子先入吾室待吾  
功畢與如言久之穆歸與拜獻金帛不受與作通夕談別去後舉  
鄉飲賓不赴

錢孝字師舜號西青居馬蹟山通經學造就甚眾

吳克字魯于號詹所萬歷二十八年舉人美鬚髯好為詩古文詞  
淡於仕進卜築茶山路名蒹葭莊距莊里許有古塋其裔欲伐松  
楸為薪克予值買存之贖茶山路以利陟年逾五十自作棺名曰  
大歇龕鐫銘其上平時幅巾羽扇與農牧話桑麻為樂子禹思有

書名

陶澤嘉靖間舉人亮爽能文為諸生時有司賞召之謝勿往再試禮部不第歸杜門歌詠絕迹干謁以貧終

楊先生佚其名居新塘鄉太倉王錫爵其弟子也嘗於貴後造訪先生茅屋數椽方自泥壁錫爵立待之先生曰若亦宜見機而作錫爵取泥助塗墜畢先生出草具共食援筆賦詩後錫爵葬親迎往題主時送葬多顯要以錫爵故餽贈幾千金先生不受徒步歸王儒字文真別秋江父公顯善琴有隱德因號樂琴儒生而敏悟日記數百文彩秀發蔚有時名白康敏公昂重之禮於家塾俾羣從子姓從之遊弘治乙酉補郡庠生屢試秋闈弗利乃歎曰吾年逾強仕豈能與群少年角一日之長乎習靜養高時與知己登臨笑歌或徜徉花亭竹徑間歡賞移日不復有仕進意善治生臧獲

無少長悉事事身先勤朴會計有法生業益充拓儒少與族祖南雍知府廷瑞從兄江西僉事文明後先以文名時而廷瑞文明亦既顯矣儒獨抱璞不售友人毛憲深惜之年六十二卒

古庵毛先生文集

徐濟字安世號海萍四世祖養浩以醫名世子孫傳業語在藝術父錫順義縣醫學訓科濟生而穎敏立志不凡從其兄瀋授禮記作文力脫塵語弱冠游邑庠自督學使者暨郡邑長咸敬重之或禮請訓其子弟濟教人不為口耳之學每講授微啓其端俟學者探索憤排始竟其說一時及門號稱多士屢舉不第年逾強仕即謝事隱居唐陽村躬督耕稼暇則偕野老徜徉柳陰竹徑間歡歌嘯詠不知世之榮枯也卒年七十二其門人毛憲銘其墓極為推重云

古庵毛先生文集

張天挺字介侯號木海居政成鄉之梅巷貢生明亡絕意進取與



堆山僧薛寀友善以名義相切劇詩文寒蒼善書法張戢字魯倩亦居梅巷增生少嫻騎射富韜略既而折節讀書山居二十年著論深切時事明亡後放懷詩酒往來於芙蓉湖芳茂山時或悲歌泣下後編茅樹巔薛寀顏曰鶴巢戢因以為號秦之鑑字尚明崇禎十六年進士任浙江仁和知縣數月而歸隱居馬蹟山著書教授手抄格言訓之當事欲薦拜以佯狂免後遊嵩山道卒

巫大章廩生少孤卦臂瘡母病崇禎十三年歲大饑力請當事籌賑全活甚眾明亡不復應舉官餉以廩金不受棄妻子入天台山國清寺供火頭役號檝菴清順治十六年端坐入寂

憚于邁字涵萬崇禎間恩貢廷試以推官知縣用明亡薙髮為僧後不知所終

錢桂森字蟬生縣學生明季披緇為僧居天台山數年歸里不入城市

王廷璧字雙白縣學生工古文辭亂後閉門自守與同里張以謙楊珥蘇州徐枋善鄉黨重之

唐宇昭字雲客弟宇量皆崇禎間舉人宇昭師事孫慎行後師蘇州陳元素元素為改字孔明以諸葛亮韋臯相期許工詩文善畫亂後與宇量偕隱皆無意用世當事迫上公車中途遁歸人稱唐氏二難

清

黃章字含仲縣學生事母孝師吳鍾巖砥礪名節好遊所交多知名士晚遊跡號南蘭逸翁喜詠詩與薛寀友善其友宋佳亦能詩佳歿章為刊其稿撫其遺孫

葉如璧字子毅工書性恬退中年即不入城市或問其志答曰我  
逃名進士識字農夫築環碧堂方四畝砌山鑿泉出入以小舟家  
人亦不得輕造嘗日午隱几三日始寤紀所夢遊曰午夢全書年  
八十五卒曾孫銘字星嶧雍正五年進士授四川樂山知縣坐事  
歸終歲不入城市布衣曳杖往來茶山白蕩間卒年八十四  
邱上儀字維正少攻舉業好奇計明季改應武試成進士累官海  
鹽衛參將不名俸外一錢士民立碑頌德署為天下第一清官亂  
後隱居紫雲山結茅躬耕率妻子力作恒業樵間釣弋小販暇說  
詩書教二子孝弟不見衣冠客與田夫牧豎言則歡甚友人朱一  
是造訪值其負薪熟視曰何憊也出蔬飯對食語竟日皆樵事一  
是曰能出山信宿草堂乎不答龍山祝眉老集耆隱十四人名千  
齡會上儀與焉即席賦詩云孤村冒雨墊綸巾一棹衝寒破水淪

自是素心堪共侶好將末俗使還淳藏身曾學姚平仲招隱誰呼  
祁孔賓良會詎應誇競病舉懷且盡甕頭春當時推此詩為冠  
蔣演生字寅伯博學工文隱居不出寄意詩歌沖澹越俗問業者  
座恒滿晚居城南面池枕岡環植以柳楹聯大書即鹿行中野牽  
牛飲上流見者翛然意遠

劉朝鑑字朗衡明御史熙祚孫性端慤力學篤行為縣學生明亡  
杜門屏跡親知罕見其面子泌字嗣勤工詩年八十六卒

張以謙字贊虞明縣學生詩文有晉唐風格隱居芙蓉湖濱杜門  
却掃一絮衣閱二十年穿敝如網妻亡不再娶或欲妻以女笑謝  
曰以謙貧善餓毋為若女羞著文數十卷藏其稿不以示人  
屠錫光字九如穎秀稱神童明亡不復應試隱居教授著書以自  
娛



史遵字尊之六歲日誦千言即能默識其義兄述字亦之楊維斗稱其兄弟為大小史比之大小蘇遵後為邑諸生與幾社復社諸賢往復診議文譽翕然明亡退居芙蓉湖不入城市年六十三卒呂嘉岳字松壑幼工詩繼善草書兼長畫蘭淡仕進所交往多高逸與同里金敞湯誥尤善名公卿再三造廬不一往報嘗以五十金買田已署券矣嗣知嚮者家貧親老遂焚券不索值子佳齡讀書繼志不習舉子業迨孫官山曾孫祖輝始為諸生以經學文藝教授有名其人皆守狷介澹名利不失先人遺意云卞煥文字厚靈郡學生著文譽明亡焚裂儒衣冠不再應舉日縱縱談兵聲如洪鐘順治十六年夏海寇陷鎮江人情恒擾煥文笑曰采石為金陵門戶兵法所必爭寇不知出此而孤軍深入腹背受敵不久必敗走果如所言嘗謂陶潛欲效張良復讐而力不能

乃自托於酒阮籍廣武一嘆胸中大有塊壘其意蓋以自寓故於國變後益劇飲自放醉輒悲歌泣下仰天嘆曰古有夷齊為餓夫予今為醉夫矣性慤直好面斥人過為仇家所誣被逮事尋白得釋未幾邁疾卒年五十六

孫駿聲字騰茂縣學生明禮部侍郎慎行族父也幼穎異絕人十歲閱楊椒山年譜未竟悲且憤曰忠臣冤苦如是耶弱冠從高秉忠遊其學專主慎獨授徒里門弟子多顯達明亡遁為僧平時啞不出口有不可輒義形於色里人王受恩雄於貲冒孫姓時置酒會族結好駿聲獨擯斥不與通崑山王永祚督楚學延入幕先後得查允昌胡在恪卷拔以冠軍二人相繼成進士時推知人在恪後督學江南屢遣使致敬駿聲避遊天台山寺僧欲留以嗣法駿聲厭之歸因親知以居厨烟屢斷遂緇衣訓蒙與同志結社講易

病中喃喃感懷故國疾且革作春日行七十四章曰數盡矣遂逝  
年七十四

人物傳目錄

寓賢

唐

竇羣

陸贄

孟郊

陸龜蒙

皮日休

宋

張鑄

蘇軾

賀鑄

王令

查道

章綬

楊時

汪藻

卞長卿

李琳

張燾子正甫

洪适弟遵邁



元

張  
棡

羅  
點

明

蔣  
捷

毛  
祥

孔  
傳心

黃  
遵

吳  
肇

清

王  
伯輿

商  
輅

焦  
丙

王  
穉登

謝  
遷

羅  
洪先

陸  
世儀

黃  
晞

李  
長祥

魏  
禧

李  
顯

周  
天游

錢  
陸燦

潘  
高

張  
迪

熊  
恩紱

邵  
齋燾

盧  
文弢

楊  
夢符

王  
曰旦

吳  
育子女庚

孫  
新銘

沈  
耀鑿

沈  
旻咎

錢  
鈞伯

汪  
文通

吳  
煥

沈  
國藩

沈  
士綸

徐  
學言

寓賢

唐

竇羣字丹列京兆人兄常牟弟庠鞏皆擢進士第獨羣以處士客  
毘陵母卒齧一指置棺中廬墓次終喪從廬庇傳啖助春秋學著  
書數十篇京兆尹韋夏卿疏薦召拜左拾遺歷任員外郎郎中攝  
中丞出為黔中觀察使坐事貶官後召還道卒

陸贄字敬輿蘇州嘉興人年十八第進士中博學宏詞調鄭尉罷  
歸寓居常州德宗立召為翰林學士從狩奉天貞元八年拜中書  
門下平章事前後論諫數十百篇後貶忠州別駕順宗召還京卒  
年五十二謚曰宣

孟郊字東野湖州武康人與韓愈為忘形交常厲常州刺史



卿甚禮之郊年五十得進士第調溧陽尉鄭餘慶鎮興元奏為參  
謀卒年六十四  
陸龜蒙字魯望蘇州吳人少高放通六經大義尤明春秋嗜茶置  
園顧諸山下取茶為品第嘗寓芙蓉湖與皮日休及郡人魏璞載  
酒賦詩不交流俗舟設篷席齎素書茶竈筆牀釣具時謂江湖散  
人以高士名不至卒後進贈右補闕  
皮日休字襲美襄陽人咸通八年進士崔璞守蘇日休為軍事判  
官嘗買釣船一具往來芙蓉湖中與陸龜蒙連舸載酒見者有兼  
葭白露之思後盡以釣船諸具貽所善魏璞著五賦詩  
宋  
張鑄字希世居滁之清流後遷晉陵登祥符進士甲科王安石其  
門人也歷官南陽帥與姪愚之並以光祿卿致仕杜祁公諸賢各

以詩贈鄉人即所居地號東西二卿  
蘇軾字子瞻眉州山人博通經史屬文日數千言嘉祐二年試  
禮部高第殿試中乙科宴瓊林日與蔣之奇坐次相接遂卜居陽  
羨邑人單錫亦是科進士軾以甥女妻之屬以田宅後謫黃州移  
臨汝上章乞居陽羨賞托邵氏瞻為買宅費錢五百緡將挈居偶  
與氏瞻步月村落間老嫗哀哭就問之答曰家有一居相傳百年  
今不肖子售諸人所以悲耳叩其居即邵所得亟取券對嫗焚之  
不索值自是不復問舍寓於顧塘橋孫氏建中靖國元年卒於常  
州年六十六  
賀鑄字方回衛州人面鐵色喜談世事可否不少假借博學強記  
工語言深婉嚴密尤長於度曲寓居毘陵著荆溪集陽羨歌以右  
班換文倅太平州而卒葬於義興之篠嶺號鑑湖居士

王令字逢原廣陵人五歲而孤二十八而卒甘貧勵行王安石器重之喜江南山水遷居潤州再遷江陰以地卑濕得足疾復遷毘陵卒因葬焉

查道性純樸早寓常州琅山寺躬事薪水以給眾衣巨衲不洗濯以育蚕蟲晚待制龍圖閣朝列服其重德謂之查長老

章紱建州浦城人棗第五子簽判西安州兄弟俱顯任蔡京興制獄傾章氏傳致其罪紱配沙門島除名停籍時論寬之張商英入相辨前獄移紱常州頃之改授內殿崇班

楊時字中立南劍將樂人熙寧九年進士第調官不赴以師禮見程顥於潁昌及歸顥曰吾道南矣顥卒又見程頤於洛歷知洺陽等縣有惠政時德望日重士不遠千里從遊號曰龜山先生政和元年自京過常州寓早科坊往見鄒浩浩旋卒為文祭之明年赴

任蕭山及滿奉祀徙居常州講學城東書院既罷祠官貧甚授常州市易務不赴建炎初還將樂居常州者十有八年如養浩堂踵息庵諸記中庸辭義伊川易傳泰山春秋傳諸序皆寓常時所著也卒年八十三謚文靖

汪藻字彥章饒州德興縣人中崇寧二年進士乙科瓊林錫宴酒半上方賜冰狀元霍公端友屬公表謝授紙筆立就如素習一坐歎驚會徽宗親製君臣慶會閣詩羣臣和進藻擬和一章屬詞用韻句法清新出眾作之右即日傳布諸公喜稱之除九域圖志所編脩官遷者作佐郎再遷符寶郎故相王黼與藻為太學同舍生不相中黜藻通判宣州藻上書請宮祠得提點江州太平觀寓家晉陵八年終黼之世不用藻幼時好春秋左氏曲漢書銳意欲與之並博學強記自六經百家太史氏之籍先儒箋疏傳注之書兵



家族譜方言地志星經曆法佛老之眾說與夫萬里海外蠻夷異域荒怪之序錄靡不記覽山陰賀鑄方回知名士也亦寓晉陵聚書萬餘卷藻日從之遊多得所未見者其為詞章明於道德達於世務指事析理引物託喻馳騁古今貫穿經傳該備眾體蓋數十萬言自成一家淵聖登極召為尚書屯田員外郎歷遷至給事中兵部侍郎兼侍講直學士院藻上言太上皇元符以來至上建炎之元並無日歷可謂闕典上詔藻領日歷事書成凡八百冊上之藻前後典六州先惠愛重名教有古循吏之迹始藻與王黼纖芥讒者反指藻為黼黨落職永州居住更七八年感風痺乞致仕不許竟卒於永州寓舍年七十六葬常州宜興縣陽蔡後隲卞長卿字鉅夫濟陰宛句人晉尚書壺之後舉孝廉入秘書省官殿前御史高宗南渡以扈蹕功遷兵部尚書建炎三年高宗如鎮

江金人猝至長卿率眾搏戰揚子橋出入矢石金人敗去疾作還至常州道卒賜葬郡南永勝西鄉謚忠勇

李琳陳留人父傅儀同三司琳宣和辛丑進士高宗南遷父子從至毘陵傅卒敕葬晉陵安東鄉之柏墓後家無錫琳博學有文章歷官多外服秦檜死始入為吏部侍郎丁丑廷試琳與張綱等讀卷首選王十朋士論稱愜後引疾以敷文閣待制致仕孝宗時起為吏部尚書卒勅葬附父墓

張燾字子公饒州德興人宣和八年進士第三人靖康元年李綱為親征行營使拜燾入幕尋隨綱貶從高宗南渡徙家武進之新塘鄉紹興二年累遷兵部侍郎時金使至詔欲屈已就和拜金詔燾言一屈之後不可復伸力詆拜詔之議秦檜患之出知成都府乞祠歸凡十有三年檜死除知建康府致仕卒年七十五謚忠定

燾家居立書院延蔣重珍講學匾其齋曰一梅講堂子正甫嘉泰間官樞密副使亦忤權相罷歸

洪适字景伯鄱陽人父皓使朔方适年十三任家事母沈氏毘陵人适與弟遵邁依舅氏讀書僧舍夜枕不解衣紹興十二年适與遵同中博學宏詞後三年邁亦中是選三洪文名滿天下适官同中書門下平章事兼樞密使卒謚文惠遵資政殿學士謚文安邁端明殿學士謚文敏适遇蔭補舍其孫密而奏表弟沈自彊以報外家

張栻字敬夫廣漢人以父浚蔭補官孝宗立浚起謫籍開府治戎栻時以少年內贊密謀外參庶務浚沒久之召為吏部侍郎尋兼侍講除左司員外郎出知袁州栻嘗過毘陵時晁子健為郡守修多稼亭栻為之記後復來講學城南殷薛里四方學者咸往就正

題書齋桃符云春風駘蕩家家到天理流事事清蓋自道也

羅點字春伯撫州崇仁人淳熙三年進士第累遷校書郎兼國史院編修紹熙三年日長至上將朝賀重華宮既而中綴點再言之不聽求去不許凡前後與侍從諫請過宮者三十五獨自上奏者十六拜端明殿學士得疾卒年四十五贈太保謚文恭嘗寓居孟河西灣卒後葬焉人因名其地曰羅墅灣

元

蔣捷字勝欲陽羨人居武進宋德祐進士元初遁迹不仕大德間憲使臧夢解陸垵交章薦其才不就著述以義理為主學者稱竹

山先生

孔傳心逸其字先聖五十五世孫為湖州路儒學教諭陞教授占籍常州至治元年奏免大小夫役差發歷代遵行之



毛祥元氏人泰定進士為常州推官至正間卒官葬武進黃塘鄉子孫廬墓不去因占籍焉

明

黃遵字至善號松軒江西清江人為人伉簡有奇氣學問浩博文章清麗越俗洪武初舉懷才抱德授南康府學訓導永樂間調常州洪熙元年遷武進學教諭時國法嚴刺史多以墨敗遵以重望除署府事秩滿將歸民恐其去懇留於執政而達之朝遂老於常吳肇號友山無錫人洪武間以經明行修徵拜御史建文時削奪親藩肇從容借喻漢事父喪歸靖難兵渡江聞宮中火北向哭累日挈家匿山中尋變姓名泝楚入蜀至滇有人識之西平侯第正統初禁釋始歸葬父於常州之孟墅託醫養母母卒遂不復言醫王伯輿安節四老孫也安節死事於常即葬焉子孫還臨安伯輿

正統舉人欲依祖墓求選常州教授陞兵部武選司至事尋與弟同至常州守墓死遂祔葬有祠在譙樓北今名臨川里

商輅字宏載浙江淳安人鄉會殿三試皆第一除修撰直東閣進兵部左侍郎石亨使草上皇復位詔輅條舊制亨怒斥罷之成化三年詔以故官入閣進謹身殿大學士中宮汪直督西廠數興大獄輅條直十一罪遂罷西廠尋致仕歸卒贈太傅謚文毅輅初領除武進毛玉延教弟理於家塾又館昇西鄉卞氏因僦居焉

焦丙本江陰虞門人明太祖徵時友宏武初徵求甚急丙恐累有司之金陵持雞酒馳甬道而入與太祖班坐飲如平生歡贈以金玉角三帶丙取角者除千戶亡何掛帶而去徙家鶴山之西偏授徒講學後人名其地為焦塾

王穉登字伯毅自江陰利城徙毘陵受業於陸聚岡補武邑諸生

晚隱吳門萬歷初吳中行等疏論張居正奪情被杖謫穉登以詩送之有云懷中諫草休焚却誦與忠臣孝子聽為朝野傳誦謝遷字于喬浙江餘姚人成化十年進士第一授修撰宏治八年詔同李東陽入內閣參與機務加太子太保疏勸太子親賢遠佞勤學問戒逸豫帝嘉之武宗立請誅劉瑾不克遂與劉健同致仕歸里有閹黨遷不樂家居夙與武進族人謝道九善遂寓居羅墅西灣瑾怨不已取中旨勒罷其弟兵部主事迪斥其子編修丕為民尋削籍奪詔命瑾誅復職致仕羅洪先字達夫吉水人嘉靖八年進士第一授修撰即請告歸十年召拜左贊善明年與司諫唐順之等疏請太子於來歲元日御殿受賀帝大怒除名洪先歸益求王守仁學後順之應召欲挽之出力辭隆慶初卒謚文莊洪先嘗寓羅墅講學數年乃去

清  
陸世儀字道威太倉人明諸生與同里陳瑚王育相砥礪倡明正學四方學者咸歸之康熙五年講學毘陵嘗主邑人楊兆魯家所著書數百卷俱楊氏開雕儀之學經畫井井鑿然可行馬負圖思辨錄亟稱之卒年六十二光緒元年從祀文廟  
黃晞字仔薪原名大湛江陰諸生父毓麒恩貢生為怨家所告官拘晞問毓麒所在晞曰事皆我所為父不知也復逮其弟大洪大瀆兩弟爭代父兄死尋得毓麒消息俱釋歸毓麒死妻孥籍沒捕解晞繼室周氏自刎常州府堂晞坐沒入旗下為奴鄉人斂金贖之自悔不能救且痛妻奇節不再娶授徒毘陵晞學有原委議論貫串千古斐亶不倦著詩文百餘篇毘陵士友家多有傳鈔本李長祥號研齋四川夔州人明進士官翰林負經濟才避獻賊之



亂寓居常州東門外桃園築草堂吟詠其中通判謝良琦為之記  
良琦號石矐廣西人罷官後留居霍園與長祥會集名士論文賦  
詩無虛日

魏禧字冰叔江西寧都人年十一補縣學生明亡後與兄際瑞弟  
禮躬耕講學天下稱三魏康熙初遊常州主於陳玉璣與憚日初  
楊日初楊瑀及江陰李遜之尤善為日初作文集序並有二人問  
答數卷後赴揚州卒於儀徵年五十七

李顥字中孚陝西藍屋人清苦拔俗昌明關學世稱二曲先生常  
州知府駱鍾麟前官西安同知師事顥康熙八年鍾麟至常請顥  
南下講學為建延陵書院使郡之士大夫師之未幾歸人士思慕  
肖顥像於延陵書院年七十六卒

周天游字紫海廣西桂林人亂後隱華山中後寓平原左都御史

董訥家識武進周清原訥薦天游應博學宏詞天游固辭以清原  
薦由甲等授翰林後偕天遊歸常通世譜郡人士多從請業天游  
學貫天人洞抉精奧一子在桂林間關來常泣請還粵笑曰汝豈  
昧吾志叱去之卒年七十六清原葬之常附主家廟

錢陸燦字湘靈號圓沙常熟人順治丁酉舉人以奏銷案黜籍絕  
意仕進著述自娛好藏書教授常州金陵間遊其門者多成名士  
寓常時主侍御董文驥康熙中與徐乾學等耆年會燦年八十

四齒最高會中諸人皆兄事之結浣花詩社一時詩學興起

潘高字孟升號南村金壇人人品高卓工詩文五言沖淡得韋柳  
法新城王士正以配邢昉主庭與同邑於梅唱和並寓常州主莊  
同生徐元珙兩家所著膾炙人口

張迪字恂叔丹徒人大學士玉書孫以舉人官山東武定府同知

康熙五十年隨父逸少徙於常性瀟灑善酒工詩及書乞休歸被服儒素溫溫如諸生求書與詩文者接踵

熊恩紱字隆輔浙江永康人乾隆間進士改庶吉士散館出為知縣歷升大名道回匪邢士花等叛恩紱出禦身被十餘創罵賊而死賜祭葬贈蔭恩紱少游學武進會試出劉景煒房故寓常州死即葬焉

邵齊燾字荀慈常熟人乾隆七年進士官翰林十年年三十六即罷歸意度夷曠工駢文常主講新城書院喜獎借士數洪亮吉黃景仁皆其所識拔也卒年五十二士有為之服心喪者

盧文弨字紹弓浙江餘姚人乾隆十七年進士歷官翰林院侍讀學士三十三年乞養歸為人孝謹篤厚潛心漢學罷官後主講新城書院以經術導士就造甚眾會重修府志延請主修屬稿未成

時推精博主講時著有新城劄記年七十九卒於新城書院

楊夢符字六士浙江山陰人寓居武進以紹興籍中式乾隆五十二年進士歷官刑部員外郎讞獄仁恕多所平反嘗隨侍郎王德按獄奉天直隸江西浙江謝絕苞苴同官服其嚴正

王曰旦安徽歙縣人父震業齷武進因家焉曰旦喜交遊砥礪學行一時知名士如趙懷玉惲敬錢伯坳吳士樸莊宇達張珍皆與之遊嗜古書畫刻惲格遺墨名愛石山房帖行世從弟烜亦以能書名

吳育原名毓字子山吳江人漢槎先生兆騫元孫婚於常州陸氏依外舅甸南以居少涉經史百家學古文辭於張惠言工四體書篆法尤美為人篤倫誼樸誠嚴正樂獎後進遊燕楚粵越殆三十年歸卒於常州子汝唐字翼先丰儀古雅亦工篆書孫新銘有文



才占籍為縣學廩生  
沈耀鑿字秋浦江陰人父芝田安徽休寧知縣僑居常州耀鑿官  
湖北宜昌通判主鹽榷楚北為淮引地川鹽地近價廉侵行全省  
耀鑿請減價便民割尤遠之鶴峯長樂借食川商以劑之滇黔歲  
運銅鉛道出宜昌恒觸灘石沈沒民重累耀鑿每假資代償咸豐  
初太平軍迫武昌耀鑿先奉檄至省司餉城陷怒罵被戕當事誤  
以為遁奏落職久之得白卹如例  
沈无咎字子慕浙江烏程人少工詩性傲不諧俗居有漁莊畝許  
得魚則跣足入市賣之口無二價人不識為詩人也善結采珠為  
燈携售於揚州過某商門某商知其名使僕贈白金一鎰還其燈  
无咎怒委金於地毀燈而去其詩劖刻脫筆墨痕尤工樂府妻湯  
朝毘陵呂氏侍兒見无咎詩而好之遂歸无咎於是朝詩日進後

合刊所唱酬曰笙磬同音

錢鈞伯原名振字訥蘧無錫人隨父宦廣東濡染庭訓博涉多通  
後侍父寓常州補縣學生日手一編不輟詩宗宋賢援例得知縣  
不就

汪文通字君仲安徽休寧人以舉人授吳縣知縣罷官後寓居常  
州事母以孝聞年八十八卒

吳煊字季眉浙江錢塘人祭酒錫麒之曾孫咸同間流寓大有鄉  
馭溪鎮工醫嗜吟詠有半榻涼生蕉葉雨一簾香送藕花風句為

時傳誦

沈國藩字燮堂江陰人博學嫻掌故文筆奇縱工醫術尤擅丹青  
得者珍若拱璧以縣丞擢署福建古田縣事多惠政尋以見保靖  
授藩司迴避改官浙江

沈士綸江陰人官安徽建平縣巡檢博通經史工文詞所著因兵  
燹散佚遺稿僅有存者  
徐學言號畏三浙江上虞人行賈至常州卜居西獅子巷久之賈  
業大起道光之季大水吾郡東城崩學言獨貲修築咸豐三年大  
旱學言晨夕率役荷飯徧覓餓者食之踰月米乏則繼之以粥其  
他凶饑疾疫捐貲不勝計戚友稱貸必應卒年八十三



人物傳

文苑

武進陽湖縣志



收卷程耀庚徵

張愚直繕





蕭子雲

蕭 偽子濟

圓蕭

蕭孝儼

蕭大園

蕭 慨

何之元

蕭 允

蕭 濟

蕭 該

秦景通

蕭德言

劉禕之

蕭穎士

蕭 立

包 佶弟何

喻 鳧

李端彥

孫 稷

孫 覲

孫 杞

錢 相

錢世雄

宋

唐 隋 陳

盧 習

孫 時

明

芮 善

陳 濟孫端甫

徐 轄

陸 簡

朱 昱

葉 林弟松 桓 材

陶 澤

唐 順之

朱 魯

惲 紹芳

吳 可行

王 忱

王 穀祥

白 悅

吳 嶽

朱 憲

吳 瑞登

顧 明鄭淑

龔道立弟道高

莊 煦

江 惟清

金 有誼



清

唐獻可

鄒之麟

岳虞巒

蔡元宸

毛重倬

唐振芳

毛念恃

毛羽宸

楊廷鑑

子大鶴 孫祖楫 曾孫煜曾 煜曾從弟述曾

龔百樂

龔眉望

莊回生

弟朝生

孫自式

董文驥

毛會建

龔廷曆

張星瑞

子祖籛

祖編

黃永

巢震林

劉維烈

吳珂鳴

龔策

吳名思

子守相

鄒祇謨

湯誥

錢二白

宗人 大鏞

大猷

陳玉璣

沈支炳

楊宗發

邵長衡

陸苞允

董以寧

朱二采

蔣理正

孫良

胡香昊

陳鍊

門人 唐惲宸 孫龍珠

錢養浩

周清原

子鴻翮

莊崑生

子紹平

蔣金式

段麒

莊清度

楊起鸚

莊令輿

徐永宣

程彥

鄭朝統

蔣汾功

子重和 寧

孫齊耀

呂師子驥

趙熊詔

卜俊氏

湯自奇

瞿朝晉

鄒光濤

莊絳

子楷 楷弟 楷中

金玉式

蔣驥

秦宮璧

張一是

趙彪詔

陳儀

胡塗

湯大紳

子修業

唐元鼈

楊煜曾

楊肩吾

李英

許璿耀

蔣梧

孫麟昌

錢枝起

龔錫純

莊勇成

從子關 關和子穎 穎和曾

劉星煒

胡問

劉鳴鶴

子致

從子芳

趙翼

李瑞岡

莊培因

唐為坤

弟為垣

莊廷璽

毛穎士

伍宇澄

鄒欲仁

蔣景翔

胡文英

高荃

管世銘

董潮

徐書受

呂嶽自

奚賓

龔顯祖

鄭環

趙懷玉

楊倫

白尚質



錢伯珂

黃景仁 子乙生

吳士模

莊宇達

劉嗣綰

莊曾詒

陸壽昌

丁履端

丁履恒

惲敬

呂光復

呂星垣

徐準宜

錢夢雲

吳錫傳

諸鴻疇

史次星

惲秉怡

陸繼輅

毛燧傳

董祐誠

李兆洛

惲蘭枝

陳景蕃

陳紹琦 子蔭

許亦魯 子沅

吳賓旭

承鵬 汪岑孫 丁懷璞

吳飛鵬

張景超

畢訓成

方履屨 子駿謨 文駿謚

莊關和 弟文和

陸慶頤

湯礫

董思誠

謝應芝

沈爾熾

楊燕龍

抗源濬

楊元錫

莊鳳翰

周儀暉 弟儀穎 孫世登 子騰虎

瞿溶 何逢辰 汪士進 談澧

徐賡揚 子廷華

吳胡鴻 莊縉度 陸容

言啟芳 劉遵燮

趙振祚

楊金監

陳亮疇

蔣曰豫

湯成烈

董似穀

許斌

管晏

史亮悠

杭清

周舫

費丙中

汪暎  
弟昉

陸蔽恩

陸爾熙

許棫

揚光勳

史致準

莊怡孫

蔣彤

馮銍

馮樹

劉清弼

黃煒

高延綬

子毓  
麒

子志敏

吳璵

何嗣焜

朱琪

呂緒承

孫清載

錢嚮杲

王振鳳

劉可毅  
弟樹屏

莊鼎彝

劉異權

蔣南棠  
妻汝濟  
謝仁  
錢世輔  
仁弟泳

張元度

費丙中

黃煒

子治本



文苑

三國

華覈字永先仕吳以文學為秘書郎遷中書丞魏滅蜀覈上表以  
桓公存衛為喻孫皓即位封徐陵亭侯皓於盛夏營新宮農守並  
廢覈疏諫不納後遷東觀令領右國史皓有研精墳典博覽多聞  
之褒時倉廩無儲世俗滋侈覈疏請息衆役務農桑禁綺繡前後  
陳便宜及薦賢釋罪書百餘上皆有補益免歸數歲卒

晉

朱鳳與吳郡吳震學行清修初為郎老而未調太興初以秘書監  
華譚薦擢著作郎

宋



蕭道度齊高帝長兄始與高帝俱受學雷次宗宣帝問二子學業  
次宗曰兄外朗弟內潤皆良璞也仕至定安太守卒

齊  
蕭煜字宣昭高帝第五子年四歲母以罪誅煜思慕如成人慟輒  
吐血學書無紙筆常以指畫空及掌遂工篆法又無碁局乃破荻  
為片縱橫以指點形勢遂至名品好文章作短句詩學謝靈運尤  
善射嘗於華林射六箭五破一皮獲賜錢五萬仕至侍中護軍將  
軍

蕭鋒字宣穎高帝第十二子性方整年四歲倚井欄為書滿則洗  
而更作晨興則畫窗塵為之五歲一學鳳尾諾即工高帝大悅賜  
以玉麒麟十歲能屬文好琴武帝賜以寶裝琴命於御前鼓之大  
見賞出為南徐州刺史仕至侍中驍騎將軍

邱巨源少舉孝廉孝武知其文學救助徐爰撰國史明帝即位參  
詔誥仕齊為尚書主客郎除武昌太守巨源不樂江外行改餘抗  
令

梁

蕭子隆字雲興武帝第八子性和美有文才武帝以子隆能屬文  
嘗謂王儉曰吾家東阿也

蕭文炎聞竟陵王子良夜集學士刻燭題詩一寸四韻曰如此何  
難乃與吳興邱令楷濟陽江洪餘姚虞義共打鉢響滅詩成皆可  
觀覽

蕭介字茂鏡少穎悟有器識博涉經史善屬文大同中為揚州府  
長史以清白稱調始興太守歷少府卿侍中都官尚書武帝將納  
侯景介表諫不聽性高簡少交遊與族兄琛從兄視素及洽從弟



淑等文酒賞會人比謝氏烏衣之遊武帝嘗延後進二十餘人賦詩介染翰便成文無加點子允語具後

蕭幾字德玄十歲能屬文早孤篤愛諸弟性溫和無競清貧自立好學善草隸書湘州刺史楊公則每謂為桓靈寶重出公則歿幾為誅詞時年甫十五沈約奇之謂其文不減謝希逸仕終新安太守

蕭洽字弘稱七歲誦楚辭略上口及長好學善屬文為南徐州從事清身率職饋遺無所受妻子不免饑寒累遷臨海太守政清平便民還拜司徒左長史嘗製同泰大愛敬二寺刹銘其文甚美又撰當塗堰碑辭亦瞻麗

蕭琛字彥瑜明悟有才辨起家太學博士時王儉當朝琛年少未為所知乃直造儉坐儉與語大悅辟用之遷尚書左丞齊明帝杖

尚書郎琛密啟止梁受禪累遷吳興太守郡廳事舊安項羽神坐太守多避舍琛至撤去之後頻泣大郡不事背產歷尚書侍中武帝每呼為宗老琛嘗言少壯三好音律書酒年長以來二事都廢惟書籍不衰卒謚曰平

蕭子範字景則齊豫章王嶷子有孝性居喪以毀聞服闋累遷大司馬南平王從事中郎以文學被過使製千字文辭甚美府中文筆皆使其草後為臨賀王正德長史歷官十餘年不出蕃府少與弟子顯子雲才名略相比而風采容止不逮嗣為秘書監簡文即位召為光祿大夫不拜及葬簡皇后使製哀冊文理哀切救齋米千石元帝追贈金紫光祿大夫謚曰文子滂確簡文嘗稱數諸蕭文士二人並預焉

蕭子顯字景陽子範弟也好學工屬文嘗著鴻序賦沈約稱為班

固幽通之流梁武帝雅愛子顯才又嘉其容止吐納嘗從容語曰我造通史成眾史可廢子顯對曰仲尼贊易道黜八索述職方除九丘聖製符同復在茲日時以為名對遷吏部尚書見九流賓客不與交言但舉扇一搗而已簡文在東宮每引與促宴謂坐客曰嘗聞異人間出今日始見知是蕭尚書卒贈侍中中書令子序愷並知名簡文稱愷為才子

蕭子雲字景喬子顯弟也年十二製拜章便有文采及長勤學有文藻弱冠撰晉書至年二十六書成上奏詔付秘閣性沈靜不樂仕進為臨川內史以和理稱奉敕改定沈約所撰郊廟樂章善草隸為武帝所重稱其筆力勁駿心手相應巧逾杜度美過崔實當與元常並驅爭先百濟國使人求書于雲書三十紙與之獲金數百萬子特亦善草隸時人比之衛恒衛瓘先子雲卒

蕭孝儼字希莊射策甲科除秘書郎太子舍人從文帝幸華林園於坐獻相風烏華光殿景陽山頌其文甚美

蕭撫字子遐性溫裕封永豐縣侯累遷東巴西梓潼二郡守武陵王紀稱尊號以撫為益州刺史守成都周軍來攻撫降武成中明帝令撫與諸儒校定經史仍撰世譜出為上州刺史政以禮讓為本嘗元日悉放獄囚聽三日後來歸諸囚依限並至秩滿入朝武帝以為文學博士歷官少傅卒謚曰襄撫善草隸又留意算數醫方著詩賦雜文數萬言子濟字德成少仁厚好屬文圓肅字明恭武陵王紀子風度淹雅敏而好學紀稱尊號副蕭撫守成都俱降於周拜咸陽郡守改授太子少傅作少傅箴太子見而悅之致書勞問隋開皇初以貝州刺史卒

蕭大圓字仁顯梁簡文帝第二十子四歲能誦三都賦及孝經論



語侯景之亂大園獲免至江陵元帝甚悅之嘗從問五經要義數十條大園辭約旨明應答無滯帝曰昔河間好學臨淄好文爾既兼之然有東平好善更高前載元帝降魏大園先使周留馬文帝以客禮待之麟趾殿招集學士大園得預見有梁武帝集四十卷簡文集九十卷乃手寫二集一年並畢隋開皇初拜內史侍郎卒於西河郡守

蕭慨深沈有禮表好學能文善草隸書南士中稱為長者歷著作佐郎待詔文林館卒於司徒從事中郎

何之元字世伯好學有才思為司空袁昂所重尋辟五官掾累遷信義令宗人敬容貴顯之元終不一造門曰德薄位隆覆敗可待吾懼不獲其利而及其禍耳識者稱之歷南梁州刺史中衛府諮議參軍之元廬江潯人陳亡移居晉陵人雅重之名所居里曰何

墅隋開皇十三年卒

陳

蕭允字叔佐少知名風神凝遠通達有識鑒始仕梁為太子洗馬侯景陷臺城百僚奔散允獨整衣冠坐宮坊景軍敬馬弗之逼尋出居京口衣冠士族四出允獨不行曰生死定分豈可逃乃閉門靜處卒免於難陳宣帝即位允為光祿卿性寂重未嘗以榮利干懷出為會稽長史經延陵季子廟託異代交為詩以敘意辭理清典後主嘗以允問蔡徵徵曰清虛玄遠殆不可測至於文章可得而言因誦允詩以對後主嗟賞久之隋師濟江允遷關右時南士例皆授官允疾辭不就文帝義之厚賜錢帛卒年八十四

蕭濟字孝康少好學博通經史詔梁武帝左氏疑義三十餘條尚書僕射張纘太常卿劉之遴並與濟討論纘等莫能抗對解褐梁

太子舍人以預平侯景功封松陽縣侯陳高祖鎮徐州世祖守會稽濟皆為長史世祖即位授侍中歷位五兵度支祠部三尚書年六十六卒贈金紫光祿大夫

隋

蕭該梁鄱陽王恢孫荊州陷與何妥同至長安性篤學通詩書春秋禮記尤精漢書開皇初拜國子博士奉詔與妥正定經史撰漢書及文選音義並為當時所貴于時漢書學者以該及東海包愷為宗匠聚徒教授著錄者數千人及卒門人為起墳立碣焉時蕭昝亦有雋才任青楊巷與何妥齊名時人為之語曰世有兩雋白楊何妥青楊蕭昝

唐

秦景通與弟暉俱知名精漢書學疏大秦君小秦君當時治漢書

而非其授以為無法皆宗師之貞觀脫累遷太子洗馬兼崇賢館學士後暉復踐其官

蕭德言字文行明左氏春秋陳亡徙關中亡歸江南仕隋為校書郎貞觀時歷著作郎弘文館學氏與虞世南等奉詔哀次經史百氏帝王所以興衰者上之帝愛其書博而要曰使我稽古不惑者公等力也晚節學愈苦每開經輒被濯束帶危坐詔授晉王經封武陽縣侯進秘書少監高宗立拜銀青光祿大夫禮遇隆重年九十九卒贈太常卿謚曰博

劉禕之字希美著作郎子翼子少與孟利貞高智周郭正一俱以文辭稱號劉孟高郭同直昭文館俄遷右史弘文館直學士與元萬頃等入禁中共撰列女傳臣軌百寮新誠樂書凡千餘卷高宗密與參決時政時號北門學士兄懿之亦給事中並居兩省論者



美之尋拜相王府司馬檢校中書侍郎及武后立王為帝擢中書侍郎同中書門下三品賜爵臨淮縣男時詔令叢繁禕之思致華敏少選可待一日私語鳳閣舍人賈大隱曰后能廢昏立明盍反政以安天下大隱表其言后怒或誣告禕之受歸誠州都督孫萬榮金武后遣人鞠治示以救禕之曰不經鳳閣鸞臺何謂之救后以為拒制使賜死臨誅神色自若立成謝表詞懇哀到人皆傷之蕭穎士字茂挺梁鄱陽王恢七世孫四歲屬文十歲補太學生觀書一覽即誦通百家譜系書籀學開元二十三年舉進士第一天寶初補秘書正字裴耀卿席豫等皆先進器其才與鈞禮由是名播天下以事免官客濮陽尹徵王恒盧異盧士式賈邕趙匡闔士和柳并皆執弟子禮受業號蕭夫子召為集賢校理宰相李林甫欲見之穎士方母喪即縗麻徑謁於政事省林甫大惡之調廣陵

參軍事穎士不能堪作伐櫻桃賦以刺林甫史官韋述薦以自代召至京終以不屈林甫免林甫死調河南府參軍事倭國入朝自陳國人願得蕭夫子為師安祿山寵恣穎士曰亂不久矣即託疾遊太室山既而祿山反穎士藏書箕穎間身走山南節度使源洧辟掌書記賊攻南陽洧懼欲退保江陵穎士力爭不可洧乃止洧卒往客金陵永王璘召之不見時淮南節度副使李承式玩兵不振穎士與宰相崔圓書謂宜時遣使以扞鎮江淮俄而劉展果反承式遣兵往救大宴賓客陳女樂穎士曰天子暴露豈臣下盡歡時耶尋授揚州功曹參軍至官信宿去客死汝南門人謚曰文元先生

蕭立年十七射策甲科官廷尉評再遷殿中侍御史文學政事為臺閣領袖獨孤及序其文比之賈馬云

包佶字幼貞父融開元中歷大理司直集賢學士工詩與賀知章劉昫虛齊名佶天寶六年進士文筆藻瞻累官鹽鐵使以國子祭酒知禮部貢舉號稱得人後封丹陽郡公弟何字幼常官起居舍人亦以文學著

喻鳧開成五年進士工詩尤長五言近禮喜仿效賈島人稱賈喻其集外句如木落山城出潮生海棹歸滄洲遠釣隱柴閣負僧期俱為人傳誦官終烏程尉

宋

李端彥字相之父鎮舉進士端彥以崇寧二年登第臚唱丙科帝覽其對親洒宸翰云直諒可嘉特升甲科端彥博學多聞官終宗學博士

孫稷字農先少嗜讀書尤邃於易不守先儒傳注而以莊周列禦

寇浮屠氏之言合於經者佐其說推原性命道德之理幽明之故鬼神之情狀迎見立解超驚獨出一時老生宿儒歎譽以為不可及文章能傳其學而辯於說理辭義精確不為空言屢試於有司輒不售其三兄相次下世闔門僅十指冠昏喪祭衣食之具皆屬君歎曰吾道盡矣遂束書不觀而治其家性夷曠洞見肝膽胸中有所懷如茹不下必盡吐乃已面刺人過盡言不諱疎財樂施一語之投捐數十萬無所計意所不合一錢不分也疾革後事皆有宿戒至屬纊無謬語卒於紹興四年九月年六十一

孫觀鴻慶居士集

孫觀字仲益大觀三年進士舉制科歷官翰林學士吏部尚書以文學名世紹興九年十月觀於舍旁營一齋名之曰思樂并為文記之其詞曰余歸田五年始斥舍旁地數十畝除灌莽植藩垣築屋居之營一齋廣深尋丈度可容膝以朝夕從事於此名之曰思



樂思樂者嘗安於樂矣而不自知也一出而櫻世患憂懼萬端險阻百態如蒙壞絮坐蒺藜而莫之勝脫於是悵然思平居無事之可樂而不得也余嘗絕京江浮長淮泝汴流而上北至於京師又東航太湖出苕霅並桐江下三衢歷撫信洪吉二江之阻直抵衡湘踰桂嶺而南至象江上山行海宿水陸萬里其高緣絙而上與猿鳥爭道於垂崖一髮之間其下衝波急湍以入於龍魚之宅爭一旦之命當是時也則思平地之樂夷狄不道以殺為嬉毒流四海幸而免者又窘於他盜寔後跋前顛倒失據如觸藩牆如蹈坎井如探湯沸鼎而無所寄焉當是時也則思太平之樂學迂材下屢竊非據於眾人必爭之地以和戎緩兵為是以伏闕首亂為非眾怒不容聚而見訕推撓於十夫杼投於三至獨持一喙終日號鳴大咤以自解說卒莫能勝遂陷於不測當是時也則思居閒之

樂已而觸罪竄投嶺海蠻蠻雜居鳥言夷面鬼嘯于梁鵬集于舍下榻畏蛇對食懼蠱嵐薰瘴染意象昏昏然颶風忽起吹簸天地江翻海渾仰屋四顧若將壓焉當是時也則思還鄉之樂今幸蒙恩還復故栖先人之敝廬與童子時釣游之處皆在焉去國十年名不著吏部之籍毀譽不挂於縉紳士大夫之口天寬地大徒步自由四封之內椎埋羣割之姦翦除殆盡南北之使已議息兵江干撤警千里宴然朝而出藜杖幅巾與田夫野老相爾汝於東阡西陌之上暮而歸折野蔬酌秫酒飯脫粟老稚團樂哇笑相雜挽須問事足慰目前凡吾昔日無事之樂舉集於此矣夫天下之樂無窮而意適則為樂吁嗟其所不獲則不樂也呻吟其所疾痛則不樂也今無是一者也行歌坐嘯訊若不繫之舟而無所係焉何為而不樂雖然世之君子有以功名為樂者為天子操尺筭筭兵

萬里一取單于否則馳一乘之傳折衝口舌之間此將相之事非  
吾之狂所敢議有以貧賤為樂者簞食瓢飲餐氈齧雪茹草木之  
實若不堪其憂而氣塞天地足以易窮餓而不怨此聖賢之事又  
非吾之愚所能及特以桑梓之國邱墓所寄閉門高卧日晏而起  
無愧於中無求於外無畏途風波之虞無徵呼發召之警無罵譏  
訕笑之辱有田以食有屋以居憂患已空吾心翛然了無一事杞  
人奚懼而憂偃師奚傷而怒拔劍逐蠅奚誅具獄磔鼠奚懟優哉  
游哉聊以卒歲然後知余之樂有在於此也尚恐習性易流操之  
不熟一為外物之所誑而立於爭地材不足以堪富貴道不足以  
安貧賤幸福而禍悔不可追故名其齋以自警云觀尤長於四六  
與汪藻洪邁周必大齊名晚歲待人益和厚有求詩文者皆忻然  
應之卒年八十九有鴻慶集傳世

道光志光緒志  
鴻慶居士集

孫杞字德發平生無所嗜惟讀書至老不去目自六藝百家史氏  
之籍翰林子墨之文章傳注箋疏之學浮圖老子之言靡不記覽  
旁穿獨騫馳騁上下務為深博無涯涘屬文操紙立就雄深辯麗  
頃刻千言至於感微託遠論美刺非則寓於詩大觀三年試上舍  
賜出身授濟州鄆城縣主簿遷商州豐陽縣令用舉者改宣教郎  
知宣州婺源縣婺源俗喜告訐持吏短長為姦利杞至則指取其  
尤一二人寘諸法縣人屬焚剽之後率用葦竹茨為屋久燥則焚  
杞命陶瓦易之後遂無火患狂賊倪從慶嘯聚境上吏民洵懼日  
三四驚杞藉丁壯為兵且臨試之以示有備從慶率其徒引去杞  
器資沈毅寡言笑居官任職据法持議不阿取事必得其所守乃  
止建炎元年冬大駕巡維揚三年春杞上書言得失會近臣有以  
杞名聞者詔杞馳驛入對未至而乘輿幸建康新將相用事所施



置不與杞言合於是辭疾不果行久之請祠官絕口不論世事參知政事張守吏部尚書孫近交薦杞可備文章翰墨之選而杞病矣紹興七年八月卒年六十五

孫觀鴻慶居士集

錢相字君玉幼穎異以詞賦知名登嘉定間進士端平間以真德秀薦累遷監察御史有直聲自起居郎入經筵歷兵禮吏三部尚書

錢世雄字冰華年幼作詩已為名流所稱比壯從蘇軾遊門下皆一時豪英而軾獨稱世雄以為探道著書雲升川增倅平江為郡守所倚姦猾屏息撫循善良如傷退休家居以詩書自娛遇事感發一見於詩其文集楊時為字序

盧習字擇善父察通經學古以詩書教授里中嗣與孫觀為同年進士卒官左宣教郎習幼警悟讀父書靡不記覽屬文辭瞻麗詳

實有家法以紹興二年賜進士出身授宣州寧國縣主簿調黃州錄事參軍更滁州全椒來安二縣令除隨州州學教授年七十致仕歸性介特少與不妄交交合則久要有終始家貧不殖貲產屋廬蔽風雨藜羹糲飯一飽之外澹然自足隆興二年十月二日無疾而卒

孫時字季中其先自南唐侍御史潛貶武進縣令遂家焉於時為六世祖時以文學行義為一州之望里父兄遣子弟受業者率嘗數十百人其學自詩書易禮春秋三傳諸子百家之書無不讀而尤深於詩貫穿通洽反復上下解名釋象論美刺非章通句達自名一家以故學者皆受詩文章氣質渾厚議論深博推原道德之旨通達世務之要不為空言三代遠矣唯西漢文詞最為近古手鈔數編紬繹論著蓋數萬言平生無嗜好耳目所接犁然有當於

心則賦詩以自見詞嚴義密句法刻深類李商隱字畫適麗有楷  
法得歐虞用筆意雖片紙尺牘屬稿記遺未嘗草書一字徽宗踐  
祚高麗遣使入賀道過常州將例用迎餞燕勞之書十餘通以屬  
時時操紙筆立就中有警句云國有喪禮闕九宰之一時當過  
密樂無肆夏之三其門人孫覲常誦焉政和二年試上舍賜出  
身授應天府穀熟縣主簿就移寧陵再徙廣濟軍定陶縣主簿權  
教授軍學尋告老歸宣和元年八月卒孫覲鴻慶居士集  
明  
芮善字性存父旺好讀書元季世亂隱居不仕善通易春秋工書  
法性淳厚端方洪武三十年進士官中書舍人以司經局洗馬侍  
襄王講讀王出封領右長史王雅重善號曰坦然先生而不名未  
幾乞歸製金蘭圖賜之

陳濟字伯載與弟浚洽同遊謝應芳門過目成誦嘗如錢塘家人  
齋貨以從比還以貲之半市書口誦手鈔十餘年盡通經史百家  
之言以布衣薦召充永樂大典都總裁而修撰曾榮等副之秘庫  
書浩無端倪濟與姚廣孝等發凡起例區分鉤考皇太子甚禮重  
之凡稽古纂集事悉以屬濟五皇孫皆從受經居職十五年卒年  
六十二濟少有酒過母戒之終身未嘗至醉所居蓬戶僅蔽風雨  
終日手不釋卷為文根據經史不事葩藻嘗云文如布帛粟菽貴  
有益於世不爾雖工奚益弟浚永樂中舉儒士懇辭曰兄濟弟洽  
皆任矣家居養母浚責也賜宴遣歸號真趣居士洽自有傳孫端  
甫字子引宏治十四年舉人歷官廣東參議詩書畫稱三絕  
徐轄字文軾景泰五年一甲三名進士授編修學問賅博著作援  
筆立成文不加點預修實錄賜五倫等書不善治生居清要屢空



晏如無姬妾之奉翰墨自娛而已善飲終日無醉容

陸簡字廉伯祖淵語在義行父愷語在官績簡成化元年解元二年一甲三名進士授編修預修宋元綱目弘治元年召修憲廟實錄累升詹事兼侍讀學士侍經筵兩典會試號得人卒年五十四贈禮部侍郎崇祀鄉賢簡姿貌秀偉少有俊才為詩文峻潔有法不輕應接有龍臯集行世喜談節義嘗念宋刺史姚訐等九人死難言於有司立忠義祠祀之自曾祖以下俱襲金姓簡始復姓陸其子孫羣從多工詩奎章異章尤著道光緒志明朱昱字懋陽福建按察使煥曾孫有孝行少好學博綜羣書覃精著述尤長於詩學士王達善和本中峰梅花詩百首一名而成昱追和之晨起濡墨疾書俄成百首為藝林所賞葉林字喬伯艱苦力學不假師授正德八年舉人官山東鄒平知

縣政多奇蹟坐事免里居教授一時名士如唐順之董后峰白省吾輩皆得其傳弟松桓材等並著名業知府張志選欽其品學延為鄉飲大賓材字達卿號木菴嘉靖十三年進士授浙江處州府推官用法平允升戶部浙江司主事別除積弊卒於官

陶澤字子沾嘉靖十三年舉人豪爽負氣能文章與薛應旂齊名為諸生有司召弗往貢入國學司成亟問之亦不私謁既舉應天再試禮部不第歸杜門詠歌絕迹干謁以貧終

唐順之字應德嘉靖己丑中禮部試第一選庶吉士座主張璉疾翰林出諸吉士為他曹欲獨留順之固辭乃調兵部主事久之復改編修校對累朝實錄時王龍溪以陽明高第寓京師盡叩陽明之學始得聖賢中庸之道校對完例當升賞卻不欲受又以張璉愛已將遠其嫌遂告歸張緣是怒以吏部原職致仕居家三十年

不役官府一人不受坊價一緡會皇太子立妙選宮僚起為春坊  
司諫竟以請朝東宮落職歸自是御布袍居宜興山中與諸生講  
學其與人言罄竭底蘊若無所不盡事關機要則深沈隱默際不  
可窺于瑣屑之事若不甚通曉至於籌畫世故則辨悉毫芒貌不  
踰中人而視天下勢之所至若萬鈞之壓卵處之晏然舉天下之  
所不敢為不能為者獨毅然當之嘗自謂當今少一寧武子之愚  
蓋自況也甲寅倭奴起釁流血東南趙文華以上命視師海上順  
之與陳機略趙歸薦於朝以南部車駕主事起之尋升北部職方  
員外郎進郎中陞見後即奉命查勘邊務繼而視師浙直與胡宗  
憲協謀討賊順之計賊來當截之海外縱使登陸則內地悉創乃  
泛海自蛟門大洋一晝夜行六七百里從者咸驚嘔順之意氣自  
如倭泊崇明三沙督舟師邀之海外折馘一百二十沈其舟十三

擢太僕少卿宗憲言順之權輕乃加右通政鳳陽巡撫李遂告急  
宗憲檄總兵盧鍾往救順之念江北為陵寢重地命鍾堅守三沙  
而身往江北與李遂首尾擊賊敗之姚家蕩又敗之廟灣三沙又  
屢告急順之復援三沙督兵進擊失利順之親躍馬布陣賊構高  
樓望官軍整堅壁不出會盛暑居海舟兩月遂得疾返太倉李遂  
改官南京即擢順之右僉都御史代遂巡撫順之疾甚以兵事棘  
不敢辭淮陽適大饑條上海防善後九事春汎期至力疾泛海至  
京口登焦山望江而歎曰天使我不能展其用乎行至通州卒訃  
聞予祭葬順之於學無所不窺自天文樂律地理兵法弧矢勾股  
壬奇禽乙無不究極原委盡取古今載籍剖裂補綴區分部居為  
左右文武儒穉六編傳世學者不能測其奧也為古文洗洋紆折  
有大家風生平苦節自勵輟扉為床不飾裊褥閉戶兀坐多所自



得學者稱為荆川先生崇禎中追謚襄文子鶴徵自有傳道先志

省人

朱魯字得之才氣超邁詩文援筆立就議論原本經史嘗輯宋文信國軼事為忠孝外傳系之以詩凡四十二章成化間以才學薦預修國史卒年八十餘學者稱東湖先生

惲紹芳字光世嘉靖二十六年進士授刑部主事累陞福建參議性坦易豁達喜讀書過目輒成誦尤敬禮士大夫聞人有善雖後輩必折節下之刻意為古文自成一家言

吳可行字子言幼不慧及年十七頓奇敏下筆數千言嘉靖三十二年進士授翰林院檢討以文學著稱尤工駢儷為宰相徐階所器異眾忌而讒之謫臬幕尋乞免歸可行才高氣雄落筆燦若雲錦晚歲屏跡獨居而文益工疾且革客至談笑如平生不作呻吟

狀

王忱字信卿少孤家貧授徒自給既壯貌虬髯議論亹亹初應郡試有司譏其于思即趨出竟棄舉于業家居考正五經六書四聲字韻史傳記年朝代名字上下數千載歷歷如指掌屢舉鄉飲賓王穀祥字祿之生有器量童烏之齡即能屬文選充縣學弟子員王文恪公一見奇之曰吾宗千里駒殆此子矣既舉進士授工部屯田司主事少宰徐文敏薦調考功尋署文選員外明慎銓藻咸當其人以忤太宰婺源汪鑑貶真定尉棄不拜杜門卻掃委懷圖史有田在東郭外課農自給與田父野老談笑移日不知為吏部郎也隆慶初簡用舊臣超拜南京文選主事稱疾不就郡守永年蔡公甫下車首書清德表其里枉駕造其廬坐床第間相勞苦口不能語稽首作謝狀越明年戊辰卒為詩冲澹而不尚綺靡文亦

典雅有則書仿晉人不墜右軍大令之風寄興丹青追工摩詰之  
技篆籀八體並臻妙品晚抱書癖手自抄錄無間寒暑讐校所纂  
郡學志并著詩文若干卷行於世明朝分省人物攷  
白悅字貞夫嘉靖壬辰進士除戶部主事奉使入關中與鄠杜王  
槐整武功康德涵上下議論留數日不能別已而之平涼望北地  
既歸遷主客司員外郎已又遷郎中復使江西乃遂登龍虎山奇  
之聞其東即武夷不遠乃即又放舟登武夷諸峰兩使還出紀游  
詩數十篇詞調既逸而又善晉人書一時見者莫不稱絕悅為人  
恢廓而好義與人游有當於心即解劍指佩以贈不為惜即內所  
弗合亦陽浮慕之不終拒也以此聲名益顯然亦以此招忌賈禍  
居頃之天子冊立東宮置官屬補左春坊左司直其年大駕幸歸  
而按劾從官未至者乃謫永平府通判累轉南京驗封司郎中無

何復謫河間府通判復轉戶部主事又一歲改尚寶司司丞悅自  
登第至為尚寶侵尋二十年官不過六品而尚寶又閒曹不得有  
所建立恒鬱鬱不樂明年庚戌遂病辛亥病篤乃以司丞致仕明朝  
分省人物攷

吳嶽字宗高初為丹陽縣學生嘉靖二十五年舉人嘗師事唐順  
之薛應旂學有矩矱任長垣教諭陞福建汀州府通判不赴歸嶽  
倜儻不羈負意氣重然諾座上士常滿子五人之鵬之龍皆進士  
之美以貢生知直隸平谷縣

朱憲字子成好讀書幼作詠天詩朱昱見而奇之為諸生遊心理  
道峭直崖異以誑誤見斥家赤貧邵寶移書郡守居以官屋尋罹  
詩禍順之言於當道事得解以窮愁終

吳瑞登字雲卿歲貢生博學勤著述授河南光州訓導薦入史館



補學錄遷湖南長州通判勸農課士多惠政

顧明嘉靖七年舉人與邑諸生鄭澂以詩交相重也明詩飄逸瀟灑澂詩深沈鍛鍊各極所長皆散失不傳明逸其字教字子南

龔道立字應身萬歷十四年進士授兵部主事有儒帥求內徙廢帥謀起用各挾重賂以請道立拒斥之出知福建建寧府日與士

子講學入覲鬻產資行半道忽心悸馳歸母方彌留握手永訣服

闕補河南按察副使歷江西布政司參議與鄒元標根究性命剖

析疑義吏治悉本經術晉湖廣按察使歸十五年杜門著書弟道

高以貢授仁和訓導不就與兄聚講不倦

莊煦字啟暘廩生高潔嗜古從遊者多通顯學士吳中行以直言

廷杖致書煦謂不貽帥門道義羞也家貧不治生擁圖書吟嘯其

間人方之元晏云

江惟清字仲濂萬歷間舉明經或勸之仕不應鄉先達孫慎行錢

一本講學書院必推惟清首座家藏書至萬卷嗜名畫法書終日

臨摹不輟其文筆人咸寶之年八十五卒于文瀾萬歷四十三年

舉人

金有誼字正儒幼孤本農家子袖書田間讀之因嘆曰予初聞人

言讀書獲一第畢矣今乃知不然日肆力天人性命之學晚多著

述

唐獻可字君俞晚號櫟園太常鶴徵孫少善屬文意氣豪邁精賞

鑑喜交游座客常滿才名播海內淮撫李獻可通家也招之不往

晚築室桃谿山脩然塵外翰墨自娛其詩由眉山而躋輞川書法

未襄陽畫在董巨倪黃間竟以諸生終

鄒之麟字臣虎萬歷三十八年進士官工部主事博學負才名書

畫為時所重文章工小品年八十餘卒晚號逸麟又號味庵老人  
岳虞巖字舜牧崇禎四年進士知浙江杭州府屏干謁有冰心鐵  
面之謠遷江西按察副使歸杜門著書二十餘年能文章晚尤好  
易精究天人理數所衍易圖皆先儒所未發者子鰲圖康熙十四  
年舉人

蔡元宸字靖公崇禎十六年進士授戶部主事馬士英欲招致門  
下元宸曰宰相無私人何門生為因棄官歸性曠達好學能詩  
清

毛重俸字卓人十歲能文工書為張瑋所賞識贈以韓昌黎集順  
治初舉於鄉以文體怪異被劾事白後仍許會試不第歷任太湖  
教諭太倉學正遷知浙江石門縣以奏銷呈誤降補江西贛州府  
經歷憂歸不復出文章初學韓蘇而宗史漢後返求諸六經所著

益醕年六十九卒

唐振芳字滋九順治二年副榜肆力古學工屬文出入左國史漢  
及唐宋八家間精藻鑑凡請業者輒能決其所至無尺寸爽母病  
疽求醫鄰邑不效冒暑行禱茅山遇異人授之方遂瘡時稱孝感  
毛念恃字爾依明給事中憲曾孫順治三年副榜貢生授福建延  
平府教授教士有法丁母憂服闋應赴選延平人愛留之不忍去  
性寬和無城府嘗曰吾目中未嘗見一不好人卒於延平祀名宦  
毛羽宸字公院府學生為人恂恂純謹不苟言笑好讀書論史尤  
留心天緯律歷之學

楊廷鑑字冰如少從孫慎行張瑋講學賅洽淹通嘗偕瑋入都瑋  
卒無子為經紀其喪悉却賻贈曰不敢傷公之廉崇禎十六年一  
甲一名進士授修撰時流寇充斥奉親歸自明亡迄清初常里居



謝絕交游邑有公事仍力任之捐金修學校救災卹患之舉尤多為文原本經術書學虞永興顏平原子大鶴字芝田父病杜門大鶴時年九歲賦謝客詩十章人比之李賀員半千博覽典籍亦工書康熙十三年進士授編修歷諭德督學順天罷歸十餘年卒大鶴子祖楫字乘萬年十七隨父官京師重九集黑龍潭賦詩前輩嘉賞謂似韓昌黎上南巡召試賜御書程伯子詩一幅特改國子監生充武英殿纂修中順天鄉試康熙五十年會試下第有詔一體殿試授編修旋卒祖楫好學精說文玉篇祖楫子煜曾另有傳祖楫兄子述曾字二思少稟家尤精諸史乾隆元年舉博學鴻詞七年一甲二名進士授編修晉侍讀纂修御批通鑑輯覽歷八年繕稿將脫手而卒總裁官疏言其勞詔給四品銜官翰林時四典鄉試所上經史摺發明傳注因事敷陳人稱為有用之學

龔百樂字介眉學問該博下筆數千言年十八舉順治三年鄉試性落拓不事生產詩歌個儻豪邁與董以寧鄒祇謨陳玉璠稱昆陵四家坐置誤廢益肆力詩古文詞性情工力迥出流輩

龔眉望字節孫生有異才與宜興陳維崧齊名任奉天錦州通判日集生徒耳提口授從遊者常數百人遼左人文蔚起生平著述甚富

莊回生字玉驄順治四年進士授檢討試滿漢文義擢第三遷贊善工繪事上幸翰林院見所繪山水給筆札命更圖以進回生畫駿馬一系贊詞以聖主得賢臣猶伯樂識良馬為喻賜金盃及衣二襲尋晉庶子以奏銷案罷職後補原官卒弟朝生順治六年進士授檢討歷刑部郎中河南提學僉事請告歸僑居蘇州與尤侗宋實穎諸人為耆年會優游林壑二十餘年卒祀名宦

孫自式字衣月順治四年進士改庶吉士授國史院檢討嘗條陳  
巡方及科場事語極剴切又慨吏治日壞自請為本縣令詔賜牛  
黃丸令歸里養疾人呼為狂翰林杜門却掃不與外事

董文驥字玉虬幼穎敏讀書過目成誦順治六年進士授行人遷  
御史疏論外轉定於銓衡及漕糧收兌歸官俱報可以史事劾浙  
江提學僉事谷應泰世祖召對慰勞會日將暮命侍衛導歸舉朝  
傳為盛事康熙四年因變求言文驥疏請復舊章言甚切觸輔臣  
怒幾不測出巡河東鹽尋外轉陝西隴右道參議引疾歸文驥博  
學高才綜貫四部尤邃於禮經立論最精核工詩善書歸田後放  
意詩酒風流文采冠一時

毛會建字子霞能文章工擘窠書入浙江籍補諸生客遊湖廣致  
千金僑居武昌因家焉晚益饒于資好奇而喜遊所至往往作斗  
大字勒崖石題名其後嘗撫岫嶠禹碑立石大別山巔又營生壙  
于大別自為誌銘系以詩

龔廷曆字玉成順治六年進士好讀書手不釋卷凡天文地理諸  
子百家靡不分類編輯官浙江湖州推官上官欲中某以法廷曆  
不可爭之力上官意終不回廷曆憤甚以利刃斷其喉未絕治之  
得甦罷歸卒

張星瑞字玉符順治九年會試第一任婺州推官折獄平允歷遷  
刑部員外郎乞歸杜門讀書貫穿經史工詩古文辭子祖蘇康熙  
九年進士直隸獻縣知縣祖鎬二十三年舉人內閣中書癖嗜史  
漢才名兄弟相埒

黃永字雲孫性孝友少遭家難與弟初子易衣并食以養親順治  
十一年進士官刑部員外郎以奏銷案罷歸性嗜書老猶手不釋



卷所居小閣臨城河舟人曉發見紙窗熒熒每指曰此黃刑部讀書燈也

巢震林字五一順治九年會試中式磨勘被革十二年復成進士前後榜皆第一百六十二名時以為異官禮部郎中時部議去八股專用策論取士震林力言八股可廢經書不可廢遂定例以經書作論題

劉維烈字惠公幼讀書過目成誦順治十五年進士尋以奏銷除名由是絕意仕進益貫串史傳尤工詩家居二十載循例開復歷官工部屯田司郎中晨入酉出鈎核簿籍黠吏不得干以私喜延賓座客常滿後遭父喪以毀卒

吳珂鳴字蕊淵少善屬文順治十四年舉人時科場被劾有詔覆考珂鳴三試皆第一特令與會試中式者一體殿試成二甲進士

世稱為天子門生改庶吉士授編修晉侍讀以奏銷案降國子監助教尋復官珂鳴文章博瞻性好施以貧族百餘棺歸葬先壟鄉里稱之

龔策字晉之明湖廣按察使道立孫博學善持論尤工詩幼隨祖任歷燕趙楚閩遇佳山水輒題詠值明季喪亂慷慨悲歌睥睨一切晚官河南鄧州同知卒子士薦字彥吉天才雄放弱冠遊京師名動公卿亦能詩以諸生終

吳名思字無虛縣學生以父宗達蔭中書舍人遭兵燹棄田宅絕意仕進授經生徒彙宋元明諸儒說著四書慎餘講義博綜經史

百家晚年修宗祠飭義莊舉鄉飲賓不赴年八十二卒子守相性孝友文采煥發以諸生考取教習授知縣未任卒

鄒祇謨字訥士順治十五年進士孝事母讀書過目不忘上自經

籍子史天文宗教百家細及古今爵里姓氏世次年譜無不諳其於詩文乃益工以奏銷案不任卒

湯誥字公綸諸生文名噪南北康熙己酉鄉試擬掄元墨卷為吏所污臨榜易去遊豐沛間適顧大申分司夏鎮河道聘主鎮山書院從者常數百人誥以生徒過衆恐罹黨禍辭歸未幾大申果遭彈射羣服其先見初誥刻苦為詞章後師事同縣馬負圖太倉陸世儀於天文地理河渠兵屯諸經世業靡不窮究錢二白字天逸康熙十八年進士為福建福安知縣縣負山瀕海土瘠民貧二白甫下車即上清丈之策分界立規隨田制賦兩閱月賦役悉均父憂歸服闋補河南伊陽縣荒簡甚於福安日與賓僚搜奇探古尋歸構半溪書房疊石鑿池吟嘯其中工書及詩年七十四卒宗人大經字愷存大猷字典存大鏞字元存並饒風雅

### 稱清門焉

陳玉璠字賡明康熙六年進士除中書科中書負盛名賓客輻輳時文操筆立就旬日盈尺識者服其敏贍

沈文炳字惕若康熙十五年進士性至孝母喪哀毀骨立期年園中忽產雙白蓮降甘露人以為孝感才思敏捷好遊足跡半天下所交多知名士詩古文出唐宋六朝間尤工書法

楊宗發字起文父佩玉嗜書工詩客有乞聯語媚逆藩者佩玉援筆書興晉有心甘載塊霸吳無術學吹簫付之其人咋舌去宗發尤負奇家貧骨立意氣灑然自得問學於惲日初尤工詩軼才縱發性耿介婦病或贈以參餌強而後受己乃檢古硯密置其人案上而去顧炎武稱其行身甚狷文筆甚狂年四十二卒

邵長蘅一名衡之字子湘少稱奇童讀書目數行下九歲能文十



歲補縣學生以奏銷案黜益肆力經史及唐宋古大家文久之而融釋貫串大放厥辭與鄒祇謨董以寧互相剗切游京師聲名藉甚諸先輩多折節下交有以詩文就正者黜竄不稍徇朝貴有物色之者非先焉不往也友人強之入太學試吏部長洲宋德宜激賞其文曰今之震川也拔第一例授州同不就試順天報罷遂歸後客蘇撫宋榮幕最久談道論文情猶昆弟王士禎稱其文為荆川後一人長蘅內行愷篤居親喪力行古禮與人交煦然以和但意所不可即髯張面亦不為媿媿卒年六十八

陸苞允字竹孫更名度八歲能文竟陵鍾惺奇賞之有鄴侯小友	之目年十四補縣學生文名蔚起明亡後絕意進取徧遊閩越齊	楚搜訪遺逸與陸世儀惓日初馬負圖輩講明正學平居訓子曰	汝輩讀書明理足矣若慕時勢榮非吾志也
---------------------------	---------------------------	---------------------------	-------------------

董以寧字文友府學生少與鄒祇謨齊名豪邁不可一世為歌詞及排偶文後棄去專意于詩又棄去專肆力古文辭於天文歷象樂律方輿多所發明晚歲屏棄一切專事窮經尤深於易春秋恤交游重然諾弟子恒數百人子大倫工詩

朱二采字立人先世自長沙遷常州遂占縣籍少好學于性理學術窮究入微嘗言治道欲復于唐虞三代而於秦漢以來之法十百而取一焉生明末造慨民生多艱謂世道之壞起于人心人心之變由於學術鑿鑿指陳利病而亟謀康濟之道人多笑之而二采意氣自若生平不屑為無用之文為文理足氣充沛然莫禦入清朝四五十年卒

蔣理正字紫真少孤以孝聞依外家丹陽荆氏盡讀其藏書遂補丹陽縣學生後客崑山徐氏閱傳是樓書殆遍究心易學自漢魏

及宋元明諸行書靡不搜錄見法書名畫輒留題尤邃于醫遠近爭延致遇危症治之立愈嘗應某巡撫聘獲酬數百金會友喪貧不能殮即揮金經紀其喪晚年胸次益灑落年九十五卒孫良字秋泉以祖籍為丹陽縣學生性恬靜能文詩書畫

胡香吳字芋莊少治舉子業後棄去肆力詩古文得漢魏六朝三唐之蘊徧遊洞庭彭蠡匡廬諸勝其詩益工里居僅容膝擬築香草堂三楹二十年不得就憚格為作香草堂圖性簡略賣文錢半入酒壚雖極窮困陶然無戚容年七十餘尚步行往來城市一日市魚墮一錢於地俯而拾之顧魚人一笑遂逝

陳鍊字道柔縣學生幼穎敏讀書過目成誦從常熟錢陸燾遊貫穿經史工詩古文辭性孝友家貧營甘旨必力弟鑄早卒割田為食孤寡妻董氏厄於水痛不再娶晚自署半緣居士人因其所居

稱為西林先生門人唐惲宸字靖遠亦諸生性豪邁能詩善飲醉則歌呼泣下卒年五十五孫龍珠字湘霞亦以能詩名

錢養浩字學聖明御史一本曾孫父以財給諸子養浩讓不受曰吾年長義不忍與諸幼弟同分性奇穎負幹濟才外家楊氏阻兵於粵獨往訪之致書旁郡守言吳六奇可擊狀書為六奇所得欲甘心焉養浩詣其營為陳禍福遂投誠為名將養浩讀書目數行下手錄十三經及史傳曰古書文義宏深不手錄則精神不接為縣學生時以事被斥後以五經再試仍補縣學生子濟世名世在庠並有聲人比之宋三蘇

周清原字雅楫性至孝英敏好學嘗言盛世文章當高華沈博不屑碎文瑣義肄業太學詩名籍甚嘗詠白丁香云月明有水皆為影風靜無塵別遞香一時傳誦康熙十八年試博學鴻詞授檢討



數與湯斌論學有契視學浙江端士習正文體振拔單寒歷遷副都御史疏請清獄省刑又請直省設立育嬰堂俱報可遷工部侍郎上命修歷代紀事年表未竟卒復命其子嘉梓續成之諭賜祭葬

莊嶠生字玉川性恬澹博學工詩與惲格胡香吳諸人相唱和舉浣花會有以奇字僻書詢者輒指示書名及卷次葉數按索無一訛時稱為字通子紹平以文學世其家康熙二十三年舉人知湖北宜城縣力請奏免塌沙田賦民勒碑頌之

蔣金式字玉度康熙二十三年舉人考授內閣中書晚為懷寧教諭日與諸生講業縣試初僅數百人後乃踰倍早工詩古文辭歸益著述不倦趙申喬與同學臨沒以必得金式文誌墓為屬子鴻翮字紹孟康熙四十四年舉人博覽典籍下筆千言與人言議論

風發從子文元淮安府教授芳洲禮部員外郎敷瀆雲南嶧峨知縣皆金式親所教授並有文名

段麒字文襄縣學生少聰穎從孫慎行張瑋遊彙纂經史百家論說百卷名曰瑤笈凡天文五行輿圖典禮悉綜核精粹性不諧俗以坎坷終

莊清度字係安康熙三十六年進士授江西奉新知縣捐俸倡置義倉歷任湖南鳳皇廳通判山西朔州知州均有惠政擢禮部郎中雍正二年典試湖南稱得人年七十謝歸與羣從講求經史媿不不倦清度以康熙辛酉舉人及見乾隆辛酉族弟大升培因等同舉于鄉時傳為佳話嘗聯族中年過六十解組者為九老會清度齒最長賦詩有九人六百三十歲林下相逢盡一家之句年九十無疾終

揚起鷄字亮聞康熙三十六年拔貢讀書目數行下淹貫古今不治章句為文鎔鑄經史多發明尤究心理學以戒懼為根本格致為工夫二語為太倉陸世儀所激賞詩歌下筆立就書法蒼勁得者珍之孫淮字桐山攻苦嗜學文有奇氣

莊令輿字蓀服姿性穎異下筆數千言尤工詩舉康熙三十五年順天鄉試以借名蔣機黜四十一年復試兼作五經二十三藝有司以違例奏特賜舉人四十五年成進士官編修五十三年主浙江試所得皆名士罷歸父母俱存融融色養好汲引後進選刊六逸詩家資好學屢空晏如自榜其家塾曰負郭無遺產傳家有賜書

徐永宣字辛齋康熙三十九年進士授戶部主事澹於仕進家居數十年肆力於詩古文辭與尚書王士禎檢討朱彝尊相頡頏大

學士熊賜履以其詩文進呈召來京供職未赴卒

程彥字松皋康熙四十五年進士授陝西靈臺知縣有善政軍興轉餉不廢吟詠詩文有天趣不雕琢謝歸與陳鍊胡香昊相唱和仲子景傅字命三幼偕兄景伊同學學日益進以貢授宣城訓導教士首以教行年六十歸蠲宅為家祠而自儼屋居以引進後學自任熟鄉邑掌工詩嘗聯年逾八十者四人與為同甲會時稱人瑞

鄭朝統字建三弱冠以文名尤工詩與胡香昊張南溟相唱和南溟字九鵬清介不偶俗不事舉業而耕釣城隅委巷席門青燈課子人比之茅容徐樨

蔣汾功字東委性純孝喪母哀毀杜門著書有文譽雍正元年進士以知縣發湖北乞養歸後官松江府教授課士有法平生屏聲



色斥貨利經明行修頽然長德每云內重則外輕膏梁文繡自不  
敵吾真樂性好書卷自少壯至老道途藩溷疾病寢食不少輟尤  
邃于孟子為文原本經術根抵醇厚子和寧字用安乾隆十七年  
進士由庶吉士授編修擢御史二十七年典試貴州旋因事罷官  
好汲引人才其批點闡落卷輒教以讀某書學某家文瀕行被放  
者追送數百里曰此經師恩勝座師也作文洞悉原流發一難必  
中竅奧尤長於詩寓意深婉和寧子齊耀官福建海澄縣丞有書  
名重耀乾隆二十三年副貢浙江錢塘知縣以循吏稱  
呂師字夔典幼失明而穎異過人經史過耳成誦及長於律算醫  
卜音韻聞而心解嘗范鐵為格方廣三分許鑿厚紙為方圓曲銳  
陰陽歧出之形粘布其間摸索即知何韻好聚書度有定處一索  
即得能圍棋以仰覆代黑白管絃絲竹非所好然為之即工時推

為奇士子驥字千里敦行孝弟克守家範

趙熊詔字侯赤康熙三十八年舉順天鄉試名噪京師上以大臣  
子召直南書房四十八年一甲一名進士授修撰進侍讀兩督運  
西陲節糜費歸之公父憂歸以毀卒為文根抵經籍詩嶽崎不雕  
飾後益肆力天文勾股之學子侗數字景維才幹敏穎康熙四十  
四年上南巡景維以諸生獻頌召修子史精華等書除湖南臨武  
知縣民謠雜處每溺女鬻妻甚有以子訐父者侗數詳曲訓導悍  
俗以變累遷湖北襄陽知府浙江寧紹台道改鹽驛副使所至有  
政蹟以屬吏事罷

卜俊民字方嘉負異稟童試即兼五經康熙五十一年會試第一  
總裁為同邑趙申喬下第者有浮言覆試時上臨視俊民展卷疾  
書不移刻書義經義並就上色齋殿試以二甲一名入翰林名噪

一時尋卒著述甚富

湯自奇字鳴友姿穎敏研精詩古文辭弱冠遊京師聲名籍甚有親王延致與諸名士分題授簡作西山賦三宗考自奇揮灑萬言如宿構親王驚異謂鄒枚復生欲薦之以省親歸徜徉泉石莊令輿徐永宣皆呼為詩老刻唱和編以自奇冠首又工詞及畫瞿朝晉字惟一歲貢生為經世學輯保甲全書其自叙畧曰保甲之法深得先王疆理遺意十家教令責甲長十甲長教令責保長各保長教令責鄉約正副有不率教令者官得治之其長教令有功官加旌有過則加懲罰由是各長所屬歲時覈實勸耕織督樹畜舉鄉約設社倉開義學解爭訟詰匪類嚴守望事舉功有所屬不舉責有所歸非特弭盜善策乃化民成俗之本書凡數萬言實可見諸施行

鄒光濤字琢其五歲屬對如響九歲誦五經長而覃精研求學益進雍正元年進士尚書唐執玉以孝友端方薦選庶吉士授編修改福建道御史以言事落職益肆力經籍鬻產購書

莊絳字丹吉幼穎異讀書五行俱下游京師文譽甚著大學士王熙重之欲以宮僚薦格于例遂寢又欲以他途進之絳以老謝遂歸絳參訂經史凡天文疆索九流百家靡不綜貫尤明習掌故文不起草子五成進士者三舉人一副榜一皆知名長子楷字書田少警敏有詩名康熙四十四年南巡召試取充武英殿纂修中式順天鄉試考授中書五十二年成進士改庶吉士授編修典試四川稱得人擢國子監司業罷歸數年卒楷弟樞字書雲康熙五十九年舉人官湖北黃梅知縣白湖渡橋當孔道捐俸葺之人稱莊公橋年六十謝歸以詩文自娛晚與同宗九人仿白居易故事號



漆園九老賦詩為會和者甚衆措子秉中與叔樞同舉鄉試官陝西扶風知縣有惠政

金玉式字王度幼負異才工詩以歲貢授無為州訓導上官檄築濱江壩費省工堅州人德之

蔣驥字凍膝縣學生少穎悟好學下筆千言與兄文元芳洲鵬翮汾功俱擅文譽邑人為之語曰里中五蔣後來居上四人先後成名驥獨困乃發憤注楚辭蒼萃百家徵引精覈游京師于大學士

徐元夢坐賦詩援筆立成怡親王徵為上客謝不往歸以經學教後進多登上第年六十八卒

秦宮壁字龍光雍正二年舉人性穎異篤志實學邃于經史於天文地理諸書靡不究心工詩古文辭

張一是字天隨兄一雋以歲貢任滁州訓導善課士嘗奉檄振饑

力杜侵漁災民德之平生肆力經史尤嗜易彙治易家言數十百

種細繹精奧晚得蔣理正讀易隨鈔因延於家喟然曰經義當以

彖傳為斷著周易析疑歷五十餘年始脫稿選一雋解官歸相與

晨夕講學暇則品題書畫或以家事白唯唯而已年七十四卒

趙彪詔字豹三雍正五年詔守令各舉一人彪詔與焉七年又詔

舉有猷有為有守之士學政復舉彪詔補授四川遂寧縣丞八署

縣事所至多惠政年六十謝歸彪詔喜撰述在官未嘗輟學歸益

擁書自娛尤留意桑梓故實凡儒先事狀鄉邦氏族以及文移謠

諺一切搜錄成巨編數百冊冊厚二寸許摺疊粘補纖悉無遺乾

隆時分纂武進陽湖二縣志皆取徵焉

陳儀字象采工書能詩家貧客授養親歷齊楚燕豫渡潯陽溺水

瀕死後歸病且劇囑友人高景山曰平生詩稿葬魚腹題畫一冊

獨完幸刑訂以存老漁面目因檢授之曰彼題景我題情似不可沒也是夕遂卒

胡塗字聖智祖宗虞貴州廣順知府以抗直忤上官罷值吳三桂逆亂道梗僑寓黔中塗生六年始歸好讀書不問生產事雍正七年舉人歷叙古今陵墓為闡幽錄搜采淵博又輯歷代謠諺為一書曰空庭天籟

湯大紳字孫書乾隆七年一甲三名進士授編修十五年上命大臣舉堪任考官者大學士孫嘉塗以大紳品端學粹薦兩充同考官得朱珪徐廷玉名以益重為人傲岸磊落酒酣議論勃發時教其子修業曰君子知命達士循理知之故循之不循理不能造命旋休致歸修業字賓鷺好學不倦精求性理之學嘗曰存誠主敬聖賢之要領也家居遵行古禮親喪蔬食三年未嘗見齒性方嚴

終日整襟危坐容無戲渝熟桑梓故實

唐元鼇字鱗長善醫工書探究經史善著述子吉初字彥謙諸生績學能文嘗言文章一綫單微得之者似黃河天上來原原本本出之不盡有論文漫興十首為世所稱同族元度字裴又襄鉅字匡九襄鉅子神駿均工詩

楊煜曾字吾三編修祖楫子乾隆元年薦舉博學宏詞丁憂未試六年舉於鄉考授內閣中書傲岸負奇學問淹通名公卿咸為傾倒時與煜曾同舉者有副貢秦懋紳及陽湖監生吳溶

楊肩吾字大受縣學生幼負奇穎乾隆初學政夢麟試諸生經解肩吾背誦如流夢麟曰吾至江南罕見博聞強記者今得人矣教授里門從學者甚眾

李英字御左父維坤字文在博學孝友英乾隆十年進士授檢討



補宗學教習尋乞休主講海州六安書院闡發名理士心依歸弟  
夢字秋塍歲貢生亦以能詩善書聞英三子兄弟齊名慶來字鹿  
籽貢生博學工詩文亦善書復來字心咳性孝友述來字紹籽工  
書及畫梅詩筆清雅卒年九十一  
許璿耀字在衡年十三補縣學生從常熟錢陸燦遊陸燦極賞譽  
其詩八試不售遂絕意進取專事著述年六十四卒  
蔣梧字萃招遊京師有詩名康熙五十七年編修徐葆光奉使冊  
封琉球延興偕琉球俗好詩文書翰梧援筆肆應彙賦詠成帙名  
海外吟怡賢親王延訓諸子梧範以規矩王甚重之性好施成黨  
多待以舉火其建社倉也人尤利賴之孫麟昌字靜存乾隆四年  
進士改庶吉士授編修文章典贍尤工詩侍直圓明園和御製銷  
夏十詠授簡立就上賜與有加纂修三禮積勞成疾卒年二十二

錢枝起字方高性明敏治經史務求實用於三禮詩義尤精遂由  
歲貢薦入工部學習綜練掌故精勤善斷遇事侃侃爭可否見忘  
同列乞養歸却掃著書不復出

龔錫純字侯服乾隆六年鄉試第一潛心根柢之學三禮尤精文  
辭原本經術行以磅礴鬱積之氣性耿介不妄干謁落落寡偶客  
京師與方苞論古有契稱忘年交家貧賴修脯以給篤于行誼舉  
族殯十餘喪所居不蔽風雨怡然自足年六十餘卒

莊勇成字勉餘孝友寬和好學不厭詩古文辭極精贍同輩推服  
之十試不售乾隆三十七年上南巡召試二等竟以諸生終從子  
關和字有鈞聰穎篤學治毛詩尚書及天官書中西算法博究河  
渠輿地風角占驗之術關和子穎曾嘉慶六年拔貢生善屬文  
劉星煒字映榆工部郎中維烈曾孫乾隆十三年進士改庶吉士

散館授編修視學廣東安徽歷官工部左侍郎星煒以工詞章擅名屢典鄉會試最稱得士尤喜提倡風雅獎掖後進官京師時每春秋佳日同官宴遊而過訪星煒則父子方伏几讀書都下傳其簡素卒于官子謹之官禮科掌印給事中軍機處行走卒無子妻湯氏視殮畢沐浴自縊詔賜百金治喪予旌表贈謹之鴻臚寺卿理之有文名候選州同知

胡憫字慄侯乾隆十八年舉人性狷介謹然諾著作甚富尤長于論史屢上春官不第歿于京遺書佚

劉鳴鶴字皋聞祖大夏語在孝義鳴鶴少孤才氣挺發于經傳無不窺乾隆元年以廩生舉博學鴻詞十六年復舉經明行修子欽字敬輿乾隆十七年進士任廣西陽朔知縣性恬退中歲即歸以著述自娛從子芳字可型乾隆十八年舉人性孝友事親竭誠敬

兄弟終不異爨所訓迪多成材任沛縣訓導為之月設文會後遂有列科目者遷福建甌寧知縣勵清操慎讞斷旋罷歸家居力任義舉鄉黨欽之

趙翼字耘松號甌北父惟寬語在孝義翼幼奇慧十二歲為文一日成七篇人皆奇之乾隆十五年順天舉人才名動輦下尋以明通榜授內閣中書入直軍機處應奉文非翼莫辨二十六年一甲三名進士授編修任撰文明年分校順天鄉試又明年分校會試所得皆知名士出為廣西鎮安知府多惠政時用兵緬甸詔翼往滇贊畫大學士傅恒倚重焉特調廣東廣州府決獄平恕擢貴州貴西道因事降秩乞養歸五十一年臺灣林爽文作亂總督李侍堯赴閩治軍事道過武進邀翼偕往侍堯以綜覈為政翼常濟以寬大後卒用翼策破賊事平侍堯欲奏起之固辭歸翼高才博物



通達朝章國典尤邃於史學生平敬歷清要宦遊邊疆戎行帷幄之謀天下山水之勝公卿交遊之盛有他人所不能兼者一發之于楮墨間解組四十餘年手不釋卷主講揚州安定書院五年遊閩二年其餘則皆家居著述外無他好所撰廿二史劄記鈎稽同異屬詞比事於前代弊政尤三致意焉其詩奇恣雄麗與袁枚蔣士銓齊名嘉慶十五年重赴鹿鳴筵宴賜三品服十九年卒年八十八子廷英廷偉廷俊廷彥俱以文學世其家庭廷俊子慶齡道光五年副貢負才力學早卒慶齡弟申嘉嘉慶二十一年舉人才氣尤橫絕早知名卒以不過

李瑞岡字義一少負文譽刻意勵行以二治銘其齋謂治己治人義不偏廢也乾隆二十六年進士改庶吉士散館授刑部主事出為福建龍巖直隸州母憂歸不復出主講崑山淮陰書院勗諸生

文行並進性和易近人然莫敢干以非義與趙翼管幹貞輩相唱和風韻清遠為後學矜式孫青翰字卣尊廩貢生負才名弱冠卒秉燾語具孝義從子汝礪字貢三有雋才乾隆四十二年拔貢早卒

莊培因字本瀉乾隆間由舉人考授中書入直軍機處十年一甲一名進士授修撰充日講起居注官晉中允歷侍講學士督學福建每以其鄉諸大儒言行勗士閱卷精勤文雖達格而佳句必賞疵類悉批示按臨一郡畢諸生即後列名亦感激請謁追送踰百里不絕丁父憂哀毀不食抵家一日卒閩士建祠奉之平生尚氣誼重然諾詩文敏贍措法精妙在中書扈蹕出塞于行帳中錄章奏值急宣不得據案即手一摺匣疾書而工整如常時人尤以為難

唐為坤字虎臣少孤曾授徒養母嘗除夕貸錢置懷墜於地或拾之為坤笑曰若貧於我促持去家故有僮數十人遣各治生歲時猶修禮階下為坤焚券遣去氣節嚴重以貢入都乾隆三十六年舉順天鄉試有授禮部關節者為坤謝曰始進不正何以為臣文章清勁晚更和粹卒年七十九弟為垣字麟臣縣學生學於為坤而與友愛或為嬰兒嬉以娛母鄉里化之無悍子弟

莊廷璽字桓觀雍正十三年副貢考取宗學教習性嗜學尤研三禮選含山教諭卒其族為昇東鄉著姓人稱坂上莊氏多讀書循謹者咏麓字仲吹府學生少孤孝母博學勵行熟桑梓故事浚家字苑珊恩貢生詞章敏捷與咏麓皆有文譽為名師

毛穎士字今吾天姿穎異與同縣沈濬趙翼稱三才子為諸生屢試不售從蔣汾功學古文辭一時銘誄多出其手內行純篤好讀

書因才而教門下幾至百人嘗曰內重則外輕膏粱文繡非所羨吾自有真樂耳

伍宇澄字既庭縣學生與兄青望並工詩善鑿書畫愛臨池漏夜吟誦不休或規之答曰吾以養心也卒年四十一

鄒欲仁性聰穎過目成誦博覽經史子集尤善經學兼長論議莊存與兄弟自幼受業及貴顯欲仁猶布衣學政訪名士於方耕以欲仁對館於松江試補松江府學生所撰述方耕為刊行之

蔣景翔字鳳夔號漱芳歲貢生瘁力古文辭鏡削道淨詩宗唐人一字不苟作詞律亦細

胡文英字繩崖占籍廣東乾隆三十年副貢任直隸高陽知縣卓精經義尤粹於詩所著述甚富

高荃字芳余穎敏篤學為文原本經術憚蘭枝李兆洛其門人也



乾隆五十三年舉人以明通榜選安徽含山訓導含山僻陋無文  
荃因材施教由是始有解額于承钰字式之從李兆洛受業亦能  
文

管世銘字緘若三中順天副榜乾隆四十三年進士由戶部主事  
直軍機處累遷郎中擢御史性方嚴會試出大學士于敏中門敏  
中好士所援引輒驟貴世銘未嘗一求獨見及和坤用事世銘憂  
憤形詞色和坤微聞之而大學士阿桂方倚重莫能中傷既擢御  
史將構疏奏劾有詔仍留軍機世銘自言愧負此官阿桂期以大  
用慰之曰報稱有日何必急以言自見耶嘉慶四年和坤誅而世  
銘已前一年卒時多惜之世銘工制舉文與同縣周景益齊名而  
從遊較衆時文尤膾炙人口其詩朗健深厚古文深於經術孫繩  
萊風翰個儻文詞瑰磊有奇氣官安徽含山縣多惠政善斷疑獄

民至今思之景益字星頡乾隆三十六年進士官貴州平遠知州  
苗胤守禦有功

董潮字曉滄少孤育於外家陳氏占籍海鹽能詩善書畫尤工駢  
體乾隆間大臣請以禮闈備卷四十人備中書學正之選潮與馬  
尋入內閣行走充通鑑輯覽纂修官取材淵富裁制謹嚴得良史  
之體旋成進士改庶吉士請假歸應聘修武陽兩邑志垂成而卒  
年三十五

徐書受字尚之性純摯敦內行少耽著述而尤長於詩以副貢生  
充四庫館謄錄官河南尉氏知縣和惠得民縣有富民殿從子者  
書受判牘曰叔為富不仁姪因貧無賴尋以三百金乞致從子死  
書受偽許之以金畀從子曰汝叔所助後宜改行其人泣謝去旋  
以防河積勞病卒

呂嶽自字雲莊廩貢生詩文並負盛名篇成輒隨手散佚嘗遊魯浙衆服其博雅性喜啟迪門下多名士弟岳尊字遜峯榮慶字月川俱有文名婿楊元錫字雲珊博學才敏工於詩

奚賓字曰朝誠魯力學屢試不第覃思著書弟寅字曰宗負異稟材武絕人能徒手搏健士數十乾隆三十一年進士官湖南衡山知縣有善政不畏繁劇緣事罷特旨復官調湖北和川縣卒于任賓門下士劉符丹字中黃縣學生有文行以勤學邁疾卒

龔顯祖字孝由歲貢生以母多病遂通醫博涉天官地理家言尤工書法天資高邁少壯意豪甚好遊飲酒無量晚屏跡村居習靜自得趙懷玉嘗從受學焉

鄭環字清如父之罕府學生聘段氏女跛辭婚之罕不可娶之尋沒更娶于卜生環環乾隆五十一年舉人幼有至性受乳必跪嘗

刳股療母居兩親喪毀瘠盡禮教人以孝弟為本讀書必徵之設施講貫之精一時無兩遠近從遊日衆以束脩分贍戚鄰值旱饑力營振事諸善舉靡不盡心經畫出大學士朱珪門每見輒條舉利病或正容進規嘉慶元年與千叟宴恩賚如例尋選授甘泉縣訓導釐祀典勵實學學者信嚮年七十七卒官甘泉人重其德留像祀之環于經義多撰述亦泛濫羣書子旦興乾隆四十五年舉人旦勲國學生咸稟家學敦志行

趙懷玉字億孫戶部尚書申喬元孫懷玉年十二能詩乾隆三十年上南巡懷玉奏賦行在四十五年復南巡召試賜舉人授內閣中書出為山東青州府海防同知迭署登州兗州二府父憂歸不復出懷玉以世家子少負重名交滿天下求詩文者自遠至主通州石港講席六年諸生愛戴晚年病廢家居文士走集其庭日與



商榷論議性坦易無城府工古文詞持論侃侃嘗自言不敢好名為欺人之事不敢好奇為欺世之學詩與孫星衍洪亮吉黃景仁齊名海內稱為味辛先生著述甚富

揚倫字敦五乾隆四十六年進士四十九年上南巡召試二等授江西貴溪知縣尋丁父憂服闋署廣西蒼梧縣勤聽斷釋株累起廢修壞所至有聲倫少負雋才博極羣書論學以不欺為本晚主講江漢書院七年學者尊信尤工詩與孫星衍洪亮吉輩相唱酬所著杜詩鏡銓王昶亟稱譽之

白尚質字亦文金壇籍乾隆五十一年舉人歷官靖江泗州學正尚質制藝有重名期于發明四子義蘊風旨淵粹穆然簡遠錢伯坻字魯斯少孤貧孝事繼母好學工詩文尤善書雄健豪放似唐李邕以品行高遠重于時所居近僕射山晚遂號僕射山樵

黃景仁字仲則四歲而孤家貧甚天才豪特所業倍常童少與洪亮吉效漢魏樂府體逾月而大工常熟邵齊燾主講龍城書院景仁從之遊學益進嘗客遊江西湖南徧覽九華匡廬彭蠡洞庭之勝每獨往名山經日不出值大風雨暝坐崖樹下見者以為異人大興朱筠督學安徽延景仁于幕凡三年盡觀江上諸山水詩益奇肆朱筠嘗於三月上巳為會於采石磯之太白樓置酒賦詩景仁年最少頃刻數百言座客咸輟筆嗣遊京師才名籍甚乾隆五十一年上東巡召試二等例得縣主簿入貲為丞陝西巡撫畢源奇其才召入幕尋又入都未久復遊陝西行次解州卒年三十五景仁伉爽高邁其詩瑰奇曠逸與李白最近論者推為乾隆間詩人第一駢體文絕似六朝工詞及書又擅繪山水子乙生字小仲年十三而孤治鄭氏禮與突皆闢道光元年舉孝廉方正未及應

召卒

吳士模字晉望縣學生明侍讀學士中行六世孫祖端立父秉鑑仍世隱德士模篤志力學弱冠即授徒養親接人以和不自表異遇不可輒義形于色平居靜默寡言及論前代理亂當世利病則洞達本末言之鑿然詔舉孝廉方正邑中以士模應力辭於時治經者率宗漢儒士模獨喜發明濂洛諸家之說為文原本經術自成一家與唐順之歸有光相上下屢試不售為邑中老師從游甚眾其尤知名者陳景藩語見後張若曾字雨棠以廩貢生終士模長子涵一字純夫季子敬承字筠墅皆能文不過仲子儀澄字秋漁道光六年進士選庶吉士後官順天宛平縣儀澄子保臨道光十三年進士官吏部員外郎當官皆有聲

莊宇達字印山好學砥行與張惠言相切磋嘉慶元年詔舉孝廉方正有司以宇達名上輿論翕然

劉嗣綰字簡之號芙初協辦大學士於義玄孫祖寅賓字暘谷乾隆九年舉人華亭教諭父汝器字重彝乾隆四十五年舉人皆以文行重于時從父汝暮字廣虞四十五年進士授編修品行高潔嗣綰嘉慶十四年會試第一元卷進呈上曰朕久知其名可謂得士矣廷試改庶吉士散館授編修嗣綰少穎異識量過人早遊京師知名當世同學者多為公卿嗣綰年將五十始獲通籍官翰林十餘年歸主東林書院年六十喪母以毀卒為人和平安雅見義無不為雖屢空晏如也其詩及駢體文少作多明艷中年則以沈博排募勝晚更清適駁邁云

莊曾詒字傳永國子監生性伉爽與人交一往深摯而終始無間朋友有過輒正容規之嘗客京師賢達以其行誼比黃叔度



陸壽昌號鳧岡由舉人授東流訓導乾隆五十八年成進士壽昌生三日父歿母撫之成立幼好學博通經史善古文辭旁及象緯輿圖算學工畫山水子鏞字麗生有文學工詩亦精繪事花鳥尤勝

丁履端字郁茲乾隆四十四年舉人官直隸威縣永定河溢壞田廬履端亟堵築請振全活甚衆工駢體文尤長於詩從子寶善字性初縣學生有雋才力學早卒時人惜之嘉幹字淵初嘉慶十三年進士歷官戶部員外郎持正不阿篤于倫紀

丁履恒字若士履端從弟也嘉慶六年選拔貢生十三年浞津召試二等選贛榆縣教諭擢知山東肥城縣在職三年民皆親愛母憂歸卒於家履恒性亮達不問家人生產友有緩急必傾身為謀誘引後進如不及于嘉蔭以舉人官銅陵教諭謹厚嗜學兄子嘉

棻不達而文行有名

惲敬字子居乾隆四十八年舉人以教習官京師與張惠言尤友善選授浙江富陽縣父喪歸服闋改授江西新喻調瑞金以卓異擢南昌同知後署吳城所至勤廉明決無所瞻徇為人氣矜尚名節動與上官忤坐事罷謝其母曰為吏不謹貽母憂母曰以汝性行禍當不止此今以微罪行幸矣嘉慶二十六年卒年六十一敬少為齊梁駢儷文稍長棄去四十後益研精經訓深求史傳興衰得失之故旁覽九流百家而以儒術為折衷惠言歿後遂肆力為古文論者謂清代文氣之奇推魏禧文體之正推方苞敬則介乎奇正之間世稱其文為陽湖派

呂光復字丙純乾隆四十五年上南巡召試一等賜舉人內閣中書以詩文書畫負重名性和平坦蕩即奇窘不見戚容年五十三

始通籍旋乞假歸歸十二年卒子星燕字君爽嘉慶九年舉人官建德訓導能傳家學與修安徽省志為時所稱年未五十卒  
呂星垣字叔訥大學士宮五世孫幼有夙慧以廩生貢入國子監乾隆五十年肇建碑雍禮成星垣進頌冊上擢一等一名選新陽訓導歷官直隸贊皇河間知縣決疑獄減徭賦民甚使之星垣氣骨清峻丰采稜岸為文操筆立就少與洪亮吉楊倫孫星衍黃景仁趙懷玉徐書受以文學相器識時稱七子子振鏞廩貢生廣德州訓導篤學工文迨晚歸從遊者益進兆熊道光五年舉人山西知縣卓有治行升補湖南桂陽直隸州未赴卒  
徐準宜字仲平乾隆六十年順天舉人官順天府糧馬通判博學多識通天文地理及九章算法讀史論古有特識工書涉歷魏晉唐宋諸家尤於趙孟頫精研有得刻寶雪齋帖性耿介事上接下

必以誠毋憂歸居鄉十年卒

錢夢雲字霞叔八歲能詩稱神童及長神采煥然性通脫無儀節滑稽不窮為文脫口韶秀出入六朝弟夢蘭字季重亦工詞賦豪飲好客晚歲厭家居居破寺中一日得疾知不起曰此非吾死所也輿歸及門卒夢雲子相初字申甫幼慧能詩嘉慶十五年舉人吳錫傳字築巖嘉慶五年舉人幼奇慧長工詩文博洽敏捷性豪放好游足跡幾徧天下倦而歸年逾七十以貧困卒所著詩文集以客吉林將軍松寧幕燬焉

諸鴻疇字睿倫覃精禮經其族人洛能古文族議建祠洛依據古禮謂廟制天子諸侯大夫降殺以兩親盡則祧庶士庶人無廟今庶民家累數十傳柶木主合食其中過矣鴻疇曰禮緣義起天子諸侯大夫各自立廟必限世數者專所尊也庶民家累數十傳合



食一堂不以世限者統所同也禮專則嚴同則泛此隆替之分酌于人情協乎天則揆諸先王制禮之心可以無憾鴻疇性孝友父病常卧床褥侍湯藥歷久罔倦弟妻歿命妻撫其遺孩恩逾已子謹言慎行鄉里推重年七十四卒

史次星字又章縣學生識趣卓遠懲堪輿家有兄弟此吉彼凶之說其葬先世以從祖父與祖父同穴從祖母與祖母同穴曰夫婦合葬非古吾以使子孫共禍福也道光元年舉孝廉方正力辭詩文自抒襟抱真純藻美不標立矜埒持古人短長讀者如親有道風旨焉

惲秉怡字潔士幼穎敏年十六讀陸隴其書慕其為人以清操自厲鄉試不第筮易得蠱之上九益淡進取務為經濟之學道光元年舉孝廉方正府縣以秉怡名上固以年老辭工書畫

陸繼輅字祁孫儀幹秀削讀書夙成與兄子耀適齊名時稱二陸嘉慶五年舉人官合肥縣訓導甚得時譽俸滿保知縣以修安徽省志叙勞選江西貴溪縣三年以疾乞休十四年卒年六十一繼輅于詩致力最深兼長古文辭耀適字劭文縣學生詩醞釀深至人亦韜精斂采黯然可思遇事侃侃無疑畏橐筆遨遊尤長尺牘名公卿爭延致之道光元年舉孝廉方正試二等選阜寧縣教諭之任百日卒年六十三性嗜金石文字所至搜輯摹拓為之考證長子循應字子良河南南陽縣典史溫雅有父風工小詞壽至八十

毛燧傳字洋冥縣增生少孤為文規範唐宋八家見人不解作寒暄語人有過輒面斥之

董祐誠字方立五歲曉九九數年十八通算學嘉慶二十年舉人

學問外無俗嗜性狷急而訥于言負經世才遊歷所至凡山川形勢政治利弊悉采覽不忘始工為漢魏六朝文長更肆力於曆數輿地名物諸學講求典章禮儀政治之要為人好深沈之思於書之鉤棘難讀者一覽輒通曉復為出新意闡隱曲他人或窮年搜索祐誠晨夕間已突過之道光三年卒年三十三兄基誠字子詵嘉靖二十二年進士由刑部郎出為河南開封府知府工駢體及詞

李	兆	洛	字	申	者	資	稟	超	異	力	學	嗜	古	舉	嘉	慶	九	年	鄉	試	第	一	明	年
成	進	士	改	庶	吉	士	散	館	選	授	安	徽	鳳	臺	知	縣	縣	與	壽	州	同	城	俗	故
獷	悍	號	難	治	兆	洛	擒	治	劇	魁	興	修	水	利	丁	父	憂	歸	不	復	出	主	講	江
陰	暨	陽	書	院	二	十	年	與	生	徒	講	求	古	學	校	刊	宋	明	人	文	集	及	清	人
說	經	論	史	書	數	十	種	並	為	補	其	缺	遺	正	其	訛	舛	尤	究	心	曆	算	輿	圖

之學其所製天球及運球之法與古儀器合而精巧過之所繪歷代輿地沿革圖及地理韻編今釋詳核無遺工文詞有養一齋集行世所選駢體文鈔尤膾炙人口年七十餘卒子頤字慰望工篆書

惲蘭枝字紉之貢生窮經篤行善啟迪為一時名師與同邑吳士模宜興吳德旋相友善十試不售專精經義尤深於詩無子所著多佚同時陸孟甲字甫生工為文博究羣書尤精史事論古今理亂得失洞徹原本亦不遇以貢生終

陳景蕃字詎齋縣學生家貧篤孝侍父疾衣帶累月不解博極羣書潛心理學造次必於禮從遊者雖質魯一經指誨不逾年立變子銓舉人銘諸生均能文

陳紹琦字功魏警敏絕人家貧棄舉業攻古文辭種瓜得錢以沽



酒客過要入瓜舍共飲興酣賦詩多奇語許亦魯書蕉葉索瓜紹琦鐫詩於瓜以報時傳為韻事同時李蔭字友端性聰記熟精班史後喪明口授徒以養母

許亦魯字效曾姿稟穎異為文跌宕不羈乾隆四十四年舉人大興翁方綱門名動公卿間五試禮部不遇將大挑權貴欲為之地輒不屑後由國子監典簿截取知縣亦不赴以著述終其身子沅縣學生孝親履道潛心經學客京師累試不遇而文譽籍甚與同郡進士許融齊名時人語曰常州二許文中之虎

吳省旭字江帆白皙如玉疏眉朗明左重瞳性聰異文詞華瞻詩與溫李相近

承鵬字象良好讀書善丹青為詩有天籟喜作山水遊愛鄧尉石湖友劂之勝厲吳閩數年卒年八十三同時汪岑孫字衡叔丁懷

璞字伯真均以能詩聞

吳飛鵬字九程幼穎慧十餘歲即為童子師通醫術工書天性强記宋元後遺聞軼事靡不詳與人論古今人物雖瑣碎亦能縷析至如洛閩諸儒傳授支派本貫別號仕隱略歷可屈指以數又能歷舉制科狀元某科某人不誤不遺與遊者咸驚服

張景超字念耆乾隆六年舉人山東登寧場鹽大使有人倫鑿工為詩同時陸葆光字秋崖家貧客游南至黔西入陝蜀歷中州三晉北出居庸所至皆有詩鄒牧字牧邨通說文工篆刻家貧而性介嘗客鎮洋畢沅幕諸名士皆好之其詩喜述情多危苦語畢訓成字莘農於學無所不窺尤精星命喜讀史作詠史詩千餘首於古今升降治亂之故三致意焉性疏宕漫遊不遇湖南布政使祖之望獨敬禮之子豫縱有文行

方履錢字彥聞幼隨父聯聚官甘肅同官楊芳燦驚為奇童嘉慶二十三年舉人大挑用知縣署福建永寧縣事調閩縣均以文行尊民會大旱禱雨致疾卒年四十一履錢饒至性篤友誼英敏積學讀書善求問博通經史百家之源流而於天文地理氏族金石錢幣以及六書九章楚筭等皆無不綜貫工駢體文詩宗六朝近體則出入大歷十子詞與張琦董士錫齊名善隸書精賞鑒積石刻萬種尤精志乘之學撰河內武涉永定諸縣志識者稱之子駿謨字元徵性和介澹名利學識淹雅為宗再試京兆不售遂棄舉業遊河南當道爭延致之咸豐十一年兩江總督曾國藩薦其才召參軍幕尋掌糧臺文薄游保安徽直隸州知州駿謨精漢學及地輿修徐州宿遷二志駿謨字幼靜陝西靈寶知縣駿謨子恠績學早卒與駿謨先後參曾國藩幕者有趙熙文字敬甫幼穎異精

訓詁形聲之學與弟文烈齊名以佐幕勞保安徽同知直隸州性廉潔筦榷五年纖毫無所私及卒篋中惟舊碑帖數十種

莊關和字有鈞幼聰穎年十五工舉子業繼而研尋經學於星曆輿地中西算術風角占驗家言靡不博涉省試屢薦不售弟文和官廣東羅定州州界萬山間積年悍不納賦關和往視弟為召諸生父老委曲開譬甫半月逋賦悉輸族子振為河北道延主講席旋歸嘉慶二十三年卒

陸慶頤字鞠人縣學生績學能文嘗遊京師朝鮮使臣洪冠巖見其詩而善之持歸國為刊傳之主講川沙觀瀾書院篤信紫陽小學務求實踐

湯璫字子堂縣學生性耿直無所屈文詞得魏晉人意尤精金石之學當道屢聘纂金石及郡縣志任邱邊浴禮稱為大江南一人



兄珩字子獻與璩齊名時稱二俊

董思誠字子遠道光二十年舉人工文詞精篆法其學得外祖張惠言之傳為人靜默獨潔妻有賢行為蓄妾日夕膏沐熏飾之冀一當意然卒無子

謝應芝字浣村祖貫浙江紹興至應芝始占籍為諸生工文博古探討經子百家著述甚富

沈爾熾字伯昭七歲能詩外祖趙翼奇愛之博通經史為文十言立就屢應省試不過晚歲徜徉詩酒人方之李謫仙

楊燕龍字宇昭號省庵府學生苦志力學博覽羣書工為詩袁枚采其佳句入詩話以勤學成瘵疾篤猶吟哦不輟云

杭源濬字發祥號震湖聰穎工詩為文根柢經史孝事父母躬祿廁諭以諸生終

楊元錫字雲珊國學生治經主漢學詩筆恢奇宗仰李白嘗遊大梁登吹臺酒酣振筆集王勃滕王閣序字成七言律十章坐客瞠視推服

莊鳳翰字桐軒少穎悟熟知史事凡政事得失人物臧否瞭如也工駢儷文常佐人幕文奏頃刻數十紙對客揮毫不廢酬答晚歲從軍役以勞卒

周儀暉字伯恬嘉慶九年舉人嘗客授廣東雷道爭引重大挑得安徽宣城訓導擢陝西山陽縣調鳳翔以老乞休民皆思之而儀暉一無所干歸裝惟積詩盈冊儀暉才思瞻逸詩宗漢魏六朝出入三唐諸家奄有其勝季弟儀穎字叔程文譽亞其兄道光二十三年舉人援例為知縣未及謁選卒儀暉子騰虎字焱甫縣學生亦工詩讀書通古今其論辨能屈伏一世使聽者忘疲咸豐五年

御史宗稷辰奏保奇才五人左宗棠居首騰虎與同縣管晏與馬後參曾國藩軍幕未竟其用而卒子世澄字孟興亦縣學生才氣橫逸似其父

瞿溶字麗江明福建布政使士達裔孫少有文譽嘉慶十九年會試第一選庶吉士散館授刑部主事洊升郎中擢御史遷吏科給事中母憂歸以江南漕重且免運繁費史緣為姦具狀控之巡撫被劾降職溶於道光八年以主事典試雲南得士多耆宿及被劾歸家居垂二十年主講龍城延陵兩書院又為後進設社課文造就甚衆旁及醫學陰陽風水家言多所訂正姑夫何逢辰字襄甫年小於溶而從受業溶初得其文歎曰若能且過我奈傳世有餘名世不足何後逢辰以廩貢為里中老師其文原本經史縝密以粟弟子得其指授輒弋科第同時名亞於逢辰者談灃字雲西道

光八年舉人官四川知縣汪士進字逸雲道光二十三年舉人兼工小詞

徐賡揚字性夫系出明大學士溥其大父始遷常州賡揚嘉慶六年進士改庶吉士散館授編修歷充起居注協修實錄方略二館纂脩故事纂修官於書誤未簽正者奪俸獨賡揚未以一字置議會詔纂東南軍興以來兵事賡揚方咯血力疾草稿頃刻數十紙詳贍有法後以御史記名引對遇寒疾卒子廷華字子稜縣學生負才氣躡於場屋益專精古文詞遊迹所至當路引重晚客死鄂中所著曰一規八稜硯齋集以父賡揚與繕御製集成賜物中有此硯爰取以名其齋

吳頡鴻字嘉之道光十三年進士以知縣發山西歷署五台靈石臨汾等縣補崞縣升署平陽府通判代州直隸州兩充甲年丁酉



同考官韻鴻工古文駢儷詩詞諸生時已名重一鄉與同時莊縉  
度趙申嘉周儀顥陸容徐廷華汪士進稱毘陵後七才子在官多  
善政崞縣民苦寒每僵斃歲置羊皮衣袴三千給之又多狼患為  
禁狼文告於神捕治而患息聽斷祥覈嘗奉檄治洪洞姦夫毒斃  
本夫獄姦夫匿置毒之器辭反覆無證韻鴻禱神夜訊本夫乃憑  
依其鄰言之果得毒器獄遂定卒於崞縣任故事進士殿試後更  
由翰林院備卷試以論疏詩曰朝考入選者多用翰林其後改入  
選為等第韻鴻朝考入選未用翰林莊縉度字眉叔工詩詞楷書  
道光十六年進士授戶部主事亦朝考入選未用翰林時有發河  
工學習之例縉度因發東河期滿政府同知陸容字蓉卿為文艷  
麗七子中最淪落不偶  
丁嘉葆字誦生道光十八年進士朝考第一改庶吉士散館授編

修二十二年上特召見命在上書房行走授瑞郡王讀大考翰詹  
擢侍讀充日講起居注官教習庶吉士督學貴州校士詳慎二十  
八年按試石阡暑疾卒嘉葆於學無不窺尤嗜金石文字詩詞固  
其家學蚤歲已哀然成集通籍去鄉舉十七年故造詣益純弟子  
著錄甚眾會遷侍講學士未及拜而卒

言啟芳字與卿系出先賢子游氏道光元年舉人官邳州學正嘗  
在里與余保純董開孟讀德勝深港三河將叙勞保知縣力辭於  
總督林則徐曰生平所嗜惟在典墳一行作吏此事便廢若仕而  
兼學則一者未優兩俱有負則徐知其誠乃止平生著作甚富以  
兵燹佚劉遵燮字洵之後啟芳一年舉於鄉官錫山訓導以身為  
教士氣大和後選太倉州學正以老不赴主講龍城書院壽至八  
十餘遵燮中年喪偶旁無姬侍一生專嗜讀書有得即手自甄錄

毫而不倦

趙振祚字伯厚戶部尚書申喬六世孫道光十五年進士改庶吉士散館授編修大考翰詹遷贊善時承平久官翰林者唯講求聲病對偶振祚獨以世禍潛伏不宜更尚佔畢每憤言時事不為大學士穆彰阿所喜十年不遷母憂歸不復出官京師日恒鍵戶讀書不與世事於明史尤致力論時事可否輒引比及之家居益講求實用謂治道在得民隱暇日獨行阡陌諮田夫野老忘倦歲大稔請振不獲振祚徧乞鄉里得錢十七萬緡有奇全活無算會太平軍連陷寧揚鎮郡城震恐振祚練江洲士民數百備戰守有姜芳槐者剋期糾眾內應太平軍振祚發其謀數十數人變遂弭越八年而總督何桂清棄城走振祚知事不可為出城謀集眾入保為亂民所害郵贈太僕寺卿銜祭葬如禮振祚性坦率少依畧氏

劉逢祿通知春秋易禮之學出於莊氏因並通莊氏學焉古文詩賦皆淵懿茂美遭亂均佚人多惜之其撰述以兵燹佚而命又不達者有府學生陸鉉字純祉縣學生黃懷孝字武者卜贊平字卿采陸卿頤字鞠仁廩貢生吳興字瑟甫均博學工文詞從受業者甚眾後學相與思慕久而不忘云

汪暕字仲穆道光十四年舉人淡于利榮不求仕進入都教授弟子詩宗陶韋篇帙不富而雅韻欲流弟昉字叔明與兄齊名尤工書畫道光二十五年舉人咸豐三年大挑知縣發山東借補布政司經歷經歷間曹昉日事文讌座客常滿常州陷鄉人多避難至者昉無問知否悉為道地得所旋補濟陽多所興建時軍書旁午昉將以鎮靜事悉辦治擢萊州府同知以老乞歸宦橐蕭然以畫自給性友愛教養兄子及孫有恩好慨濟人急豪飲善諧主文譎



諫面斥人亦無怨者年七十九卒

揚全監字用明善屬文才思敏贍以廩貢生應順天鄉試挑取騰錄主講山西解梁書院以經史課士使為有用之學咸豐二年太平軍陷江寧郡城岌岌官紳公設保衛局全監條具十策曲盡事理尤善醫避地鄉間及江北活人甚眾性豪飲喜詼諧無問賢愚與游者各得其意以候選訓導保加員外郎銜全監意不屑也陸黻恩字亞章道光十九年舉人高尚不仕里居授徒工詩嘗客江皖所至皆有詩紀游感事抒懷一皆寓焉陳亮疇字德生成豐三年進士改庶吉士散館授編修八年督雲南學政同治四年記名御史五年大考翰詹賞大緞方視學時滇黔川陝回漢方構釁亮疇萬里牙行無難色會母以常州陷殉難遽歸服闋入京常鬱鬱夜泣徹月不寐遂乞假漫遊以疾卒於楚

亮疇勤學博覽手錄諸子百家及兩漢唐宋文哀然成冊朱墨並下為文能自暢其旨真行書敏捷稱意官翰林日繕經筵講章楷法整秀次日遂拜督學之命

陸爾熙字廣敷同治二年進士以編修充庚午陝甘正考官其副為司業孫詒經故事司業偕編檢出差多得正爾熙此役獨否蓋異數也為人靜訥不通聲氣居京課徒自給門人多達者其文精密不苟下一字終以此致疾卒

蔣曰豫字友石性敏慧工文詩及篆隸書咸豐間捐知縣發直隸署元氏蔚州皆有政聲去任時囊無餘資同治七年捻擾直隸總督檄曰豫佐戎幕多所規畫章奏多出其手擢花翎知府銜直隸州母憂以毀卒

許棧字太眉天才橫逸於學無不窺抱經世志道光中寰宇無事

上下恬嬉棧獨言天下且有變衆目為狂俄而英吉利犯順其後和議成棧復言患猶未已不數年太平軍興人始服其遠識九試於鄉不售遂絕意進取咸豐元年舉孝廉方正力辭後遭亂流離兵間境益阨惟以著作自娛所為詩渾博忠愛頗似少陵晚治說文能闡發微奧主講道南書院十餘年嘗言人不可有驕心不可無傲骨又曰處世圓而不失之隨持己方而不失之執年八十二卒仲子衍熙亦工詩治小學甫壯年而卒族人許樹勳字建侯亦擅文名弟子著錄甚衆

湯成烈	字果卿	道光十一年舉人大批以知縣發浙江補武康縣
二十九年	充鄉試同考官	署玉環同知調任仁和所至均有惠政
同治初	江浙郡縣淪陷	江蘇巡撫檄佐防務於上海數建議不用
旋乞歸	成烈力學彊記潛心經世之學	尤嫻掌故性戇直好面折

人過在官以修志課士為急主講延陵書院十餘年著作甚富楊光勳字子燾風儀端粹幼敏能文陸繼輅器之妻以女由是詩文益工入資為浙江樂清典史久之歸卒

董似穀字蓉初道光十一年順天鄉試第一越七年成進士改庶吉士散館授編修累充武英殿纂修國史館總纂起居注總辦擢洗馬出為江西南安知府未之官加鹽運使銜再權糧儲道篆同治間重修江西通志似穀充提調審定體例識者稱善志成引年歸年八十四卒與似穀同官江西者有高延綬字小岑父賜禮由翰林官禮部郎中延綬道光二十四年進士選庶吉士散館改主事擢任江西南康知府緣事降調主講南康贛州書院十年卒

史致準字伯平成豐九年舉人大批以知縣發雲南攝呈貢縣同治十三年充鄉試同考官補文山縣權安平同知告歸卒致準湛



敏耽學五十餘始獲一官嘗欲以經術為治上官迂之尋乞歸卒其治經宗鄉先輩莊劉二氏尤精天祿著述甚富許斌字仔新諸生工為文多從學者性狷介不合輒去客死京師嘗謂毛詩序申傳而每失傳意箋申序而每失序意著詩說以正之又謂周易十翼非聖人親授往往不得其旨嘗日習一卦欲仿毛大可之注易未竟而卒詩詞淡冶有致

莊怡孫字心吉以諸生入資為刑部郎孺掌故文詞雅飭精八分	隸草光緒四年重修邑志怡孫為定體例事增文減族子志敏字	仲求以貢生入資為福建同知攝霞浦知縣績學能文尤喜尺牘	未永年卒吳興字瑟甫與怡孫同纂新志能古文辭性隘不諧俗	以諸生終	管晏字敬伯與弟樂並知名公卿間咸豐五年給事中宗稷辰疏
---------------------------	---------------------------	---------------------------	---------------------------	------	---------------------------

薦奇才以晏與邑人周騰虎湘陰左宗棠名上時晏樂方佐在籍汪本銓布政治鄉團未及出十年太平軍陷郡城晏奉母避居山東以幕勞保知縣歷署山東海陽寧海朝城等縣補黃縣母憂解任佐左宗棠治軍塞上功最不日顯擢矣而晏倦遊亟歸久之卒晏治古文宗法惲敬樂字才叔性通脫屢佐當道幕累薦輒辭期以甲科進卒因塲屋以諸生終詩文雋永兼善醫術

蔣彤字丹稜諸生從李兆洛游學問淹通篤守家法尤精于考禮文詞雅鍊編定李兆洛年譜及暨陽問答為時所稱

史亮悠字子貞同治六年舉人以鹽官試用浙江性狷介不媚俗博聞強記于學無所不窺為文條達曲盡事理沈鬱悱惻唱和多

名人

馮銍字石溪幼穎悟許棫主講道南書院惟銍得其傳植品勵學

淹貫經史工詩文佐湖北巡撫惲祖翼幕歸館郡城每講論經義  
長言罕譬能使聽者忘倦所為文嶽崎歷落時有奇氣  
杭清字朗眉諸生亦能詩

馮樹字思白少遭亂袖漢書一冊誦之意氣自若亂平歸窮究經  
學采漢唐以來諸家之說斷以己意所著書多手寫成帙晚精算  
學旁及風角占驗醫術終於諸生

周舫字載帆穎悟好學弱冠負文名性忼直咸豐九年舉人門下  
多得甲乙科者馬新貽治軍安徽招入幕以親老辭後督兩江復  
召舫主書院講席久之卒子毓麒字藕塘歲貢生工制義詩賦晚  
為福建龍溪漳浦各書院山長

劉清弼字夢祥咸豐末太平軍由金陵東下清弼挾策走江淮數  
千當道不用以諸生領鄉薦家居教授門下士多知名嘗欲使闔

郡各鄉皆立塾舉有學行者為師如古鄉校之制不果清弼魁奇  
偉岸有志用世喜論古今成敗無所遇乃飲博自放酒後抗誦離  
騷蒼涼激楚聲出金石一座悚聽改容卒年三十九

費丙中字旭堂貢生工文詞穎脫立就與蔣偉玉以文等唱和有  
名詩宗元遺山尤長於章奏兩江總督李星沅浙江巡撫吳文鎔  
奇其才交辟之後佐李鴻章治軍淮徐議不合遂歸嘗以幕勞議  
叙直隸州州判卒

黃煒字浩然增貢生候選訓導教學行工詩古文善書法主講宜  
興臨津書院以樸誠訓士士論翕然子治本字農孫讀書目數行  
下好學能文

何嗣焜號梅生幼慧嗜學年十三補諸生長益博涉羣書致力古  
文詞尤究心時務公卿爭聘入幕臨事善決策積勞保至直隸州



知州

王振鳳字芝徵性嚴格見座客欠伸不敬輒拂衣去豪暴妄生是非者斥之鄉里重其行工駢體文制藝一日可十餘首書法鍾王光緒七年進士旋卒

朱琪字潔卿縣學生幼穎慧受業於洪齋孫家貧力學工詩古文辭不屑屑於舉子業中經冠亂遂絕意進取邃經學尤精春秋左氏咸同間邑中稱文壇四柱琪其一焉晚授徒里彥多出門下卒於家兄獲字爽卿與琪相友愛有義行終身不娶

劉可毅初名毓麟字葆真博學強識語出輒驚座工文好飲酒醉後歌呼佗傺每試輒高等拔貢成均光緒十八年會試第一改庶吉士散館授編修座主翁同龢語人曰吾得劉生日不盲矣官京師不驚聲氣泊然無營庚子義和拳亂可毅挈孥出避戕於匪年

四十六海內痛惜之弟樹屏字葆良亦文學知名

呂緒承字俠迦以諸生入資得福建縣丞改八品京官好為詩慷慨蒼涼聲震簡外佳處往往似元遺山母喪歸甫旬日以毀卒年三十二同時蔣南棠字樹森謝仁字統卿仁弟泳字柳湖並以詩詞稱南棠兼工書仁好蓄金石姜汝濟字虛舟光緒二十年舉人錢世輔字秉均亦皆工詩

莊鼎彝字茗甫光緒十七年舉人大挑以教職用不就精治漢書有得輒札記復能詩創設冠英學校風規獨善邑中有學校自此始宣統元年卒

孫清載字遂舫歲貢生歲饑赴省乞振活饑民無算建三近書院晚好樓居手不釋卷以吟詠自娛于鼎煊字伯宣增貢生亦能詩劉異權字脊生少卓犖不羈讀曹國藩集心儀其人由是作文治

身一以曾氏為法兼及方苞姚鼐之書力古博覽文辭日益進其於義理奧蘊經師家法政俗因革之由聲音文字之統政教風俗之因革皆鈞沈發伏有所著述終於家

錢嚮杲字仲謙

年舉人力學工文論議風發有志於用

世博識古名臣言行錄及清中興曾胡諸公事蹟累試禮部不第或勸之仕不應光緒十年法蘭西兵內犯官軍大破之於諒山既西與定和約嚮杲嘆曰天下事自此不可為矣擬萬言書及歷練將才疏上之當道倡技擊以教里子弟擒盜則勞以酒食請郡縣辦民團而自任董勸其論學則曰道二仁與不仁而已仁者道之大綱大綱得瑣瑣同異勿論可也詩文雄渾激昂年

卒同

時張元度字秋舫縣學生能文與嚮杲為道義交入貲得校官授淮安教諭不與諸生爭贊貧者饋棗栗而已造就甚眾每課士手

批累千百言卒年



人物傳

藝術

武進陽湖縣志



張愚直抄



人物傳目錄

藝術

宋

韋叟

齊

蕭惠基

梁

蕭綸

蕭贇

陳

蕭乾

蕭引

隋

蕭吉

唐

蕭誠

弟諒

蕭祐

宋


于琮

孫時

暨生

董羽

僧居寧



曹仁希 徐友戚舜臣元化

徐友諒

吳炳

許迪

吳璜

於青言

許叔微

陳得一

朱裕

於材中

元

莊伯寧

徐賁

陳震英

唐世美

林良才

白仲

孫瓏

段銜

呂敬甫唐竹窗朱菊農

蔣鑑陶浚金剛柔

吳之琯

周教

徐養浩

王彥昭

子仲清仲清子矩用矩用子述迪選

蔣宗武

吳傑

子希孟希曾

丁煥

湯玉湯玠

子文佐兄子文英

湯啟暘

胡住思

石震

霍應兆

鄭汝煒

子文起孫澤山

曹秉鉉

周正

許其仁

毛昇

張正道

徐暉

蔡信

洪仲茂

曾劉須佛孫

清

岳瀾

解勗屠鴻

林菁

陳明善

高星紫

楊二溥

白銘唐字昭薛奕字昭于于无字昭弟字肩薛璿楊喬年白恭

虞書

莊寶書

僧明學

馮龍濤

李馥





朱文燦

趙學徹 子京錫

陳峻

楊士昕

楊振

鈕吉越

吳咨 弟傲

惲秉恬

王光裕

湯祿名 弟綬名 琳名 母董婉貞 及妹嘉名

湯鉉

丁嘉植

劉灞

王光祿

朱青立 弟淵

曾圖南

屠墉

全鉉

魏士鳳

汪彥份

湯世澍 弟世晉 謝杰 謝陽 劉弼長 劉承德

李芳

江鑑

趙宏

楊光暄

惲彥彬

陳煥

黃山壽

張耀

陶鎔

費念慈

陳欽

高企辛

汪九齡 族人汪晉

屠兆熙

汪鑄

蔣維翰

張誥

談雋

張容萬

吳鎬

陸鏞

王采蘋 妹采繁

左錫蕙 妹錫璇

何禕 李鈺 沈芎

袁韞

法徵麟 弟公麟 徵麟子謙益 復 學山 謙益子雄 震 雄子絅 絅子弼 弼子文沅 文沅長子子序 復子鼎 學山子恭 寬 信 惠 惠子履端



丁天吉

張聖源

薛益

周清漢 湯溥

潘若雲

劉逢源

李衍昌 子熙

金溥

周相宸

楊時泰

黃德嘉

徐允升

邵文卓 姓金宗

蔣斌

錢維岳 父子錄 子師仲 孫鳳吉鳳彩

江日新

魏元 子衷 法楚藝

鄒澍

馬永隆

石公懷

費公宣

蔣國佐

湯洪 子經邦

惲熊

毛鳳彩 子荀一 孫景昌

黃述曾

莊一夔

劉遷

費岳瞻

費伯雄 孫承祖

劉承模

余汝達

鄭光澤 弟光泉

孫維屏

諸大藩

童克敏

杭朝棟 子煥

吳仲山

湯伊勳

馬省三

謝士鰲

沈守倫

馬文植

錢育萬 弟雄萬

朱兆綸

毛鉞

張熙載

巢龍章 子博九

姚鏡湛

屠坤

馬荷安

金亮疇

曹雲濤

丁澤周

錢福連

龔仕燕

孔璞

湯洽名

謝震

董達存

劉鷄

陳鍾奇

徐鴻藻

林純慶

張景和

沈光藩

楊文言

項森

唐本銓

王振采

盛久肇

葉楷

僧慧蒼

蔣寶三

吳一諤

趙穆

祝鴻勳

張楫

高尚正

鄒嶧先

屠耀采

董文毅

史恩絳

楊浚

蔣烈卿 毛漸達

子禮耕 盛久常 魏企垂

宣汝庸

汪在豐 沈德隆 劉稱



人物

藝術

宋

韋叟善相宋武帝始為鎮軍將軍桓攸令視帝當得州否叟曰得邊州退而私於帝曰君貴不可言帝笑曰若中當用為司馬其後受晉禪叟詣之曰成王不負桐葉之言今不敢希鎮軍司馬得軍佐足矣卒與之

齊

蕭惠基思詔少子善隸書及奕棋當時能奕碁人琅琊王抗第一褚思莊夏赤松並第二品永明中勅抗品碁竟陵王子良使惠基掌其事



梁

蕭綸武帝子武帝好草書筆法頗古故簡文帝元帝及綸並能書  
蕭賁字文真工書畫含毫命素動必依真扇上畫山水咫尺具萬  
里之勢雄厚特勝任河東太守

陳

蕭乾字思揚善隸書得從父子雲法官五兵尚書諡靜子

蕭引字叔休善隸書高帝嘗披奏事指引署名曰此字筆趣翩翩  
似鳥之欲飛官至中庶子建康令

隋

蕭吉字文休精陰陽算術江陵陷歸周為儀同隋受禪進上儀同  
考定古今陰陽書開皇間帝陰欲易太子吉先事言及帝異之后  
崩令擇葬所歷筮諸原至一處曰卜年二千卜世二百圖而奏之

退告族人平仲曰二千者三十字也二百者取三十二運也太子

得政隋其亡乎富有真人出治之矣煬帝立拜太府少卿加開府  
嘗經華陰見楊素冢上有白氣屬天密言於帝曰其後當有兵禍  
滅門已而玄感反果應其言

唐

蕭誠梁之後開元初拜右司員外郎書太原題名一時無出其右  
為司馬係書南嶽真君觀碑極有鍾王趣弟諒亦善書世謂誠真

諒草官汝州刺史

蕭祐字佑之耿介苦學自處士徵拜左拾遺元和末為諫議大夫

精書及畫自鍾王蕭張以來皆能識其真贗賦詩鼓琴游心林壑

韋溫號為山林友

暨生善占事汝州刺史桓臣範入考道過常適得東京緱氏莊奴



婢初到桓問以莊上事暨云此莊姓盧不姓桓見一奴云此奴即走竊錢兩貫問今去改何官暨曰東北一千里外作刺史須慎馬厄行至揚州奴果竊錢兩貫去至東京改瀛州刺史常慎馬厄至郡因拜跪左足忽痛艱于行有人解鍼鍼訖痛轉劇遂請告經百日停官其鍼人乃姓馬歸至東都其緱氏莊賣與盧從愿諸事無不應者

宋 于琮善隸書學魏受禪表深得其行書意

孫時字季中文行為一州望書法適麗得歐虞用筆意雖片紙尺牘屬稿未嘗草書政和三年試上舍授應天府姑熟縣主簿再徙定陶授宣教郎致仕

董羽字仲翔善畫龍水海魚始仕江南為翰林侍詔既歸宋命為

畫圖院藝學鍾陵清德寺有李中主八分題名李蕭遠草書羽畫海水為三絕嘗畫水於玉堂北壁波瀾洶湧望之若臨煙江絕島間宋白賦詩有回眸陡覺三山近滿目潒驚六月寒之句太宗命於端拱樓畫龍水精心結構半載而成一日上與嬪御登樓皇子見畫驚啼亟命巧墁僧居寧喜飲酒酒酣戲墨作草蟲甚至長四五寸筆力勁俊不專形似自題居寧醉筆梅聖俞贈詩云草根有纖意醉墨得已熟好事者每得一扇目為珍物

曹仁希字企之善畫水為驚濤怒浪萬流曲折以至輕波細溜一筆之間自分深淺古今罕有及者徐友亦善畫水嘗於太平寺彌陀殿壁畫清濟貫河中有一筆起西北隅縈繞數十丈却立諦視疑飛濤騰涌後遭兵火寺盡焚惟殿獨存或謂水能厭之又咸舜

臣畫水於蕭山縣覺苑寺佛座後壁濤瀾洶湧可駭化元不知於舜臣何屬家世畫水而化元兼工魚龍嘗作龍歸入海圖筆力崢嶸有風浪起伏之勢

徐友諒少為縣吏工畫草蟲傅色輕妙人皆稱之

吳炳畫花鳥寫生折枝功奪造化光宗李后愛其畫恩賚甚厚待詔賜金帶

許迪工草蟲黃花紫菜青草紅葉妙臻神品

吳璜善畫竹師文湖州

於青言工畫荷花寧宗朝進所畫幃授承節郎浙西安撫使計議官孫務道世其藝元時嘗以荷花圖進御知名

許叔微字知可舉鄉薦不第歸而學醫有神助病者無問貴賤與藥不受值所活不可勝計紹興間登第晚歲以已試之方並記其

事實為本事方撰論尤富多言傷寒者其治法脉法推本張機更為圖辨累數十卷

陳得一字晞夫崇寧間至日本得天文星術書遂精推步學紹興五年日官言正月朔旦日食九分半虧在辰正得一言當食八分半虧在巳初果如其言以御史張致遠薦詔就秘書省改造新曆得一上推甲子之歲得十一月甲子朔夜半冬至日度起於虛中以為元八月曆成賜名統元以六年頒行命以官辭賜號通微處士官其一子所著書詔付太史尋歸隱聶墅

元

朱裕字敏道畫山水方君瑞畫草蟲堵信卿亦工錢君用善畫禽鳥

於材中善製墨與朱萬初杜青碧齊名各有所傳可以仿古



明

莊伯寧讀書躬耕通經史善書畫陳洽有詩題其畫云

徐賁字幼文號北郭生洪武中徵起使晉冀還橐惟所賦詩累官

河南布政工書其楷端秀草雄宕為時所珍後徙居吳之齊門

陳震英以禮部儒士考授主簿輕財重然諾善書得趙松雪法

唐世美號月樓善草書窮極奇變開闢縮上逼唐僧懷素詩歌

有唐人風嘉靖中年八十餘詔賜冠帶

林良才字古峯廩生工詩文其書法尤為人推重一時碑版多出

其手

白仲字子中尚書昂之孫嗜酒落拓不羈學晉人書精妙絕倫

孫瓏號小癡幼穎敏畫草蟲雪兔隨手點染如生呂敬甫唐竹窗

朱菊農亦皆善草蟲菊農兼工書法

段銜能詩善畫山水極類文徵明尤工扇頭小景蔣鎰官指揮使

亦畫山水以何登為法陶浚號雲江諸生山水師馬夏行筆蒼勁

字亦如之金則柔字錫卿亦諸生所畫煙雲變態出入黃子久之

法

吳之瑄自幼未冠人呼為九蓬頭善畫人物瀟灑絕俗畫神佛則

莊嚴端好晚尤精巧能於寸楮上作西園雅集圖

周教畫鍾馗糾糾有態巧仿古鼎彝及唐宋室器殆欲亂真又裁

古藤為几杖極工緻

徐養浩先世本居毘陵其父被元兵掠至燕久之得常州織染局

官以歸生二子長曰養浩博通儒書始業醫為無錫醫學教授子

仲清醫尤精為湖州路儒學教授子矩用以薦任襄黃兩縣教諭

生三子述字孟魯迪字孟恂選字孟倫述決病人生死旦夕歲月

若神迪不盡責效湯液率以意為之嘗過市市人躍而踰牆述診  
曰腸斷當死市人笑不信至暮果死一女傷於怒内向卧不能轉  
迪索花作婦人粧歌且笑其女不覺回顧大笑而瘡一孕婦仰而  
探物遂不能俯迪令衣以裙數十層掖之眾中解之以次解至中  
諭婦不覺用手力護因得俯一人病僂俯迪令之坐以大鉗徐  
擬之其人漸避漸仰至用鉗尤多神效俗呼曰徐神仙然三人者  
皆尚氣好施博物洽聞述尤工天文喜吟詩選更以孝友稱歲且  
除從宜興載米百斛還未至家遍索故人與之家方待炊勿恤吳  
人周克恭有所託於選其家不知克恭歿選急走其家還之道遇  
一貧人寒甚急解襦與之歸旋縫以禦寒述嘗夜讀岳飛傳怒甚  
持挺起碎其盎於爨下鄰人驚問之曰吾方切齒擒賊也洪武中  
述迪皆以他醫累當遠戍選贅得免而情不忍卒與述迪同奉母

以行艱苦備嘗者廿年正統初述語族人曰天象如此不越三年  
萬乘其蒙塵乎既而曰其在己巳是年果有土木之變帝嘗召見  
述欲官之不果厚賜金帛以歸與迪俱以高年終

王彥昭字仲文父思明以薦侍燕王即時彥昭未冠嘗被召應對  
如老成上奇之命從金華戴元禮學醫得其禁方脈書以精慎稱  
每製上用藥必預凡藩府舊臣疾上必遣診視姚廣孝病頭風彥  
昭曰病得之當風而坐清其頭目可也藥之輒瘳王郎中弟患傷  
寒脈沈實彥昭謂法當下他醫汗之死張主事子患痢脈沈手足  
冷彥昭曰此陰痢也作湯投之瘳劉僉憲有疾彥昭診之私語其  
兄曰死不出月果如言嘗從太監分領銅符司城門啟閉間從上  
出入軍中有功欲官之辭以母老乞養歸

蔣宗武字季文曾祖達善以醫名吳越間宗武益精其業天順間



徵入供奉授太醫院御醫累陞院使進通政司左通政忤汪直下獄後官至禮部左侍郎宗武能取捷效周太后不豫投一劑輒瘳上在青宮時病目宗武治瘳之至是召至便殿將驟遷以酬固辭乃命免其成籍籍太醫院一日上問以保身養氣之道對曰保身莫若寡欲養氣莫若省心上嘉納宗武謹厚寡言數荷優異無矜色出入禁掖數十年人問以宮中事不答既歸雖襜褕襪履以病叩無不盡心者

吳傑字士奇宏治間以善醫徵至京都御史王鉞鎮大同聞名奏調臺省言傑當留供奉下禮部試之果無踰傑者故事高等入御藥房次太醫院下者遣還傑以諸醫待次久遣歸可憫願賫己秩偕入院尚書義而許之正德中上病喉甚危傑進上清丸一服而瘳自是得幸一日上射獵口出血傑進犀角湯瘳後幸虎園虎驚

傷又以試馬腹猝痛皆療之立瘳每瘳進一官積至院使賜彪虎衣繡春刀及餘幣甚厚遊幸必從南巡以力諫忤上不以隨既而駕還清浦溺而病夢見傑亟召之因扈從還通州時江彬懼上崩且見誅勸幸宣府傑出佯語彬以無恙入則力促大奄請還上得崩於大內彬伏誅傑有力焉傑善診脈用藥不主古方若與症相蓋而無不效及進御不得不用古方亦無不效者年七十八卒子希孟進士戶科給事中希曾舉人

丁煥字伯文世為小兒醫至煥而始精性好飲痘症時行一日診百餘家家飲以酒多至沈醉握小兒手輒睡主人覺之醒輒曰我知之矣歸至室則取藥者填街滿戶煥一一付去雖甚危症皆效狀短小而謙下視之不知其有異術也卒之日家無餘蓄竟無子湯玉湯玠皆世業婦人醫有奇效時有他醫視為虛羸不敢輕藥

者往往投以大黃而瘡歲用至數百斤無錫有施教者劑必用人參亦歲至數百斤識者比之李廣程不識用兵玠嘗行野見林有縊者釋之知因貿易得偽金也以藥資贈之空橐返于文佐兄子文英亦以醫著

湯啟暘字及泉亦世為婦人醫性和易與物無忤與里中耆英共為方外之社壽九十七舉鄉飲賓

胡任思字慎柔精於醫得周慎齋之傳所著慎柔五書能發慎齋所未發其徒石震為之註釋名亦埒焉

霍應兆字漢明丹徒人徙居武進精醫天性純篤事母孝與人論古今節義事輒慷慨奮發行善不求人知于秉仁康熙二十年舉人秉義縣學生

鄭汝煒字明甫宣城人亦精醫而徙居武進尤以刀圭擅長嘗官

太醫院後隱迹垂六十年全活甚眾年八十卒于文起孫澤山傳其業

曹秉鉉字公輔喜讀書有濟世志因父病而學醫曰吾姑壽此一方以延親壽會大疫秉鉉不避危險治之不取值全活無算

周正一名端號北山又號九華為諸生有名以苦學病肺遂精醫術多著奇效

許其仁字宅真精奇門遁甲術數之學尤工醫投藥無不效明亡為祥符寺僧號甚遠訓子弟曰學醫必讀書醫理無窮也又曰為貧人治疾切勿論財

毛昇字伯時御史節弟也幼稱神童七歲能詩有異人引去授以前知術閱二年瞽其兩目送歸自是玩物聽聲近在目睫即數千里外決人生死禍福不爽永樂間兩召至京軍國事有疑問之



神驗帝欲官之昇辭曰命貧薄不得祿食獲守本郡陰陽正術足矣帝益賢之老疾乞還命中使護行宣德間復召入寵眷有加張正道號起閒居馬蹟山幼孤事母孝補縣學生博涉形家言光宗卜葬慶陵上下疑似以少師孫愷陽薦用倒杖法決之遂定天啟間擢授欽天監博士晉五官靈臺郎

徐暉永樂間為吏以木工官至尚書蔡信有巧思少習工藝授營繕正陞工部主事永樂時營建北京徵天下絕藝至都均遵信繩墨累官至工部侍郎

洪仲發善圖章篆法高古有名於時同邑魯釗能得其傳又有須佛孫者字西來縣學生亦精篆古為人重意氣能文章

岳瀾字宗瀛性倜儻善文工書解勗字湘渠耄年猶能作蠅頭小

楷屠鵠字丹山精行楷有唐人風致皆諸生

林菁字鶴亭又字莪溪晚號白眉道人工書作尋丈大字筆力奇縱府縣城隍廟匾額天寧寺禪堂碑記皆其手書乾隆初知府董貽曾屬書鼓樓額曰三吳第一樓

陳明善字服旃山西朔州知州工詩善寫行石尤善書家有園名亦園

高星紫字次薇博學多才胸無城府工隸書兼善畫刻有玉堂楷法帖由舉人官甘泉訓導

揚二溥字希之積學工文善書與薛奕白銘唐宇昭齊名號前四家以歲貢授寧國訓導嚴課程崇實學士風不變康熙間上嘗見所書佛經徵入京先一月卒薛奕字若昧方山元孫白銘字筠心貢生性耿介與人無城府孝事繼母工詩古文詞宇昭語在隱逸

其子于光字子晉縣學生工畫荷花魚藻與惲格同時有唐荷花  
惲牡丹之目字昭之弟字肩好學工書與薛增揚喬年白萬號稱  
後四家

虞書字石渠能詩善四體書兼工篆刻

莊寶書字然乙善書崛強天矯亦能詩以書名掩由四庫館議叙  
選山東聊城縣丞以臂疾歸道光間復有王士儀字心一李以謙  
字地山並以書名隱居不仕

僧明學俗姓徐出家大悲庵工詩善奕尤以書名於時能上模右  
軍兼學僧懷素

馮龍濤字躍衢工詩文尤善書法於碑版真贋一覽即辨酷好右  
軍書嘗客遊京師山西奉幣乞書者踵接

李馥字蘭芳號訥庵善書臨摹古篆籀尤妙兼工音律

劉國柱字契萱善書出入二王

金維翼字式如號壽昌居大有鄉渡溪鎮善擘窠書

僧六溶善草書奔放似懷素喜為詩兼善堪輿家言邵青門集中  
嘗稱之

僧英發出家福慶院後為崇法寺方丈能詩善書法

孫宗祺字曲江縣學生書法初師顏歐後宗鍾王晚年筆尤勁健  
黃宗字衍亭亦縣學生工八分書

張鳳翥字祥笙摹篆隸及北魏均神似

莊鳳威字耀采號巢阿浙江歸安縣知縣少學右軍書晚參以顏  
歐筆力適勁

丁壽葵字詠於廩生工書小楷尤韶秀子凱元縣學生亦以能書  
稱



高粹曾字純士縣增生能文工書

李正華字靜之廩貢生官浙江知縣工北魏書姿致秀勁遠近乞書者無虛日得者珍之

高昕照號小山性曠不羈重氣誼有友客京師遺書以老母孤子託昕照襍被立往為歸其喪並經紀其家好飲工詩尤喜書法直入率更令之室

費彝訓號鐵臣光緒甲午舉人官湖北知縣工書法北魏遠近稱之

朱先字允先善畫草蟲以蘆梢麥桿代筆無意求工而栩栩生動性雅淡喜著書年八十三卒

惲本初字道生明崇禎間舉賢良方正除內閣中書棄官歸更名向號香山老人以畫自娛直入宋元作者之室從子格實師之格

一名壽平字正叔明副貢日初子八歲詠蓮花詩避兵福建建寧為軍帥所掠獲育為子帥死日初以計歸之授經史不治舉業工詩及書畫山水宗董北苑僧巨然絕去町畦既與常熟王翬交見所畫乃曰讓卿獨步遂專為花卉寫生本徐熙沒骨法而出以新意氣韻天成自為題識世稱畫詩書三絕家貧以畫自給然性高介畫非其人不與視百金猶土芥也某監司延之畫不即赴拘繫聽事將辱之事為婁縣大學士王瑄齡所聞急遣人為緩頰乃解所居甌香館倡酬皆一時名宿卒年五十四自格以畫名天下故其羣從子孫多工畫者馨生字德彥山水花卉一規矩格而出入於古人標字樞亭寫花卉禽魚皆有氣韻源濬字哲長善吹鐵簫號鐵簫老人直隸天津縣丞畫有生氣源景字希述欽天監冬官正轉工部主事亦以畫稱源成及賡颺皆工花鳥奎善花卉源濬

妹尚書無錫鄒一桂妻與兄俱學格畫法山水平遠有天然風韻  
一桂亦工畫以翰墨值內廷人以為得於閨閣源濬女懷娥字紉  
蘭適淮揚道宛平曹恒畫花果得家法懷英戶部郎呂光恒妻花  
鳥雅秀尤長墨菊又格族曾孫女冰字浩如工寫生芊綿蘊藉用  
粉精純迎日光花朵燦灼作已輒題小詩乾隆初總督尹繼善以  
進呈孝聖太后高宗題詩嘉獎名大起適毛鴻調築小樓夫婦居  
之吟詩作畫老馬子鳳朝鳳梧鳳儀皆習畫孫女周字榴林亦能  
得其意裔孫女璠寫生得家法珠字珍浦滿洲廷路妻工詩善花  
卉格甥張子畏花草得舅氏法張偉字子佳董瑜字岐嘉皆師格  
所畫輒能亂真又格從甥楊湛思字琴山工山水近思字恩愚善  
寫梅同時范廷鎮字芷菴工花卉草蟲習忍工折枝花卉王之任  
字榮膺工山水尤善畫蟹

屠遠字帆輕博學能詩尤工畫山水蘭竹又林旭字其祥縣學生  
工山水翎毛陳儀字象彩工山水蘭竹吳闡思山水稱能品

湯祖祥字充閻康熙間以監生在武英殿銅版館纂修古今圖書  
集成善畫花卉傅色妍淨折枝小幅尤佳

褚源字清來兄全三工丹青源得其秘善寫真花草鱗蟲具有生  
趣雍正十二年蘇松督糧道延源繪督運圖所歷數千里山川城  
市人物纖悉分明時稱神技

胡吟字鑑泉善畫窠石山水尤工詩詞

潘是稷號劍門山人善畫大竹雜卉墨瀟淋漓

陳河清字頌平少孤貧博習藝事篆隸行草及圖章俱蒼古有法  
繪花鳥生氣迴出尤工墨蘭

楊振昆字步青幼稟殊慧讀書恥章句著述自娛畫法不名一家



尤工設色山水

張洽字月川又字玉川畫山水蒼秀雄絕中年游京師曾於藩邸從觀珍秘晚契禪悅一寫心靈曾結廬棲霞山罕入城市故筆墨尤絕俗為青綠山水皴皴特異年九十餘卒

莊存字義門品高逸工畫大梅及墨梅於花鳥尤佳

陳遠字西河善畫花木

陳麟字趾仁善事繼母友愛兄弟嘗見遺金於道拾而立道旁鎮日俟失者至而與之喜吟詠善丹青子蘭溪年七歲知吟詩畫雨竹圖有相對意中人在否幾回清夢到瀟湘之句未數月殤人為識云子廣字字丹崖性耿介工畫人物

馮立安字西喬性澹遠工墨竹善楷書

孫西灝字煥文寫竹石水墨明秀蕭然出塵

朱嶼字與山畫與惲格齊名格工著色嶼工淡墨畫龍尤為神品子紱字九夔亦善畫兼工隸書孫會東字星五工書

陳政字香山工山水尤擅白描得唐宋人意嘗作徑寸西湖圖五十二幅進御

劉澤字友宗畫墨梅老幹疎花生動有致自號雲溪居士子岱松字勁齋又字五峯工墨梅蟲魚瀟灑脫俗題詩有天趣年八十餘卒岱松子古歡亦工草蟲年九十餘卒

僧人鳳字石菴俗姓吳為前明文端公後裔棄家為僧居天寧寺水月房能詩工畫花鳥錢文敏公維城其從母兄弟也每見其畫輒喟然曰此人不可與爭名故文敏晚年惟畫山水不復作花鳥云

徐體劬字近思工山水及寫意花卉官至直隸保定府通判孟勤

乙字麗堂周永瀚字香浦皆善畫山水

畢涵字蕉麓工山水掃去塵俗遠宗古法晚益蒼潔入勝書亦清  
勁脫俗子用霖畫山水亦工霖弟簡字仲白山水得家法兼善寫  
意花卉咸豐十年城陷賦詩投水死年八十涵女昇工畫梅及花  
卉女士韓桂字古香少從涵學得其秘楷法學靈飛經又善琴得  
錢塘李王峰之傳

余彤字右賓號子山府學生性磊落喜畫竹題詩皆有寓意嘗館  
行聖公府高宗見其畫善之遂名聞天下朝鮮人亦珍之年七十  
二重游泮宮至八十餘卒

錢維喬字樹參號竹初尚書維城弟乾隆二十七年舉人官浙江  
鄞縣知縣有政聲早歲為維城代作畫即能亂真中年後筆尤蒼  
厚文辭博瞻兼工書法年六十八卒兄子中鈺字守之官中書書

畫俱工年三十餘遽卒族子履坦號素園忼爽磊落畫山水以維  
城維喬為法後乃專寫生尤工畫梅筆墨高雅詩亦清氣橫逸後  
有名秋江者工赭色山水

戴維崑字九煙善畫山水弟維崙亦善畫早卒

彭澤字柳西家貧授徒養父不給遂學畫深入古法性澹雅敦友  
誼

史策字紀庭性高澹善畫山水兼工詩精篆刻

汪文煊字竹可工畫蘭竹

吳恒字立方畫山水花木人物

管垣字薇院品學純謹善畫尤工花鳥子綬字琴軒傳其筆法壽  
至八十餘

陳鏞字淶晴善畫山水法王原祁王翬得其神趣嘗任粵畫幀能



典質得金晚尤名重鄉里年八十餘卒同時畢松董旭皆擅長山水而名亞於鏞

呂光復字雨純號石農乾隆四十五年召試舉人授內閣中書善山水又有名星垣者字叔訥直隸贊皇縣知縣山水學徐渭兼工詩詞

廉澳字竹賓別號竹里村牧又號陽湖漁隱工寫意人物雖徑丈巨幀援筆無懦色豪於酒酒酣輒笑不止人目為癡癡即自號癡癡道人澳與李淦同即宜興羽士潘元仁淦字聽濤澳子準畫人物山水皆古茂尤善墨龍

李述來字紹善畫墨梅枝幹花圈依古法用濃墨近時畫家罕得其意

羅琦字藝庵工畫於寫真尤肖純以淡墨鉤勒不事顏色烘染年逾八十卒子黼字念劬工花卉合白陽新羅為一家

朱文嶸字竣三由舉人官興化校官畫山水蒼茫渾厚兼工書法趙學徹字季由號蓉湖嘉慶四年進士由御史出守湖州襟韻蕭遠工書索者沓至乃畫蘭以應之得其畫乃彌喜然不多作子京錫官直隸靈壽知縣亦工書秀勁肖歐陽詢

陳峻字石庵工寫真兼善山水人物花鳥簡老秀逸不名一家屬吳門道院垂三十年年七十餘卒

楊士昕字劬起嘉慶間舉人官直隸寧津縣知縣罷官後寓居保定工詩文畫花果揮灑有致

楊振字蕉隱畫工小品自寫瀟湘別館圖氣韻悠遠工詩詞古文其書法勁秀在歐褚間平生多所撰著

鈕吉越字省軒居新塘鄉道光間以寫真名凡所識面或他出或

歿背撫神似

吳咨字聖俞為人短小精悍年十四立錫澄上作篆書勁老有法及長四體書皆工善畫花卉魚鳥生動流美取法惲格而運以己意刻印尤精官山東鹽大使到省旋卒弟倣字子仁亦工篆刻惲秉恬字潔士號梧岡敦孝行好書畫初寫竹後專畫山水沈雄娟秀道光元年舉孝廉方正

王光裕善畫山水蒼秀入古

湯祿名字樂民副將貽汾子官兩淮鹽運判貽汾工畫山水祿名則以花卉果實擅長秀潤欲滴尤工美人古粧大雅為世所寶年七十餘卒弟綬名字壽民工墨梅花楸名字右氏官廣西巡檢畫花卉蔬果均工貽汾妻董婉貞及女嘉名字碧生均善繪事嘉名尤工白描人物

湯鏗字東笙負才氣累試不售援例為山東知縣工行草書善畫

花卉風枝露葉生態逼真

丁嘉植號琴涵善畫山水學婁東諸王而稍變其法有小卷湖圖

為時珍賞

劉灝字粹甫由軍功官湖南通判解餉至貴州以勞卒詔賜卹灝工繪事畫山水蒼勁有神花卉娟秀歷久絹素如濕

王光祿善山水工寫兼長蒼秀入古

朱青立字昂之號津里善畫山水出入宋元於董其昌尤深造有

得書亦似之所居殘帖廢畫叢積几榻聞人有秘蹟不遠數千里

借觀故能薈萃衆長發研韻於筆外間寫花卉梅竹蘭石亦清逸

超脫弟淵字起貞初法惲格畫花鳥後棄去專作山水以兄為法

亦有名於時



曾圖南字纘豐號翠亭本籍福建上杭遊於常遂家焉善畫人物學於閩人李燦燦上官周高第弟子也圖南得其傳性嗜酒興酣落筆妙擅一時

屠壩字東垣少能文府縣試皆冠軍未獲入庠遂憤棄舉業習畫山水以董巨為法墨采沈厚望之涵然間作花鳥亦清勁別致全銓字宗英號天慵昔一目少為羽士於東嶽觀後返服依寺僧以居好畫敗荷尤善淡墨松竹與馮龍濤及僧澹涵友善澹涵能詩所畫墨龍風雨上下具咫尺千里之勢魏士鳳字伯起自號采蘭生畫花卉翎毛涉筆秀雋尤喜繪朱藤每作必有題詠間寫山水家藏名宿畫幅甚富汪彥份字回生湖北同知擅長考訂金石善篆隸尤精繪事所畫花鳥草蟲附色古雅山水取法宋元而折衷四王堅凝朗雋款識

亦美秀

湯世澍字潤之監生工寫生畫態極妍鮮艷若活繪牡丹花神韻獨絕光緒二十年慈禧太后萬壽院撫沈秉成屬畫百花屏進御頗蒙嘉賞由是聲譽彌著弟世晉直隸知縣亦工花鳥蟲魚謝杰字叔年與世澍同學憚格法以畫花卉知名謝陽字蕙庭師世澍及杰畫花卉得其傳兼善山水墨龍又長篆刻同時劉弼宸字子良廣東碧甲場鹽大使少與世澍友善切磋工折枝花卉劉承德字子修亦以憚派花卉稱

李芳字信甫官海州教諭工詩善書於畫山水尤善有高閣蒼厚之致間寫梅竹亦古勁卒年七十七  
江鑑字與春初工花卉翎毛後致力山水體格老蒼能不落前人窠臼畫鬪雞尤有名

趙宏字子欽善畫山水蒼渾沈著

楊光暄字仲暘幼穎慧試習畫落筆即超絕工山水清微澹遠畫

中有詩以幕勞保直隸知縣年甫三十八遽卒識者惜之

惲彥彬字次遠晚自號樗園同治十年二甲一名進士官工部右

侍郎學行醇潔立朝多建白光緒二十年視學廣東任滿值朝議

變政彥彬憂之乞假歸工分隸書尤善折枝花卉靜逸絕塵得其

家法年八十卒

陳烺字叔明晚號潛翁又號玉獅老人邑增生援例為浙江鹽大

使耽吟詠善詞曲尤工山水

黃山壽字旭初別號旭道人善畫於人物山水花鳥均妙造自然

尤精繪墨龍僑寓上海以畫自給名重一時

張耀字兆星號燮安善畫仕女為人寫真酷肖兼工山水花鳥蟲

魚

陶鎔字寶如縣學生河南臨潁縣知縣入民國任財政部秘書善

畫人物山水花卉逼肖古賢尤長於畫松墨采蒼秀又工篆刻

費念慈字此懷號西蠡光緒十五年進士官翰林院編修為人超

邁博洽書法出入歐褚尤善畫山水疏秀入古花卉亦艷雅拔俗

念慈嘗典試浙江劾罷寓吳門考訂金石書畫以賞鑑精審著名

陳欽字叔卿縣學生居潞城鎮迭客湖北督撫幕善畫山水神采

靜雅入有明文氏之室得者珍之兼善醫

高企辛字思召福建同知能草書尤工山水

汪九齡字節香以惲法畫花卉兼善人物墨龍族人汪晉字逸亭

畫魚藻栩栩如生

屠兆熙字秉慎性至孝母喪未數日以毀卒善畫沒骨花卉



汪鑄字治堂工花卉人物嘗戲作蝎子刺鍾進士圖見者稱絕  
蔣維翰字克莊性曠放重氣誼善畫蟲魚花鳥非友好不輕作好  
飲晚得腳氣疾父喪以毀卒

張誥字毓慶別號觀我生兀傲不羣多藝能工四體書精篆刻能  
詩善度曲手製渾天儀星球日晷又諳皇極經世學其於繪事尤  
精所畫竹石梅花水仙氣韻空遠出人意表平生好遊覽每值山  
水佳處出袖中笛吹之旁若無人其風致可想

談隽字秉耀善畫人物山水花鳥蟲魚又工書法為人好行其德  
鄉里稱之

張容萬字經林縣學生工書能詩善畫蟹性又嗜之索畫者輒贈  
生蟹以易傳為韻事

吳鎬字夢周自號笠澤漁隱善畫花卉草蟲尤喜繪蛺蝶

陸鏞字麗生善畫花卉

王采蘋與妹采繁采藻均善畫采蘋尤精八分書有寒柳詩甚工  
左錫蕙字晚香安姚愷元室善人物花卉俱超妙入神妹錫璇  
錫蕙工花卉竹石有秀致

何禕字織影山水雅淡李鈺字如瓊工花卉沈粵繪蝶生動

袁輻字韻珊陸軍部主事憚寶元室能詩善花卉韶秀如生寶元  
殤輻以身殉詔予旌

法徵麟字仁源高祖世美以醫學傳家徵麟學有本原洞見癥結  
有母子病將革鬻婦婦慟絕不去鬻者率眾大噪徵麟入按脈曰  
不死也吾藥之立起出語噪者曰活人妻律得娶耶蠲己資償之  
去母子病皆瘳弟公麟字丹書亦業醫有神效時以所得濟貧乏  
尤為知名徵麟子謙益字坤行復字中行學山字景行謙益長子

雄字振和次震字致和俱有聲於時雄子綱字孟容有神悟言簡指遠綱子弼字淮封治時症奇效診脈決死生不爽弼子文沅字政甫嗣業早卒文沅諸子皆有稱而長子某字子厚尤敏妙復子鼎字汝和學山子恭字瑞和寬字養和信字協和惠字心和惠子履端字啟元於醫學皆有論撰故世醫推法氏子孫

丁天吉字若衝縣學生少有文名於醫術尤精幼科知府于琨題其門曰保赤國手貧者疾甚當用參天吉隱置藥中弗告也著醫書十餘種里黨傳寫珍之

邵文卓字向如善治小兒痧痘臨變症用意逆之皆立效年八十卒姪企宗亦以幼科稱

張聖源字宗發父魯玉以醫名聖源世其業善用清和理氣之劑頗奏神效

蔣斌字良佐善醫決死生多奇驗張某疾已劇斌診之曰所患即瘵十年後疾發當死徽賈某以微疴就診斌曰二十日後不起矣可速歸後昏如所言斌輕財好施嘗泊臨清值大旱流亡集水次人給青蚨三百囊金數百立盡遇海寧周某傾蓋歡甚知其壯未娶立挈六十金畀之其豪邁率類此

薛益字爾謙號聽江擅長技擊通奇門遁甲於醫術尤多奇效貧者不受值復給以藥兼工書得聖教序神髓

錢維岳字清時父子錄以幼科名世維岳孝事繼母撫弱弟孤姪成立精醫理貧者不受謝轉調卹之從學者皆使指其業嘗糾同業設局小茅山送診施藥歷久不懈乾隆季年歲大饑病者枕藉於道維岳往為遍診給藥全活甚衆子師仲字五臻孫鳳吉鳳彩俱以醫世其家



周清漢字繼南性孝友業醫尤精外科貧者轉給藥餌舟車費無  
論貧富遠近有請必往風雨泥塗弗恤也湯溥字文金亦以醫知  
名  
江日新精醫術嘗製膏丹與人不受值樂善好施至老不倦  
潘若雲精瘍醫能續斷筋折骨刀圭皆珍品神效貧者酬以金不  
受  
魏元字應乾父璿好義樂施稱長者元性好學泛覽百家至內經  
素問諸書慨然曰人生貴有用此亦可以濟世矣因精其術踵門  
求醫者日衆痼疾奇證無不應手瘡乾隆五十年大饑元家有米  
數百斛首出平糶生平於親戚里黨周之恐不及比鄰大者再而  
元居無恙人謂種德活人之報云子襄早貴自有傳次子衷及外  
孫法楚藝皆能傳其術

劉逢源字近松縣學生親老多疾遂精於醫乾隆五十年大旱逢  
源倡浚南北渠董理捐振明年大疫逢源力為診治多所救濟  
鄒澍字潤安性孝居喪哀毀骨立家貧刻苦自勵於書無不窺隱  
於醫以自給道光元年詔舉山林隱逸有議以澍名上者固辭乃  
止澍通知天文推步地理形勢沿革詩古文亦卓然成家不自表  
襮所著多醫家言世遂第以醫目之

李衍昌字龍標幼孤孝母精研醫書卅餘年嘗言內經為明道之  
書本草為載道之書晚益進天時人病能預知之周氏婦脹脹經  
年曰蠱疾也下蟲數升而瘳錢氏子勞證曰滋陰降火之技窮矣  
古人有養脾陰法宜用之病果瘳子熙字青原能傳父業  
馬永隆家貧十五歲喪父竭力事母撫兩幼弟成立精醫術不索  
酬貧者贈以藥卒年八十六

金溥字韓城縣學生書法蒼勁善醫註仲景傷寒論嘗以醫金易鄰村木橋為石至今賴之

石公懷世以醫名公懷遇危急證每用重劑奏奇效周相宸幼業儒讀醫書遂精其術能治人所不能治者

費公宣精醫術遠近稱之生平好施予尤篤友誼

揚時泰字穆如居家孝友人無間言好讀精究醫理治病立方多為時醫所不解以舉人官山東署莘縣事未踰年卒

蔣國佐精醫知府駱鍾麟子病黃疸莫能治國佐呼詢乳母知三歲時嘗食池邊螺數枚投以鴨涎下血裏一螺霍然瘡里有產婦

死將葬棺薄流血國佐曰血鮮婦可活以鍼刺婦胸得蘇產子又牛觸牧童腹腸盡出國佐洗以米泔納其腸敷藥得不死

黃德嘉字瑞峯能文章通技擊尤精醫遇痼疾輒能起之

湯洪字錫三世業醫至洪藝彌精孝事母撫養孀嫂幼姪有恩四

世同居為鄉黨所重子經邦字德宜能承家學每診視立方藥不過數味服之立效好行其德有父風

徐允升字南洲監生善醫姪婦臨產病角弓反張危甚允升曰此子痼也朝發夕死夕發朝死惟初服羚羊角次服川連胎下後服

參蘇飲始可活服之果然族孫傳揚身面發頰舌脹不能言允升曰此虛陽上浮陰極似陽也以熟地八兩肉桂二兩灌之一夕瘳

賀氏婦腹脹服桂附後如坐堅冰允升曰此胎氣也子死已久今口舌皆青難治矣投以淡豆豉二兩芸臺子倍之婦大顛下膿斗

許獲安值大疫允升已病曰吾不食新穀矣杜門謝客眾固求之勉一出為立方附加減法活數十百人後果於秋分前卒

惲熊字亨時監生屢試不售乃業醫值大疫禱關帝求助帝見夢



於廟祝凡熊所投藥立效疫竟止時稱熊為仁醫  
毛鳳彩字羽豐精幼科痘疹全活甚廣子荀一字人龍承父業不  
苟言笑日記功過以自省能詩孫景昌字介侯幼學幼科後習方  
脈洞徹醫理危症輒奏奇效

杭朝棟字棲霞縣學生父用久習外科朝棟益精其學善鍼灸常  
集奇方購佳藥神效子煥字裕垂郡庠生亦通醫學承先志施藥

濟人黃述曾字穎夫父雄文品行為鄉里推重述曾少業儒因母疾改

習醫曰以寒士而得濟人者莫如醫吾且濟人以延母壽乎道光  
元年邑大疫述曾治之立效不取值竟以勞瘁卒

吳仲山父雲上世業醫於外科尤精得異傳能識別草木所用藥  
類非經方所載俗呼為吳草頭長子斐有神悟早卒仲山嗣父兄

業而名益顯癰疽巨毒得膏藥一痛即止求診者日百數十人仲

山手量刀圭口占湯劑所指授一一奏效坐是致富捐餉得二品

銜壽至八十餘有子能世其業他醫多記名門下獵聲譽云

莊一夔字在田湖北荆門州吏目精幼科嘗病俗醫治小兒熱邪

驚風動以寒涼表散致死因著福幼編又論治痘及治疹俱忌寒

涼消導著遂生編其治小兒危症予藥一二劑即瘳大要長於溫

補湯伊勳字孝思精婦科嘗冬日詣玄妙觀遇異人四五席地酣飲

指顧間忽杳地遺鮮荷葉一柄訝而携歸會大疫伊勳每診一人  
即摘葉少許與作引無勿瘳者翌日缺處復圓如故競傳其家有

靈藥云孫隆誼曾孫述高玄孫向宸均克傳家學述高以事親孝  
聞向宸於民國初由政府給予青囊世守額

劉遷字立齋善醫虛心切問值疑險與衆醫議方不執己見反差不為己功嘗館於鄉積金數兩而歸塗聞一婦哀哭詰之則欲自嫁以葬夫不忍舍子女也悉所有畀之俾全節

馬省三字吾庵善針灸以瘍醫名

費岳瞻字曉峯精醫貧者贈藥餌諸子世其業岳瞻以飽食車行磕石腸絕歸使諸子脈之皆言無疾獨五子文紀泣曰腸壞敗徵見矣岳瞻因救諸子無以醫誤人傳吾學者獨紀也悉以秘方授之文紀年二十為醫至七十四卒

謝士鰲號鶴園善醫術能聞聲辨人死壽其治痘藥最驗年八十疾亟救舉債券焚之孫應材字遂喬曾孫寶善字東揆醫學並精應材尤善治外科

費伯雄字晉卿增貢生世醫文紀子按脈即確知病所由決人生

死夭壽不爽其方藥主培養靈氣不用峻劑創為輕藥重投法奏效如神吳太守寶儉得奇疾凡接所御之物物即與言甚至詈罵疑為邪崇伯雄診之曰肝主藏魂疾火侵肝陽升無制則神魂飛越附物而言投以清火豁痰潛陽鎮逆之品數日旋瘳陳氏婦分婉訖忽有瑩白骨針出觸之奇痛伯雄令濃煎黑料豆四兩服之須臾針即落下人問之伯雄曰症因受孕後房勞過度致精氣凝結黑料豆能益腎腎氣布則針落也性好施與應變有膽識道光間洲濱苦潦伯雄力為捐賑躬歷各洲勸築隄自衛咸豐三年太平軍據江寧鄉民劉明松聚衆抗糧當道將遣兵往勦伯雄詣郡以全家立保狀歸說衆令散事得解孫承祖字繩甫恩貢生由伯雄親授醫學少侍診日必百數十人入夜篝燈背錄於方案藥量不訛一字伯雄喜謂得傳人迨伯雄歿承祖繼業求診之衆與伯



雄時無異所治多應手瘡立方不盡拘成法得力於生理氣化為多光緒二十四年詔徵海內名醫兩江總督劉坤一欲薦承祖應徵因母老力辭性篤孝嘗刲股療伯雄及父應蘭疾承祖弟榮祖字哲甫亦善醫

沈守倫號曉峯善醫治疾輒效言人生死無不驗避兵江北時周卹親故尤至

劉承模字靜楷潛心醫學博究諸書行術數十年不受謝惟飲一茶令人釋念卒年八十三

馬文植字培之孟河世醫少承家學內外科並精候色驗眉膏盲洞達凡奇險毒惡沈痼隱秘疑似怪異各症經方所無而羣醫瞠

目束手者文植治之輒瘳以是名震遐邇赴診者如歸市門下士得其一長即知名於世光緒六年慈禧太后不豫詔徵天下知醫

者蘇撫吳元炳舉文植應詔入京九月病瘳賜務存精要匾額賞

白金文綺以歸子翼庭字亦亭安徽鳳陽縣知縣亦以醫著名

余汝達字伯初父敏求善醫汝達承家學博覽精思乞診者塞戶

鄰婦病傷寒已氣絕汝達灌以藥而甦逾八年始卒族姪鼎勛患

傷寒七日不省人事汝達診之曰雖壯熱而脈虛用台參鬚二錢

煎服病漸轉續進他劑即瘳其他多此類名盛一時

錢育萬號心坦祖鳳彩父耕方均以幼科名育萬幼孤孝事繼母

承家學名聞江浙間俗有錢仙人之目時鄉人避外者多患痢惟

育萬所治皆瘳叩以故則曰今歲之痢由受驚傷腎治必從其所

傷也有幼孩頷下生癰潰即穿喉不救育萬數以藥一日夜移左

寸許再以藥攻潰尋瘳瘍醫驚以為神弟雄萬字心榮亦以醫知

名

鄭光澤號湘溪幼孤家貧習藥業肆主吳仲山業醫見光澤勤敏授讀醫書積數年盡通其術嘗代仲山診病效與之同遂業醫求診者戶內外皆滿他醫束手者光澤治之輒起或計無生理則繞室徬徨夜不成寐曰吾求其生不得耳為人性孝友好行其德弟光泉傳其學

朱兆綸字紫衡縣學生穎敏強記讀書過目不忘博通經史工舉業鄉闈六薦不售乃業醫所治輒效診暇輒手一編不輟嘗言醫之為道首重養生兼以濟人後之人或託為業或流為技曰世醫曰儒醫曰名醫時醫名愈尊而真愈失豈有立品不端讀書未精而可與言醫者有識以為知言

孫維屏字杏江號仁溥從吳仲山遊吳尋歿歸取醫書搜討學大進試診皆應手瘡會秋疫所治輒效名大起嘗撰醫通一書首采

靈素以下各書精要以溯醫學之本原次則論五行四序六氣以洞究疾病之變化終錄古今成方見證為之發明以見病情藥性之嚴確草創甫竟遽病卒

毛鉞字紫庭附貢生潛心醫學出診必戴笠跨馬荷錢囊歸途散之貧者以是惠聲四布家無餘貲有欲執贖門下者悉拒不納曰先通文乃可學醫而鉞自以儒醫著聞

諸大藩承家學以醫行世善審病用藥不青報不計值周施樂善見稱里黨

張熙載字蘭祥歲貢生善治溫病遊湘鄂活人無算蘇藩司陸鍾琦嘗延主省會官醫局

童克敏字傳德世業醫克敏敬承家學尤長幼科於痼疾奇證治之立瘳同時王邦獻亦善幼科



巢龍章字沛三業醫精內外科時同里費馬二家名震全國龍章後起而聲譽相亞子搏九字圖南能世其業

姚鏡湛字蓉第附貢生善醫傷寒

劉鷄字雨人縣學生好醫於各醫家書無不窺值重症用藥輒以

重劑往往轉危為安自謂得張長沙心法

屠坤字厚之為費伯雄高足弟子長於病久調攝於醫書深奧處

恒有發明

陳鐘奇字毓真號夢漁幼孤事母孝因患臌脹遂棄儒習醫其學

原本張長沙而外最服膺西昌喻氏昌邑黃氏為人視疾一以經

旨為歸值有疑難必窮思博討

馬荷安字致和家世業醫性仁厚藉醫為惠時稱善士姪希融字

紹成孫日初字旭然皆能得其傳術施診給藥有祖風

徐鴻藻字壽民品高眾醫踵門者入坐即診出診者聞召即至數

十年如一日有張氏子患痲痧危甚鴻藻診治獲生其家製贈聯

額鴻藻却之曰醫以濟世徒博虛譽何益

金亮疇字贊卿縣學生咸豐間郡城陷避亂江北與名醫任大綱

同寓古寺大綱針法得秘授不輕傳人見亮疇誠篤具以教之後

遂為郡城針科之冠終身齋食好行其德焉

林純慶字潤卿少孤孝母於醫精內外科而治喉尤勝李姓婦患

喉風更數醫僅餘一息純慶曰雖危尚可救針藥並用竟瘡侍郎

惲彥彬題其室曰今之華扁

曹雲濤字懋齋幼喪父事母以孝聞嘗因亂避廬泰興釀資倡設

粥廠蘇撫喬松年間其名委辦泰興善後局施醫給藥會天花盛

行以雲濤知醫尤善種牛痘因飭設局勸種全活嬰孩無算亂平

歸里蘇撫又札飭知府禮聘雲濤設局於育嬰堂勸種牛痘其後功效大著而造端自雲山始且勸導之功為多

張景和醫術至工性通悟多秘方然世鮮知之者以貧瘁終

丁澤周字甘仁從馬仲清學醫術盡得其傳最致力經方嘗謂衄吐下血見黑色者宜附子理中服涼劑則死風水身腫宜麻黃附子細辛服利劑則不效性好施急公光緒間濱江迭被水災澤周捐贈數千金倡設義塾及施醫局民國初設廣益中醫院於上海復立男女中醫校各一政府嘗給以博施濟羣額年六十二卒遠近惜之兄相縉字培林亦知醫早卒

沈先藩字維屏幼聰悟能以手捫絲而別其色稍長入上海中日醫學校卒業最優等第一授醫學士歷充軍醫長主無錫大同醫院事所治應手立效卒年四十五弟瑛亦善西醫

錢福連一名鶴生陳國均字秉之附貢生馬冠羣字良伯縣學生巢廷堅字伯衡張新字有銘附貢生辛啟尹字聘三均以醫著聞揚文言字道聲幼有神悟通歷算尤明習幾何耿精忠藩下人聘為幕客亂起被羈清兵至得出聖祖嘗問其人於李光地對曰杜門高蹈李顥之流文言多所論著其南蘭陵紀事詩若干卷尤關地方掌故

龔仕燕字武仕少穎異能文講求性理發明蔡氏律呂新書推行黃鍾圖徑開方密率諸法而於元太史郭守敬授時曆尤得其秘如求冬至時刻如推晦朔弦望如赤道變黃道均經仕燕引伸而益其餘月離五星等法與回回西洋諸曆無不洞悉疑難至日月體徑有大小交食限數有淺深亦具見其奧且悟唐順之孤容直闕法自是一應七政氣朔交食諸端按法而推百不失一與毛貽



哲揚爾京揚道聲徐紫威往還講論康熙六年詔募天下知曆之士仕燕入都詔在觀象臺測驗仕燕據七年所測表影推測太陽盈縮又據日測五星行度遲疾彼此推求加減轉交諸應測驗皆與天合其法亦本郭守敬初漢監正揚光先崇信大統曆繼復欲用回回曆仕燕示以授時七政光先心折焉監正交章保薦八年曆書成奏對武英殿授曆科博士時有薦西洋南懷仁利類思安文思三人者其術既驗且捷遂定用西洋法而古曆不行十年以疾歸

項森字木林通中西曆算星學幼即究心邵雍皇極經世書年八十一乃悟其加盈差之故以驗易緯及天官太乙諸家之術遂著經世書論六章發明元會運世用易數曆年表用曆數之體藏曆數之用言約理賅世多神其選擇時日而未知其精微如此

孔璞字豈凡縣學生通曉曆算準步天歌取經緯星度依十二月為十二圖又以五夜躔次分為五圖中夜覘察尤精奇門遁甲嘗逢遇一人謂曰子有大禍速歸毋出戶其人歸憂懼潛至璞所求救璞見驚曰子母來禍且立見是日為仇家殺於途璞兼習兵法酒酣放言滿座傾動

唐本銓字仲襄縣學生幼孤力學博極羣書尤精天文占驗每年雷始發聲及陰晴水旱言之無不奇中病咯血卒所著書未就人咸惜之

湯洽名字誼卿布政使雄業孫生而穎慧師張惠言通古學兼明天官曆數風角星算遊京師以算學考取天文生因母老歸又工六壬自知死日葬期黏課於壁既葬始見其課所言皆合王振采號繭易翁貌清癯性狷介精六壬

謝震字墨卿居昇西鄉瞽目精六壬占多奇驗城醫陸鳳起失幼女詣震占之震約三日來取課及期往則與一圖為村落掩隱樹間曰若女命在金火旁西南行得村如圖至第一家求之即得女矣如言往得某村冶鐵家女方在鑪旁掩泣他多類是子禮耕字蓉芳能繼父術目亦微眚有客往占校官得缺期禮耕曰若年四十二當得署任其象多水當在水鄉且曰吾與君不復相見客訝之答曰數不能逃也踰兩月禮耕果卒客如年署崇明教諭正在海中盛久常字仲恒魏企垂皆精六壬能自刻死期禮耕子錫藩縣學生工詩文幼承家學精星命六壬射覆諸術語多奇驗盛久肇字孟谷七歲目瞽性聰慧知書工小詞善葉戲以手捫即得其數能修整刻漏鐘表取鍼芒分置器中揩拭已次第上之無差布帛撫以手即辨美惡及色工吹笛度曲及六壬數學並精絕

人亦慷慨好施篤行誼避地困厄卒於京

董達存字華星乾隆十七年進士授國子監助教告養歸家傳有青囊書達存精其業決休咎奇驗人爭致之過所不可夷然不屑也性慷慨和易所得餽贈建宗祠置祭產餘以贍貧乏時建普濟堂達存捐金倡焉

葉楷字蔭初縣學生習堪輿家言通究原委答辨不窮同時吳適大字公求為人孝友直諒亦精堪輿論休咎輒驗僧慧蒼出家鐘樓寺善琴不為時調邑中多從學者

蔣寶三字惟善性閒適不慕榮利善鼓琴能以古調發其新聲張履照字倬雲從寶三受指法著琴學述以明師說尤精賞鑒能為小詩

吳一諤縣學生落拓不羈坐事褫革坦然也篆刻古雅兼工詩又



鄒	高	隸	皆	張	河	擘	鴻	祝	不	趙	蔣
嶧	尚	碑	全	揖	工	窠	勛	鴻	奏	穆	烈
先	正	版	篇	如	勞	大	軌	勛	刀	原	卿
字	字	及	細	精	存	字	以	字	也	名	工
元	蘭	刻	入	刻	保	尤	吻	禹	書	垣	象
煥	泉	雜	毫	聚	知	精	吮	枚	畫	字	牙
年	奕	竹	髮	頭	縣	篆	接	晚	亦	仲	章
十	稱	器	捫	扇	旋	刻	而	號	工	穆	獸
三	國	皆	之	骨	歸	古	出	虢		一	鈕
四	工	工	有	其	里	茂	博	勺		號	極
即	年	絕	稜	文		通	學	山		老	巧
以	九		每	如		勁	多	人		鐵	毛
奕	十		柄	前		兼	藝	性		善	漸
名	餘		值	後		勝	能	至		篆	達
游	耳		百	赤		於	通	孝		刻	亦
京	目		金	壁		篆	醫	母		貧	工
師	猶		而	賦		學	卜	苦		不	篆
公	聰		成	北		多	星	疾		治	刻
卿	明		必	山		所	相	塞		生	家
爭			數	移		論	堪	每		非	藏
延			月	文		撰	輿	黏		素	碑
致			又	歸		嘗	家	滯		友	版
與			善	去		以	言	唇		雖	甚
過			摹	來		山	善	舌		兼	富
百			篆	辭		東	作	間		金	

楊	仕	史	禹	董	誠	屠	齡
浚		恩	門	文	樸	耀	盛
字		絳	以	毅	不	采	逢
懷		字	名	字	修	性	聖
瑾		叔	族	鹿	邊	伉	同
究		和	諸	泉	幅	爽	稱
心		性	生	道	人	工	
星		疏	博	光	目	奕	
命		放	學	時	為	好	
六		善	工	稱	癡	遊	
壬		奕	文	國	而	江	
諸		昆	又	手	奕	南	
術		仲	以	汪	特	北	
尤		皆	奕	在	工	罕	
精		以	與	豐	年	有	
象		宦	在	沈	少	匹	
棋		學	豐	德	於	者	
推		顯	德	隆	曜	同	
為		恩	龍	次	采	時	
合		絳	相	之	而	宣	
郡		獨	頡	同	名	汝	
第		高	頡	時	與	庸	
一		蹈	頡	劉	埒	字	
手		不	頡	偁	字	良	
				字		五	

宜山字後漢  
許汝方字子宜